













# সহসାତ୍ରୀ

শ୍ରୀମণীন্দ୍ରଲୀল বসু

ডি, এম, লাইব্রেরী  
কলিকাতা

প্রকাশক—

শ্রীগোপালদাস মজুমদার

ডি. এম. লাইব্রেরী

২২, কণওয়ার্লিস স্ট্রিট, কলিকাতা

১৩৪৮

দাম আড়াই টাকা

মুদ্রাকর : শ্রীপ্রভাতচন্দ্র রায়

শ্রীগৌরাক্ষ প্রেস

৫, চিত্তামণি দাস লেন, কলিকাতা

শ୍ରীঅন্নদାশঙ্কর রাय

प्रीतिभाजनेषु

এই উপন্যাসের নরনারী চরিত্রগুলি ও  
ঘটনাবলী সম্পূর্ণ কাল্পনিক ও অমূলক।

সহযাত্রী

শ্রীমণীন্দ্রলাল বসু লিখিত

উপন্যাস

রমলা

জীবনায়ন

ছোটগল্প

রক্তকমল

সোণার হরিণ

কল্ললতা

স্বাতুপর্ণ

ছেলেদের বই

অজয়কুমার

সোনার কাঠি

ডি এম লাইব্রেরীতে পাওয়া যায়

## সহযাত্রিনী

হাওড়া ষ্টেশন :

পাঁচ নম্বর প্ল্যাটফর্মে বোম্বে মেল দাঁড়িয়ে।

সাড়ে সাতটা বেজে গেছে। নানাবেশী নানাভাষী যাত্রীজনতার চঞ্চল বন্যা বৈদ্যুতিক আলোকমালার তীব্র দীপ্তিতে অর্থহীন অদ্ভুত মূর্তিশ্রোতের মত। হাঁকাহাঁকি, ঠেলাঠেলি, ছুটোছুটির অন্ত নেই।

ষ্টেশনের এই জনতার দিকে ক্লান্ত চোখে চেয়ে কল্যাণকুমার ঘোষ পাইপে তামাক ভরলে। ইংলণ্ডে সে যে তামাক খেত সে তামাক সে অনেক খুঁজে ষোগাড় করেছে, হিসেব করে খরচ করতে হবে। কিন্তু তাড়াতাড়ি ভরতে গিয়ে খানিকটা তামাক প্ল্যাটফর্মে পড়ে গেল। চারিদিকের ভিড়ে কোলাহলে তার মাথা ধরে গেছে।

কল্যাণ সন্ধ্যাইংলণ্ডপ্রত্যাগত বেকার যুবক। ইয়োরোপীয় জীবনের রঙীন আভা এখনও তার চোখে লেগে আছে সুখস্বপ্নস্মৃতির মত। প্যারিসের গারু ছা নর্ডের জনতার রূপ তার চোখে ভেসে উঠল। সে জনতার উবেল তরঙ্গলীলার যেমন একটা ছন্দ আছে তেমনি রঙের ঝলমলানি, ইম্প্রেশনিস্ট চিত্রকরের চিত্রপটের নানা বর্ণের ছোপের মত। এ জনতার গতি অসংলগ্ন, বর্ণের বৈচিত্র্য বা উজ্জ্বলতা নেই।

পকেট থেকে ছোট্ট ঝকঝকে লাইটার বাহির করে কল্যাণ পাইপে অগ্নিসংযোগ করলে। ছোট ভাগ্নি দীপিকা পাশে দাঁড়িয়েছিল, আইস-ক্রীম বিক্রেতার গাড়ী কাছে এলেই ডাকবে। ঝকঝকে ছোট্ট-দেশলাই



দেখে সে লাফিয়ে উঠল। এমন আশ্চর্য্যকর দেশলাই সে আগে কখনও দেখেনি। একটা কল টিপলে আগুন জ্বলে ওঠে। সে ব্যগ্র হয়ে বলে, রাঙামামা, আমাকে দাও একবার, আমি জ্বালব না, শুধু হাতে ধরে থাকব।

দ্বিতীয় শ্রেণীর মহিলা-গাড়ী হতে জানলা দিয়ে মুখ বাড়িয়ে শিবাজী চেষ্টা করে উঠল, আমি একবার জ্বালাব দিদি!

সরোজিনী ছোট খোকার বিছানা পাততে পাততে ধমক দিয়ে উঠল, শিবু আবার জানলায় মুখ বাড়িয়েছ, দীপা দিয়ে দাও দেশলাই—

দেশলাই পাবার কোন আশা নেই দেখে শিবু চেষ্টা করে উঠল, রাঙামামা ইঞ্জিন দেখাবে বলেছিলে, ইঞ্জিন—

সরোজিনী একটু হতাশের স্বরে বলে, দাদা, শিবুকে একটু ঘুরিয়ে নিয়ে এস, বড্ড গোলমাল করছে, আমি ততক্ষণ বিছানাগুলো পেতে নি।

মায়ের অল্পমতি পেয়ে শিবাজী দরজা খুলে প্ল্যাটফর্মে লাফিয়ে পড়ল। সরোজিনী একটু ভীতভাবে পঞ্চম স্তানের দিকে চাইলে। ছোট খোকাকে নিয়ে সে ব্যস্ত, এদের দিকে মনোযোগ দিতে পাচ্ছে না। রায়গড়ে জন্ম হয়েছিল বলে তার নাম দেওয়া হয়েছিল, শিবাজী। সরোজিনীর আপত্তি ছিল, তার স্বামীই জোর করে এ নাম দিয়েছিলেন, এখন নামের গুণে ছেলেটি দিন দিন দুর্ব্বাস্ত হয়ে উঠছে।

সরোজিনী চেষ্টা করে বলে, দাদা ওদের হাত ধরে নিয়ে যেও, আর আইস-ক্রীম দিও না। খোকা চেষ্টা করে ওঠাতে আর কিছু বলা হল না। সরোজিনী ভাবতে লাগল, বোম্বেতে বোধ হয় টেলিগ্রাম করা হয়নি, দাদা নিশ্চয় ভুলে গেছে।

সরোজিনীর স্বামী বোম্বেতে বড় কাজ করে। কল্যাণ এসেছিল

তাদের গাড়ীতে তুলে দিতে। সরোজিনীর বিশেষ ইচ্ছা ছিল, কল্যাণও তাদের সঙ্গে যায়, কিন্তু মায়ের মনে বিশেষ আপত্তি বুঝে কিছু বলে নি। মায়ের ভয়, বোধে গেলে কল্যাণ হঠাৎ কোন দিন কোন ইয়োরোপগামী জাহাজ চড়ে বসবে। অনেক চিঠি লেখা ও টেলিগ্রামের পর সাত বছর পরে কল্যাণ বাড়ী ফিরেছে। সেজগা জগৎতারিণীকে রীতিমত একটি অস্থখ পাকিয়ে তুলতে হয়েছিল। এখন সে ছেলেকে তিনি সহজে ছাড়তে রাজী নন।

সরোজিনীর দৃষ্টির আড়াল হতেই কল্যাণ তার ভাগ্নে ভাগ্নির হাত ছেড়ে দিল, তারা ছুটে চল সামনে। হন্থন করে সে-ও চল। দ্রুতছন্দে চলার বিলিতি অভ্যাস ছ'মাসের মধ্যেই চলে যায় নি।

পাইপটা হাতে ধরে কল্যাণ নাড়া দিলে। তামাকটা একটু কড়া, ঠিক সেই স্বাদ, সেই গন্ধ পাওয়া যাচ্ছেনা। ভায়লেট এ পাইপ তাকে উপহার দিয়েছিল, আর তিন কোটা তামাক। সে তামাকের স্বাদ গন্ধ কেন পাওয়া যায় না! ভায়লেট! সে এখন কোথায় কে জানে! নিশ্চয় শ্বাসগোতে নেই। দু'মেল তার কোন চিঠি পাওয়া যায় নি।

পাইপ টানতে টানতে কল্যাণ এগিয়ে চল। চেহারা লম্বা নয়, কিন্তু ছিপ্ছিপে বলে তাকে বেঁটে দেখায় না; স্নিগ্ধ গৌর মুখশ্রী; বোধে-বন্দরে যখন সে নেমেছিল তখন এ গৌরবর্ণে ঘন রক্তিমতা ছিল, এখন এ বড় ফ্যাকাসে, ঘসা কাচের মত জোলস-হীন। মুখখানি গোল, এখন একটু ক্লশ দেখায়, পাকা আম শুকিয়ে চুপ্‌সে গেলে যেমন হয়। প্রথমেই চোখে পড়ে খুব ছোট-করে চুল-ছাটা বড় মাথা, ভারী নিরেট ওলের মত। দেখে মনে হয় না, সেই মাথার মধ্যে পরমাণু-তত্ত্বের নূতন নূতন থিওরী, অঙ্কশাস্ত্রের বড় বড় ফরমুলা, জাহাজ তৈরী করবার নানা নব পরিকল্পনা ভর্তি আছে। স্নন্দর সরু নাকের দু'পাশে দীপ্ত চোখ দুটি

দেখলেই বোঝা যায় এ তীক্ষ্ণদী। উজ্জ্বল চোখ দুটির উপর এখন ক্লাস্তির ঔদাস্যের ছায়া এসে পড়েছে, যেমন তার গৌরবর্ণ মুখকান্তির ওপর পাইপের ধূম্রজাল ছড়িয়ে পড়েছে।

কশীয় ব্লাউজ ধরণের সোনালী সিল্কের ডিলে পাঞ্জাবী পরা; দেশী ধুতির কালোপাড় কোচা লুটিয়ে পড়েছে; পায়ে তালতলার নব সংস্করণের কটকী চটিজুতা; বেশের বাহ্যিক নেই কিন্তু স্তম্ভ ব্যক্তিত্ব আছে; বিলাতে দীর্ঘকাল থেকেও সে বাঙ্গালীমানা ভোলেনি।

ইঞ্জিন তখনও এসে পৌঁছায়নি। কি একটা গোলমাল হয়েছে। ক্ষতিপূরণস্বরূপ দীপু ও শিবুকে আইস-ক্রীম খাওয়াতে হল।

ফেরার পথে কল্যাণ প্রথম শ্রেণীর এক কুপের সামনে থমকে দাঁড়াল। পাইপে লম্বা টান লাগিয়ে সে শিবুর হাত ছেড়ে দিলে। গাড়ীর ভেতর রূপবতী বাঙ্গালী মহিলা একা বসে। গজদন্তশুল্ক কপোলের এক অংশ দেখা যাচ্ছে, চিবুকের চারু-রেখা যেন স্তূরে বিলীন, ঘননীল বর্ণের ব্লাউজের ফোলা হাত রক্তবর্ণ স্থলপদ্মের মত। নয়নানন্দকর এ রূপলাবণ্য।

কল্যাণ চমকে উঠল। এ মুখ ত তার চেনা। ওই কালো ভুরুর টান, কপোলের কুণ্ডন, চিবুকের বক্ষিমভঙ্গী, ওই মুখের প্রতি রেখা, ওই অদ্ভুত শুভ্র রঙ, বুঝি তার জানা। যেন কোন অপূর্ণ অজানা দেশে স্বপ্নে দেখেছিল, তারপর ভুলে গিয়েও ভুলতে পারে নি।

পাইপের আগুন নিভে গেছে। দীপার হাত ধরে কল্যাণ এগিয়ে চলে। সরোজিনী উদ্বিগ্নভাবে জানলায় মুখ বাড়িয়ে আছে। চৈচিয়ে বল্ল, দাদা আর গাড়ী ছাড়বার বেশী দেরী নেই, ওদের তুলে দিয়ে গাড়ীর দরজা বন্ধ করে দাও।

গাড়ীতে এক বর্ষিয়সী মহিলা উঠে হাঁপাচ্ছেন। তিনটি ট্রাক, দুটো

বস্তা, গুড়ের নাগরি, চারটে পুঁটলি, তাঁর জিনিষপত্রে গাড়ীর ভেতর ভরে গেছে।

তকমা-পরা এক চাপ্রাসী এসে কল্যাণকে লম্বা সেলাম করে বলে, মেমসাহেব আপনাকে সেলাম দিয়েছেন।

মেমসাহেব যে কে তা কল্যাণ বেশ বুঝলে, তবু আশ্চর্যের ভান করলে।

সরোজিনী উদ্বিগ্ন হয়ে বলে, না, দাদা, তুমি এখন কোথাও যেও না, টেলিগ্রাম করেছ?

পাইপ ধরিয়ে কল্যাণ বলে, এক মিনিট, আমি আসছি, এখনও গাড়ী হাড়তে দেবী আছে।

শিবাজী বলে উঠল, হাঁ, মা, এখনও ইঞ্জিন লাগেনি।

কৃষ্ণ ভ্রলতার তলে আয়ত নয়নের কৃষ্ণতারকার রূপ তেমনি জ্যাতিশ্ময়, তেমনি মায়াময়, তেমনি রহস্যঘন। কল্যাণের বুকের রক্ত লে উঠল। অন্তরের এ অপূর্ণ শিহরণ সে বহুদিন অনুভব করেনি। ইয়োরোপে তাকে একেবারে blase করে দেয় নি। মুগ্ধ হয়ে সে চয়ে রইল।

—কল্যাণ নাকি!

—তাইত মনে হচ্ছে।

—মনে ত হচ্ছিল না, পেয়াদা দিয়ে মনে করিয়ে দিতে হল, ভেতরে এসে।

—গাড়ী ছাড়তে বোধ হয় বেশী দেবী নেই।

—টাইম-টেবিল অনুসারে নেই, কিন্তু ছাড়তে দেবী হবে।

দরজা খুলে কল্যাণ গাড়ীতে প্রবেশ করল।

—ভাই, পাঠপটা—

—ভেরি সরি, মনে ছিল না।

অনেক কথাই ধীরে ধীরে কল্যাণের মনে হল। মনে পড়ল, অনুপমা এখন অতি উচ্চপদস্থ এক ভারতীয় গভর্নমেন্ট অফিসারের স্ত্রী; মনে পড়ল, তামাকের ধোঁয়া অনুপমার সহ হয় না; মনে পড়ল, গলাকাটা ব্লাউজের রঙীন লেসের ফাঁক দিয়ে যে সূচিক্রণ শুভ্রচর্মের আভা দেখা যায়, তাহারি কোমল আবরণতলে বক্ষপঙ্ক্তরের মধ্যে দক্ষিণ ফুসফুসে যক্ষ্মা-জীবাণুর সঙ্গে সংগ্রামের সুদীর্ঘ ইতিহাস গোপনে লেখা আছে। হৃদ-যন্ত্রের ধক্ধক্ শব্দে সে সংগ্রামের জয়ধ্বনি কি অহিনিশি বাজছে। অথবা সে যুদ্ধ চলছে দিন রাত ধরে?

—কি দেখছ, মোটা হয়েছি!

—বোধ হয় হয়েছে, কেমন আছ আজকাল?

—কেমন আছি? বেশ আছি, মন্দ কি, জ্বরটা অনেক দিন হয়নি—  
তারপর, কবে ফিরলে, এসে একটা খবরও দাওনি!

—মা'র অস্থখে কোথাও যাওয়া হয়নি।

—হাঁ, জেঠাইমার অস্থখ করেছিল, শুনেছিলাম, কেমন আছেন তিনি?

—মা'র অস্থখের জ্ঞানই ত তাড়াতাড়ি ফিরতে হল, ঘাসগোতে কোর্সটা শেষ করে আসতে পারলুম না।

—তোমার ত বেশি জে ডিগ্রি হয়ে গেছে।

—হাঁ, তারপর ঘাসগোতে গেছলুম জাহাজ তৈরী শিখতে; খুব সুবিধা পাওয়া গেছিল—

—ভালই করেছ, চলে এসেছ, শুনছি শীগ্গীর যুদ্ধ বাধবে।

কল্যাণের চোখে গ্লাসগোর ঘরের ছবি ভেসে উঠল। কাচের টেবিলের ওপর ককটেলের গেলাস। মিষ্টি ইজিচেয়ারে ভায়লেট এলিয়ে বসে। কি গভীর নীল তার চোখ! আর অনুপমার চোখ কি ঘন কৃষ্ণ! ভায়লেটের বাবা এক বড় পোত-নির্মাতা কোম্পানীর ডিরেক্টর; তাঁর সুপারিশে সে জাহাজ তৈরী শেখার সুবিধা পেয়েছিল। কল্যাণ চুপ করে রইল।

সুদৃঢ়তা ভঙ্গ করে অনুপমা বললে, জেঠাইমা কেমন আছেন বললে না ত?

—মা, একরকম সেরে গেছেন, এ বয়সে এদেশে এর চেয়ে আর কি ভাল থাকবেন।

—দেখতে যাবার বড় ইচ্ছে ছিল।

—কিন্তু অণ্ড নানা ইচ্ছার মত কার্যে পরিণত হয়নি।

—ঠিক বলেছ। আমি যে কি বন্দিনী তুমি জাননা—

কল্যাণ অনুপমার দিকে স্থিরদৃষ্টিতে চাইল। অধর রাঙ্গা হয়ে উঠেছে, কালো চোখ শ্রাবণের জলভরা মেঘের মত আরও ঘন কালো।

—বন্দিনী, মুক্তির প্রতীক্ষায় বসে আছ? এ বন্ধন বড় সুখের!

—ঠাট্টা নয়, কল্যাণ। জান ত সহর থেকে দূরে থাকতে হয়, তবে গঙ্গার ধারে বাড়ীটা বড় সুন্দর, মস্ত বড় আমবাগান আছে, সেই রাজমাহীর আমবাগানের মত—

—বা, এমন জানলে একদিন যেতুম।

রাজমাহীতেই দুই পরিবারের মধ্যে পরিচয় হয়, কল্যাণের মা অনুপমার জেঠাইমা হলেন। তারপর কলিকাতায় সে হৃদয়তা ঘনীভূত হয়েছে। বন্ধু-মহল অনেক রকম অনুমান ও ঠাট্টা করেছে। কল্যাণ হঠাৎ বিলেত চলে যাওয়াতে সবাই বিস্ময় প্রকাশ করেছিল। তারপর

অনুপমা যখন জগদীশকে বিবাহ করলে, বন্ধু-মহল আরও বিস্মিত হলেও, বিজ্ঞ-জনেরা বলে, অনুপমার সংসার-জ্ঞান আছে, যৌবন চাঞ্চল্যে শুভবুদ্ধি হারায়নি। বিবাহের ছ'মাস পরেই ঘৃষ্ণুসে জ্বর আরম্ভ হল।

অনুপমা বলে যেতে লাগল, তারপর জান ত, ওই পোড়া অস্থ, কখন যে তার কি মর্জি হয়, শুয়ে আছি ত দিনের পর দিন শুয়েই আছি। তারপর ডাক্তারদের যদি অনুমতি পাওয়া গেল বাহির হবার, ভদ্রলোকের আর সময় হয় না, কাজ, খালি কাজ,—আর আমাকে একাও কোথা যেতে দেবেন না—খালি কাজ—

—এখানে ত একা ছেড়ে দিয়ে গেছেন দেখছি।

—দেখ না, এসেই গেছেন টেলিফোন করতে, এতদিন পরে ছুটি মঞ্জুর হয়েছে—কিন্তু ডাক পড়লেই ছুটে আসতে হবে, একটা প্রোগ্রাম করবার জো নেই, ওই ফুলের তোড়াটা সরিয়ে রাখ ত, বড় উগ্র গন্ধ—

—আমার সঙ্গে লগুনে একবার দেখা হয়েছিল, তখন জানলে ভাল করে আলাপ করতুম।

—সে দুঃখ এখন দূর করতে পার।

—কত দূর যাচ্ছ?

—ঠিক আছে কি? ইচ্ছে অজন্তা ইলোরা দেখে বোধে যাব, সেখান থেকে মালাবার পর্য্যন্ত—তুমি?

—আমিত কোথাও যাচ্ছি না। আমার বোন সরোজকে তুলে দিতে এসেছি।

—সরোজ কে? বুঁচি—বোধেতে যার বিয়ে হয়েছে, সে যাচ্ছে এ গাড়ীতে—তুমিও চল বোধেতে, বেশ মজা হবে।

—তুমি কি ভাবছ আমরা রাজসাহী যাচ্ছি, যে ছপুরে আমবাগানে কাঁচা আম পাড়বে, কাঁচা লক্ষা দিয়ে থাকে?

—অথবা নোয়াখালি—সেই নোকা বেয়ে চলা—ও good old days ! নয় কল্যাণ ?

কল্যাণ মুগ্ধভাবে অনুপমার মুখের দিকে চাইলে। এ মুখ শুধু অনুপম সুন্দর নয়, মনের ভাবের সঙ্গে এ মুখের রং বদলায়, নিশ্চল আকাশে ভোরের আলোর মত স্বর্ণময় স্নিগ্ধ আভা।

স্নিগ্ধস্বরে অনুপমা বলে, বোসো, উঠোনা।

—দেখি, দীপা আবার কি বলে।

—ওই বুঝি বুঁচির মেয়ে, কি রে, আয় ভেতরে—

দীপিকা গাড়ীর দরজার সামনে দাঁড়িয়ে বিশ্বয়মুগ্ধনেত্রে অনুপমাকে দেখছিল। কানের হীরার ফুল কি সুন্দর! হাতের চুড়িগুলি কি ঝকঝক্ করছে, নখগুলি লাল রঙ করা কেন? তার মায়ের ত এরকম নেই। সে চমকে বলে, রাঙা মামা, খোকা গ্রাকার করেছে, তুমি শীগ্গীর এসো।

—দেখি খোকা আবার কি কাণ্ড বাধালে।

—আবার আসছ ত, চল বোধে—গাড়ীতে বেশ গল্প করতে করতে যাওয়া যাবে। আর মালতী মল্লিক যাচ্ছে, আলাপ করিয়ে দেব, বুঝলে ?

কল্যাণ দেখলে, অনুপমার কঁটাক্ষে এখনও বিদ্যুৎ খেলে যায়, গুরুগুরু ধ্বনি সে শুনলে আপন বক্ষে।

সরোজিনীর গাড়ীতে এসে কল্যাণ দেখলে ছোট খোকা সামান্য বমি করেছে, একটু দুধ তুলেছে মাত্র, কিন্তু তার মুখ চোখ লাল হয়ে উঠেছে, সে ভয়ঙ্কর চৈচাচ্ছে। আর সরোজিনীর মুখ পাংশুবর্ণ।



—দাদা, যদি ফিট হয় !

সরোজিনী রীতিমত ভয় পেয়েছে। বিষয়সী মহিলাটি অভয় দিচ্ছেন, ও কিছু নয় মা, গরম নেগেছে মা, বাছার গরম—

—না মাসীমা, আপনি জানান না, ফিট হবার আগে ওর অগ্নি মুখ চোখ লাল হয়।

এরি মধ্যে মাসীমা পাতান হয়ে গেছে।

প্ল্যাটফর্মে, বিশেষতঃ পাশের দ্বিতীয় শ্রেণীর গাড়ীর সামনে, অসম্ভব ভিড় হয়েছে। কে একজন সাধু যাচ্ছেন, তাঁর শিষ্য শিষ্যা ভক্তবৃন্দে চারিদিক পরিপূর্ণ।

কল্যাণ ধীরে বললে, ভাবছি আমি তোদের সঙ্গে যাই।

—হাঁ, দাদা, মাকে আমি বুঝিয়ে লিখব'খন, তুমি চল। থোকা যদি পথে অস্বস্তি করে বসে।

—সেই জগুই ত বলছি।

—কিন্তু টিকিট কিনে আনার সময় আছে কি ? আমি টাকা দিচ্ছি।

—এখানে গার্ডকে বলে দিচ্ছি, বর্ধমান কিনে নিলেই হবে।

সরোজিনীর মুখে ভয়ের ভাব কেটে গেল। সে স্নিগ্ধস্বরে বললে, চূপ কর থোকা অত চেষ্টা না, রাঙামা মা সঙ্গে যাচ্ছে, চূপ কর সোনা। থোকাকার কিন্তু চীৎকারের বিরাম নেই। কুলিদের চেষ্টানো, সন্ন্যাসীর ভক্তবৃন্দের কলরব, ষ্টেশনের সব কোলাহল ছাড়িয়ে তার চীৎকারধ্বনি। সরোজিনী উদ্বিগ্ন হয়ে বললে, এ যে থামতে চায় না, দাদা, কি হয়েছে থোকা !

দত্তগির্নি বললেন, আমার কোলে দাও ত মা, বোধ হয় পেট কামড়াচ্ছে

সরোজিনী বেগে বলে উঠল, যদি পেট কামড়ায় ত আপনার কোলে গেলে থামবে কি করে ?

কল্যাণ বলে, বোধ হয় জলতেষ্টা পেয়েছে, ওর মুখে চোখে একটু জল দে দেখি।

—ওইত জল খাওয়ালুম, চুপ্ কর ! হাড় জালিয়ে খেলে।

খোকার কান্নার শব্দ সন্ন্যাসী প্রেমদাসের কানে পৌঁছাল। তিনি চঞ্চল হয়ে উঠলেন। তখন পায়ের ধূলো নেবার ব্যস্ততা ও ভিড় জমে উঠেছে। প্রেমদাস তাঁর এক ডাক্তার শিষ্যকে জিজ্ঞাসা করলেন, পাশের গাড়ীর খোকা বড্ড কাঁদছে ?

ডাক্তার শিষ্য ব্যস্ত হয়ে বলে, আপনি উঠবেন না, আমি দেখছি।

শিষ্যদের ভিড় ঠেলে সন্ন্যাসী উঠে বলেন, তুমি ওষুধ দিতে গেলে ওরা নেবে না, আমার মধুর শিশিটা দাও।

ভক্তিমতী এক প্রোঁচা বলেন, শিশুর কান্না শুনলে ঠাকুর কি আর স্থির থাকতে পারেন !

সরোজিনী খোকাকে নিয়ে হাঁপিয়ে উঠেছে। খোকাকে কোলে চেপে দুই বেকির মাঝখানে সরু জায়গায় চঞ্চল হয়ে ঘুরছে। দত্তগিন্নির ট্রাক, পুঁটলি, বস্তা জিনিষপত্রে গাড়ীতে নড়বার বেশী জায়গা নেই। কল্যাণ অসহায় ও বিরক্তভাবে চারিদিকে চাইছে। অগ্র কোন গাড়ীতে জায়গা খুঁজে নিতে হবে, সময় বেশী নেই, সারারাত জেগেই কাটাতে হবে বোধ হয়। এমন সময় এক সন্ন্যাসী শিশি হাতে তাদের গাড়ীতে উঠছে দেখে সে রেগে উঠল।

—মশাই, এটা মেয়েদের গাড়ী।

—এটা যে শিশুদেরও গাড়ী !

কল্যাণ বলতে যাচ্ছিল, আপনি কি শিশু, কিন্তু সন্ন্যাসীর প্রশান্ত আননে বেদনাময় কারুণ্যের রূপ দেখে সে স্তব্ধ হয়ে গেল। কান্নার শব্দে লোকটা সতাই বেদনা পাচ্ছে, মনে হ'ল।

প্রেমদাস ব্যথিত কণ্ঠে বল্লেন, কেন কাঁদছে মা এত ?

সরোজিনী কোন কথা কইতে পারলে না।

গেকুয়া রঙের আলখাল্লা-পরা, গলায় রুদ্রাক্ষের মালা, কালো লম্বা কৌকড়া চুল বৈরাগীদের মত, কাঁচাপাকা দাড়ি, চোখে দীপ্ত জ্যোতি, তেজ ও করুণার সম্মিলন। অপূর্ব এ পুরুষের মূর্তি।

সরোজিনী ভীত মুগ্ধ হয়ে গেল।

প্রেমদাস বল্লেন, ও যে কাঁদার চেয়ে কাশছে বেশী, ওর গলা খুস্ খুস্ করছে—এই মধু একটু দাওত মা।

সরোজিনীর করতলে প্রেমদাস একটু মধু ঢেলে দিলেন। মুখে আঙুলে করে মধু দিতেই ছোটখোকা দুই ঠোঁট দিয়ে আঙ্গুল চেপে চুষতে লাগল। সন্ন্যাসীর অপূর্ব মূর্তি দেখেই হোক অথবা মধুর গুণে, খোকা চুপ করলে। হাত বাড়িয়ে সন্ন্যাসীর দাড়ি ধরে টানবার চেষ্টা করলে।

ভক্তবৃন্দ গাড়ীর জানলার ওপর ঝুঁকে পড়েছিল, সবাই জয়ধ্বনি করে উঠল। ঠাকুর যাবার আগে কি মাহাত্ম্য দেখিয়ে গেলেন !

মধুর শিশি সরোজিনীর হাতে দিয়ে প্রেমদাস বল্লেন, রোজ সকালে এক ঝিল্লুক মধু খেতে দিও মা, তাহলে খোকার গলা সেরে যাবে।

কল্যাণ ভাবলে, লোকটা সন্ন্যাসী হবার আগে কবিরাজ ছিল, তাতে স্তব্ধে হল না দেখে এ ব্যবসা ধরেছে। সে ধীরে জিজ্ঞাসা করলে, মশাই ও শুধু মধু, না ওতে ওষুধ মেশান আছে ?

প্রেমদাস হো হো করে হেসে উঠলেন, আরে শুধু মধুতে কি হয়, আছে বৈকি কিছু মেশান, প্রেমরস ! প্রেমরস !

সন্ন্যাসীর প্রাণ-খোলা হাসি কল্যাণের ভাল লাগল। লোকটা বোধ হয় ভণ্ড নয়, তবে নতুন শিষ্টা জোগাড় করবার আঁট জানে।

ডাক্তার শিষ্টাটি এগিয়ে এসে বললে, ইনি ঠাকুর প্রেমদাস।

‘সেক্ হাণ্ড’ বলে কল্যাণ হেসে হাত বাড়িয়ে দিতে যাচ্ছিল, কিন্তু সেটা বড় বিসদৃশ হবে ভেবে স্থির হয়ে দাঁড়িয়ে রইল।

প্রেমদাস ! দত্তগিন্নি পায়ের ধুলো নেবার জন্ত ব্যস্ত হয়ে উঠলেন, কিন্তু সম্মুখে ডালের পুঁটলি, নারিকেলের বস্তা পথরোধ করে। তিনি চেষ্টায়ে উঠলেন, ঠাকুর একটু দাঁড়ান। ঠিক সেই সময়ে গাড়ী সশব্দে নড়ে উঠল। কে যেন দত্তগিন্নিকে ঠেলে বেষ্টিতে বসিয়ে দিলে। মোটা ভারী শরীর কাঁপতে লাগল।

দীপিকা চেষ্টায়ে উঠল, ওই ইঞ্জিন লেগেছে।

প্রেমদাস গাড়ী থেকে নেমে গেলেন। প্রশান্ত স্নিগ্ধ মুখ।

দত্তগিন্নি হাঁপাতে হাঁপাতে বল্লেন, আহা পায়ের ধুলো নেওয়া হল না। সরোজিনীও লজ্জিতভাবে ভাবলে, তাইত, প্রণাম করা হল না। ধীরে সে জিজ্ঞেস করলে, দাদা, উনি বুঝি পাশের গাড়ীতে আছেন, তুমি যাচ্ছ ত দাদা।

—কি বলিস্ ?

—হাঁ চল দাদা, আমার একা যেতে সাহস হচ্ছে না, কেমন ভয় করছে।

—ভয় কিসের ! দেখি, কাছাকাছি কোন গাড়ীতে যদি জায়গা পাই, ছিটকিনিগুলো ঠিকমত বন্ধ করিস্।

পাশের গাড়ী থেকে প্রেমদাসের শিষ্টারা নেমেছেন, শিষ্টারা সবাই এখনও নামেনি। খালি বার্থ আছে কিনা বোঝা যাচ্ছে না।

দু'দিক থেকে দু'জনে কল্যাণকে ডাকলে। ধূতি-পাঞ্জাবী-পরা একটি ইংরাজ ও জিপ্সোগান সিন্ধের চেকসার্ট ও যোধপুরী ব্রিজেস্ পরা একটি বাঙ্গালী।

—হ্যালো ঘোষ!

—হ্যালো কল্যাণ!

কল্যাণ অবাক হয়ে দেখলে বাঙ্গালী সাজে আর্থার গ্রেগরি তার সম্মুখে।

—হ্যালো আর্থার, কি আশ্চর্য্য, তুমি এখানে, এই বেশে—excuse me—আরে কনক! may I present আমার শিল্পীবন্ধু কনক রায়, আর ইনি আমার কেম্ব্রিজের সহপাঠী আর্থার গ্রেগরি, আমরা একসঙ্গে রাদারফোর্ডের কাছে কাজ করেছি।

—নমস্কার কনক রায় মহাশয়।

—বা, তুমি ত বেশ ভাল বাংলা শিখেছ আর্থার।

কনক বললে, তুমি কি যাচ্ছ এ গাড়ীতে?

—হ্যাঁ, যাবার ত ইচ্ছা, তবে টিকিট কিনিনি, বার্থও রিজার্ভ করিনি, তাই জায়গা খুঁজছি।

—বেশ, এ গাড়ীতে আমার একটা বার্থ রিজার্ভ করা আছে, তুমি এসো।

গ্রেগরি বললে, আমারও এ গাড়ীতে বার্থ, কিন্তু প্রবেশ করবার উপায় দেখছি না।

কনক বলে, তার চেয়ে চলো রেষ্টোরঁ কারে, পরের ষ্টেশনে এসে ওঠা যাবে, বড় তেষ্ঠা পেয়েছে, কি বলেন মিষ্টার গ্রেগরি।

—আমার ত খুবই মত, কারণ আমার ক্ষুধা পেয়েছে।

—আপনাদের কি সব সময়ই ক্ষিদে পায়—এ গরমে আমার ত খালি তেষ্ঠা পাচ্ছে।

—প্রবল ক্ষুধা আছে বলেই ত এরা পৃথিবীর এতখানি গ্রাস করতে পেরেছে—

—আর কনেকের তৃষ্ণার পরিমাণ তুমি জাননা আর্থার—

—না হে, সে প্যারিসীয় তৃষ্ণা আর নেই।

কনক কল্যাণের কলেজের সহপাঠী ছিল, কিন্তু বন্ধুত্ব জন্মেছিল প্যারিসে। বুলেভারের নৃত্যশালায়, মমাতের কাবারেতে কত রাত সে ছিল কনকের সঙ্গী।

তিনজনে রেষ্টোরঁ-গাড়ীর দিকে এগিয়ে চলল। প্যারিসীয় প্রমোদ-রাতির স্মৃতিতে ষ্টেশনের আলোগুলি যেন রঙীন হয়ে উঠেছে।

হুঁহু করে চলে ইন্টার ক্লাশের গাড়ী পেরিয়ে কল্যাণ একটু থামলে। বলে, তোমরা এগোও, আমি একটু আসছি।

কল্যাণ ধীরপদে পিছনে ফিরে এল। মধ্যমশ্রেণীর মহিলা-গাড়ীর সামনে একটু দূরে সে ভিড়ের আড়ালে দাঁড়াল। পাইপে তামাক ভরতে লাগল।

মহিলা-গাড়ীতে এক বাঙ্গালী তরুণী একাকিনী বসে। বৃহৎ শূণ্য তীব্রালোকিত কক্ষের এক কোণে সে একা। গাড়ীর আলোকদীপ্তিতে তার শুভ্র মুখশ্রী বিবর্ণ, করুণ। চওড়া কপাল হতে লম্বা দৃঢ় চোয়াল দিয়ে উন্নত সরু চিবুক পর্যন্ত মুখের সুন্দর রেখা অসমভাবে গড়িয়ে পড়েছে; স্কুমোরের হাতে মাটির ফলের মত, সে মুখ পেলব, নরম;

এখনও আগুনে-পোড়া স্বদৃঢ় কঠিন রূপ নেয় নি। মুখের উঁচু চোয়ালের ওপর সরু নাকের পাশে একটু বসা চোখ জলজলু করছে, পাহাড়ের তলে সূর্য্য-হসিত গভীর হৃদের মত। শূণ্য গাড়ীর জানলা দিয়ে সে কালো চোখের দীপ্ত দৃষ্টিতে কিসের সন্কেত! কালো মাটির প্রদীপের মুখের চঞ্চল শীর্ণ শিখার মত। যেন কার প্রতীক্ষায় সে একা জেগে।

বিশ্বোষ্ঠা। হৃদয়ের আগুনের আভা ওষ্ঠে অধরে লেগেছে বুঝি!

কল্যাণ ভাবলে, এই বোধ হয় মালতী মল্লিক?

সে এমন একা যাচ্ছে কেন! সে কি অল্পভব করতে চায় তার সাহস আছে।

কিন্তু সাহসিকার অন্তরে যে শঙ্কা, চক্ষে প্রতীক্ষা। ফ্রেমে বাঁধান ছবির মত তার মূর্তি, ওই হাল্কা সবুজ শাড়ীর সোনালী পাড় যেন ভোরের পৃথিবীর কপোলে অরুণের স্বর্ণরেখা।

পাইপ টানতে টানতে কল্যাণ গাড়ীর দিকে এগিয়ে গেল। একলা-বসা তরুণীকে সে কিছু বলতে চায়। কি বলতে চায় সে জানে না। হয়ত সে বলত, তুমি কি মালতী মল্লিক? অথবা, ওগো যাত্রিণী, কতদূর তোমার একা যাত্রা!

ঠিক সেই সময় পাঁচ মিনিটের ঘণ্টা পড়ল। আকুঞ্চিত-ক'রে তরুণী চাইল। ছাই-ওড়া অঙ্গারের মত চোখের দৃষ্টি।

মুখ হতে ধূমের কুণ্ডলী বাহির করে কল্যাণ দ্রুতপদবিক্ষেপে রেস্তোরাঁ গাড়ীর দিকে এগিয়ে গেল। মনে মনে সে হেসে উঠল। উনত্রিশ বৎসর বয়সে তার উনিশ বছরের স্বপ্নময় মন আবার জেগে উঠতে চায়। এ কি বাংলার বাতাসের গুণ অথবা অল্পমাত্রা তার প্রথম যৌবনের স্বপ্নমায়া জাগিয়ে দিল।

প্ল্যাটফর্ম ছাড়িয়ে হাওড়া ষ্টেশনের ইয়ার্ড পেরিয়ে বোম্বে মেল ছুটে চলেছে, যেন রূপকথার বৃহৎ সরীসৃপ, মাথায় মানিক জ্বলছে, মণিমুক্তাখচিত দেহ অন্ধকারে ঝক্‌ঝক্‌ করছে, গর্জনে নিশ্বাসে অগ্নি ও ধূম চতুর্দিকে বিকীর্ণ।

কাচের জানলা ফেলে দেবপ্রিয় বাহিরের আকাশের দিকে চাইলে। ইয়ার্ডের লাল নীল সাদা অগণিত আলোর ছটায় আকাশের নীলিমা মুছে গেছে।

কালো চশমা খুলে দেবপ্রিয় গাড়ীর ভেতর চাইলে। চোখ তার খারাপ নয়, তবু সে একটা কালো চশমা পরে থাকে, তীব্র আলো তার চোখে সয় না। চোখকে বিশ্রাম দেবার জগ্ন অথবা ভাববার জগ্ন অনেক সময় সে চোখ বুজে থাকে, অথচ জানাতে চায় না, সে চোখ বুজে আছে। চশমাটা সযত্নে খাপে রেখে সে এক কোণে ঠেসান দিয়ে বসল।

গাড়ীটা বেশ বড় ও নতুন। সবুজ রঙের রেক্সিন চক্‌চক্‌ করছে। ছ'বার্শওয়ালা গাড়ী, মাঝখানে ফাঁকা অনেকখানি জায়গা। দেবপ্রিয়ের বেকিটি গাড়ীর পেছনের অংশ জুড়ে। তার ডানদিকের বেকিতে সন্ন্যাসী প্রেমদাস। বামদিকের বেকিতে কোর্টপ্যান্টপরিহিত মধ্যবয়স্ক এক বাঙালী চূপ করে বসে, মাথার টুপি এখনও খেলে নি। হাঁপানি রোগী বায়ুহীন গ্রীষ্মের রাত্রে বিনিদ্র নয়নে যেমন অসহায়ভাবে বসে থাকে তেমনি বাথিত মুখে লোকটি জানলার দিকে চেয়ে বসে আছে। ট্রেন বখন ছেড়ে দিয়েছে, লোকটি ছুটতে ছুটতে এসে লাফিয়ে উঠল,



হাতে একটা ছোট স্ট্রটকেশ। প্রেমদাস তাকে ধরে টেনে না নিলে হয়ত সে প্র্যাটফর্মে পড়ে যেত। কিন্তু সেজন্য প্রেমদাসকে সে কোন কথাও বলে না, ধন্যবাদ জ্ঞাপন করলে না, সামনের খালি বেঞ্চে গুম্ হয়ে বসে পড়ল।

মাথার টুপি খুলে লোকটি একবার দাঁড়িয়ে আবার বসে পড়ল আকাশের অঙ্ককারের দিকে চেয়ে।

দেবপ্রিয় লোকটিকে চিনতে পেরে বিস্মিত হল। রাধাকান্ত মিত্তির, বহুলক্ষপতি রাধাকান্ত মিত্তির! পাঁচ সাতটা বড় কোম্পানীর ডিরেক্টর। কিছুদিন আগে তার ছবি দেবপ্রিয়দের কাগজে বাহির হয়েছিল। এক কোম্পানীর নূতন আফিস-বাড়ী উদ্বোধন-উৎসবে সাব এডিটর হিসাবে দেবপ্রিয়ের নিমন্ত্রণ হয়েছিল। উদ্বোধনে সে যেতে পারেনি কিন্তু কাগজে লম্বা প্যারাগ্রাফ লিখতে হয়েছিল।

কিন্তু রাধাকান্ত মিত্তির সেকেণ্ড ক্লাশে কেন? নূতন তাপ-নিয়ন্ত্রিত গাড়ীতেই রাধাকান্ত বোম্বে যায়, দেখেছে। বোধ হয় জরুরী কোন ব্যবসায়সংক্রান্ত ব্যাপারে তাড়াতাড়ি যেতে হচ্ছে।

দেবপ্রিয়ের বেক্সির আর এক কোণে এক বৃদ্ধ ভদ্রলোক বসে। ছাই-রঙের গলাবন্ধ কোট, মাথায় চুলগুলি যেমন খড়ির মত সাদা মুখ তেমনি আরক্ত, শুভ্রতা ও রক্তবর্ণের বৈষম্যে লোকটিকে অস্বাভাবিক করে তুলেছে।

বেশীক্ষণ কথা না কইলে দেবপ্রিয় হাঁপিয়ে ওঠে। তিন সহযাত্রীর মধ্যে সন্ন্যাসীর সঙ্গেই কথা কওয়া সহজ।

দেবপ্রিয় উঠে সন্ন্যাসীর সামনে দাঁড়াল। সন্ন্যাসী একদৃষ্টে রাধাকান্তের দিকে চেয়ে আছেন, সে দৃষ্টির করুণ কাতরতা দেখে দেবপ্রিয় অবাক হল।

প্রেমদাস পরিচিত বন্ধুর মত দেবপ্রিয়কে বলেন, এসো, বোসো—

—আমার নাম দেবপ্রিয়।

—দেবপ্রিয়, বা সুন্দর নাম, না, না, প্রণাম করতে হবে না।

প্রেমদাস দেবপ্রিয়ের হাত ধরে তাঁর পাশে বসিয়ে বলেন, আমরা এখন সহযাত্রী, দু'ঘণ্টার জন্তেই হোক, দু'দিনের জন্তেই হোক, এক পথের পথিক।

—আমি বোম্বে যাচ্ছি।

—আমারও বোম্বে যাবার ইচ্ছা।

—বোম্বেতে কি থাকবেন?

—না, ওই পথ দিয়ে দ্বারকায় যাব।

—মা একবার আপনার দর্শন চান, যদি বোম্বেতে থাকেন তাহলে গাড়ীতে বিরক্ত করব না।

—তোমার মা? পাশের গাড়ীর ওই মোটা গিল্লিটি বোধ হয়!

—ঠিক বলেছেন।

—আচ্ছা বোম্বেতেই দেখা হবে, ও গাড়ীতে যেতে আর সাহস হচ্ছে না, সে সাহেবী মেজাজী ছোকরাটি ঘে রকম রুখে উঠেছিল, 'এটা মেয়েদের গাড়ী'—

প্রেমদাস হো হো করে হেসে উঠলেন।

—বোসো, আলাপ করা যাক।

—আপনি এখন বিশ্রাম করুন।

—না, না, আমার ঘুম বড় কম, গত দু'রাত্রি ঘুম হয়নি, এরা ত্রেণেও বোধ হয় হবে না; আর মানুষের সঙ্গে আলাপ করার মত আনন্দ কি আছে—তুমি পণ্ডিত লোক তোমার সঙ্গে আলাপ করার মত আনন্দ কি আছে—তুমি পণ্ডিত লোক, তোমার সঙ্গে কথা কয়ে জ্ঞানও লাভ হবে।

—কি ঠাট্টা করছেন, আমি পণ্ডিত! খবরের কাগজের সাব-এডিটর মাত্র।

—কতদূর পড়েছ।

—এক সময় পড়েছিলুম বটে, ইউনিভারসিটির ডবল্ এম্-এ, ফাষ্ট ক্লাসও পেয়েছিলুম।

—ওই খুলি-জোড়া টাক দেখেই বুঝেচি, তুমি পণ্ডিত।

দেবপ্রিয় ধীরে দীর্ঘনিশ্বাস ফেলে। তাহার জীবনের স্বপ্ন, আদর্শ ছিল বটে সে পণ্ডিত হবে, ভারতের ইতিহাসের এক নূতন ব্যাখ্যা দিয়ে বই লিখবে, স্পেন্সার যেমন লিখেছেন Decline of the West. ইতিহাসে এম্-এ পাশ করে দর্শনে এম্-এ পড়েছিল; কিন্তু কোন কলেজে একটা কাজও যোগাড় করতে পারেনি। হঠাৎ যখন তার বাবা মারা গেলেন, মর্টগেজ-করা বাড়ী ও কয়েক হাজার টাকা দেনা রেখে, যৌবনের সব স্বপ্ন মিলিয়ে গেল। এখন সে সামান্য মাহিনার এক কাগজের সাব-এডিটর। সারাদিন প্রুফ দেখে ফরমাস-করা প্রবন্ধ লিখে সন্ধ্যায় শ্রান্ত হয়ে ছোট্ট ভাড়াটে বাড়ীতে আসে, তারপর শুনতে হয়, খোকার জ্বর হয়েছে, খুকীর পেটের অস্বস্থ, গৃহিণীর বুকের ব্যথাটা বেড়েছে; বিরক্ত হয়ে পাড়ার তাসের আড্ডায় আশ্রয় নিতে হয়, “প্রাচ্যে অরুণোদয়” খসড়া হয়ে পড়েই আছে। কিন্তু এ সন্ন্যাসী তার অন্তরের গভীর বাসনার কথা জানলে কি করে! সে বই এখন থাক। দেবপ্রিয় ভাবতে লাগল, আর একখানা বই লেখার মাল-মশলা বোস্বেষাত্রাপথে ট্রেনেতে যোগাড় করা যেতে পারে। সন্ন্যাসী প্রেমদাসের এক জীবনী লিখতে পারলে নিশ্চয় খুব বিক্রি হবে; অথবা প্রেমদাসের উপদেশাবলী, ইংরাজীতে নাম হবে Philosophy of Sadhu Premdas. কোন ধনী শিগ্ধ্য ছাপাবার ভার নিতে পারে। ইংরাজী বইখানা আমেরিকায় খুব বিক্রি হবে।

দেবপ্রিয় বল্ল, দেখুন আমার একটি নিবেদন আছে।

প্রেমদাস তার কথায় বাধা দিয়ে বলেন, দেবপ্রিয়, ও লোকটি কে ?  
চেন ?

রাধাকান্ত তখন পকেট থেকে নোটবুক বাহির করে হিসেব করতে বাস্তু।

—মনে হয়, চিনি।

—লোকটি বড় দুঃখী।

—দুঃখী ? উনি লক্ষপতি। অর্থের দুঃখ নয়, এটা ঠিক ?

—দুঃখ কি কেবল টাকার ?

—আমাদের মত সংসারী মানুষের কাছে তাই বটে।

—তুমি গভীরভাবে ভেবেছ কি আমাদের সত্যিকার দুঃখ কিসের  
জন্ম ?

ছাইরঙের কোট-পর্যাপ্ত লোকটি আলোচনায় যোগদান করবার  
জন্ম অধীর হয়ে উঠছিল, সে বলে উঠল, বাসনাই সব দুঃখের মূল নয় কি ?

প্রেমদাস উৎসাহের সঙ্গে বলেন, আসুন, এগিয়ে আসুন, আপনি  
সুন্দর কথা বলেছেন, শাস্ত্রে বলে বটে—

—আমাকে বোধ হয় চিনতে পাচ্ছেন না, আমি বিরিকি।

—ও বিরিকি বাবু আমাদের, আপনার ওপরইত টিকিট কেনার  
ভার ছিল।

—হ্যাঁ, ঠাকুরের সব মনে থাকে। রেল কোম্পানীর টিকিট বেচে  
চুল পাকিয়ে ফেল্লুম, এদিকে দক্ষিণে লিলুয়ার বেশী কখনও যাইনি।  
লোকে বলে, দিন্ত মশাই একটা আশালার টিকিট, একটা আমেদাবাদের  
টিকিট, টিকিট দি, পয়সা গুণি আর ভাবি কি সুন্দরই সব জায়গা  
পৃথিবীতে। তাই, পেনসন নেবার আগে ঠিক করলুম এক লম্বা পাড়ি

দেব, বড়সাহেব শুনে খুব খুসি, নিজে বোম্বে যাবার পাশ লিখে দিলেন, তারপরে যেখান খুসি যাও,—ঠাকুর আপনি দ্বারকায় যাবেন, তাহলে আপনার সঙ্গে যাই।

প্রেমদাস স্থিরদৃষ্টিতে বুদ্ধ বিরিকির দিকে চাইলেন, অতি ধীরে বল্লেন, বহুদূরে আপনার যাত্রা।

—হাঁ, এতদিন রেল কোম্পানীর চাকরী করলুম এবার কোম্পানীর পয়সায় যতদূর সম্ভব ঘুরে আসবার ইচ্ছা।

—আপনি সুদূরপথের যাত্রী, আপনায় দেখে ধচ্ছা হলুম।

প্রেমদাস বিরিকিকে বুক জড়িয়ে ধরলেন। বিরিকির বুক কেঁপে উঠল, ঠাকুরের সহজ কথার অর্থ সে যেন বুঝতে পারছে না। স্তব্ধ হয়ে সে বসল।

প্রেমদাস হেসে বল্লেন, দেবপ্রিয়, তুমিও যে নোটবুক বাহির করলে দেখছি, কি টুকুছো?

—প্রশ্নের উত্তরটা কি দেন, তাই লিখে নেব।

—প্রেস রিপোর্টারের কাজও কর নাকি?

—দরকার হলে করতে হয়, যাতে দু'পয়সা আসে।

—প্রেমদাস বৈরাগীর সঙ্গে ইন্টারভিউ দেনে, দু'পয়সা পাবে, বেশ, বেশ, লেখ, লেখ। প্রশ্ন হচ্ছে, মানব-জীবনে দুঃখের কারণ কি? তুমি বলছ, অর্থের অভাব; বিরিকি বলছেন, বাসনা কামনা। এ অভাবাত্মক দৃষ্টি। ভাবাত্মক দৃষ্টি দিয়ে দেখ, দুঃখ কেন? প্রেম নেই বলে দুঃখ। মানুষ প্রেম চায়, হৃদয়ের স্পর্শ। অন্তরে প্রেমের চন্দ্রমা উদিত হলে, দুঃখের নিবিড় অন্ধকার দূর হয়ে যায়। এই যে আমাদের গাড়ীগুলো টানতে টানতে ইঞ্জিন ছুটে চলেছে, যাত্রির ঘন অন্ধকারে তার মাথায় সার্জ-লাইট জ্বলছে, নিজের পথ নিজে আলোকিত করে

চলেছে, প্রেমের হেড্-লাইট জেলে চলো, জীবনপথে কলিসন হবার ভয় নেই—

দেবপ্রিয় হাত চালিয়ে লিখে চল। মনে মনে সঙ্কল্প করলে, জীবনী লেখার প্রস্তাবটা কাল সকালেই করতে হবে।

সন্ন্যাসীর কণ্ঠস্বরে রাধাকান্ত চমকে উঠল, তারপর নোটবুক বন্ধ করে তারান্ধার রাত্রির প্রবহমান অন্ধকার শ্রোতের দিকে চেয়ে বসে রইল।

ধূসর নীল পর্দার মত মুক্ত আকাশ, একপ্রান্তে একফালি চাঁদ। রাতের আকাশের দিকে, চাঁদের দিকে সে কখনও এমন করে বসে চায়নি। তার সময় কোথায়!

তার দিন কেটেছে অফিসে, ব্যাঙ্কে, শেয়ার মার্কেটে, কারখানায়; তার রাত কেটেছে হিসাবের বই পরীক্ষা করে, টাকা গুণে, নূতন নূতন ব্যবসার প্ল্যান তৈরি করে। মাঝে মাঝে যখন শ্রান্তি এসেছে, তখন সে গেছে বন্ধুদের দল নিয়ে কোন অভিনেত্রীর রঙ্গমঞ্চে, অথবা তার বাগানবাড়ীতে কোন বাইজীকে এনে প্রমোদোৎসবের আয়োজন করেছে। সে ক্ষণিকের খেলা। তার আসল খেলা টাকা নিয়ে। নারী তার মন ভুলায় না, মদ তাকে মাতাল করে না, তার একমাত্র নেশা টাকা। একদিকে টাকা জমাবে আর-একদিকে টাকা খেলাবে।

এমনি একটি ছোট স্টকেস হাতে সাতাশ বছর আগে সে কলিকাতায় এসেছিল, গৃহহীন, নিঃস্ব, নগণ্য পথিক। আজ সে বহু-লক্ষপতি। কিন্তু টাকা সে জমায়নি, টাকা সে অনবরত খেলিয়ে চলেছে। খেলার

নেশায় মেতে এখন সে মহাবিপদে পড়েছে ! এতদিন জিতের খেলার পর বুঝি এবার হারের খেলা আরম্ভ হল ! যে সোনার চাকা সে ঘোরাচ্ছিল, বেশী জোর ঘোরাতে গিয়ে, সে চাকা তার গলায় এসে চেপে আটকে গেছে । আবার চাকা ঘুরবে, হঠাৎ কয়েক লাখ টাকার টানাটানি পড়ে গেল, বাজারে কিছুতেই যোগাড় করে উঠতে পারল না । সেয়ার মার্কেটে এত মরীয়া হয়ে খেলা ঠিক হয় নি, রেসের ঘোড়াটাও পা ভেঙ্গে বসল, লোহার কলের নূতন যন্ত্রটা প্রথমদিন চালাতে গিয়েই ভাঙল, ইউরোপ থেকে ইঞ্জিনিয়ার না এলে সারান যাবে না, সে তিন মাসের ধাক্কা, এদিকে তার কোম্পানীর শেয়ারের দর ভয়ঙ্কর নেমে গেছে । এখন নগদ তিন লাখ টাকা না হলে বাজারে তার ব্যবসা বন্ধ হবে, সাতটা ছুটি এক সপ্তাহের মধ্যে এসে পড়বে । সে আজ দু'খানা চেক কেটেছে, একখানা কুড়িহাজারের, একখানা ত্রিশ হাজারের । ব্যাঙ্ক বরাবর এর চেয়েও বেশী ওভারড্রাফট দিয়েছে, কিন্তু ম্যানেজার বললে ওভারড্রাফট দেওয়া অসম্ভব, লগুন থেকে কেবল এসেছে খুব সাবধানে কাজ করবে, ওভারড্রাফট বন্ধ কর । হঠাৎ এরকম কেবল এল কেন ম্যানেজারও বুঝতে পারছে না । কাল সে চেক ব্যাঙ্কে ভাঙাতে নিয়ে যাবে, dishonoured হবে । রাখাকান্ত মিত্তিরের সহ-করা চেক কাগজ মাত্র !

আজ নানা জায়গা ঘুরে দেখল, বাজারে তার ক্রেডিট নেই । একটা মিলে ধর্মঘট, আর একটা কারখানার যন্ত্র বিকল, বাজারে দেখা খুব বড় অঙ্কের, নূতন যন্ত্রপাতি সব ধারে কেনা ।

ইন্সল্‌ভেন্সি ! মন্দ কি ।

নোটবুকে রাখাকান্ত যে হিসাব করছিল, টাকার সে বড় বড় অঙ্কগুলি তার মাথায় ঘুরতে লাগল, চোখের সামনে নাচতে লাগল ।

তিনটে কোম্পানী লিকুইডেসনে যাবে, সেই সঙ্গে তার আলিপুরের বাড়ী, বারাকপুরের বাগানবাড়ী সব যাবে।

মন্দ কি ! একদিন সে কপর্দকশূণ্য হয়ে কলিকাতা হতে চলে যাবে তার গ্রামে, নদীর ধারে পিতামহের ভাঙা বাড়ীটা সারিয়ে থাকবে, রোজ রাতে দেখবে এল্লি চাঁদ, তারকাপুঞ্জের ঝল্‌মলানি। হাঁপানিতে রাতের পর রাত জাগতে হবে না—কোম্পানীর হিসাবের খাতার বড় বড় অঙ্কগুলি চোখের সামনে তাওব নৃত্য করবে না—

বেশী নয় দেড়লাখ টাকা জোগাড় করতে পারলে, কয়েকটা দেনা শুধতে পারলে আবার বাজারে ধার পাবে।

না, সে হার মানবে না।

গাড়ীর দরজা ভাল করে বন্ধ করে পাশের ছোটো জানলার কাচ ফেলে দিয়ে মালতী পিঠে একটা কুশান ঠেস দিয়ে বসল। এত বড় গাড়ীতে সে একা। সব জানলা বন্ধ করে যাওয়া যায় না। যদি বর্ধ্বমানে কোন মেয়ে না ওঠে, আসানসোলেও কেউ না ওঠে, তাকে সারারাত জেগে একা যেতে হবে।

মালতী টাইম টেবল খুলে দেখতে লাগল, গাড়ী কখন বর্ধ্বমান পৌছবে। বোম্বে পৌছাতে দু'রাত কাটাতে হবে এই ট্রেনে। কি লম্বা পাড়ি ! ট্রেনগুলো একশ' দেড়শ' মাইল বেগে যায় না কেন ?

মালতী একটা নভেল খুলে বসল। রাশিয়ান উপন্যাস, সোভিয়েট রাসিয়ার শ্রমিক ও কৃষকদের নবস্বপ্নের কথা।

বেশীক্ষণ সে নভেল পড়তে পারল না। গা কেমন চম্‌চম্‌ করছে।



ট্রেন ছুটে চলেছে ক্ষাপা দৈত্যের মত। ট্রেনের ঝাঁকুনীতে বোধ হয় শরীর ভাল বোধ হচ্ছে না।

মালতী উঠে বেকির তলাগুলি ভাল করে দেখলে। না, কেউ কোথাও লুকিয়ে নেই।

এক সে কখনও ট্রেনে ভ্রমণ করেনি ; ইন্টারক্লাসেও কখনও চড়েনি। থার্ডক্লাসে গেলে মন্দ হত না, সে গাড়ীতে দুটো হিন্দুস্থানী মেয়েকে বসে থাকতে দেখেছে।

না, সাহসের পরীক্ষায় সে হার মানবে না। এ তার এ্যাডভেন্চার। বাড়ীর সবার অমতে দৃপ্ত যৌবনের গর্বে জনসেবার প্রেরণায় সে একা চলেছে। প্রথমে সে ভারতবর্ষ ঘুরে দেখবে,—চাষীদের জীবন, শ্রমিকদের থাকবার ব্যবস্থা। তারপর যাবে ইয়োরোপে। বিবাহ এখন সে করছে না।

বই বন্ধ করে মালতী জানলার কাচ ফেলে দিলে। কি সুন্দর চাঁদ উঠেছে, রূপালি নৌকা। গান গাইতে ইচ্ছা করে।

মালতী গান গেয়ে উঠল, নিবিড় অমাতিমির হতে বাহির হল—

এক লাইন গেয়ে সে থামল। মনে হল গাড়ীতে কে যেন প্রবেশ করেছে। কিন্তু কোথাও কাউকে দেখা যাচ্ছে না।

মালতী আর একটা গান আরম্ভ করলে,—‘চলি গো, চলি গো, যাই গো চলে—

গাড়ীর চাকাগুলো সে গানের ছন্দে স্বরে উন্নতের মত ছুটে চলেছে। সমস্ত ট্রেন গান গাইছে—চলি গো, চলি গো।

এবার ট্রেনটা গানের একটা লাইন বার বার গাইছে, ছড়িয়ে চলি চলার হাসি—ছড়িয়ে চলি চলার হাসি—ঝক্ ঝক্ ঝক্ ঝক্—ছড়িয়ে চলি চলার হাসি—ঝক্ ঝক্ ঝক্ ঝক্—

যেন ট্রেনটা অগ্রসর হচ্ছে না, একই পথে বার বার ঘুরে ঘুরে গাইছে।  
হঠাৎ গাড়ীতে কে হো হো করে হেসে উঠল।

মুখ ফিরিয়ে মালতী আঁকে চাইলে। ভয়ে কেঁপে সে চেষ্টায়ে  
উঠল।

তার সামনের বেঞ্চে একটা কুলী বসে! হাঁ, ষ্টেশনের কুলীর সাজ,  
কিন্তু মাথায় একটা খদ্দেরের টুপি। লোকটা এল কোথা হতে!

—টানবেন না, অন্তগ্রহ করে চেন টানবেন না।

কুলীর মত গলা নয়ত।

—কে তুমি?

—হাঃ, হাঃ কমরেড মালতী, ভেবেছিলুম, তুমি শুধু স্বন্দরী নও,  
তোমার সাহসও আছে।

—নিশ্চয়ই আছে!

—তবে চেন ধরে আছ কেন—স্থির হয়ে বোসো।

—কে তুমি!

মাথার টুপি ও মোটা কালো গৌফ খুলে যুবকটি বলল, এখন  
চিনতে পাচ্ছ বোধ হয়, চেষ্টাও না। আমাকে সাহায্য করতে হবে।

—তুমি, সমর!

—চূপ, আস্তে কথা বল।

কলেজের সহপাঠি সোসিয়লিষ্ট সমর।

—কোথায় ছিলে?

গাড়ীর এক কোণে আঙুল দেখিয়ে সমর জানলার খড়খড়ি  
তুলে বসল।

হাসির তরঙ্গে দেহ ছুলিয়ে মালতী বসল। কালো চোখ জল  
জল করছে। মুখে রক্তাভা, শরৎপ্রভাতের স্বর্ণদীপ্তির মত।

—হাঃ, হাঃ, কি চমকেই দিয়েছিলে ! আমি ত ক্যাপিটালিষ্ট নই, আমাকে ভয় দেখাতে আসা কেন ? ব্যাপার কি ?

—যদি বলি, তোমাকে একা দেখে গাড়ীতে উঠে পড়েছিলুম, তাহলে খুসি হবে--

—মোটাই নয় । তাছাড়া তোমার কোন মংলব আছে ।

—সুন্দরী তরুণীর সঙ্গলাভ ।

হঠাৎ ট্রেনের গতি মন্দ হ'য়ে এল ।

সমর চম্কে দাঁড়িয়ে বলে উঠল,—এ কি ! শীগ্গীর একটা শাড়ী বের করো !

—তুমি পরবে নাকি ?

—উপায় কি ! যদি ট্রেন থামিয়ে এখন সার্জ করে—

—তুমি শাড়ী পরে ঘোমটা টেনে বসে থাকবে—হাঃ হাঃ—না, না, আমি—হঠাৎ আমি হেসে ফেলব—সে আমি দেখতে পারব না ।

ট্রেন থামল না । আবার ক্রমবর্দ্ধমান গতিতে ছুটে চলল ।

—বোসো, ট্রেন থামছে না ।

প্রথমশ্রেণীর কুপেতে আলো জল্জল্ করছে ।

জগদীশ এক সরকারী ফাইলের পাতা ওন্টাচ্ছিল । অল্পপনা অর্দ্ধশায়িতা, স্বপ্ন চেয়ে আছে আকাশের দিকে । স্নান চাঁদের আলোভরা আকাশের টুকরা নীলার মত ঝক্‌ঝক্ করে ওঠে, গাছের কালো ছায়া দৈত্যের মত ছুটে এসে চলে যায়, অন্ধকারের শ্রোত স্বচ্ছ শ্রোতস্বিনীর

মত, এ ঘেন অসীম কাল-স্রোত প্রবাহিত হয়ে চলেছে তার চক্ষের সম্মুখে। এ অনন্তস্রোতে একবার উজান ঠেলে অনুপমা অতীতে যেতে চায়। কলাণ তার জীবনতরীর মুখ ঘেন ঘুরিয়ে দিলে।

ক্লান্ত উদাসস্থরে অনুপমা বলে, ওগো শুনছ !

মোটা ফাইল বন্ধ করে জগদীশ একটু চমকে চাইলে, দীর্ঘে বলে, তোমার সেই ওষুধটা খাবার সময় হল বোধ হয়।

—না, ওষুধ আমি আজ খাচ্ছি না, এ ঝাঁকুনীতেই আমার গা গুলোচ্ছে—ফাইলটা রাখনা।

—এই ফাইল বন্ধ হল।

—এই ইয়ারিং আর হারটা তুলে রাখ দেখি।

হারের সঙ্গে কয়েকগাছা চুড়িও অনুপমা খুলে দিলে। অলঙ্কার-শোভিতা হয়ে আরাম করে শোয়া যাচ্ছে না।

এ্যাটাচি-কেসে গয়নাগুলি রেখে জগদীশ ঔষধের শিশি বা'র করলে।

—ওষুধ ত খাবনা বল্লম ; বরঞ্চ আমাকে সেই সরু মটরমালাটা দাও।

সোনার মালা অনুপমা গলায় পরলে না, হাতে জড়িয়ে থেলা করতে লাগল। জগদীশকে সে বলে, এবার তুমি শুয়ে পড়। একটা আলো নিভিয়ে দাও।

জগদীশ দু'টো আলোই নিভিয়ে দিলে।

একটু ভয়ের স্থরে অনুপমা বলে, না, না, একটা আলো জ্বলে রাখো, গাড়ীতে অন্ধকার করে যেতে আমার কেমন ভয় করে।

একটা আলো জ্বলে জগদীশ অনুপমার পাশে একটা বালিশ ঠেসান দিয়ে বসল, হেসে বলে, ধরো তোমায় যদি একা গাড়ীতে যেতে হত।

—যেতুম। চারটে আলো জ্বলে। ওগো মাল্‌তীর গাড়ীতে মেয়েরা কেউ উঠেছে দেখলে? ধন্তি, সাহস মেয়ের!

—ওর গাড়ীতে আর কোন মেয়ে ওঠেনি।

—সে কি! মেয়েটা একাই যাচ্ছে! বর্দ্ধমানে একবার খোজ কোরো, যদি আমাদের গাড়ীতে আসতে চায়—

—ভয় নেই, একা যাচ্ছে না। হীরাসিংকে কড়া নজর রাখতে বলেছি, ওর পাশের গাড়ীতেই বসিয়ে দিয়েছি। তার রিপোর্ট ত রীতিমত রোমাণ্টিক।

—কি, রোমাণ্টিক আবার কি? তোমরা সবতেই রোমান্স দেখছ!

—না, গো! তোমার বোন রীতিমত মডেয়ার্ণ—বুঝলে—শুধু একা দেশভ্রমণ নয়, elope করবার আনন্দও পেতে চান—

—কি হেঁয়ালী বলছ!

—হীরাসিংএর রিপোর্ট হচ্ছে, ট্রেন ছাড়বার কিছু আগেই, সে একটি বাঙ্গালী যুবককে ওই গাড়ীতে উঠতে দেখেছে; যুবকটি উঠেই এক কোণে লুকিয়ে রইল, আর মাল্‌তি-বাবা একটু হেসে অন্তরিক্তে মুখ ফিরিয়ে রইল। ব্যাপারটা আগে থেকে পরামর্শ করে ঠিক করা, এ বিষয় কোন সন্দেহ নেই। স্বতরাং তোমার আধুনিক মাতৃস্বসাহিত্য তরুণ প্রেমিকের সঙ্গে আনন্দালাপ করতে করতে যাচ্ছে, একা নেই।

—বাবা, মাল্‌তির এত বিচ্ছেদ! আচ্ছা, ছেলেটি কে দেখলে?

অনুপমা সোজা হয়ে উঠে বসল।

—আমি কিছুই দেখিনি। বল ত, বর্দ্ধমানে দেখতে পারি। তবে খোজটা কাল সকালেও করা যেতে পারে।

—হাঁ, আজ রাতে থাক। তা, বাবু বল্লই পারে, ওর মা'ত মেয়ের বিয়ে দেবার জন্ত পাগল।

—মায়ের এক কথায় বিয়ে করে ফেল্লে, মডেয়ার্ণ গার্ল হবে কি করে—চাই লভ্, ট্রেনে রাঁদেভু।

—মাল্টি বোধ হয় জানত না, আমরাও এ ট্রেনে যাচ্ছি, বড্ড ধরা পড়ে গেছে।

মধুর হাসি খেলে গেল অল্পমার মুখে। জগদীশ মুগ্ধ হয়ে চেয়ে রইল। অল্পমার এ রূপলাবণ্যময় হাস্যের অলৌকিক শক্তি আছে, জগদীশ মন্ত্রমুগ্ধের মত এগিয়ে আসে, অল্পমা সরে যায়, হাসি মিলিয়ে যায় আলেয়ার আলোর মত।

অন্ধকার কোণে সরে গিয়ে জানলার দিকে একটু মুখ ফিরিয়ে অল্পমা এলিয়ে বসল, স্থির গম্ভীর রূপ।

অল্পমার মনের আকাশে কখন কালো মেঘ ঘনিয়ে আসে, কখন চাঁদের আলো ভরে যায়, কখন অরুণের সোনার আভা ঝলমল করে, তার সুন্দর আনন্দের রূপ-পরিবর্তন দেখে জগদীশ বুঝতে পারে। অস্থির আগে অল্পমার সহজ স্থির গাম্ভীৰ্য ছিল, সহজে সে চঞ্চলা হত না। এখন তার স্নায়ুগুণল বীণা-যন্ত্রের ঢিলে তারগুলির মত, একটু আঘাতেই বেহুৰো বেজে ওঠে। অতি সাবধানে জগদীশকে চলতে হয়। মাঝে মাঝে তার শ্রান্তি লাগে। সব সময় সপ্রেম ব্যবহার, আদর-ভরা কথা, মন খুঁসি করবার প্রয়াস। যেন সে অভিনয় করে চলেছে।

নির্ণিমেষ নয়নে অল্পমা চাইলে কৃষ্ণতারকা হতে অদ্ভুত জ্যোতি বাহির হয়। জগদীশের ভয় করে। অগ্রসর হতে সে পারে না।

মুখের থম্‌থমে ভাব কেটে গেছে। হেঁয়ালীর স্বরে অল্পমা বল্লে, টেষনে কার সঙ্গে দেখা হল জান! guess?

—পুরুষ, না মহিলা ?

—কল্যাণের সঙ্গে দেখা হল, বহুদিন পরে ।

—কল্যাণ !

—তোমার সঙ্গে ত দেখা হয়েছিল বিলেতে,—জ্যেষ্ঠাইমার ছেলে ।

—ও, তোমার old flame !

জগদীশ কুশান চেপে বসে পড়ল ।

—ফ্লেম্ ! আর ঠাট্টা করতে হবে না ।

—আহা, আমি কিছু mean করিনি—কি পাশ করে এল ?

—এই গাড়ীতেই যাচ্ছে, গিয়ে জিজ্ঞেস করে আসতে পার ।

জগদীশ চূপ করে রইল । সে কথা কাটাকাটি করতে চায় না ।  
ভাবলে, আগুন কি একেবারে নিভে গেছে ? বোধ হয় অঙ্কার রয়েছে  
ছাই-চাপা । সে অঙ্কারের অগ্নি-আভা অনুপমার গণ্ডে লেগেছে বুঝি !

গাড়ী ছুটে চলেছে । দু'জনে স্তব্ধ । কালের স্রোত বয়ে চলেছে  
অসীমতার অভিমুখে ।

একটু পরে অনুপমা হেসে উঠল : জগদীশকে ঠেলা দিয়ে বলল, কি,  
শুন্ম হয়ে বসলে কেন ? ওষুধটা দাও থাই ।

—ওষুধ থাকবে না, যে বলল ।

—Changed my mind dear,—কি বল !

—ভাল কথা । ডাক্তারের কথা ত শোনা উচিত ।

—নিশ্চয়, নিশ্চয়, আর এত উদ্বোধন করে বেড়াতে নিয়ে চলেছ,  
হঠাৎ অস্থখ করে বসলে হবে কেন—একটা কর্তব্য-বোধ আছে ত ।

—কার প্রতি ?

—শরীরের প্রতি এবং তোমার প্রতি, বুঝলে ।

ওষুধ খেয়ে অনুপমা বলল, এবার তুমি শুয়ে পড় । ওপরের বাক্সে

বিছানা পাতা আছে, স্পিপিং স্টুটটা বিছানার ওপর আছে বোধ হয়। চাপ্রাসীকে রাখতে বলেছিলুম।

নানারঙের কুশান-ছড়ান রঙীন চাদর-পাতা বেক্ষির দিকে জগদীশ চাইলে। স্বপ্রশস্ত গদি-ওয়ালা বেক্ষি, তার অর্ধেক জুড়ে কৌকড়ান চুল এলিয়ে ধুসর হলদে রঙের বালিশ ঠেসান দিয়ে অল্পপমা পা ছড়িয়ে বসে, খোলা জানলার দিকে চেয়ে আছে। কিংশুক বর্ণের শাড়ীর প্রান্তভাগ নীচে বুলে পড়েছে।

জগদীশ ধীরে বসে, এর মধ্যে শোব কি! বর্ধমানের পর শোয়া যাবে। বেক্ষির আর এক কোণে বসে সে অল্পপমার দিকে চেয়ে রইল। অল্পপমার দৃষ্টি তারাভরা আকাশের দিকে।

এম্মি চুপ করে একা উদাসভাবে অনন্ত আকাশের দিকে চেয়ে বসে-থাকা অল্পপমাকে দেখলে জগদীশের মন ব্যথায়, আশঙ্কায় ভরে ওঠে। এ যেন কোন অজানা, অপরাধ নারী; প্রতিদিনের-জানা অল্পপমা তার কাছ থেকে কতদূরে সরে গেছে, কোন্ অজানা পথে বহুদূর চলে গেছে, সে পথে সে একাকিনী যাত্রিণী, জগদীশের সঙ্গ ত্যাগ করে চলেছে। অল্পপমার রূপ তাকে মুগ্ধ করে; তার কালো চোখের চাউনিতে বক্ষের রক্ত হুলে উঠে, তারপর অল্পপমা দূরে সরে যায়।

ওয়াটেয়াবের নির্জন সমুদ্রতীরে অনন্ত আকাশের তলে এম্মি একা-বসে-থাকা অল্পপমাকে দেখেই সে বিমুগ্ধ হয়েছিল, ভালবেসেছিল। সোণালী বালুচরে সন্ধ্যার আলোয় এম্মি খোলা চুলে কিংশুক বর্ণের শাড়ী পরে সমুদ্রের দিকে চেয়ে চুপ করে বসে ছিল অল্পপমা। যেন একা, বড় একা সে। যেন সে ভেনাসের মত শুক্লির দোলায় সমুদ্রের অতলতা হতে উঠে এসেছে, বিজন পৃথিবীতে পথ খুঁজে পাচ্ছে না।

সেই একাকিনী সৌন্দর্যময়ীকে সে জীবন-সঙ্গিনী করেছে, প্রেম-



প্রদীপ জালিয়ে আহ্বান করেছে অন্তরে ; নিবিড়ভাবে তাকে পেতে চায় । কিন্তু নিকটে গিয়েও, পরিপূর্ণভাবে মিলন হয় না ।

অনুপমা জগদীশকে সরিয়ে রাখে না, কোথাও বাধা দেয় না, অথচ সহসা এক আবরণ সৃষ্টি করে, অদৃশ্য জালের মত । সৌন্দর্য্যমায়ার আবরণ, অসীম উদাস স্তব্ধতার আবরণ ।

অনুপমা অজানা, সুদূরগতা । অদৃশ্য ভেদ-জাল কে ছিন্ন করতে পারে ?

ব্যথায় জগদীশের মন খচ্‌খচ্‌ করে ।

জগদীশকে সুপুরুষ বলা চলে না । কালো, মোটা দেখতে । থ্যাংবড়া মুখ, নাক মোটা, ছোট চোখ ; মোটা কাচ-ভরা কাচকড়ার চশমার ফ্রেম মুখখানি বিসদৃশ করে তুলেছে । অনুপমার পাশে বসলে জগদীশকে বিশী দেখায় । “Beauty and the Beast” ছিল তার বিবাহের পরে বন্ধু-মহলে প্রচলিত ঠাট্টা ।

সরকারী চাকরীর পদগৌরব ও মাহিনার মোটা অঙ্ক কষ্টিপাথরের গায়ে স্বর্ণাভরণের মত তার দেহের অসৌন্দর্য্য দূর করেছে ।

অনুপমার সঙ্গে জগদীশের আলাপ হয়েছিল ওয়াল্টেয়ারের সমুদ্র তীরে । অহৈতুক আলাপ । বিবাহের কোন প্রস্তাব প্রথমে ছিল না ।

জগদীশ বিশেষ আকৃষ্ট হলেও, প্রস্তাব করতে সাহস করেনি ।

অনুপমারই এক মামা প্রস্তাবটি আনেন । অনুপমার মত নিয়ে তিনি এসেছিলেন । জগদীশ তাতেও সন্তুষ্ট হয়নি । নিভূতে সে নিজে প্রশ্ন করে অনুপমার নিকট হতে সম্মতি জেনেছিল । অনুপমা তাকে ভালবেসে বিবাহ করেছে কিনা, এ প্রশ্ন তখন মনে উদয় হয়নি । প্রশ্ন করলে বোধ হয় উত্তর পেত না । বিবাহের পর একথা বহুবার মনে হয়েছে, কিন্তু প্রশ্ন করতে সাহস হয়নি । দু’জনার মধ্যে যে অতি সূক্ষ্ম

অদৃশ্য বাধার জাল রয়েছে, প্রশ্ন করতে তার ভয় করে। সে অনুভব করে, অনুপমাকে সে গভীরভাবে ভালবাসে। ভাল যদি না বাসত অনুপমাকে সে সহ্য করতে পারত না, অনুপমার আরোগ্যের জন্য অকাতরে এত অর্থব্যয় করতে পারত না।

—এখনও তুমি শোওনি, অমন চূপ করে বসে ভেবো না।

জগদীশ ধীরে উঠে দাঁড়াল। ওপরের বাক্সেই তাকে শুতে হবে ধীরে বসে, তুমিও শুয়ে পড়। জানলাটা বন্ধ করে দি।

—জান ত, ট্রেনে আমার ঘুম হয় না। মিছে তুমি জেগে থাকবে আমার জন্তে।

—অত মুখ বাড়িও না। চোখে কয়লার গুঁড়ো পড়বে।

—বেশ সুন্দর লাগছে রাতটা—যেন হু হু করে ভেসে চলেছি—  
আচ্ছা তুমি এরোপ্লেনে চড়েছ ?

—হ্যাঁ, সেবার দিল্লী থেকে এলুম।

—আমার এরোপ্লেন চড়তে ইচ্ছে করছে—খুব জোরে ছুটে যাবে—  
আকাশের নীলিমায় উষ্কার মত ছুটে চলবে—আচ্ছা এরোপ্লেন ঘণ্টায়  
তিন চার শ' মাইল যেতে পারে ?

—যেতে পারে, তবে যাত্রী-এরোপ্লেন নয়। জলের বোটলটা  
কোথায় ?

—ওই কোণে রেখেছ—না, আমি জল খাবনা—দরকার হলে সোডা  
পাব'খন।

—শুয়ে পড়ি ?

—হ্যাঁ, হ্যাঁ।

—বর্দ্ধমানে ডেকে দিও। কেমন tired লাগছে।

অনুপমাকে আল্গা চুষন করে জগদীশ ওপরের বাক্সে উঠে শুয়ে

পড়ল। ফাইলটা শেষ করে শুয়ে পড়লেই ভাল হত। ট্রেনেতেই রিপোর্ট লিখে পাঠাতে হবে।

বড় ক্লান্তি লাগে। মাথায় নানা চিন্তা। কল্যাণ ঠিক এই ট্রেনে এল কি করে? যা প্ল্যান করা যায়, কামনা করা যায়,—কোথা থেকে অঘটন ঘটে—কোন দুঃস্থল সব সময়ে তাকে ব্যঙ্গ করছে।

বালিশে মুখ চেপে জগদীশ চোখ বুজলো।

মালতীর সামনের বেঞ্চিতে সময় বসেছে, মুখোমুখি। পাশে রুস-লেখক সোলেকভের “Virgin Soil Upturned” উপন্যাসখানি খোলা।

মালতীকে সে জিজ্ঞাসা করলে, এবার দেবগ্রামে কৃষক-কনফারেন্সে তোমায় দেখলুম না?

মালতীকে ‘তুমি’ বলবার মত ঘনিষ্ঠ আলাপ না থাকলেও, সময় কোন সময়স্বয়ং মেয়েকে “আপনি” বলে না। তাছাড়া মালতী তাদের দলের; “আপনি” বলা বুজ্জোয়া মনোবৃত্তির পরিচায়ক। কোন মেয়েকেও সে “আপনি” বলতে দেয় না।

মালতী বলল, না, এবার কনফারেন্সে যাওয়া হয়নি, শরীর ভাল ছিল না।

—শরীরের কথা ভাবলে কি কাজ করা চলে। আজ সারাদিন ত আমার খাওয়া হয়নি।

—কিছু খাওনি? আমার সঙ্গে ত খাবার নেই কিছু।

—তিন কাপ চা আর দুটো ফাউল-কাটলেট—খাবার কথা।

যাক, কোনরকমে আমায় বোপে পৌছাতে হবে। টাকাও হাতে নেই।

—টাকা কিছু দিতে পারি।

—টাকা থাক্। রেলওয়ে টিকিট থাকে ত দাও। টিকিট নেই বলে শেষে ধরা না পড়ে যাই।

—তোমার নামে কি ওয়ারেন্ট বাহির হয়েছে?

—না, ওয়ারেন্ট বাহির হয়নি। তবে খোঁজ হচ্ছে। ভবেন্দ্রকে ধরেছে,—

—অপরাধ?

—রাধাকান্ত মিলে ধর্মঘটের কথা শোননি? বক্তৃতাটা গরম হয়ে গেছিল। সিতিকণ্ঠ একটা স্লিপ পাঠালে, সরে পড়। তাই সরে পড়ছি।

—কেন, ভয় কিসের?

—জেলকে আমি ভয় করিনা, বুঝলে কমরেড—তবে কেন মিছিমিছি যাই—

—আমারও তাই মত।

—তাছাড়া, এবার লম্বা পাড়ি দেবার ইচ্ছে আছে, এতদিন বাহির হতে পারিনি মায়ের জন্তে, এবার বুঝিয়ে এলুম, জেলে যাওয়ার চেয়ে ইউরোপ যাওয়া ত ভাল হবে।

—তোমার মা নিশ্চয় খুব ভাবছেন!

—ভাবছেন বৈ কি! ভাবাটাই তাঁদের একমাত্র কাজ। তা আমার মা শক্ত আছেন। শোন কমরেড, আমার ঠিকানাটা লিখে নাও, কাল একটা চিঠি লিখে দিও মা'কে—ভণিতা কিছু করতে হবে না, শুধু লিখে দিও, আপনার ছেলের সঙ্গে দেখা হ'ল, ভাল আছে, তার অভীষ্টপথে চলেছে—বুঝলে—একটা জংসন স্টেশনে পোষ্ট করো,—

খামে লিখো আর বেশ মেয়েলিছাঁদে ঠিকানা লিখো—‘শ্রীচরণেশু’, ওই সব লাগিয়ে দিও।

মালতীর বিবর্ণ মুখ রাঙা হয়ে উঠেছে, কালো চোখ জলজল করছে অন্ধকার আকাশে শুকতারার মত।

ছোট নোটবুক বা’র করে সে ধীরকণ্ঠে বলে—বলো ঠিকানা, নামটা বলে।

—মা’র নাম? দেখ, মায়ের নাম মনে পড়ছে না, মা, মা—শুধু ‘মা’ লিখে দিও, কেয়ার অফ—মনে পড়েছে, ‘যোগমায়া’—কাল সকালেই লিখে দিও।

ব্যাগ থেকে রেল টিকিট বা’র করে মালতী বলে, টিকিটটা রাখো।  
ব্যাগ নেই?

—ব্যাগটা কোথায় পড়ে গেছে দেখছি, একটা ছিল ট্যাকে।

—আচ্ছা এ মণিব্যাগটাও রাখ, বেশী টাকা নেই।

—থাক তোমার কাছে, পরে নেব। দরকার হবে না বোধ হয়।

—তুমি কি এই কম্পার্টমেন্টেই থাকতে চাও?

—বর্ধমানের নেমে একবার দেখব—অন্য গাড়ীতে যদি স্লুবিধে হয়—এক কাজ কর, জানলাগুলো সব তুলে দিয়ে আলো নিভিয়ে শুয়ে পড়।

—আলো না জ্বালা থাকলে আমার ভয় করবে।

—ভয়?

—না, ভয় নয়, কিন্তু অন্ধকারে আমি থাকতে পারি না, আমার ত ঘুম আসবে না।

—আচ্ছা আলো জেলেই চলো, আমি সহজে নড়ছি না।

মালতী কোন উত্তর দিলে না। গগুদেশে রক্তের ছোঁপ মিলিয়ে

গেছে। মণিবন্ধে বাঁধা ছোট ঘড়িটা দেখলে। কলিকাতার এক ছোট গলিতে তাদের পুরাতন বাড়ীর এক অংশ তার চোখে ভেসে উঠল। মায়ের কথা মনে পড়ল।

মায়ের রান্না বোধ হয় শেষ হয়ে গেছে। আজ আর বেশী রান্না করেন না। ছোট ভাইপো মল্ল বোধ হয় এতক্ষণে ঘুমিয়ে পড়েছে। আসবার সময় তার মা চক্ষের জল কষ্টে রোধ করেছিলেন, কিন্তু মল্ল চীৎকার করে বাড়ী মাং করে দিয়েছিল।

মা যদি অবুঝ হন কি করা যায়! তার জীবনের আদর্শকে সে কত বোঝাতে চেষ্টা করেছে, মা কিছুতেই বোঝেন না; বলেন, গরীব দুঃখীর সেবা করতে চাও, খুব ভাল, কিন্তু সেজ্ঞা বিয়ে না করে টো টো করে ঘোরা কেন! আজ রাতে মায়েরও ঘুম হবে না! মাকেও একটা চিঠি লিখতে হবে ট্রেন থেকে।

মালতীর ইচ্ছা হ'ল, সময়ের সঙ্গে মায়ের গল্প আরও করে। কিন্তু সঙ্কোচে সে চূপ করে রইল। সোসিয়ালিজ্‌ম্-মত্রে সে দীক্ষিত। হৃদয়ের কোনরূপ দুর্বলতা প্রকাশ করলে চলবে না।

সময়ের দিকে সে উৎসুকভাবে চাইলে। সময়ও বোধ হয় তার মায়ের কথা ভাবছে।

মালতী ভাবলে, সে যদি সময়ের মত মুক্ত, স্বাধীন হত, চলে যেতে পারত দেশ দেশান্তরে!

রেন্সটার্গ-গাড়ীতে ত্রয়ীর আহার শেষ হয়ে পান-পর্ব আরম্ভ হয়েছে। কল্যাণ ও আর্থার লিকার নিয়ে বসেছে, কনকের হৃইঙ্কি চলছে।

সাক্ষ্যের গেলাসে একটু চুমুক দিয়ে কল্যাণ বলে, আর্থার, তোমার এ ছদ্মবেশ কেন ?

পাঞ্জাবীর হাতটা গুটিয়ে আর্থার বলে, এ দেশে এই বেশ বড় আরামের। আর আমি ঠিক করেছি, যে দেশে যাইব, সে দেশের বেশভূষা পরিব।

—আইডিয়া ভাল, কিন্তু তোমার মংলব কি ?

—ভারতবর্ষ সম্বন্ধে আমি একটা বই লিখছি।

কনক বলে, দোহাই, ভারতবর্ষ সম্বন্ধে অনেক বিদেশী আবর্জনা জমেনি কি ?

আর্থার বলে, আপনারা যদি নিজ দেশ সম্বন্ধে বই লিখিতেন ত ভাল হইত। আপনারা যে লেখেন না। দেখ, প্রাচীন ভারতের বিষয় জানিতে হলে সেই বিদেশী ছয়েন সাঙের বৃত্তান্ত পড়িতে হয়।

—তার কারণ নিজের ধর্ম, সমাজ সম্বন্ধে বই লেখা যেতে পারে, কিন্তু সমগ্র ভারতবর্ষ সম্বন্ধে বড় বড় মন্তব্য করে বই লেখা যায় না, অনেক ইংরাজ আমেরিকান সাংবাদিক পয়সার জন্ত অথবা ভারতবর্ষকে হেয় করবার জন্ত অনেক বই লিখেছে, তুমি ত তা করবে না আর্থার ?

—আমি ভারতবর্ষ সম্বন্ধে বই লিখিতেছি বলিলে ঠিক হবে না, এ হচ্ছে ভারতবর্ষকে আমার বুদ্ধি হৃদয় দিয়ে ব্রহ্মবার চেষ্টা, তার ধর্ম, সভ্যতাকে, বইখানার নাম Soul of India হবে।

গেলাসে সোড়া ঢালতে ঢালতে কনক হেসে উঠল, Soulকে খুঁজে পেয়েছ কি ? ওই কথাগুলি হচ্ছে তোমাদের সম্মোহন বাণ, একেই ত আমরা ধর্মের গাঁজা খেয়ে বুঁদ হয়ে আছি—

—সেজ্ঞ স্বচ হইলি দিয়ে নেশা কাটাবার চেষ্টা করছ !

—ঠিক বলেছ, আজ পৃথিবী জুড়ে ইয়োরোপীয় সভ্যতার শক্তি সম্পদ

দেদৌপামাম, ভারতবর্ষ যদি সেই সভ্যতাকে, এই যন্ত্র-শক্তি, বৈজ্ঞানিক ব্যবস্থাকে সম্পূর্ণভাবে গ্রহণ করতে পারে, তবেই সে বাঁচবে।

—তোমার মত শিল্পীর নিকট হতে এ কথা আশা করি নাই।

—শিল্প কি আমাদের রক্ষা করতে পারল? লৌহ-যন্ত্র কি জয়ী হল না? জয় যন্ত্র! জয় যন্ত্র!

এক চুমুকে গেলাস শূন্য করে কনক চাঁচিয়ে উঠল, শোন যন্ত্রের জয়ধ্বনি—ঝক্ ঝক্, ঘব্ ঘব্, ঘড়্ ঘড়্ চলেছে—গরুর গাড়ীর চাকার স্রুর আপনার কাছে যতই মধুর লাগুক মিষ্টার গ্রেগরি—

—কিন্তু যন্ত্র-দানবের তাণ্ডব নাচের প্রলয়ধ্বনি আপনি শোনেন নি—বিগত মহাযুদ্ধে আমি ফ্রান্সারসের যুদ্ধক্ষেত্রে ছিলাম—

—তুমি যুদ্ধে ছিলে, তোমার বয়স তখন খুব অল্প হবে।

—হাঁ, বয়স ভাঁড়িয়ে আমি গেছিলাম। যৌবনের রঙীন আদর্শবাদে অনুপ্রাণিত হয়ে ভাবিয়াছিলাম, এই পৃথিবীর শেষ যুদ্ধ, তারপর মানব সভ্যতার নবযুগ আরম্ভ হইবে, জাতিতে জাতিতে প্রীতি, দেশে দেশে শান্তি কল্যাণ প্রতিষ্ঠিত হইবে—তার জগ্রে প্রাণ দিতে প্রস্তুত ছিলাম।

—তোমার মত কত যুবক প্রাণ দিয়েছে, তারা শুধু দেশরক্ষার জগ্ৰ, সাম্রাজ্যরক্ষার জগ্ৰ যায়নি; মানব সভ্যতার এক নূতন যুগের জন্ম দেবার জগ্ৰ তারা পৃথিবীকে নিজেদের রক্তে রাঙা করেছিল।

—কিন্তু ফল কি হ'ল! পেশাদার রাজনৈতিক নেতাদের চক্রান্ত আরও কুটিল হয়েছে, জাতীয় দম্ভ আরও ভয়ানক, শক্তিলোপতা আরও তীব্র, শ্রেণীগত স্বার্থপরতা আরও উগ্র হয়েছে—যুদ্ধের ঝঙ্কা আসন্ন।

গ্রেগরি অতি গম্ভীরভাবে বল্লে, ভগবান ইয়োরোপকে রক্ষা করুন, আগামী যুদ্ধ যে কি ভয়ানক হইবে, আমি কল্পনা করিতে পারি না।



—কেস্টিজে তুমি ত প্যাসিফিষ্ট ছিলে।

—এখনও আছি। তবে কোন বিশেষ মতকে ধরে থাকতে আমি চাই না। আসল কথা, যুদ্ধ কোরবো না বলিলে ত হবে না। যুদ্ধ যাহাতে করিতে না হয়, যুদ্ধ করা প্রয়োজন না হয়, পৃথিবীর সেরূপ ব্যবস্থা করিতে হইবে।

—সে ব্যবস্থা কি করে হবে ?

—প্রথমত আমাদের মনকে তৈরী করিতে হবে, জাতির প্রতি জাতির মনোভাব বদল হবে—moral armament—

—কথাটা আগে কোথায় শুনেছি, খুষ্টের প্রেম-নীতিরই নূতন সংস্করণ করতে চাও।

বোতলটা নিঃশেষ গেলাসে ঢেলে কনক বল্লে, মিষ্টার গ্রেগরি, আপনি এতদিন ভারতবর্ষে না ঘুরে যদি ইয়োরোপে ঘুরতেন আপনার প্রেমের বাণী প্রচার করে, এই আসন্ন যুদ্ধ আপনি ঠেকাতে পারতেন মনে হয় ?

গ্রেগরি চমকে উঠল। প্রশ্ন করলে, যুদ্ধ কি বাধছে ? আমি কয়েকদিন খবরের কাগজ পড়িনি। একটা দূরে গ্রামে গেছিলাম।

—কাগজ পড়নি ?

—না, খবরের কাগজ পড়িতে শুধু বিরক্তি নয়, কেমন বেদনা অনুভব করি। কাগজগুলিতে থাকে বুড়ি-ভরা মিথ্যা—নিজ দলের প্রপাগাণ্ডা, আমার হাতে শক্তি থাকিলে আমি খবরের কাগজের রূপ বদলে দিতাম।

—দেখ, তুমিও শক্তিকামী হয়ে উঠছ।

—আচ্ছা, আজ নতুন খবর কি আছে কাগজে ?

—পোল্যান্ডের কাছে জার্মানী যা দাবী করেছে, তার উত্তর দেবার সময় বোধ হয় এতক্ষণে শেষ হয়ে এল—তারপর জার্মানী পোল্যান্ড আক্রমণ করবে স্থনিশ্চিত।

গ্রেগরি উত্তেজিত হয়ে বলে, তাহলে ইংলণ্ড তাহার সৰ্ত্ত রাখিবে, তাহার কর্তব্য করিবে—

কল্যাণ হেসে বলে, তাহলে দেখছ আর্থার তুমি শান্তিবাদী নও, যুদ্ধবাদী, অর্থাৎ বন্দুক কামান নিয়ে যুদ্ধ করে সমস্কার সমাধান করতে চাও, ত্রায় প্রতিষ্ঠিত করতে চাও, মহাত্মা গান্ধীর মত নিরপ্স ধর্মযুদ্ধ নয়।

—ওখানে আমি গান্ধীকে বুঝিতে পারি না।

টেবিলে গেলাস ঠুকে কনক বলে, তাহলে আপনি ভারতবর্ষকেও বুঝতে পারবেন না। সত্যিকথা বলতে কি, আমিও বুঝতে পারি না। তুমি পার ঘোষ ?

কল্যাণ কোন কথা বলে না। সিগারের বাত্ম থলে তাদের সামনে ধরলে, তারপর নিজে একটা সিগারে অগ্নি সংযোগ করলে।

বাংলার উন্মুক্ত প্রান্তর দিয়ে ট্রেন ছুটে চলেছে। আকাশে থণ্ড থণ্ড মেঘ, চাঁদ ঢাকা পড়েছে। ঘেন অন্ধকার রাতে দৈত্যের দল মশাল জ্বলে হুঙ্কার করে ছুটে চলেছে।

ড্রাইভার ড্রামণ্ড এতক্ষণ সার্জলাইট-আলোকিত লৌহবস্ত্র দেখছিল। জাতিতে স্কচ; হাইল্যাণ্ডে এক পার্কতা গ্রামে তার বাড়ী। বাড়ীতে বুড়ি মা আছে। তার স্ত্রীও মার সঙ্গে বাস করছিল, একমাস হল হেলেন লগুনে এসেছে, কার সঙ্গে লগুনে আছে লেখেনি, নিশ্চয়ই ওগিলভির সঙ্গে। ব্যাপারটা ভাইভোর্স কোর্টে শেষ পর্যন্ত না গড়ায়। গত মেলে হেলেনকে সে লিখেছে, ছুটির জন্ত দরখাস্ত করেছে। কিন্তু ছুটি পাবার এখন সম্ভাবনা নেই। হেলেনকে ভারতবর্ষেও সে

আনতে চায় না। বাংলার গগনচুম্বী অব্যাহত মাঠের মধ্যে স্কটল্যান্ডের গিরিচূড়া, বনভূমি, হ্রদের ছবি জেগে উঠল ড্রামণ্ডের চোখে। সহকারী ইঞ্জিনচালককে সে বলে, তুমি চালাও। তার চোখ ঝাপসা হয়ে আসছে।

ঘননীল সাট-পরা, আস্তিন-গোটান, মাথায় কালো বেরে-টুপি, অ্যাংলো-ইণ্ডিয়ান যুবকটি এগিয়ে বসল। কুলীকে বলে, বয়লারে কয়লা ঢালতে।

বর্দ্ধমান বাবার রাজপথ দিয়ে একটি গরুর গাড়ী চলেছে, ভারতবর্ষের পথপ্রান্তর জুড়ে লক্ষ লক্ষ গরুর গাড়ী যেমন ভাবে চলে তেমনি মন্তরগতিতে এঁকে বেঁকে চলেছে। রাজা গণেশ যখন বাংলার রাজা তখন গ্রামের পথ দিয়ে গরুর গাড়ী যেভাবে যেত, সম্রাট আকবর যখন দিল্লীর সিংহাসনে অথবা মুর্শিদ কুলি খাঁ যখন মুর্শিদাবাদে স্তবেদার তখন বর্দ্ধমানের এই পথ দিয়ে রাতের অন্ধকারে গরুগুলি যেমন ঘুমের ঘোরে গাড়ী টানত, চাষা-চালক যেমন ঝিমোতে ঝিমোতে গাড়ী চালাত, তেমনি তন্দ্রা-ভরা চোখে পথের দিকে না চেয়ে গরুগুলি পিঠের বোঝা টানতে টানতে সামনে এগিয়ে চলেছে; মাঝে মাঝে গাড়ীতে বোঝাই-করা খড়ের গন্ধে চঞ্চল হয়ে জোরে ছুটছে, আবার মন্দগতিতে চলেছে; হঠাৎ ঝাঁকুনি খেয়ে চালকটির ঘুম মাঝে মাঝে ভেঙ্গে যাচ্ছে, গরুগুলিকে গালাগাল দিয়ে সে আবার খড়ের গাদায় ঠেস দিয়ে আরামে ঝিমোচ্ছে। ষ্টিভেন্সন্ যে ষ্টীম ইঞ্জিন তৈরী করেছেন, আমেরিকায় এডিসনের জন্ম হয়েছিল, ফোর্ড মোটর গাড়ী নির্মাণ করেছেন—পৃথিবীর এসব ঘটনা বাংলার এ গরুর গাড়ী চালকের জীবন-ব্যবস্থার কোন পরিবর্তন করতে পারে নি। রাতের অন্ধকারে তারার আলোয় সে সনাতন গরুর গাড়ীতে বসে ঝিমোচ্ছে, গরুর গাড়ী চলছে মন্দগতি।

চাষাটির নাম গদাধর মণ্ডল। সে শুধু ঝিমোচ্ছে না, সে ঝিমোতে ঝিমোতে ভাবছে। সে ভাবছে টাকার কথা। গায়ে জাপানী ছিটের হাত-কাটা ফতুয়া, পরণে হাটে-কেনা আট-হাতি বোন্ধে মিলের মোটা ধুতি; হাতে একটা লাঠি গোঁজা। খড়গুলি বেচতে সে বর্দ্ধমান চলেছে।

গদাধর ভাবছে, খড় বেচে সে কত টাকা পেতে পারে। ষ্টেশনের কাছে এক দোকান আছে, সেখানে বেচলে কিছু বেশী পাওয়া যেতে পারে, তিন চার আনা বেশী ত হবেই, কিন্তু সেদিকে যাওয়া চলবে না। সেদিকে রামহরি পোদ্দারের দোকান, তার কাছে ধার রয়েছে ; খড়ের গাড়ী দেখলে আটক করে বসতে পারে। খড়গুলি রাতারাতি বেচে বর্দ্ধমান ছাড়তে পারলেই সুবিধে : রামহরির সঙ্গে আবার পথে দেখা হয়ে না যায় !

অথচ উকিল বাবুর সঙ্গে একবার দেখা করে না আসতে পারলে হবে না। সালিশী-বোর্ড ব্যাপারটা সে ঠিক বুঝতে পারছে না। সেটা নাকি খুব সুবিধের, দেনার টাকা কিছুই দিতে হবে না, শুধু একটা দরখাস্ত হাকিমের কাছে,—দেখাতে হবে তার কিছুই নেই। এদিকে উকিল বাবু দেড় টাকার কম কথা কইবেন না বলেছেন। তা হলে ত খড় বেচে—

গাড়ীর চাকা এক গর্তে পড়ে যাওয়াতে গদাধর ঝাঁকুনী থেয়ে চোখ মেলে চাইলে, গরু দু'টোকে গালাগাল দিয়ে উঠল।

গরুর গাড়ির পর গরুর গাড়ি পার হয়ে গণেশ হালদার তার মোটরকার হাঁকিয়ে চলেছে। সুবৃহৎ নীল নতুন-কেনা মোটরকার, লম্বা স্ফটিক বনেট গুণ্ডারের দাঁতের মত ; রাত্রের আলোছায়ায় গাড়ীটাকে কালো দেখাচ্ছে, যেন একটা বগুবরাই ক্ষেপে ছুটে চলেছে।

গণেশ সাধারণতঃ নিজে গাড়ী চালায় না। কারণ সে আস্তে গাড়ী চালাতে পারে না। মোটরগাড়ী যদি ঘণ্টায় ষাট সত্তর মাইল

বেগে না যায়, তা'হলে ঘোড়ার গাড়ীর সঙ্গে প্রভেদ রইল কি ! বর্তমান জগতে বাঁচতে হলে জীবন উপভোগ করতে স্পীড্ চাই, এই তার মত । শাস্ত ছন্দে মধুর ভাবরসাবিষিক্ত হয়ে চলা নয়, চাই উদ্দাম গতি, নটরাজের নৃত্যের ছন্দ, বজ্রার স্রোতের মত উচ্ছল চঞ্চল জীবন ।

গণেশকে টাকা রোজগার করতে হয়নি । তার পিতৃপিতামহগণ পাঁচ পুরুষ ধরে যে টাকা জমিয়ে গেছেন, বহুবৎসরসঞ্চিত ধনরাশি সে এখন স্পীডের সঙ্গে খরচ করে চলেছে । সে বলে, live intensively, live dangerously—অনুভব কর, তুমি বেঁচে আছ বর্তমান যুগে ।

গণেশকে দেখলে লক্ষপতি যুবক বলে মনে হয় না । লম্বা পাংলা, চুলগুলি উস্কেথুস্কে, মাথার মাঝখানে টাকের আভাস ; চওড়া কপালে কয়েকটি ক্ষতের চিহ্ন ; লম্বা ফোলা মুখ শুকনো, যেন রক্তহীন ; মাঝে মাঝে গণ্ডে যে দীপ্তি দেখা যায়, সেটা অস্বাভাবিক কারণে ; কালো কাচ-ভরা সোণার ফ্রেমের চশমা, দুই ঠোঁটের প্রাস্তরেখা কালো হয়ে গেছে, মুখের বাদিকে একটা সিগারেট সব সময়ই জ্বলছে । স্থূলদেহ, অত্যধিক বিয়ার পানের ফল । গায়ে সিন্ধের গলা-খোলা সাট অথবা লংক্লথের পাঞ্জাবী ; পরণে দেশী জরি-পাড় ময়লা ধুতি, জরি-পাড় দেশী ধুতি ছাড়া সে পরে না, কিন্তু সব সময় ময়লা ; পায়ে মাদ্রাজী শ্রাণ্ডেল ।

কলিকাতার পথে সে নিজে গাড়ী চালায় না । তা'ছাড়া তার গাড়ী বন্ধুবান্ধবেরা প্রায়ই নিয়ে চলে যায়, তাকে ঘুরতে হয় ট্যাক্সিতে ।

সে সন্ধ্যায় গণেশ নিজে গাড়ী চালিয়ে চলেছে, তার কারণ, সুপ্রসিদ্ধা অভিনেত্রী মধুরা শিপ্রা তার সঙ্গিনী । শিপ্রাকে নিয়ে সে বোম্বে চলেছে ।

ইতিহাসটি এইরূপ : কোন বন্ধুর প্রমোদ উদ্দানে নিশীথ উৎসবে

শিপ্রাকে নাচতে দেখে গণেশ মুগ্ধ হয়ে গেছিল। শিপ্রা সুন্দরী নয়, রং কালো, মেয়েরা যাকে বলে, উজ্জল শ্যামবর্ণ। কিন্তু মুখচোখের গঠন বড় নিখুঁত, পাথরে খোদাই-করা গ্রীকমূর্তির মত, প্রতি রেখা উজ্জল, স্পষ্ট; দীর্ঘ তন্তুলতা, কখনও পদ্মনালের মত হুয়ে পড়ে, কখনও অগ্নিশিখার মত কাঁপে।

শিপ্রাকে গণেশ পেলে না। কোন বড় কোম্পানীর ডিরেক্টরের প্রেমাস্পদা সে। গণেশ বুঝলে, এর মধ্যে ব্যবসাদারি আছে। মুগ্ধতা আরও গভীর হয়ে গেল।

ইতিমধ্যে বোম্বের কোন সিনেমা-কোম্পানী এক নতুন ফিল্মে অভিনয় করবার জন্য শিপ্রার সঙ্গে চুক্তি করেছে। কলিকাতা হতে মস্ত দল যাচ্ছে। ট্রেনে যাবার ব্যবস্থা হয়েছে।

গণেশ শিপ্রাকে বলে, চলো আমার সঙ্গে, মোটরকারে তোমায় বোম্বে পৌঁছে দেব।

শিপ্রা প্রথমে রাজী হয়নি। গণেশ বলে, আচ্ছা, এই নতুন মোটরকার, তুমি যদি এ গাড়ী করে যাও আমার সঙ্গে বোম্বে পর্যন্ত, এ গাড়ী তুমি উপহার পাবে।

শিপ্রা ভাবলে, ফিল্ম কোম্পানীর সঙ্গে চুক্তি ত হয়ে গেছে; ম্যানেজারের ব্যবস্থা অন্তসারে যে ট্রেনেতেই যেতে হবে, তার কোন কারণ নেই। কাউকে না জানিয়ে সে গণেশের সঙ্গে চলে গেল বারাকপুরের বাগান বাড়ীতে। বোম্বেতে ঠিক সময়ে পৌঁছে সবাইকে অবাক করে দেবে। ইতিমধ্যে চারিদিকে খোঁজাখুঁজি চলুক। কাগজে বাহির হোক, চুক্তিপত্র সই করে অভিনেত্রী অন্তর্হিত।

গাড়ীর গতি কমিয়ে গণেশ বলে, সিগারেটটা আবার নিভে গেল, ধরিয়ে দাও ত।

শিপ্রা বলে, ওটা ফেলে দাও, একটা নতুন ধরিয়ে দিচ্ছি।

—দেখ ত, পকেটে সিগারেট আছে কিনা।

গণেশের পকেটে সব সময় একটা বড় গোল সিগারেটের টিন ও দেশলাই থাকে।

সিগারেটের টিন বাহির করে শিপ্রা বলে, দুটো আছে।

—আচ্ছা, ওইতেই চলবে। বর্ধমান আর বেশীদূর হবে না।

গণেশ গাড়ীর গতি আরও বাড়িয়ে দিলে। শিপ্রা দেখলে, গতি-জ্ঞাপক যন্ত্রের কাঁটা ষাট হতে সত্তর সংখ্যার মধ্যে ঢুলছে। তার বুক কাঁপছে।

—আন্তে চালাও বাপু!

—কেন?

—দেশলাই জ্বালতে পারছি না।

—ভয় করছে তোমার?

শিপ্রা কোন উত্তর দিলে না।

গণেশ গাড়ীর গতি কমিয়ে দিলে, কাঁটা ত্রিশের দাগে নেমে এল।

অর্দ্ধদণ্ড সিগারেটটা ফেলে দিয়ে গণেশ হেসে উঠল।

—Live dangerously, বুঝলে শিপ্রা, তবে জীবনে থ্রিল পাবে—

—ইচ্ছে করে বিপদ ডেকে আনার ত কোন মানে বুঝি না।

—তাহলে ট্রেনে আরামে ঘুমোতে ঘুমোতে গেলেই ত হত।

সারারাত জেগে যেতে হবে আমার সঙ্গে, দেখ না, আসানমোলটা পার হই, তারপর কি রকম স্পীড্ দেব—

—কত?

—এ গাড়ী ঘণ্টায় আশি নব্বই মাইল সহজে যেতে পারে।

—অর্থাৎ মেলট্রেনের চেয়ে জোরে, মিনিটে দেড় মাইল!



—ভয় করছে শুনে ? আচ্ছা, চলো আজ সারারাত, তারপর গতির  
নেশা তোমায় পেয়ে বসবে, তখন আস্তে যেতেই পারবে না—

—না বাপু, আমার কেমন দম আটকে যায়। এই নাও সিগারেট।

—বর্ধমান গলাটা ভিজিয়ে নিতে হবে, বড় তেষ্ঠা পেয়েছে।

সোণার কঙ্কণ ঘুরিয়ে শিপ্রা গণেশের মুখের দিকে চাইলে।

এই অদ্ভুত লক্ষপতি যুবক অথকে তুচ্ছজ্ঞান করে, প্রাণেরও মায়া  
করে না ; সে স্তূপের সন্ধান ঘোরে অথচ স্তূথ চায় না, জীবনটা হৈঁঠে  
করে কাটাতে চায়।

সে কেন বিবাহ করে না ? বিবাহ করে সংসারী হলে সে সুখী  
হবে। গণেশের জন্তু শিপ্রার কেমন মমতা জন্মে গেছে। একথা বললে,  
লোকে হাসবে, বলবে, এ শিপ্রার বড় রকম ব্যবসাদারি চাল।

মোটর গাড়ীর তীব্র দীর্ঘ আলোকে সম্মুখের পথ সমুজ্জল ; দূরে এক  
গরুর গাড়ীর সোণালী খড়ের গাদায় সে আলো ঝলমল করছে।

শিপ্রা ভয়ে চোঁচিয়ে উঠল, দেখ দেখ সামনে ওটা কি ? কি একটা  
হলদে—বোধ হয় গাছ—হর্ণ দাও—

—খড়ের বোঝা, গাড়ীটা দেখা যাচ্ছে না—হর্ণ দিলে গরুগুলো  
ভড়কে যেতে পারে।

গণেশ গাড়ীর গতি কমালে না। গরুর গাড়ীর পাশ দিয়ে সে  
জোরে বেরিয়ে চলে যাবে।

গদাইয়ের খড় বোঝাই গরুর গাড়ী এঁকে বঁেকে চলেছে। সোণালী  
খড়ের স্তূপ মোটরগাড়ীর আলোয় অপরূপ দেখাচ্ছে।

মোটরকার গরুর গাড়ীর কাছাকাছি এসেছে। গণেশ ঠিক করলে  
বাঁ দিক দিয়ে বেরিয়ে যাবে। গরুগুলো চমকে উঠে জোরে ছুটেছে।  
গণেশ বাঁ দিকে গাড়ী ঘোরাল ; গরুর গাড়ীও তার সামনে এসে পড়ল,

পথের বাঁ দিকে ; পাশে হয়ত যাবার রাস্তা আছে, অন্ধকারে বোঝা যাচ্ছে না। প্রাণপণে ব্রেক-টেনে গণেশ আরও বাঁ দিকে গাড়ী ঘোরাল।

পথপার্শ্বে বৃহৎ মহীকহ। তার কালো শক্ত গুঁড়িতে বনেট জোরে ধাক্কা মারলে ; প্রাচীন বনম্পতি অটল দাঁড়িয়ে রইল। মোটরগাড়ী ঝন্ঝন্ শব্দে কঁপে উঠে থেমে গেল। সামনের চাকা কাদায় ডুবে গেছে। গাড়ী কাং হয়ে পড়েছে, আলো নিভে গেছে, ইঞ্জিন স্তব্ধ। ঝিল্লীরবে মুখরিত অন্ধকার, রাত্রির ছায়া চারিদিকে ঘিরে এল।

ডাম্—বলে গণেশ ব্রেক ছেড়ে হাত ঝাড়তে লাগল। কজিছুটো ঝন্ঝন্ করছে। এবার বাহির হবার চেষ্টা করতে হবে। উঠতে গিয়ে সে অনুভব করলে তার কাঁধের ওপর একটা নরম বোঝা। একটু ঘুরে বসতেই, শিপ্ৰার স্নন্দর দেহ তার বুকের ওপর লুটিয়ে পড়ল বাণবিন্ধ্য পক্ষিণীর মত।

—শিপ্ৰা !

কোন উত্তর নেই।

গণেশ ভাবলে, শিপ্ৰা মূর্ছিতা হয়নি ত ? শিপ্ৰার দেহ ধরে নাড়া দিলে। তপ্তপ্রশ্বাস তার হাতের ওপর পড়ল।

—শিপ্ৰা !

কোন উত্তর নেই, শুধু একটা চাপা হাসির শব্দ।

গণেশ শিপ্ৰাকে বুকে জড়িয়ে ধরলে। চারিদিকে কি গভীর স্তব্ধতা, কি নিবিড় রহস্যময় অন্ধকার ! ঝোপে জোনাকীর দল, আকাশে তারা-গুলি রিমঝিম করছে।

ইতিমধ্যে ড্রাইভার শোভনলাল গাড়ীর দরজা খুলে কোন রকমে বাহির হয়েছে। সে পেছনে বসেছিল।

—হুজুর, কোন চোট লাগেনি ত ?

শোভনলালের কণ্ঠস্বরে গণেশ চমকে উঠল ।

—না, শোভন, আমরা অল্‌রাইট !

—তাহলে ওই গাড়োয়ান বেটাকে ধরে নিয়ে আসি ।

গণেশ স্তব্ধ হয়ে বসে রইল । শিপ্‌রার বুক ধক্-ধক্ করছে । জীবনে এসব মুহূর্ত ক'টাই বা আসে !

চাঁদের মৃদু আলোকে খড়-বোঝাই গরুর গাড়ীর মস্তুর গতি বড় সুন্দর ।

রেক্সোর্‌-গাড়ীর খাবার টেবিল হতে একটা অর্দ্ধদণ্ড সিগার তুলে নিয়ে গ্রেগরি বসে, আচ্ছা ভারতবর্ষে কত গরুর গাড়ী আছে, বলিতে পারেন রায় ?

সিগারে অগ্নি সংযোগ করে কনক বসে, এ সম্বন্ধে ভারত গভর্নমেন্টের নিশ্চয় রিপোর্ট লেখা আছে, তবে আমার জানা নেই ।

—আমি এক বইতে পড়িয়াছি ভারতবর্ষে পঁচিশ লক্ষ গরুর গাড়ী আছে ।

কল্যাণ হেসে বলে, কনকের মত হচ্ছে, এই পঁচিশ লক্ষ গরুর গাড়ী লুপ্ত হয়ে যেদিন পঁচিশ লক্ষ মোটর গাড়ী ভারতের পথপ্রান্তর জুড়ে মস্তবেগে ঘুরে বেড়াবে, সেদিন ভারতবর্ষ সভ্য স্বাধীন হতে পারবে ।

—অর্থাৎ ভারতবর্ষকে আমেরিকা করে তোলা ।

—ভারতের অনাদিকালের সনাতন আত্মার কি হবে ?

—ঠাট্টা করবেন না। ভারতের আত্মা নব কলেবর ধারণ করবে। বর্তমান যুগে ভারতবর্ষের বিশেষ কাজ আছে। গত দু'মাস এক গ্রামে গিয়ে বাস করছিলাম, সেখান থেকে নিকটবর্তী রেলওয়ে স্টেশন তিন দিনের পথ। নদীর ধারে অব্যবহৃত মাঠের মধ্যে ছোট গ্রাম। সেখানে খোলা আকাশের নীচে দীপ্ত সূর্যালোকে স্নিগ্ধ তারার আলোয় আমি যে গভীর শান্তি পাইয়াছি, ইয়োরোপের কোন গ্রামে আমি তা পাইনি। সেখানে এক বাড়লের সঙ্গে আলাপ হয়েছিল। এ গ্রামের এক রিপোর্ট লিখেছি, তোমাদের শোনাতে চাই।

—দেখ আর্থার, প্রাচীন ভগ্ন প্রাসাদের বা ভগ্ন মন্দিরের ধ্বংসস্তূপের একটা সৌন্দর্য আছে, যে শিল্পী তা আঁকতে আসে, যে পথিক দেখতে আসে, তার কাছে এসব সুন্দর, এমন কি জ্যোৎস্নালোকে অপরূপ মনে হতে পারে, কিন্তু যাদের সেই ভগ্নস্তূপের মধ্যে বাস করতে হয়, ভাঙা ছাদ দিয়ে দুঃখ দৈন্তের জলধারা যাদের মাথাঘষ অবিরাম ঝরে পড়ে, তাদের কাছে সব ভেঙে নতুন ইমারত বানানই যুক্তিযুক্ত মনে হয়, পশ্চিমের ঝোড়ো বাতাসে যে অট্টালিকা অটল থাকবে।

—তোমরা সব সময় ইয়োরোপের সঙ্গে তুলনা করে ভাব, এই হয়েছে মুশ্কিল।

—ঠিক বলেছ, ইংরাজ মাষ্টারদের কাছে আমরা যেমন সেক্সপিয়র ব্রাউনিং পড়েছি, অথবা সটহাও টাইপরাইটিং শিখিছি অথবা কি করে সাততলা বাড়ী বানাতে হয়, পোল করতে হয়, কলকারখানা চালাতে হয় জেনেছি, তেমনি ইয়োরোপের ইতিহাসের শিক্ষাও লাভ করেছি,—আইডিয়া, আইডিয়া হচ্ছে সব—ডেমক্রেসি, কম্যুনিজম্—যে জাহাজ ভরে তোমরা আমাদের মাল বেচতে এসেছ, সে জাহাজের পালের বাতাসে ইয়োরোপের আইডিয়ালও ভাসিয়ে এনেছ—

—কিন্তু ইয়োরোপের ইতিহাস এখনও শেষ হয় নি—কি লণ্ডভণ্ড শুরু হয়েছে ইয়োরোপে দেখিতে পাচ্ছ কি ?

—ও কথা বলে আমাদের ভোলাতে বা ঠেকাতে পারবে না।

—সেজ্ঞাঈ আমি ভারতবর্ষে এসেছি, এখানকার পণ্যের হাটে আমদানি রপ্তানির বাজারে নয়, আমি এসেছি তার ধর্মের মন্দিরে, জ্ঞানের প্রদীপ যেখানে জ্বলিতেছে, ভারতবর্ষ যেখানে নিত্যকালের অমৃতভাণ্ড নিয়ে বসিয়া আছে।

—তুমি বেশ সুন্দর বলতে পার, আর্থার। সিগারটা ধরাও।

—ভারতবর্ষে জন্মালে এমনভাবে বলতে না। আলোচনাটা এখন মূলতুবী থাক, বর্দ্ধমান স্টেশন বোপ হয় এল।

—আর এক পেগ্ হবে ?

—তার চেয়ে সঙ্গে একটা বোতল নিয়ে যাওয়া যাক, এত শীগ্‌গিরও ঘুম আসবে না।

—তেষ্ঠাও পাবে। ট্রেনে আমার ঘুম হয় না।

ট্রেন বর্দ্ধমান স্টেশনের প্ল্যাটফর্মে প্রবেশ করল।

রেন্তোর'—গাড়ীর বয়কে ডেকে কনক অর্ডার দিলে, এক বোতল ছইস্কি, তিনটে গেলাস ও ছ বোতল সোডার জল তাদের গাড়ীতে দিয়ে আসতে।

সিগার টানতে টানতে ত্রয়ী চল্ল তাদের গাড়ীর দিকে।

প্রেমদাসের সঙ্গে তখন দেবপ্রিয়ের তর্ক জমে উঠেছে।

বস্তুতঃ দেবপ্রিয় তর্ক না করে বেশীক্ষণ থাকতে পারে না

কারণ সে কোন জিনিষ মানতে রাজী নয়। তার মনে সত্যাহুসন্ধিৎসা যেমন প্রবল, যুক্তির শাণিত বাণগুলি তেমনি উত্তত—ভাবের রঙ্গীন কুহেলিকা সে সহ করতে পারে না। বুদ্ধির কষ্টিপাথরে সকল ভাব যাচাই করে নিতে চায়।

“প্রেমদাসের কথা” কিছুক্ষণ লেখার পরই আলোচনা শুরু হয়েছে। বিরিক্ষি প্রথমে আলোচনায় যোগ দিতে চেষ্টা করেছিল, কিন্তু দেবপ্রিয়ের বড় বড় ইংরাজী কথার মানে না বুঝতে পেরে, ওপরের এক বান্ধে আশ্রয় নিয়েছে। রাধাকান্ত মাঝে মাঝে এই দুই তর্কিকের দিকে বিস্মিত নেত্রে চাইছে। ওদের আলোচনা তার কাছে শুধু অবোধ্য নয় নিরর্থক। অল্প সময় হলে সে বাধা দিয়ে বলত, দর্শন ও শাস্ত্রের কুট আলোচনাই ভারতবর্ষের অবনতির কারণ, ভারতের প্রতিভাসম্পন্ন বুদ্ধিজীবী ব্যক্তিগণ বিজ্ঞানচর্চা না করে, দর্শন ও ধর্মের আলোচনা করে কাটিয়েছে, এখন তার ফল ভোগ করতে হচ্ছে।

তত্ত্বালোচনায় যোগ বা বাধা দেবার মত মন রাধাকান্তের ছিল না। সে ভাবছিল, ইয়োরোপে যদি সত্যই যুদ্ধ বাধে, তার সুবিধে হবে কি না। লোহার কলটা তাড়াতাড়ি সারান দরকার। বোম্বেতে খোঁজ করলে ভাল ইঞ্জিনিয়ারের সন্ধান পাওয়া যেতে পারে। না, এখন ইয়োরোপ যাওয়া হবে না। কোঁকের মাথায় সে পাসপোর্টটা নিয়ে বাহির হয়েছে। কলটা ভাল করে চালিয়ে তারপর সে আমেরিকা যাবে। দু’ লাখ টাকার জন্তে আটকে যাচ্ছে। এ কি কম আপশোষ! শেষে কি বাটলিওয়ালার কাছে গিয়ে ধার করতে হবে। কলের শেয়ার তাকে কিছুতেই দিতে চায়নি।

ইয়োরোপে যদি যুদ্ধ বাধে, গভর্নমেন্ট তার কল সারাবার ব্যবস্থা করে দিতে পারে। আর এই ধর্মঘট আইন করে বন্ধ করতে হবে,

গভর্ণমেন্ট তার লোহার কল নিয়েও নিতে পারে, তেল্লি পাটের কলে লাভ প্রচুর হবে।

সন্ন্যাসী বলছেন, দেখ দেবপ্রিয়, তুমি যে সমস্যা বলছ, তার একমাত্র সমাধান হচ্ছে—প্রেম।

প্রেম, প্রেম, বার বার এ কথা শুনে দেবপ্রিয়ের বিরক্তি ধরে গেছে। কবিরাজী সর্বজ্বর বিনাশক বটিকার মত, সকল ক্ষতের মহৌষধি প্রলেপের মত, সকল প্রশ্নের উত্তরে প্রেমদাস বলেন, প্রেম ছাড়াও অন্তরে, প্রেম বিলাও জগংজনে।

দেবপ্রিয় বলে, ‘প্রেম’ কথাটা আপনি বার বার ব্যবহার করছেন, প্রেমের অর্থ কি? প্রেম কি? define করুন।

—এই ইংরাজী-পড়া বিড়ে আরম্ভ করলে। এ যে অন্তর্ভূতির ব্যাপার দেবপ্রিয়, অন্ধকার রাতে বসে তুমি যদি বলো, প্রভাতসূর্য্যের সোনার আলো কিরূপ বলুন,—সাধনা ভিন্ন এ ত জানতে পারবে না, এ যে বোধের ব্যাপার, বুদ্ধির অগম্য, বৈষ্ণবশাস্ত্রে বলে—

—বৈষ্ণব শাস্ত্রে কি বলে আমি জানি, আপনি কি বলেন, শুনতে চাই।

—তুমি জান না, তাহলে এ প্রশ্ন করতে না। মানুষের মধ্যে নানা কামনা, বাসনা রয়েছে—

—তাদের মধ্যে দুটি কামনা সবচেয়ে প্রবল, ইংরাজীতে বলে কথাটা স্পষ্ট হয়—Sex and Property.

—অর্থাৎ সৃষ্টিরক্ষার জন্ত নারীরূপিণী প্রকৃতির সুন্দরী মায়া, আর স্থিতির জন্ত শক্তি ও সম্পদসঞ্চয়। কি বল?

—শেষটা বলেন না, নারীর জন্ত, সম্পদের জন্ত শক্তির সংঘাত—  
প্রলয়! সংগ্রামটা আপনি বাদ দিতে চান।

—তুমি যাকে সংগ্রাম বলছ, আমি বলব লীলা—শিব ও শক্তির লীলা—

রাধাকান্ত ক্ষুর চক্ষে সন্ন্যাসীর দিকে একবার চাইল। লীলা ! করতে হত টাকা বোজগার, চালাতে হত লোহার কল, ধর্মঘট ভাঙতে হত—তাহলে বুঝতে লীলা কাকে বলে ! দু’ লাখ টাকা আনতে পার !

কথাগুলি যে সে আপন মনে উচ্চ স্বরে বলে উঠল, সে জ্ঞান তার ছিল না। দেবপ্রিয় বলে, প্রেমের লীলা নয়, এটা ঠিক। রাজশক্তির সঙ্গে প্রজাসংঘের, ভূম্যধিকারীর সঙ্গে কৃষকের, ক্যাপিটালিষ্টের সঙ্গে শ্রমিকের, জাতির সঙ্গে জাতির সংগ্রাম চলেছে—

বিরিক্তি বান্ধে উঠে বসল। ধর্মের গভীর কথা হচ্ছে। এ সব সে বোঝে না। ছোকরাটি অত্যধিক বাচাল, নিজে খুব জানে ও বোঝে এ কথাই প্রমাণ করতে চায়। আরে বাপু, পণ্ডিত হতে পার, গাদা গাদা বই পড়তে পার, কিন্তু ভক্তি না হলে কোন জ্ঞানই হবে না। বিশ্বাসে মিলায় কৃষ্ণ তর্কে বহুদূর।

বিরিক্তি আবার শুয়ে পড়ল। পেটে কেমন বাথা বোধ করছে। কয়েকমাস আগে তার ভয়ানক অসুখ করেছিল, পেটে অসহ্য যন্ত্রণা, নাড়ীগুলি যেন নীচে নেমে যেতে চায় ! এ্যালোপ্যাথিক ডাক্তারেরা কেউ বলে টিউমার, কেউ বলে ক্যানসার। কাটতে হবে। বিরিক্তি রাজী হ'ল না। কারণ খরচ যা হবে, হিসেব করে দেখা গেল, সে টাকায় বিরিক্তির ছোট মেয়ের বিবাহ হয়ে যায়। মরতে ত হবেই একদিন। অনুঢ়া কন্যা নিয়ে বেঁচে থাকার চেয়ে ঘটা করে চিকিৎসা না করে মরাই যুক্তিযুক্ত। ডাক্তারেরা কেউ বলতে পারছে না, রোগটা কি, ঠিক সারবে কি না। সস্তার কবিরাজী চিকিৎসা করে সে সেরে গেল। খুব সস্তার চিকিৎসা নয়, দুধ, ঘি, পোলাও হ'ল



পথ্য। বৃদ্ধ কবিরাজের ঔষধের গুণে পেটের ব্যথা ত গেলই, দেহে কোনরূপ ব্যথা বোঝবার শক্তিই প্রায় লোপ পেল। দাঁত ফোলে, কিন্তু কোনরূপ ব্যথার অনুভূতি নেই। জিহ্বায় রসাস্বাদের অনুভূতি নেই। ফজলি আম খাও বা রাবড়ি খাও বা দুধ সাবু খাও, সব একই আস্বাদ। হয়ত পেটে তার ব্যথা হয় কিন্তু ব্যথানুভূতির স্নায়ুগুলি অসাড় হয়ে গেছে বলে ব্যথা বোধ করে না। তাই মাঝে মাঝে মনে হয় ব্যথা হচ্ছে। কল্পনাও হতে পারে।

এবিষয়ে প্রেমদাস ঠাকুরের কাছে নিবেদন করে একটা ঔষধ নেবার তার বিশেষ ইচ্ছা। প্রেমদাস আশ্চর্য্যাকর দৈব ঔষধ জানেন। কিন্তু কথাটা বলবার স্বযোগ পাচ্ছে না। এ রাতে ঔষধ প্রার্থনা করবার কোন আশা নেই দেখে বিরিকি শুয়ে পড়ল।

শুয়ে সে ভাবতে লাগল কবিরাজের এ ঔষধ সেবনে কটু কষা তিক্ত সব স্বাদ এক হয়ে যায়; তেয়ি সন্ন্যাসী এমন মনের ঔষধ জানেন, যা পেলে জীবনের সকল দুঃখবোধ চলে যায়, সুখদুঃখ এক হয়ে যায়—কিন্তু সে যে সাধনার দরকার, ট্রেনে এক কথায় সে জিনিষ লাভ করা যাবে না—ঠাকুরের সঙ্গে সে যাবে দ্বারকায়—সেই অমৃত যদি লাভ করতে পারে। ছোকরাটা কি তর্কই করতে পারে!

দেবপ্রিয় তখন বলছে, দেখুন এ বিষয়ে আমার একটা থিওরি আছে। আমার মত হচ্ছে, বাস্তবকে মেনে নিয়ে সত্যরূপ জানতে আমরা চেষ্টা করি না—সেজ্ঞা আমরা মুক্তির ঠিক উপায় খুঁজে পাচ্ছি না,—সত্য হতে আমরা পালাতে চাচ্ছি সারাক্ষণ, আমাদের ইন্দ্রিয়ানুভূতির সত্য, মনের নানা বাসনা কামনার সত্য—আমরা সত্যকে মানতে চাই না, কল্পনার রঙে রঙীন, ভাবের মধুর রসে স্নিগ্ধ করতে চাই—ইংরাজীতে যাকে বলে escapist.

—যেমন সংসার থেকে পালিয়ে লোকে সন্ন্যাসী হয়, পথটা সহজ কিন্তু সত্য নয়, এই তুমি বলতে চাও।

—আমি বলতে চাই, তাতে সংসারের দুঃখ সমস্য়ার সমাধান হল না! এটা পালিয়ে জেতা।

—সুন্দর কথা বলেছ। এ বিষয়ে ভেবে তোমার সঙ্গে কাল কথা হবে। বর্দ্ধমান স্টেশন এল বোধ হয়।

ট্রেনের গতি মন্দ হয়ে এল।

দেবপ্রিয় দাঁড়িয়ে উঠে বসে, আমি চাই, অম্লান বুদ্ধি দিয়ে বাস্তবের সমীক্ষণ, সত্য কি জানা, তারপর উপায়ের সন্ধান। মানুষ আঘাত সহিতে রাজী নয়, স্থখের সন্ধানে সে মায়াবী সৃষ্টি করে কাল্পনিক স্থখ-লোকে আশ্রয় নেবার চেষ্টা করছে; দুঃখ ভুলতে মানুষ নেশা করে,—মদের নেশা, নারীর নেশা, টাকা জমাবার নেশা—কাব্য রচনা করে, ছবি আঁকে, নতুন নতুন আইডিয়ায় মেতে অদ্ভুত সমাজব্যবস্থা রাষ্ট্র-রূপের কল্পনা করে, সোশিয়ালিজম্, কম্যুনিজম্, ফ্যাসিজম্—পুরাতন ভাঙতে চায়, কিন্তু ভাঙার আগে দেখেনা সত্যিকার গলদ কোথায়, সে সত্যি কি চায়—সে জানে না।

ট্রেন থেমে গেছে। রাধাকান্ত দাঁড়িয়ে উঠেছে। দূরে রেস্টোরাঁ-গাড়ীর এক খাণ্ড-পরিবেশককে দেখে তার ক্ষুধা ও তৃষ্ণার বোধ প্রবল হয়ে উঠেছে। দেবপ্রিয়ের দিকে কটমট করে চেয়ে সে বলে, মাফ করবেন, মানুষ কি চায়, তা সে খুব স্পষ্টই জানে!

দেবপ্রিয় একটু খতমত খেয়ে চুপ করে দাঁড়াল। লক্ষপতি রাধাকান্তের সঙ্গে বাগ্‌বিতণ্ডা করতে সে রাজী নয়।

সন্ন্যাসী হেসে বলেন, আপনি কি চান বলতে পারেন?

মাথায় টুপি জোরে চেপে রাধাকান্ত বলেন, সে বলে কোন লাভ নেই আপনাকে, সন্ন্যাসীর গুণ বা ধর্মকথা নয়।

প্রেমদাস পলকহীন নয়নে রাধাকান্তের দিকে চাইলেন, তারপর ধীর কণ্ঠে বলেন, আপনি চান দু'লাখ টাকা, আপনি চান মিল চালাতে, ধর্মঘট ভাঙতে, কিন্তু তাতে আপনার শান্তি অথবা পৃথিবীর শান্তি হবে কি ?

গদি-ওয়ালা বেঞ্চে রাধাকান্ত আবার বসে পড়ল। সন্ন্যাসীর দিকে চাইতে তার সাহস হল না। লোকটা তার মনের কথা জানল কি করে ? অলৌকিক শক্তি আছে নাকি ? যদি অলৌকিক শক্তি থাকে, তাকে দু'লাখ টাকা জোগাড়ও করে দিতে পারে। সন্ন্যাসীকে ঠাট্টা করা উচিত হয়নি।

রাধাকান্ত আবার চুপ করে বসল। ক্ষুধাতৃষ্ণা ভুলে গেল। তার চোখের সামনে ভেসে উঠল লৌহের কলের বৃহৎ বাড়ী, শূণ্য, অন্ধকার ; ফারনেসে আগুন জ্বলছে না, চিম্নীতে ধূমের চিহ্ন নেই। দুইচোখ জলে ভরে এল।

প্রেমদাস মুহূর্তে দেবপ্রিয়কে বলেন, তোমায় বলেছিলুম এ লোকটি বড় অস্বার্থী।

সে কথা রাধাকান্তের কানে গেল না।

তিন বন্ধু যখন রেস্টোরাঁ-গাড়ী হতে এ গাড়ীতে এসে উঠল, তাদের পেছনে বয় মদ ও সোডার বোতল, গেলাস দিয়ে গেল, বেকিৎ এক কোণে রাধাকান্ত গুম হয়ে বসে রইল।

তারপর ট্রেন যখন একটু চলতে শুরু হয়েছে, হঠাৎ সে দাঁড়িয়ে উঠল, গাড়ীর দরজাটা তাড়াতাড়ি খুলে দিলে।

দেবপ্রিয় ভীতভাবে রাধাকান্তের দিকে চাইলে, লোকটা লাফিয়ে পড়বে নাকি !

এক যুবক লাফিয়ে গাড়ীতে উঠল, তারপর এক তরুণী ।

হাঁপাতে হাঁপাতে গণেশ বল্লে, বাবা এ যে ভরা গাড়ী !

শিপ্রা মাথা ঝাঁকুনী দিয়ে বল্লে, ভাগ্যিস চলন্ত ট্রেনে ওঠার  
রিহার্সেলটা ভাল করে দিয়েছিলুম ।

গাড়ীর পেছনের লম্বা বেঞ্চে তিন বন্ধু পাশাপাশি বসেছিল, তাদের  
দিকে অভিবাদনের ভঙ্গীতে মাথা একটু নত করে গণেশ বল্লে, বোধ হয়  
আপনাদের disturb করলুম,—মশাই, পথে যা accident হ'ল—  
তারপর পরশু সকাল থেকে ওঁর স্কটিং শুরু হবে—

পার্শ্বের বেঞ্চে সন্ধ্যাসীর স্থিরস্নিগ্ধ মূর্তি দেখে শিপ্রা লজ্জিত হয়ে  
উঠল । জর্জেট-শাড়ীর লাল জরির স্ফরাটী পাড় মাথায় টেনে দিলে ।  
গণেশের দিকে চেয়ে মিনতির সুরে বল্লে, চূপ করে বোসো, কি বক্ছো !

রাত বারটা বেজে গেছে।

বাংলার শস্যশ্যামল স্নিগ্ধ অব্যবহিত মাঠ ছাড়িয়ে ট্রেন ছুটে চলেছে ছোটনাগপুরের রক্তবর্ণ রুক্ষ তরঙ্গায়িত প্রান্তর দিয়ে। কোথাও গিরিসঙ্কুল সর্পিল পথ, কোথাও শাল বনের ঘন অন্ধকার, কোথাও গভীর খাদের তলে গিরিনিঝরিণীর রক্তধারা তমিস্রপুঞ্জে বিহ্বলতার মত।

তারা ভরা আকাশ ঝলমল করছে, যেন ঘননীল শাড়ী ভরে হীরার চুম্বকি। চারিদিকে অপূর্ণ স্তব্ধতা, তন্দ্রাহারা নিশীথিনী বাক্যহারা বসে; এ গভীর নৈঃশব্দ্যে ট্রেনের একটানা শব্দ একঘেয়ে কর্কশ স্বরের মত লাগছে।

সবিস্ময়ে শিপ্রা উঠে বসল। মুগ্ধ হয়ে চেয়ে রইল আলোছায়া খচিত রাত্রির দিকে।

আসানসোল পার হতে শ্রান্তিতে শিপ্রা একটু ঘুমিয়ে পড়েছিল। যখন হঠাৎ ঘুম ভাঙল, দেখে, শূন্য প্রান্তরের মধ্যে ট্রেন দাঁড়িয়ে আছে, অদূরে বনের গভীর অন্ধকার, অতিকায় দানবদলের মত কালো ছোট পাহাড়গুলি গুম্ হয়ে বসে, যেন রূপকথার দৈত্যপুত্রী, স্তব্ধ রাত্রির জ্যোৎস্না থম্‌থম্‌ করছে।

তার ভয় করতে লাগল। এ কোন্‌ অজানা জায়গায় সে একা!

গাড়ী অন্ধকার। টাঁদের স্নান আলোয় সব অক্ষুট রহস্যময়।

লম্বা কেবিনট্রাকের ওপর ঘুমন্ত গণেশের মুখে টাঁদের আলোর আভা। গণেশের মন্থপানরক্তিম শ্রান্ত মুখ তার বড় ভাল লাগল।

আশ্বস্ত হয়ে সে উঠে বসল। পথে মোটরকারে দুর্ঘটনা, চলন্ত ট্রেনে লাকিয়ে ওঠা, তার সব মনে পড়ল।

গাড়ীটি সে ভাল করে দেখলে।

আসানসোলে গ্রেগরি অগ্র গাড়ীতে চলে যাওয়াতে সে গ্রেগরির রিজার্ভ করা বার্থটি দখল করেছে। তার ওপরের বার্থে বিরিকির নাসিকান্থনি শোনা যাচ্ছে। সামনের বেঞ্চে সন্ন্যাসী এককোণে অচঞ্চল বসে, তিনি ঘুমোচ্ছেন না ধ্যান করছেন, বোঝা যাচ্ছে না। তাঁর ওপরের বার্থে রাধাকান্ত কোটপ্যাণ্ট পরেই শুয়ে পড়েছে। পাশের লম্বা বেঞ্চের এক কোণে কল্যাণ বসে ঝিমোচ্ছে; আর এক কোণে দেবপ্রিয় অর্ধশায়িত ভাবে, ঘুমোচ্ছে কি ভাবছে, বোঝা যাচ্ছে না, মনে হচ্ছে, ঘুমের মধ্যে মাঝে মাঝে তীক্ষ্ণ দৃষ্টিতে চাইছে; তাদের ওপরে কনক মণ্ডপানঘন নিদ্রায় স্থির।

ধীরে গাড়ী চলতে লাগল। শিপ্রার চোখে আর ঘুম এল না। আর ঘুমোতে ইচ্ছা করল না। এ স্তব্ধ রাত্রি, এ রহস্যময় গিরিভূমি, এ গতিবেগ, এ অন্ধকার গাড়ীতে ঘুমন্ত অজানা যাত্রীদের আবছায়া, তার বড় ভাল লাগল। মুগ্ধনেত্রে সে বাহিরে চেয়ে রইল; অন্তরে সে এক অপূর্ব শান্তি অনুভব করল। তার চঞ্চল আশ্রয়হীন কামনাতপ্ত অনিশ্চিত জীবনে সে কখনও ওরূপ শান্তি অনুভব করেনি।

গণেশের ঘুম-ভরা শান্ত মুখের দিকে সে একবার চাইলে, তাঁদের আলো সে মুখ থেকে সরে গেছে। কিন্তু সে আলো তার চোখে এ কি মায়াবর অঙ্গন লাগিয়ে দিল। ধীরে উঠে সে গণেশের মাথার বালিশটা ঠিক করে দিল। ইচ্ছা করলে, গণেশকে চুম্বন করে।

মুহূর্ৎ দীর্ঘনিশ্বাস ফেলে শিপ্রা আবার বসল। বড় স্নিগ্ধ তাঁদের আলো, যেন অশ্রুজলসিক্ত।

শিপ্রার মন ভারী হয়ে এল।

অন্ধকার গিরিবন্ধ দিয়ে ট্রেন সশব্দে উঠে চলেছে। গাড়ী অন্ধকার হয়ে এল। জানলা ফেলে সে শুয়ে পড়ল। তার আবার কেমন ভয় করছে।

সিঁদুরের মত রাঙা লালমাটি ছোট কালো পাতাড়ের সারি, শালবন, এ সব দেখলে তার মায়ের কথা মনে পড়ে যায়। ছোটনাগপুরের একটি ছোট জায়গায় তার মায়ের জীবনের শেষের দিনগুলিতে সে প্রাণপণে মায়ের সেবা করেছিল। কিন্তু বাঁচাতে পারে নি।

মা যে বাঁচেনি তাতে সে দুঃখিত হয় নি। তাঁর দুঃখের জীবন যে শীঘ্র শেষ হয়েছে, সে তাঁর ভাগ্য। যে সুন্দরী তরুণী প্রেমের মোহে খঞ্জ স্বামীর গৃহ ত্যাগ করে বাহির হয়েছিল, জীবনে সে শুধু প্রতারণা, লাঞ্ছনা পেল, স্বথ-মরীচিকার সন্ধানে ঘুরে সংসার মরুভূমির তাপে ক্লিষ্ট দগ্ধ হয়ে গেল, মৃত্যু ত তাহার বন্ধু।

মায়ের কথা ভাবলে, মায়ের উপর তার যেমন রাগ হয়, ঘৃণাও হয়, তেমনি করুণাও হয়।

তার জীবন যেন মায়ের জীবনের পুনরাবৃত্তি না হয়। সে অনেক জিনিষ ঠেকে শিখেছে। এ জীবন-যুদ্ধে সে একা। পুরুষ তাকে করুণা করবে না, ভালও বাসবে না, তার যোগ্যতা দেখে পুরস্কার দেবে। এ নারী বনাম পুরুষ যুদ্ধে প্রেমের কথা ভাবলে চলবে না, জীবনে প্রেমের স্থান নেই।

তবু, ভালবাসতে ইচ্ছে করে, ভালবাসা পেতে ইচ্ছা করে। ভালবাসার অভিনয় অনেক দেখেছে, অনেক করেছে। সত্যি ভালবাসা কি জানতে ইচ্ছে করে।

শিপ্রা আবার উঠে বসল। জানলার কাচ ফেলে দিলে।

বাহিরে রাত্রি বড় নির্জন, বড় শূন্য ।

বহুদিন পরে দুঃখিনী মায়ের কথা মনে হল কেন ?

মায়ের কথা ভাবতে ইচ্ছে করে না । স্বপ্নজাল বুনে ইচ্ছে করে ।

গণেশ যদি তাকে বিবাহের প্রস্তাব করে, তার আপত্তি নেই ।  
অভিনেত্রী-জীবন সে সম্পূর্ণরূপে ত্যাগ করবে না । গণেশ হয়ত  
রাজী হবে ।

কিন্তু গণেশ তাকে বিবাহ করবে কেন ? গণেশের নিকট সে  
ক্ষণিকের সখ, হয়ত ক্ষণিকের মোহ ।

এসব চিন্তা তার মনে কখনও হয়নি । সে কি গণেশকে ভাল  
বেসেছে ? বোধ হয় এই প্রেমের আরম্ভ । এ দুর্বলতা জয়  
করতে হবে ।

—তুমি, কঁাদছো কেন মা ?

সন্ন্যাসীর কণ্ঠস্বরে শিপ্রা চমকে উঠল ।

—আমি কঁাদছি ? না ?

—তবে, চোখে জল কেন ?

চোখে আঙ্গুল দিয়ে শিপ্রা দেখলে, চোখ দিয়ে জল বারেছে । কি  
একটা ব্যথা বুক ঠেলে উঠে বাহির হতে চায় ।

ক্রুদ্ধ হয়ে সে সন্ন্যাসীর দিকে চাইল । লোকটা কি এতক্ষণ জেগে  
তার দিকে চেয়ে বসেছিল নাকি ! গণেশকে যে সে আদর করেছে, তা  
বোধ হয় দেখেছে ।

—আমি ভেবেছিলুম, আপনি ঘুমোচ্ছেন ।



—সবাই যখন ঘুমোয়, তুমি কি তখন কাঁদো ?

—দেখুন, আপনি সন্ন্যাসী, আমাদের কান্নার কি বুঝবেন, কি জানবেন ?

—কান্নার সাগর পার না হলে, অমৃতের সন্ধান পাওয়া যায় না—  
আমাদেরও কি কম কাঁদতে হয় ?

—দেখুন, ওসব বড় বড় কথা বুঝি না।

—তুমি ত একজন প্রসিদ্ধা অভিনেত্রী, অনেক বড় বড় বই অভিনয় করেছ।

—সে মুখস্থ করে।

—না বুঝো ?

—লোকে কি বই দেখতে আসে, না বই বুঝতে আসে ? দেখতে আসে আমাদের ছলাকলা।

শিপ্রা রেগে উঠেছে। শিপ্রার ক্ষুদ্র দীপ্ত স্বর শুনে প্রেমদাস দাঁড়িয়ে উঠলেন। অবাক হয়ে চাইলেন ! যেন, পূর্বজন্ম হতে এক কিশোরীর কণ্ঠস্বর তাঁর কানে ভেসে এল।

—দেখুন, কাঁদলেই যদি অমৃতের স্বাদ পাওয়া যেত, তাহলে মানুষের জীবনে অমৃত উথলে পড়ত।

—তোমার মা, কে তিনি ?

—আপনার জানবার কিছু দরকার নেই ; তিনি বেঁচেও নেই।

শিপ্রা চুপ করে বসল। মায়ের কথা না ভুলেই হত।

প্রেমদাস তার নিকটে এগিয়ে এসেছেন ; তাঁর মুখ কঠিন রুক্ষ হয়ে উঠেছে, চোখে অস্বাভাবিক তীব্র দীপ্তি।

ভয়ে শিপ্রা সরে বসল। বুঝি সে চীৎকার করে ওঠে।

এ ত প্রেমদাস সন্ন্যাসীর কল্যাণময় স্নিগ্ধ দৃষ্টি নয়, এ কোন

কাপালিকের প্রলয়ঙ্কর অগ্নিগর্ভ দৃষ্টি, চক্ষুতারকা হতে সম্মোহনী তীব্র জ্যোতি বিচ্ছুরিত।

ভীতা হরিণীর মত শিপ্রা চাইলে। হাতের সোনার চুড়িগুলি কঙ্কণের সঙ্গে আঘাত করে ঝন্ঝন্ শব্দে বেজে উঠল।

আত্মসম্বরণ করে সন্ন্যাসী নিজের বেঞ্চে এসে বসলেন। তাঁর মুখ কালো হয়ে এল শ্রাবণের মেঘভরা আকাশের মত; চোখে জ্বালাময়ী দৃষ্টি।

তারপর বিদ্যুৎ-বিদীর্ণ ক্রমঃ মেঘপুঞ্জ হতে জলধারার মত দুই চোপ দিয়ে অশ্রু নিঃশব্দে ঝরে পড়তে লাগল।

ভীত বিস্মিত হয়ে শিপ্রা সন্ন্যাসীর দিকে চেয়ে রইল।

বাহিরের তুর্ক তারাবাড়া রাত্রির চেয়ে এ সন্ন্যাসী আশ্চর্য্যকর।

মস্তচালিতের মত শিপ্রা উঠে প্রেমদাসের পাশে বসল।

—আপনি কাঁদছেন কেন?

—সন্ন্যাসী কেন কাঁদে বুঝতে পারবে কি?

—কখনও কোন সন্ন্যাসীকে কাঁদতে দেখিনি। সংসারের দুঃখ কান্না এড়াবার জগুই ত লোকে সন্ন্যাসী হয়।

—ভগবান তাঁর নিজের ভার যাকে দিতে চান তাকে তিনি করেন সন্ন্যাসী। তার মত দুঃখী কে?

—আপনি দুঃখী?

—তোমার মায়ের কথা ভেবে তোমারও যেমন দুঃখ হচ্ছে, আমারও তার চেয়ে কম দুঃখ হচ্ছে না।

—আমার মাকে আপনি জানতেন?

—জানতুম বৈ কি। তখন তোমার মায়ের নাম মুণালিনী ছিল না, তখন ছিল ‘উষারাগী’। সে আমাদের গ্রামের মেয়ে। পাশের গ্রামেই

বিয়ে হয়েছিল। মনে পড়ে, বিয়ে হবার কয়েকদিন পরেই সে একা চলে এসেছিল। বলেছিলুম, স্বামী খোঁড়া তা কি হয়েছে। বলেছিল, নিজে এক খোঁড়া কালা মেয়েকে বিয়ে করুন তারপর বলবেন। তোমার মায়ের সে জীবনের কথা তুমি কিছু জানো না।

—জানবার ইচ্ছেও নেই। আচ্ছা আপনি কি বরাহনগরে কখনও এসেছেন?

—হু' তিনবার গেছি বোধ হয়।

—অস্পষ্ট মনে পড়ে, একজন সন্ন্যাসী আনতেন, তাঁকে দেখে বড় ভয় করত,—আগুন জালিয়ে তিনি কি সব করতেন।

—তখন আমি তান্ত্রিক ছিলাম।

—আপনিই কি তাহলে আমার বাবাকে—

প্রেমদাস উত্তেজিত ভাবে বাধা দিয়ে বলেন, তোমার বাবাকে লোকে যত খারাপ বলে, তিনি তত খারাপ ছিলেন না।

শোবার জায়গা থাকলেও কল্যাণ শোয়নি। বেঞ্চের কোণে বালিশে ঠেসান দিয়ে অর্দ্ধশায়িতভাবে সে বিমোহিত। ট্রেনে তার ভাল ঘুম হয় না। তাছাড়া, প্রতি স্টেশনে সরোজিনীর একবার খোঁজ করা দরকার।

বহুদিন পরে অত্যধিক মদ খেয়ে তার মাথা বিম্ বিম্ করছিল। ট্রেনের গতির সঙ্গে ছলতে ছলতে উদ্ভার ঘোরে বিচিত্র স্বপ্ন দেখতে দেখতে যেতে তার বড় ভাল লাগছিল। অল্পপমা তার স্বপ্নলতায় অপরূপ পুষ্প ফুটিয়ে তুলছে।

কস্তা-পেড়ে ডুরে শাড়ীর আঁচল কোমরে জড়ান, অর্ধেক বিনানো চুল পিঠে ঢুলছে, দুষ্টুমি-ভরা চোখ নাচছে ভ্রমরের মত, আঁঘবাগানে ছুটোছুটি, ঢিল ছোঁড়া, লুকোচুরি চলেছে, চঞ্চলা বালিকার মুখ কাম-রাস্তার মত রাঙা।

ভাদ্রের নদী কানায় কানায় ভরা, আকাশে মেঘ ও রৌদ্রের খেলা। ভাঙা ঘাটের পাথরে কিশোরী বসেছে নদীর জলে পা ডুবিয়ে, অন্তর্ভব করতে চায় খরশ্রোতের টান। সবুজ রঙের শাড়ীর প্রান্ত গৈরিক জলে পড়েছে, যেন একটা কচি কলাপাতা জলে ভাসছে। নয়নে বিদ্যাদাম-লীলা নেই, স্থির তারকায় স্বপ্ন-কজ্জল মাখান; সাদা পাল-তোলা নৌকার মত মন ভেসে চলেছে কোন অজানা দেশে।

ঘরের সামনে ছোট ছাদ। কয়েকটি ছোট ফুলের টবে বাগান করবার সখ মিটান। পথের প্রান্তে কৃষ্ণচূড়া গাছে আগুন লেগেছে, সপ্তমীর স্নিগ্ধ চাঁদ উঠেছে মিস্ত্রিরদের বাড়ীর ছাদের আড়ালে। তলায় অন্ধকারময় আঁকা বাঁকা সরু গলি নির্জন, দুর্গ-প্রকারের খাদের মত। ছোট ছাদে তরুণী একা পায়চারি করছে, আপন মনে গুণ্ গুণ্ করে গান করছে, এলোচুল মেলে দিয়েছে চাঁদের আলোয়। মায়াময় কৃষ্ণতারকায় কিসের প্রতীক্ষা! অন্ধকার গলি আলো করে কোন্ রাজপুত্র আসবে?

এ কে এল? এ ত সোনার ঘোড়ায় চড়ে স্বপ্নের রাজপুত্র নয়। মাথার গণি-জালা সর্পের মত সূচালো বনেটওয়ালা মোটরকারে এল যন্ত্ররাজের দানব অলুচর; সে তার বৃহৎ পুরীতে নিয়ে গিয়ে বন্দিনী করে রাখল।

দূরে নদীজলে সূর্য্যের আলো বক্ মক্ করে, চাঁদের আলো মায়াজাল রচনা করে। বৃহৎ বাগানের মধ্যে প্রাচীন প্রাসাদ, জনবিরল,

নিস্কর। রঙীন শাড়ী পরে একাকিনী নারী ঘুরে বেড়ায়, বিছানা হতে বারান্দায়, বারান্দা হতে ছাদে, ছাদ হতে সিঁড়িতে; সিঁড়ির ধাপে শ্রান্ত হয়ে বসে পড়ে। বাহিরে পূর্ণিমা রাত্রি থম্ থম্ করে, বায়ু-কম্পিত আশ্রবনের ছায়া কালো চক্ষের সম্মুখে দোলে, গজদন্ত-শুভ্র আনন শুষ্ক চামেলি পুষ্পের মত। জ্যোৎস্না-বিহ্বলা নিস্করা নিশীথিনীর কানে কানে কোন অন্ধকার কোণে বসে সে নারী চুপে চুপে বলে, আমি যে কি বন্দিনী তুমি জান না!

অন্ধকার রাতে তারার আলায়ে সে নারী এলোচুলে একা ছাদে দাঁড়ায় সপ্তমিগুলের দিকে চেয়ে; হীরার ঢুল জল্ জল্ করে জমাট অশ্রুবিन्दুর মত। সে অন্তর্ভব করে, সে বন্দিনী নয়, সে যাত্রিণী: অসীম অন্তরীক্ষ ভরে আলোর পথিকেরা ছুটে চলেছে, জগৎ-জোড় প্রাণধারার সঙ্গে সে-ও চলতে চায়, হৃদয়ের পেয়ালা ভরে পান করতে চায় প্রাণের স্বধা, দেহ মন দিয়ে অন্তর্ভব করতে চায় অসীম প্রাণের ছন্দ, উল্লাস। এমন সুন্দর দেহ কেন রোগ-জীবাণু-ক্রিষ্ট হয়?

কেন এমন হয়?

দুঃস্বপ্নপীড়িত নিদ্রিতের মত আর্ন্তনাদ করে কল্যাণ জেগে উঠল। বুকে যেন কে চেপে বসেছে, চোখ চাইতে পারছে না। চিন্তার অসংলগ্ন সূত্রগুলি-জোট বেধে যাচ্ছে।

বাক্—বাক্—বাক্—বাক্—কেন এমন হয়—কি বন্দিনী তুমি জান না—বাক্—বাক্—বাক্—বাক্—

জোর করে কল্যাণ উঠে দাঁড়াল। বেশীক্ষণ দাঁড়াতে পারল না, ট্রেন যেন বড় জোরে ঢলে চলেছে। জানলা দিয়ে দেখা যাচ্ছে, দূরে পর্কিত শ্রেণীর মসীরেখা ধূসর অস্থরে। ক্ষুধিত চক্ষে সে চেয়ে রইল।

বহুদিন পরে অল্পমমাকে দেখে কল্যাণের হৃদয়ে যে চঞ্চলতা

জেগেছিল, সে তৃষিত তপ্ত চাঞ্চল্য সে শান্ত করতে চেয়েছিল, অবিশ্রাম কথা কয়ে, অত্যধিক পান করে, আপনাকে ভুলিয়ে।

কিন্তু মধ্যরাত্রে যখন স্থপ্তির বাধ ভেঙে চিন্তার বেড়া ভাসিয়ে বহাধারার মত সে বেদনাময় চাঞ্চল্য দেহমানে উদ্বেল হয়ে উঠল, কোনরূপ বাধা দিতে কল্যাণের ইচ্ছা বা শক্তি রইল না।

তবু সে ভাবতে লাগল; অনুপমাকে বঝিয়ে বলতে হবে, জীবনে আপোষ করে চলা দরকার; যতই অনুযোগ করবে ততই অশান্তি। এগন যদি সে কিছুক্ষণ অনুপমার সঙ্গে কথা কইতে পারত; শুধু কথা কওয়া; কিছুক্ষণ নয়, সারারাত ধরে কথা কওয়া, মাঝে মাঝে চুপ করে পাশাপাশি বসে থাকা, আবার কথা কওয়া—তাহলে তার মন শান্ত হত।

অনুপমাকে সে সত্যি কোনদিন ভালবাসে নি। একথা অনুপমা জানে।

অনুপমার রূপ লাভণ্য তাকে মুগ্ধ করেছে। তার স্তূঠাম তন্তুর ভঙ্গী, বর্ণের অপূর্ব শুভ্রতা, কৃষ্ণ নয়নের অদ্ভুত জ্যোতি, এ যেন কোন অপূর্ব প্রাণের রহস্য নিকেতন। গভীর অন্ধকার রাতে হঠাৎ চাঁদ উঠলে যেমন চারিদিক আলোকময় অপরূপ হয়, তেমনি অনুপমা যেখানে আসে, চারিদিক আলো হয়ে ওঠে। জগদীশও এই রূপে মুগ্ধ, নারী সৌন্দর্যের আভায় অন্ধ হয়েছে। এ রূপের মায়া-অবগুণ্ঠন খুলে সত্যিকার অনুপমাকে কল্যাণ জানতে চায়। তার অন্তরের কামনা, প্রাণের রহস্যকে বুঝতে চায়।

কল্যাণ দাঁড়িয়ে উঠল। চলন্ত গাড়ীতে সে পায়চারি করলে। আবার চুপ করে বসলে।

একটি তরুণীর মুখচ্ছবির অস্পষ্ট রেখা তার চোখের সামনে ভেসে

উঠল। রেখাগুলি অস্পষ্ট, রঙ হালকা বলেই কল্পনায় নানা রঙে ছবিটি ভরে দিতে পারা যায়। তরুণী যাত্রিনী কি একা বসে চেয়ে আছে দিগন্তের দিকে। সাহসিকার অন্তরে যে শঙ্কা, চক্ষে প্রতীক্ষা!

সে তরুণী মূর্তি সৌন্দর্য্যে মুগ্ধ করে না, অজানা পথে আহ্বান করে। বলে, এসো, চলো আমার সাথে। তার কালো চোখের দীপ্ত দৃষ্টি প্রদীপশিখার মত আলো করে নিয়ে যাবে পথ।

মুগ্ধতার মধ্যে শান্তি, তৃপ্তি আছে, কিন্তু এ বাসনা বেদনাময়, বুকের রক্ত ছলে ওঠে।

আর ঘুম হবে না। রাত্রির আলো-অন্ধকারের দিকে কল্যাণ চেয়ে ভাবতে লাগল।

মালতীর গাড়ীতে আসানসোলেও কেউ উঠলে না।

সময় বলে, এবার শোবার ব্যবস্থা করা যাক। সারাদিন বড় ঘুরেছি। আর গাড়ীতে কোন পুলিশ নেই দেখলুম।

মালতী বলে, তুমি ওই বেকিতে গুয়ে পড়, এই চাদর আর বালিশ নাও।

—তুমিও ঘুমিয়ে নাও। অকারণে রাত জাগা অস্বাভাবিক। আর যদি কবিত্ব করতে চাও, আলো নিভিয়ে দাও, চাঁদের আলোর দিকে চেয়ে বসে থাক।

—অকারণে রাত জাগছি না। ঘুম আসছে না বলেই জাগছি।

গাড়ীর আলো নিভিয়ে দিতেই চাঁদের মুখ আলো গাড়ীর বেক্ষে এসে পড়ল।

‘মর শুয়ে পড়ল না। জানলার কাছে এসে বসল।

—দেখ, কি সুন্দর রাত !

—আচ্ছা, তোমার প্ল্যান কি ? সত্যিই ইয়োরোপে যাবে ?

—নিশ্চয়ই যাব। যদিও পাসপোর্ট নেই, টাকাও নেই।

—আচ্ছা কত টাকা লাগে যেতে। চার পাঁচ শ টাকায় হবে ?

—খুব।

—তাহলে আমি ঠিক করে কেল্লম—

—কি ? কি ঠিক করলে ?

—কথাটা শুনে তুমি হাসবে।

—না, কমরেড বলো, আমি হাসব না। তবে চাঁদের আলোর দিকে চেয়ে যা ঠিক করা যায়, দিনের আলোয় তা সব সময়ে ঠিক থাকে না—চাঁদের আলোর একটা মোহিনী শক্তি আছে।

—না, চাঁদের আলোর সঙ্গে কোন সম্বন্ধ নেই। আমি ঠিক করেছিলুম, যদি আসানসোলে কেউ আমাদের গাড়ীতে ওঠে, তাহলে হবে না, তোমায় বলব না ; আর যদি আসানসোলে কেউ না ওঠে, তাহলে তোমায় বলব।

—তাহলে দেরী না করে বলে ফেল।

—আমার প্রস্তাবটা হচ্ছে—

মালতী হঠাৎ চুপ করলে। দূরে কোন কয়লার খনিতে আগুন জ্বলছে, সেই দিকে চেয়ে রইল।

—দ্বিধা না করে প্রস্তাবটা করে ফেলো। বিবাহের প্রস্তাব ছাড়া যে কোন প্রস্তাব শুনতে রাজী আছি।

—দেখ, তুমি সব বিষয়ে পরিচাস কোরো না। আর আমি বিবাহ করব না, তুমি জান।



—কি করে জানব? আজ ত তোমার কাছে শুনলুম।

—তুমি সিরিয়াসলি শুনবে কি না?

—নিশ্চয় শুনব, আমি উদগ্রীব হয়ে আছি।

—আমি তোমার সঙ্গে ইয়োরোপে যেতে চাই। আমার সঙ্গে যা গয়না আছে, তা বেচলে পাঁচ শ' টাকা হবে; আর ইয়োরোপ গিয়ে পড়লে দানা নিশ্চয় টাকা পাঠাবেন—

—প্রস্তাবটা খুবই ভাল।

—ভাল মানে? তুমি আমায় সাহায্য করবে কি না?

—অর্থাৎ আমার সঙ্গে যেতে চাও। কিন্তু যদি পাসপোর্ট জোগাড় করতে না পারি, আমাকে হত কোন বিদেশী জাহাজে খালাসী সেজে বা লুকিয়ে যেতে হবে।

—পাসপোর্ট জোগাড় করা কি শক্ত।

—পুলিশ ত আমায় দেবে না; আর চাইতে গেলে ধরা পড়তে পারি। সুতরাং অথ কোন লোকের পাসপোর্ট চুরি করতে হবে।

—চুরি!

—শুধু চুরি নয়, তার ফটোর মত সাজও করতে হবে। সুতরাং আমার সঙ্গে যেতে হলে, দরকার হলে, তোমাকে অথ সাজ পরতে হবে।

—অর্থাৎ পুরুষ সাজতে হবে। তুমি আমায় ভয় দেখাচ্ছ।

—আমি সত্যি কথা বলছি।

—আচ্ছা, সমর, তুমি কি সত্যিই কম্যুনিষ্ট।

—এ প্রশ্ন কেন কমরেড? এসব আলোচনা থাক। তার চেয়ে, চেয়ে দেখ কি সুন্দর রাত! একটা গান গাও শুন।

—সত্যি বলছি ইয়োরোপ দেখতে আমার বড় ইচ্ছে। স্বাধীন দেশ দেখতে, স্বাধীন জাতের নরনারীরা কি ভাবে থাকে, সেখানে

রাষ্ট্র, সমাজব্যবস্থা নিয়ে কত পরীক্ষা পরিকল্পনা চলেছে—দেখতে ইচ্ছে করে।

—কিন্তু তাদের দেখা ত চোখের দেখা নয় ; প্রাণ দিয়ে তাদের দেখতে হয়, রক্তপাত করে তাদের শিখতে হয়—সত্যি তুমি যাবে ?

—দেখ, সাহস করে ত বেরিয়ে পড়েছি।

—তোমার সাহসের প্রশংসা করি। বোম্বেতে গিয়ে ঠিক করা যাবে।

—কেন ?

—বোম্বেতে যদি কোন সম্পাত্র না মেলে বিলেতে গিয়ে তার সন্ধান হবে।

—তোমায় বার বার বল্লুম না—

—তুমি শতবার বলতে পার, কিন্তু শেষ পর্যন্ত তুমি বিয়ে করবে—  
প্রকৃতি তোমাকে গড়েছেন সৃষ্টিপালিনী মাতা রূপে—

—প্রকৃতি তোমার কানে কানে এসে বলে গেছেন—সবই খুব বোঝা, নয়, “ক্যাপিটেল” এসব কথা লেখা আছে !

—চটো কেন। রাগ কোরো না। এপথে যে যায় সে সঙ্গী খোঁজে না, এ গুলয়ের পথ একা চলার পথ। নব সৃষ্টির অরুণোদয় দেখা তাদের ভাগ্যে নেই জানে, তারি স্বপ্নে মাতোয়ারা হয়ে মৃত্যু তুচ্ছ করে ছুটে চলে।

মালতী কোন উত্তর করলে না।

ছদ্মনে নিস্তব্ধভাবে বসে রইল।

জানলা দিয়ে পাণ্ডুর দিগন্তদৃশ্য ঝাপসা ছবির শ্রোতের মত চোখের সামনে প্রবাহিত হয়ে গেল।

প্রথম শ্রেণীর কুপের এক কোণে একটি আলো মৃদু জ্বলছে।

রাত্রি গভীর হল। অনুপমার চোখে ঘুম নেই। আজ রাতে তার ঘুম হবে না। ঘুমের ঔষধ খেয়ে ঘুমোবার ইচ্ছে হয় না। অজানা পর্বত নদী বন প্রান্তর অতিক্রমী ট্রেনে বসে এ রাত জেগে কাটাতে চায়।

বায়স্কোপের স্বপ্নালোকিত অস্পষ্ট ছবির শ্রোতের মত বাহিরের দৃশ্যাবলী তার চোখের সামনে ভেসে যাচ্ছিল। এদৃশ্য তার ভাল লাগে না। বহাধারার মত মত্তবেগে ছুটে চলেছে কত অদ্ভুত আবছায়া; ওই কিস্তৃতকিমাকার ছায়া-শ্রোতের সঙ্গে কত অশরীরী প্রাণীও উর্দ্ধ্বাসে ছুটেছে; অনুপমাকে আহ্বান করছে, চলে এসো, চলে এসো।

রাত জাগা অনুপমার অভ্যাস হয়ে গেছে। কিন্তু এ চলন্ত ট্রেনে নিঃসঙ্গ রাত্রিতে তার কেমন ভয় করতে লাগল। এই মত্তগতি, বিরামহীন যন্ত্রচক্রের ধ্বনি, পাণ্ডুর আলোক, নিস্তব্ধা নিশীথিনী, তার চিত্তকে চঞ্চল, ভয়ান্ত করে তুলেছে। অন্ধকারময় বনভূমি ওই রূপকথার দৈত্যপুরীর মত ভয়ানক।

জানলার কাচ ফেলে অনুপমা অর্ধশয়ানভাবে চোখ বুজলে।

একবার সে ডাকলে, ওগো, শুনছ, ওগো!

ওপরের বাক্সে জগদীশ গভীর নিদ্রিত। মৃদু নাসিকা ধ্বনি পাখা-ঘোরার শব্দের সঙ্গে মিশে যাচ্ছে।

অনুপমা একবার দাঁড়িয়ে উঠল। ইচ্ছে হল, জগদীশকে ঠেলা দিয়ে বাক্স থেকে ফেলে দেয়। সাবধানী স্বামীর স্নানদ্রব্য ভেঙে দেয় এক

ধাক্কায়। বিরক্তির সঙ্গে সে জগদীশের দিকে চাইল। শুধু বিরক্তি নয়, একটা ঘৃণা, ক্ষোভ।

নিঃস্বপ্ন জগদীশের দেহ স্পর্শ করতে তার ইচ্ছা হল না। সে এক গেলাস জল বোতল থেকে ঢাললে; অর্ধেক গেলাস জল খেয়ে বাকী ফেলে দিলে, জলের কোন স্বাদ নেই।

বেকের তলা থেকে অনুপমা একটা ছোট স্টকেস সশব্দে টেনে বাহির করলে। তারপর স্টকেসের ওপর সে বসে পড়ল, গাড়ীর ঝাঁকুনিতে সে দাঁড়াতে পারছে না।

আর একবার সে ডাকলে, ওগো, শুন্ছ!

কোন সাড়া নেই।

স্টকেস খুলে অনুপমা হাতের সোনার চুড়িগুলি এক কোণে ফেলে দিলে। একটা ফুল-ছাপা ছিটের জামা ও কালো-পাড় শান্তিপুত্রে শাড়ী বাহির করলে। মহীশূরের রঙীন জর্জেট-শাড়ী পরে তার বড় গরম বোধ হচ্ছে।

স্টকেসের ওপর অনুপমা আবার বসে পড়ল, বেকিতে ঠেসান দিয়ে। শাড়ী বদলাবার উৎসাহ তার নেই। সে চায় স্থপ্তি, সে চায় শান্তি। ধীরে সে চোখ বুজলে। চোখে ঘুম আসে না। মাথা দপ্-দপ্ করছে। আবার বোধ হয় জ্বর আসবে।

চম্কে অনুপমা লাকিয়ে উঠল। কে যেন তার পাশে এসে বসেছে। ছায়া! জগদীশের কালো কোটের ছায়া স্টকেসের ওপর এসে পড়েছে।

স্টকেস ঠেলে দিয়ে জানলার কাচ খুলে অনুপমা রঙীন কুসানগুলির ওপর এলিয়ে শুয়ে পড়ল।

পাখাটা ঘুরছে জেলখানার গোল বন্ধ ঘরে পাগল কয়েদীর মত। তার ছায়া চারিদিকে নড়ছে। অনুপমা জ্বরে চোখ বুজলে।

কর্মকান্ত জনের চক্ষে রাত্রি স্থপ্তি আনে ; নিদ্রার শাস্ত্রহুন্দে দেহের ক্ষয় ভরে তোলে, মনের শ্রান্তি বেদনা দূর করে, রাত্রিশেষে নব জাগরণ, নব চেতনার আনন্দ !

কিন্তু নিঃসঙ্গা যে নারীর চক্ষে রাত্রি স্থপ্তি দিল না, তার কাছে রাত্রি শুধু রহস্যময়ী নয়, বড় জালা-ভরা । অন্তরের সকল স্থপ্ত বাসনা, নিরুদ্ধ কামনা জেগে ওঠে, অব্যক্ত ব্যথায় দেহমন ক্লিষ্ট হয় ।

বেশম, দিনের আলোর অবগুষ্ঠন উন্মোচন করে রাত্রি উদ্ঘাটিত করে অনন্ত তারালোক, আকাশের স্তনীল যবনিকা প্রান্তে জ্যোতির্ময়ী অসীম সরণী উদ্ভাসিত হয়, তেমনি দিনের কর্মশ্রোত শেষ হলে, নিদ্রাহারা নিশীথে মনের গোপন দ্বার খুলে যায়, অবচেতনার অতলতা হতে ছায়া-মূর্তির মত যারা বাহির হয়ে আসে, তাদের স্পষ্ট দেখা যায় না, বোকা যায় না, কোন্ অজানা পথে তারা আহ্বান করে । চিন্তা আসে, ভয় হয়, বিস্ময় জাগে । স্বপ্নকামনাস্কন্ধ মনের অসীম রহস্য-জগৎ প্রকাশিত হয় ।

খোলা জানলার দিকে চেয়ে রাত কাটান অল্পমার শুধু অভ্যাস নয়, অল্পমা ভালওবাসে । খুব অন্ধকার রাত বা দীপ্ত জ্যোৎস্নাভরা রাত ভাল লাগে না । স্নান চন্দ্রালোকিত আলোছায়ায় স্তব্ধ রাত্রি তার ভাল লাগে । মুহূ বাতাস বইবে, মাঝে মাঝে বাতাসে গাছগুলি ছুলে উঠবে, গাছের পাতার শব্দে আকাশ ভরে যাবে, আবার স্নিগ্ধ স্তব্ধতা ।

অস্থখের পর এলি রাতজাগা তার স্বভাব হয়ে গেছে ।

মাঝে মাঝে সে ঘুমিয়ে পড়ে ; হঠাৎ জেগে ওঠে, একটু ভয় করে ; তারপর রাত্রিকে বড় ভাল লাগে । আলোছায়াখচিত উত্থানের দিকে চেয়ে সে অতি সূক্ষ্ম স্বপ্নজাল বোনে । রহস্যময়ী নিশীথিনী তার একমাত্র সঙ্গিনী । সে সঙ্গিনীকে প্রাণের সব কথা বলা যায়, যত দূরন্ত বাসনা, অসম্ভব কল্পনা, অপরূপ আশা ।

জগদীশ যেমন কর্তব্যপরায়ণ তেমনি সাবধানী। অস্থখের পর হতে সে অনুপমার পাশের ঘরে শোয়, মাঝের দরজা রাতে খোলা থাকে। রাতে অনুপমার ঘরে কোন পরিচারিকার শোবার ব্যবস্থা করতে চেয়েছিল, অনুপমা রাজী হয়নি। ঘরে সে একাই শুতে চায়।

একা শোয়া ছোটবেলা থেকে তার অভ্যাস। তার ভয় করে না। ছোটবেলার তার মায়ের মৃত্যুর পর হতে বরাবর একাই শুয়ে এসেছে।

অনুপমার পিতা ছিলেন দর্শনের অধ্যাপক। গভীর জ্ঞান-পিপাস্ত্র অগোছালো মানুষ। যুবা বয়সেই, প্রথমে স্ত্রী তারপর পুত্র হারিয়ে তিনি সংসার সম্বন্ধে আরও উদাসীন হয়ে গেলেন। অর্থোপার্জন সম্বন্ধে তাঁর কোন চেষ্টা রইল না। তাঁর একমাত্র সান্ত্বনা হল বই-পড়া। শুধু দর্শনের বই নয়, সাহিত্য, বিজ্ঞান, ইতিহাস। ইয়োরোপের প্রাচীন ও আধুনিক সব দার্শনিক, ঔপন্যাসিকদের বই তিনি বেহিসাবী ভাবে কিনতেন।

একমাত্র কথা অনুপমার প্রতি তাঁর যেমন গভীর স্নেহ ছিল তেমনি কোনরূপ শাসন ছিল না। অনুপমা আপন খেয়াল-খুসিমত চিরদিন চলে এসেছে। তবে অর্থের অভাবের জগু সব সময় সে মনের সকল ইচ্ছা পূর্ণ করতে পারত না। তার ধনী খুড়তুতো জাঠতুতো বোনদের মত বাহারে শাড়ী কিনতে, নূতন প্যাটার্ণের গহনা পরতে, মাঝে মাঝে মোটরকার করে ঘুরে বেড়াতে, তার ইচ্ছা হত; তার বাপ বলতেন, আসছে মাসে মাহিনা পেলেই শাড়ী কিনে দেব, গহনা গড়িয়ে দেব। তারপর ভুলে যেতেন, কিনে আনতেন এক গাদা নূতন বই। মায়ের পুরাতন চুড়িগুলি পরেই তাকে স্কুল-কলেজ করতে হয়েছে।

এখন বাবার কথা ভাবলে মাঝে মাঝে অনুপমার রাগ হয় কিন্তু তখন বাবার ওপর তার রাগ হত না। কেমন মমতা হত। তাছাড়া

সে-ও পিতার মত কল্ললোকে আইডিরার-রাজ্যে বাস করত। পিতা বাস করতেন মানবজ্ঞানের বিরাট প্রাসাদে,—সেখানে শঙ্করের সঙ্গে ব্রাডলির মতবাদের তুলনা চলছে, আইনষ্টাইনের রিলেটিভিটির ব্যাখ্যা হচ্ছে, ফ্রয়েডের সঙ্গে ইউংএর তর্ক বেধেছে। আর অনুপমা ছিল নানা যুগের নানা দেশের কবি ঔপন্যাসিকগণের প্রেমকামনাশ্লুক বিচিত্র কল্প-জগতের অধিবাসিনী। পিতার লাইব্রেরীতে তার অবাধ গতি ছিল, যে কোন বই পড়তে, বইয়ের ছবি দেখতে তার বাধা ছিল না। চোদ্দ বছর বয়সে সে বার্টনের আরব্যোপন্যাস পড়েছে; আঠার বছর বয়সে নোপাঁসা, ফ্লোবের, এমিল জোলা শেষ করেছে; কলেজ-জীবনে টুর্গনিভ, স্ভুডারমান, ডিএইচ লরেন্স ছিল তার প্রিয় লেখক। গভীর রাত পর্যন্ত জেগে সে উপন্যাস পড়ত, অদিকাংশ বই সে বুঝতে পারত না, তবু নেশার মত পড়ে যেত। অজানা অস্পষ্ট-বোঝা মানব অন্তরের নানা স্থখ কামনা আশা-আশঙ্কা-ভরা নভেলের রাজ্য হতে কত বিচিত্র অনুভূতি অপূর্ণ কামনা রঙীন মেঘের মত তরুণীর চিত্তাকাশে পুঞ্জীভূত হয়ে আবার ভেসে চলে যেত। অর্ধেক-পড়া নভেল বন্ধ করে আলো নিভিয়ে সে বিছানায় বসে চেয়ে থাকত আলোছায়াখচিত রাত্রির দিকে। মৃদু মর্ম্মরধ্বনিমুখর স্নানজ্যোৎস্নাময় রাত্রির অস্পষ্ট আবছায়াময় জগৎ তাহারি চিত্তলোকের মত। রাত্রির সঙ্গে সে নিবিড় যোগ অনুভব করত; তার তারালোক নয়, তার ছায়ালোক সে ভরে দিত আপন মনের স্বপ্ন-কামনার অশরীরী কল্পনা-কৌতুকে।

অনুপমার সামাজিক জীবন ছিল স্বল্প। তার বাবার মতই, তার বন্ধুবান্ধব বিশেষ কেউ ছিল না। তার মন কল্পনা-কৌতুকী ছিল বলে সে কখনও নিঃসঙ্গতা অনুভব করত না। যখন কোন বই

পেত না, আকাশের মেঘের খেলা দেখে তার বেলা কেটে যেত, গাছের পাতাগুলির দিকে চেয়ে সন্ধ্যা হয়ে আসত, অন্ধকারের দিকে চেয়ে সে কি ভাবত তা নিজেও বুঝত না।

শুধু মাঝে মাঝে কল্যাণ এসে তার মনকে নাড়া দিত। যেন ঘুমঘোর হতে সে চমকে জেগে উঠত।

কল্যাণ ছিল তার পিতার প্রিয় ছাত্র। তার পিতা শুধু দার্শনিক নয় গণিতজ্ঞও ছিলেন। অঙ্কশাস্ত্র শিক্ষা করতে কল্যাণ তার পিতার নিকট আসত। তাছাড়া লাইব্রেরী হতে বই নিতে, গল্প করতে কল্যাণ প্রায়ই আসত। আমার কোন বাধা সময় ছিল না। অল্পপমার সঙ্গে যে কোন সময় এসে তর্ক গল্প করবার কোন আপত্তি বা বাধা ছিল না।

তরুণ কল্যাণকে তরুণী অল্পপমার ভাল লাগত। ফর্সা রং, ছিপ্‌ছিপে চেহারা, ধূতি পাঞ্জাবী সব সময়ে পরিষ্কার ধবধবে; তীক্ষ্ণ নাসিকা, জল্‌জলে চোখ, তরুণ মুখ বুদ্ধিতে দীপ্ত; সে সব সময়ে তর্ক করছে, গল্প বলছে, পরিহাস করছে, চুপ করে বসে ভাবে না, যৌবন-চাঞ্চল্যে ভরা। তার নিঃসঙ্গ তরুণী-জীবনে এই একমাত্র তরুণ যুবক। উপন্যাসের নায়কদের মত সে কল্পলোকে নিয়ে যায় না, পৃথিবীর সহজ সরল জীবনের সঙ্গে গ্রন্থিবন্ধন করে। ছোটখাট জিনিষ কিনে আনতে, ফরমাজ খাটতে কল্যাণ, মাঝে মাঝে বেড়াতে বা বায়স্কোপ যেতে কল্যাণই সহায়, পিতার অসুখে ডাক্তার ডাকতে, ঔষধ আনতে কল্যাণই ভরসা। এ রোমান্স নয়, তরুণ-তরুণীর প্রেমলীলা নয়, এ সহজ বন্ধুত্ব।

কলিকাতার ছোট এক গলিতে ছোট পুরানো বাড়ীতে অল্পভাড়ায় তারা থাকত। পিতার প্রায়ই অসুখ হত, টাকার অনাটন ছিল, তবু সে দিনগুলি বড় সুখের, স্বপ্ন মায়াভরা ছিল।



পিতার মৃত্যুর পর অল্পমাকে কখনও থাকতে হত বোর্ডিঙে, কখনও মামার বাড়ীতে। কল্যাণের সঙ্গে দেখাশোনা কমই হত। বাহিরে যখন সে দূরে চলে গেল, অন্তরে সে আরও নিকটে এল। কল্যাণ মাঝে মাঝে আসত দেখা করতে; কল্যাণের মাও মাঝে মাঝে নিমন্ত্রণ করে নিয়ে যেতেন। মামার বাড়ীর লোকেরা পছন্দ করত না, কানাঘুষো হোত, কিন্তু কেউ আপত্তি করতে সাহস করত না।

তখন কল্যাণ এম্-এস্-সি পাশ করেছে। হঠাৎ অসময়ে সে হাজির হত। কোন মণ্ডপ্রকাশিত ইংরাজী উপগ্রাস বা কবিতার বই আনত বা আমেরিকান গ্যাগাজিন। বেশভূষায় পারিপাট্য নেই, মুখ একটু রুক্ষ, কালো চোখে কিসের আলো জ্বলে উঠত, অল্পমার চমক লাগত। মনে হত, কল্যাণ তাকে ভালবাসে। হঠাৎ কল্যাণ উঠে দাঁড়াত, কথা শেষ না করেই চলে যেত। অল্পমা চমকে ভাবত, সে বুঝি কল্যাণকে ভালবাসে।

আজ এ সব প্রশ্ন নিরর্থক, প্রয়োজনহীন। তবু জানতে ইচ্ছে করে, কল্যাণ কি তখন তাকে ভালবেসেছিল?

আর সেই তরুণী অল্পমা?

সে অল্পমা মরে গেছে, যেমন করে রক্তবর্ণা গিরি-বর্ণার মৃত্যু হয় বিশাল নদীর পঙ্কিল খরস্রোতে। বাসনাবিহ্বলা ব্যাধিক্লিষ্টা এ নারীর মধ্যে তার সন্ধান কে পাবে?

আলো নিভিয়ে অল্পমা জানলা সব খুলে দিলে।

জর্জেট শাড়ী ছেড়ে . শান্তিপুরে শাড়ী পরলে। মাথার চুল খুলে দিলে। এ ছোট কমপার্টমেন্টে তার যেন দম আটকে আসছে।

জানলার কাছে মাথা রেখে সে চোখ বুজে শুয়ে পড়ল। রাত্রির

অন্ধকার দিয়ে ট্রেন হু হু করে ছুটে চলেছে। এই গতির ছন্দে সে ভেসে যেতে চায়। বড় কর্কশ ট্রেনের শব্দ।

ধীরে ট্রেনের গতি মন্দ হয়ে এল। এক অজানা অন্ধকার ষ্টেশনে ট্রেন থামল। বাহিরের অন্ধকার বড় স্নিগ্ধ।

অনুপমা ধীরে উঠল। ট্রেনের দরজা খুলে প্লাটফর্মে নামল। ওই লোকটির নাসিকা গর্জ্জন অসহ্য। শুধু বিরক্তি নয়, বার্থতাবোধ, হতাশাস, অন্ধ ক্রোধ।

—মেম সা'ব !

অনুপমা চমকে চাইলে। হীরা সিংএর দীর্ঘ দেহ তাহার পাশে। কি সজাগ সতর্ক প্রহরী !

—হীরা সিং !

—হজুর !

—মাল্টি-বাবার গাড়ীটা কোথায় ?

—একঠো গাড়ী পরে আছে।

—আচ্ছা, তুনি এ গাড়ীতে থাকো, আমি মাল্টির সঙ্গে দেখা করে আসি।

—এখনি গাড়ী ছেড়ে দেবে, মেম সা'ব।

—ছেড়ে দেয়, আমি সে গাড়ীতে থাকব।

—যো হকুম হজুর।

হীরা সিং এগিয়ে গেল মালতীর গাড়ী দেখাতে। গাড়ীর দরজা খুলে সে দাঁড়াল।

সর্বিস্বয়ে মালতী দেখলে শ্বেতবসনা এক নারী তার গাড়ীতে উঠল। সঙ্গে কোন জিনিষ নেই।

—কি রে মাল্টি, চিনতে পারছিন্ না !

—ও, তুমি অল্পপমাদি, এত রাতে হঠাৎ এলে? তোমার অসুখ করেছে নাকি।

—অসুখ করতে যাবে কেন?

—ও, তোমার মুখ কি ফ্যাকাসে। বোসো। গাড়ী কিন্তু এখুনি ছেড়ে দেবে।

—দিক্ না; তোর গাড়ীতে নয় কিছুক্ষণ রইলুম। তুই একা যে?

—গাড়ীতে আর কেউ ওঠেনি, তাই একা।

—বা, সহযাত্রীটি কোথায়? তাকে দেখতেই ত এলুম।

গাড়ী ধীরে চলতে লাগল।

—সহযাত্রী? কি বলছ? দেখনা, কি মুস্কিল, কোন স্টেশনে কেউই উঠল না। একা রাত ভেগে চলেছি।

—সে বুঝি কোথাও লুকিয়ে আছে গাড়ীতে?

মুহূ হেসে অল্পপমা সামনের বেক্সির তলা দেখলে।

মালতী উদ্বিগ্নভাবে গাড়ীর কোণে চাইল। স্টেশনে গাড়ী থামতেই প্ল্যাটফর্মের উণ্টোদিকের দরজা খুলে সমর নেমে গেছে, তারপর তাকে গাড়ীতে প্রবেশ করতে দেখেনি। তবু সে ভীতভাবে চাইলে।

—বুঝেছি, আমায় দেখে অগ্ন গাড়ীতে গেছে।

—কি হেঁয়ালি বলছ।

—হীরা সিং অত কাঁচা ছেলে নয়।

—হীরা সিং!

—হীরা সিং স্বচক্ষে দেখেছে তোর গাড়ীতে এক যুবক হাওড়া স্টেশনে উঠেছিল, আর বোধ হয় এতক্ষণ ছিল।

মালতীর মুখ শুকিয়ে গেল।

—অনুদি, এদিকে এস, শোন লক্ষ্মী ভাই—

—ভয় নেই, আমি কাউকে বলব না, কি সাহায্য করতে হবে বল।  
এত লুকোবারই বা কি আছে।

—সে ভয়ানক ব্যাপার, শোন।

অনুপমা হেসে উঠল। মনোমুগ্ধকর সে হাসি।

—ভয়ানক! সে তোমার মুখ দেখেই বুঝি।

—শোন, সে ছেলেটি সোসিয়ালিষ্ট, পুলিশ ধরবে বলে পালাচ্ছে,  
লুকিয়ে মেয়েদের গাড়ীতে উঠেছিল।

—এ্যা! এ শুধু লভ্ নয় তার সঙ্গে সোসিয়ালিজম্! টুর্গনিভের  
নভেলের বাংলা সংস্করণ!

—ঠাট্টা নয়, অনুপমাদি! সত্যি বলছি—

মালতী হঠাৎ স্বর হয়ে গেল, মুখ দিয়ে কথা বাহির হল না, যেন  
সে বোবা।

অদূরে বন্ধ দরজার খোলা জানলার বাহির দিকে সমরের কালো মুখ  
সে চকিতের জ্ঞান দেখতে পেল, যেন ফ্রেমে-বাঁধান একখানি ছবি।  
চাপা ঠোঁটের ওপর খাড়া তর্জনী দিয়ে সমর ইসারা করছে, চুপ রহো!

নিমেষের মধ্যে সে মুখ অস্বহিত হয়ে গেল। মালতীর বুক ছুর ছুর  
করতে লাগল। উত্তেজনায় সে দাঁড়িয়ে উঠল।

—কি, চুপ করে গেলি কেন?

মালতী তখন ভাবছে, দরজার বাহির দিকে পা-দানির ওপর সমর  
বসে আছে দরজার হাতল ধরে। বড় জোরে ট্রেন ছুটে চলেছে। যদি  
সমরের পা ফস্কে যায়, হঠাৎ কাঁকুনীতে হাত আলগা হয়ে আসে, হঠাৎ  
যদি সে চলন্ত ট্রেন থেকে পড়ে যায়—

মালতীর মাথা গুলিয়ে গেল। অনুপমাদিদিকে সব না বলে  
উপায় কি!

—শোন অল্পদি, তুমি যদি বলো, তুমি কাউকে বলবে না, জগদীশ বাবুকেও নয়, তুমি যদি প্রতিজ্ঞা কর, তুমি ছেলেটিকে পালাতে সাহায্য করবে, সে কিন্তু সোসিয়ালিষ্ট—

—আমি প্রতিজ্ঞা করছি, আমি যথাসাধ্য সাহায্য করব, হোল ত।

—ওই আখো, ওই !

আরক্ত আননে মালতী বসে পড়ল, দরজা খুলে সমর প্রবেশ করেছে, মাথায় খদ্দেরের টুপি তির্থ্যকভাবে টানা, কালো গৌফের ফাঁকে ব্যঙ্গ হাসি।

নির্গিমেষ নয়নে অল্পপমা সময়ের দিকে চাইলে। সাহসিক তরুণ যুবক কুলির সাজ পরে বাহির হয়েছে প্রাণের মায়্যা তুচ্ছ করে। কিসের আগুন এর প্রাণে জ্বলছে !

মালতী ধীরে বল্লে, ইনি আমার অল্পপমাদিদি, এঁর কথা তোমায় বলছিলুম, আর ইনি কমরেড সমর—

গৌফ-জোড়া খুলে সমর মাথা নত করার ভঙ্গী করে বল্লে, নমস্কার দিদি, দেখলেন বাঙ্গালী মেয়ের সাহস !

অল্পপমা দাঁড়িয়ে উঠেছে, ঘনকালো এলোচুলের মধ্যে শাড়ীর কালো পাড় মিশে গেছে ; গজদন্তশুভ্র মুখে মাঝে মাঝে রক্তের ছোপ, কৃষ্ণ-তারকা হতে অদ্ভুত জ্যোতি বাহির হচ্ছে ; নারীর এ রূপ সমর কখনও দেখেনি। এ বেন যাহু জানে। এর পাশে মালতীর রূপ, বৈশাখী ঝড়ের কালো মেঘে সূর্যাস্তের বর্ণোৎসবের প্রান্তে সন্ধ্যার শুকতারার মত।

অল্পপমা হেসে উঠল, বেশ সাজ করেছে ত তুমি ! বোসো।

তার চোখ তখনও জল্ জল্ করছে। তার মনে পড়ছে, তরুণ কল্যাণকে অনেকটা এই রকমই দেখতে ছিল ; তবে কল্যাণ ছিল

আরও ফসাঁ। বাংলার তারুণ্যের রূপ কুলির সাজ পরে তার সম্মুখে।

স্নিগ্ধ হেসে অনুপমা বলে, এই কচি ছেলে, একে ধরবার জন্তে পুলিশের ঘুম নেই!

—দেখুন দিদি, আপনার স্বামী কিন্তু আমায় দেখতে পেলে এখুনি হ্যাণ্ডকাপের আদেশ দেবেন। বুঝলেন দিদি!

দিদি! কোন অজানা তরুণ যুবক অনুপমাকে এমনভাবে এমন স্বরে দিদি বলেনি। সে যেন কতদিনের জানাশোনা। অনুপমার বড় ভাল লাগল।

অনুপমা এগিয়ে গিয়ে সময়ের সামনে বসল। ধীরে বলে, দেখ সময়, তোমার এ দিদি থাকতে তোমার কোন ভয় নেই, এই তোমায় বলে দিলুম।

—হাঁ, তুমি প্রতিজ্ঞা করলে, সেই সাহসেই ত দরজা খুলে এলুম। আমি ট্রেনে ঝুলে সারারাত যেতে পারি, দরকার হলে, চলন্ত ট্রেন হতে লাফিয়েও পড়তে পারি। কিন্তু কমরেড মালতীর সাহস দেখলে—

মালতী এতক্ষণ চুপ করে বসেছিল। যেন সে সেখানে নেই। এবার কাঁঝাল স্বরে সে বলে উঠল, তুমি হাতল ধরে একবার বসছ, একবার দাঁড়াচ্ছ, কা'র না ভয় করে বল?

অনুপমা মুহূ হেসে বলে, ঠিকই ত, জানো সময়, যাকে ভালবাসা যায় তার জন্তে সব সময়ই ভয় হয়, অকারণেও ভয় হয়—

মালতী একটু তিক্ত স্বরে বলে, কি যা তা বলছ অনুপমাদি, ওসব ভালবাসার অভিজ্ঞতা আমার নেই।

—আহা চটিন্ কেন, ভালবাসা পাওয়া ত ভাগ্যের কথা।

সময় এবার হেসে উঠে বলে, দেখ দিদি, আমি ভালবাসায় বিশ্বাস

করি না, ওটা যত বৃজ্জোয়া কবি নাহিত্যিকদের কল্পনার সৃষ্টি, উপতাস লেখবার জন্তে।

মালতীর দিকে ফিরে অন্তপমা বলে, তোমারও তাই মত নাকি ?

—মোটাই না, প্রেমের অস্তিত্বকে আমি বিশ্বাস করি। তবে সত্যিকার প্রেম কজনই বা পায়, কজনই বা জানতে পারে ?

—তাহ'লে কমরেড মালতী স্বীকার করছ, ও জিনিষ সর্বজনলভ্য নয়—বা সবাই পেতে পারবে না, সোসিয়ালিষ্ট সে জিনিষ চায় না।

—ও আলোচনা থাক। তার চেয়ে তোমার কথা বল সময়।

—কি জানতে চাও, দিদি। একটা মিলের ধর্মঘটে গরম বজ্রতা দিয়েছিলুম।

—তোমার মা আছেন ?

—ওই, মেয়েদের নামুলি প্রশ্ন। আছেন বৈকি, তবে দিদি নেই, দিদি পেলুম।

তারপর মালতীর দিকে ফিরে সময় বলে, শোন কমরেড, কাল মাকে কিন্তু চিঠি লিখতে ভুলো না।

—আচ্ছা তোমার ধর্মঘটের গল্পই বলা।

—শোন দিদি, গত বছর ডিভিডেও ডিক্লেয়ার করেছিল চব্বিশ পারসেন্ট, তার আগের বছর বিশ, এদিকে কুলীদের থাকবার বস্তি যদি দেখতে—

উত্তেজনায় সময় দাঁড়িয়ে উঠল। প্রভাত সূর্যালোকদীপ্ত তরুণ শালবৃক্ষের মত তার মুখ ঝলমল করছে।

মুষ্টিবদ্ধ হস্তের তরঙ্গায়িত ভদ্রী করে সময় বলে যেতে লাগল, আমি বল্লম, কমরেড্‌স্—

বিমুগ্ধভাবে অন্তপমা সময়ের দিকে চেয়ে রইল। কৃষ্ণচক্ষুতারকা

মাঝে মাঝে জল্ জল্ করে উঠছে। সময়ের সব কথা সে শুনছিল না, সে দেখছিল সময়ের তারুণ্যমণ্ডিত দীপ্ত স্রী। সে ভাবছিল, সে যদি আজ মালতীর মত কলেজের মেয়ে হত, যদি ফিরে পেত মালতীর বয়স। সময়ের মত কোন ছরন্ত প্রাণভরা স্বপ্নভরা তরুণের প্রেম যদি নাও পেত, সে ত হতে পারত মালতীর মত তার সহযাত্রিণী। কুড়িনকে কি এগ্নি দেখতে ছিল? বাজরফের মতন কি সময়কে মরতে হবে? কিসের অগ্নি এদের প্রাণ-প্রদীপে জলছে!

বাহিরে অন্ধকার রাত্রি। ট্রেন ছুটে চলেছে দুনিবার বেগে।

পরের স্টেশনে ট্রেন থামতেই হীরা সিং মালতীর গাড়ীর দরজার সামনে এসে দাঁড়াল। গাড়ীর দরজা খুলে বসে, মেম সা'ব!

অল্পপমা চমকে চাইলে। টোপরের মত সূচালো সাদা বড় পাগড়ি, আয়তবক্ষে জরির কাজ করা লম্বা আচকান, শালবৃক্ষের মত দীর্ঘ ঝজু দেহ নিশীথ গগনের পটে চিরজাগ্রত প্রহরীর মত আঁকা।

—কি হীরা সিং, সাহেব জেগেছেন।

—না, মেম সা'ব।

—আমি পরের স্টেশনে—

—আপনার তবীয়ৎ আচ্ছা নেই মেম সা'ব।

—মালতী, এই হীরা সিং, সময়—

অল্পপমা চারিদিকে চেয়ে দেখলে, কোথাও সময় নেই। চকিতের মধ্যে অজানিতভাবে সে কখন অদৃশ্য হয়েছে। আর এ গাড়িতে থাকতে অল্পপমার উৎসাহ রইল না।

—চল্লুম মালতী, খুব খুসি হলুম দেখে, কন্‌গ্রাচুলেসন্ করতে পারি?

—মোটাই না। তোমরা ওছাড়া কিচ্ছু কি ভাবতে পার না?



—আচ্ছা, কাল সকালে আমার গাড়ীতে এসে চা খাবি, কেমন ?  
এখন ঘুমিয়ে নে। আর রাত জাগিস্ না।

—মেম সা'ব।

—চলো হীরা সিং।

মালতী চুপ করে বসে রইল।

অন্ধকার কুপেতে অনুপমা নিঃশব্দে প্রবেশ করলে। জগদীশ নিঃশব্দ। ছোট বৈদ্যাতিক পাখাটার বিরামহীন শব্দ, যেন একটা কালো পোকা বন্ধঘর হতে বাহির হবার পথ খুঁজে পাচ্ছে না, একটানা আর্ন্তনাদ করে ঘুরছে।

অনুপমা আলো জ্বাললে না। পা ছড়িয়ে রঙীন বালিশে ঠেসান দিয়ে বসলে। পিঠ ব্যথা করছে। ব্লাউজের বোতাম খুলে দিলে। গাড়ীর মেঝেতে শাড়ীর আচল লুটিয়ে পড়ল। জলতেষ্টা পেয়েছে, কিন্তু আবার উঠে জল গড়িয়ে খাবার মত শক্তি যেন তার নেই। হাত-ব্যাগ থেকে একটা প্যাষ্টিল মুখে পুরে দাঁত দিয়ে কামড়ালে।

নিরঙ্ক অন্ধকার দিয়ে ট্রেন ছুটে চলেছে দিশাহারা ঝড়ের বাতাসের মত। দেহ বারবার তুলে উঠছে।

অতীত জীবনের স্মৃতি নয়, বর্তমান জীবনের বেদনা-তৃষ্ণা নয়, মন এগিয়ে চলতে চায়। অসীম গগন ভরে আলোর প্রদীপ হাতে অনন্ত পথযাত্রীরা অহিনিশি ছুটে চলেছে, পৃথিবীর ধূলি তৃণ পর্বত বন নদী সমুদ্র তারি হুন্ডে ছুটে চলেছে, এগিয়ে চলে।

চোখবুজে অনুপমা অনুভব করতে চেষ্টা করলো, বিশ্বের অসীম প্রাণশ্রোতের সঙ্গে সে-ও ভেসে চলেছে। আফিমের ফাইল-ভরা ঔষধের শিশি-ছড়ানো জগদীশের প্রাসাদ-কারার বন্দিনী সে নয়।

হঠাৎ ট্রেন থেমে গেছে। অনড় প্রস্তরের মত স্থির।

অল্পপমা চেয়ে দেখলে, ছোট ষ্টেশন, আলোগুলি মিটমিট জ্বলছে, নির্ঝাঁত নিষ্কম্প বনভূমি। তারাগুলি স্থির পথ-চাওয়া নয়নের ক্লান্ত দৃষ্টির মত; নিখিল প্রাণস্রোত সহসা গতিহীন, অচঞ্চল হয়ে গেছে।

মুখ বাড়িয়ে অল্পপমা প্ল্যাটফর্ম দেখলে। নেমে চলে যেতে ইচ্ছে করে এই স্তব্ধ অরণ্যে।

ট্রেনের গার্ড লাল লঠন হাতে নিয়ে ছোট্টাছুটি করছে। ইঞ্জিনের কুলি একটা নেমেছে; কি একটা গোলমাল হয়েছে। কয়েকজন যাত্রীও নেমে পড়েছে।

ও কে? ও কে? যেন ঘুমের ঘোরে চলেছে।

অতি মুহূর্তে অল্পপমা ডাকলে, কল্যাণ!

যেন সে আপন মনে কথা কইছে। যে স্বরে সে নিস্তব্ধা নিশীথিনীর কাণে কাণে বলে, আমি বন্দিনী, সেই স্বরে সে ডাকলে, কল্যাণ! কল্যাণ!

চকিতে কল্যাণ এগিয়ে এল, গাড়ীর খোলা জানলার কাছে দাঁড়ালে।

অল্পপমার চোখেঝু ওপর সে চোখ রাখলে। আর কিছু বলতে পারলে না। রাত্রি-জাগা রক্তহীন মুখ বড় করুণ, ক্রমঃক্ষে বিদ্যুদ্গম নেই, উষার শুকতারার মত নিমেষ-হারা চাউনি।

—কি হয়েছে?

—হট্‌ এক্সল্‌।

অল্পপমা গাড়ীর দরজা খুলে দিলে। কল্যাণ দরজার সামনে এসে দাঁড়াল।

—এস ভেতরে ।

—ইঠাং ট্রেন ছেড়ে দিতে পারে ।

—ছাড়ুক না ।

মস্তচালিতের মত কল্যাণ কুপেতে উঠল, অল্পপমার পাশে বসল ।  
দূর বন হতে একটা দম্কা বাতাস খোলা দরজা দিয়ে প্রবেশ করে  
জানলা দিয়ে বাহির হয়ে গেল, দীর্ঘনিশ্বাসের মত । আবার সব স্তব্ধ ।  
রাত্রি রিমঝিম্ করছে ।

—এখনও কি তোনার রাতে ভাল ঘুম হয় না । রাত জেগে পড় ?

—চুপ, কথা কোয়ো না ।

কল্যাণ নিজের হাতে অল্পপমার হাত টেনে নিলে । কি নরম ঠাণ্ডা  
হাত । কোন ইংরাজ মেয়ের এত নরম হাত সে দেখেনি ।

—চারিদিক কি চুপচাপ ! তারাগুলো যেন খুব কাছে মনে হচ্ছে,  
কি দপ্‌দপ্‌ করছে—আচ্ছা ওই বনে বাঘ আছে ?

—খুব আছে, এখন সব শিকারের সন্ধানে বাহির হয়েছে ।

—রাতের গভীর বন দেখতে বড় ইচ্ছে করে ; ওর মধ্যে যদি বাড়ী  
করে থাকা যেত ।

—গ্রীন ম্যানসান !

—চুপ !

ইঞ্জিনের দীর্ঘ তীক্ষ্ণ হুইস্‌ল্ ধ্বনিতে চারিদিক প্রতিধ্বনিত হয়ে  
উঠল । এবার ট্রেন ছাড়বে, তারি সন্ধেত ।

কল্যাণ একটু নড়ে বসল কিন্তু উঠল না । দৃঢ় চাপে অল্পপমা তার  
হাত ধরে । সে হাত এখন আতপ্ত ।

ট্রেন নড়ে উঠল । দুজনে বসল ঘেঁসাঘেঁসি ।

ট্রেন ছুটে চলেছে ।

—চুপে চুপে কথা বল, অমন চুপ করে থেকো না।

—বড় সুন্দর তোমায় দেখাচ্ছে, আগেকার চেয়ে অনেক সুন্দর হয়েছে।

—সে কথা বলতে তোমায় ডাকিনি। মেমদের ওসব কথা বলে বলে বুঝি মুখস্থ হয়ে গেছে।

—সত্যি, তোমার মত অমন সুন্দর চোখ আমি সমস্ত বিলেতে কোথাও দেখিনি।

—চুপ করে বোসো, কথা কোয়ো না।

অল্পপমা অল্পভব করছিল কল্যাণের রক্তধারার ছন্দ, আতপ্ত স্পর্শ নিজের ব্যাধিবিহ্বল তলুতে।

—একটু ভাবতে আমার কথা ?

—প্রায়ই ভাবতুম।

—চিঠি দিতে না কেন ?

—পিক্চার কার্ডসগুলো পেতে না ?

—সে বুঝি চিঠি !

—শোন, অল্প—

—কথা বোলো না। বড় ভাল লাগছে তোমায় দেখে, বহুদিন পরে দেখলুম। বিলেতে বিয়ে করেছ ?

—না।

—সত্যি বলছ ?

—সত্যি, না।

—তবে যে শুনেছিলুম—

—সে মিথ্যে, সম্পূর্ণ মিথ্যে। মাকে জিজ্ঞেস করনি কেন ?

—কথা বোলো না। ভাল লাগে না কথা।

—স্থির হয়ে বোসো। একটু শুয়ে পড়।

—ট্রেনটা বড় দোলে। মাথা দপ্‌দপ্‌ করে। ডাক্তারেরা বারণ করেছিল ট্রেনে চড়ে একসঙ্গে এত পথ যেতে।

—জ্বর আসে নাকি ?

—বহুদিন আসেনি। আর ভুগতে ভাল লাগে না—জীবনটা বুখা মনে হয়—কারও একটু কাজে লাগে না—

—ঘুম হয়নি সারারাত ?

—না, ঘুম আসে না, বত বাজে কথা মাথায় বোরে। তুমি জান বরাবরই ঘুম আমার কম হয় তবে এখন আর উপগ্রাস পড়তে ভাল লাগে না; তাই হিজিবিজি কত কি ভাবি। ভাবি বল্লোও ঠিক হয় না, তারা নিজেরাই আসে নিজেরাই চলে যায়। বাবার কথা মনে পড়ে তোমার ?

—খুব পড়ে।

—তোমায় দেখে সেই সব পুরানো দিনের কথা মনে পড়ে গেল। সে যেন অত্ৰ কোন জন্মের, অত্ৰ কোন যুগের জীবন।

—স্বপ্নের মত মনে হয় সে দিনগুলো। শোন, অহু—

—চুপ, কথা কোয়োনা। রাত্রির স্তব্ধতায় সমুদ্রের ঢেউগুলো বালুতীরে আছড়ে আছড়ে কেমন ভেঙে পড়ে, শুনেছ—শুয়ে থাকলে ট্রেনের শব্দ আমার সেই রকম লাগে—হ্যাঁ ওইখানটা টিপে দাও, মাথার মাঝখানটা, চুলগুলো বেশ জোরে টেনে—

—একটু ঘুমোতে চেষ্টা করো।

আতপ্ত কপোল রক্ত স্থলপদ্মের মত ; হৃৎ-পিণ্ডের রক্তের তাপে দ্রুত নিশ্বসন অত্যুষ্ণ, ধারা-বর্ষণে আন্দোলিত পুষ্পিত কদম্ব তরুর মত দেহ থরথর কাঁপছে।

—অত কাছে এসোনা—আমি যক্ষ্মারোগী, ভুলে যাও কেন—  
ভয় করে না ?

—না। কিছুমাত্র না।

—আমার যে ভয় করে। কথা বোলো না। কথা—থ্যক্—  
থ্যক্—ক—

লাল নীল হলদে নানা রঙের সিল্কের গোল কুসনে মুখ গুঁজে  
অনুপমা কাশির বেগ চাপতে চেষ্টা করলে। অদমনীয় কাশির বেগ।  
জোরে বালিশ চেপে সমস্ত মাথা গুঁজে সে কাশতে লাগল।

ভয়ে ও অসহায়ভাবে কল্যাণ দাঁড়িয়ে উঠল।

মুখ দেখা যাচ্ছে না। কোন আহত জন্তুর গৌড়ানির মত  
চাপা কাশি !

অশ্রুটস্বরে কল্যাণ বলে উঠল, হাউ আনক্যানি ! ও !

সে ভাবতে লাগল, যদি রক্ত ওঠে, জগদীশকে বোধ হয় ডাকতে হবে।  
কোনরূপ উদ্বেজনা ওর সয়না।

কুসানগুলিতে অমন করে মুখ গুঁজে ও কাশছে কেন !

ধীরে কাশির বেগ থামল। বালিশ থেকে মুখ তুলে শ্লান মধুর  
হেসে অনুপমা চাইল। বালিশের রক্তিমবর্ণ যেন তার মুখে ছড়িয়ে  
গেছে।

—কি ভয় পেয়ে গেছ ! ও কিছু নয়, বোসো ! কি দেখছ ?  
ও গলার কাশি—রক্ত ওঠে না—এ রকম প্রায়ই হয়—গলার কাশি—  
কমালটা দাও দেখি খুঁজে—একটা প্যাণ্ডিল দাও, ওই ব্যাগটায় আছে—  
জল—না, জল একটু পরে খাব—বোসো—

—এ রকম কাশি আমি কখনও শুনিনি।

অনুপমা কাত্ হয়ে উঠে বসল। কল্যাণ বসল জানলার কাছে।

—কি, ভয় করছে? আর কাশব না—এবার বোধ হয় ঘুম আসবে—তুমি কিন্তু চুপ করে বসে থাক।

কল্যাণের কাঁধে ছোট বালিশ রেখে তার ওপর অনুপমা মাথা রাখলে। চোখ বুজে সে বললে, এম্মি মাথা উঁচু করে শুয়ে থাকি, তাহলে কাশি আসবে না—তুমি চুপ করে বসে থাক, যেওনা। এবার একটু ঘুম আসছে।

কল্যাণ বাক্য-হারা বসে রইল। অনুপমার মুখ সে দেখতে পাচ্ছে না। শুধু সে অনুভব করছে, সন্ধ্যা-ফোটা শিশির-ভেজা শ্বেতপদ্মের মত সে মুখ শান্ত স্নিগ্ধ নির্মল।

বাহিরের দিকে সে চেয়ে রইল।

ধীরে রাত্রি ক্ষয় হয়ে আসছে। নিম্নে প্রান্তর বনস্থলীতে অন্ধকার, উর্দ্ধে গগনে আলোর আভাস, তারাগুলি একে একে মিলিয়ে যাচ্ছে। শুধু দূর দিক-চক্রবালে শুকতারার শুভ্র দীপ্তি।

পরম বিস্ময়ে বিমুগ্ধভাবে কল্যাণ চেয়ে রইল রাত্রিশেষের পৃথিবীর দিকে। এমন শান্তি, এমন স্নিগ্ধতা সে কখনও অনুভব করেনি।

নিদ্রাভরা অনুপমাকে ধীরে গুইয়ে দিয়ে কল্যাণ যখন পরের স্টেশনে নিঃশব্দে কুপে থেকে নেমে গেল, তখন স্বর্ণবর্ণা কল্যাণী উষা পূর্ব দিগন্তে আবির্ভূতা; শোন নদীর জল তাহারি আভায় রাঙা হয়ে উঠেছে।

নিজের গাড়ীতে গিয়ে উঠতেই, ঘুমে তার দুই চোখ ভারী হয়ে উঠল। পাইপটা ধরিয়ে খাবারও উৎসাহ রহিল না।

প্রেমদাস বল্লেন, আপনার ভয়ানক ঘুম পেয়েছে দেখছি। আপনি এইখানে শুয়ে পড়ুন, আমি ওই কোণে বসছি।

দ্বিধা না করে কল্যাণ প্রেমদাসের বার্থে শুয়ে পড়ল।

ভোরের আলো যখন আকাশের দিগ্বলয়ে ছড়িয়ে পড়ে, নীড়ে নীড়ে পাখীরা উস্খুস্ করে ওঠে, তখন রোজ খোকার ঘুম ভেঙে যায়। সন্ধ্যোটা কাঁটালি চাঁপার মত কোমল আলোয় কচি চোখ মেলে সে হেসে ওঠে, হাত পা ছোঁড়ে, মায়ের বুক পিঠ খামচায়, কখনও বা কান্নার স্ররে ডাকে, তারপর হেসে ওঠে। সরোজিনীকে তার সঙ্গে খানিকক্ষণ খেলা করতে হয়, দুধ খাওয়াতে হয়। তারপর থোকা আবার ঘুমিয়ে পড়ে।

বেঞ্চির মাঝখানে ট্রান্স স্ট্রাকেশ এ্যাটাচিকেশ দিয়ে বেঞ্চিগুলির সনান উঁচু করে, দুই বেঞ্চি জুড়ে ঢালাও বিছানা হয়েছে। কাঠের দেওয়ালের দিকে শুয়েছে শিবাজী, তার পাশে দীপিকা, তারপরে বালিশের ব্যবধান দিয়ে ছোট কাঁথায় থোকা, তারপর সরোজিনী, সবাই আড়াআড়ি শুয়েছে।

রাত্রে সরোজিনী নিশ্চিন্ত মনে ঘুমোতে পারেনি। বার বার ঘুম ভেঙেছে। শিবাজীকে সোজা করে শুইয়ে দিতে হয়েছে, সে রাতে চাকির মত ঘোরে; দীপিকার গায়ে চাদর ঢাকা দিতে হয়। দন্তগিরি বলেছিলেন, ট্রেনে তাঁর ঘুম হয় না, তিনি সজাগ থাকবেন। কিন্তু সরোজিনী যখনই জেগেছে, দেখেছে তিনি গভীর নিদ্রিতা, নাসিকা-ধ্বনিতে গাড়ী মুখরিত।

খোকার কচি মুঠোর ঠেলায় সরোজিনীর ঘুম ভেঙে গেল। চোখ রগড়াতে রগড়াতে সে বিরক্তভাবে চাইলে, ইচ্ছে হল খোকার পিঠে এক কীল বসিয়ে দেয়, কিন্তু খোকার হাসিমুখের দিকে চেয়ে তাকে বৃকে



টেনে নিলে। দেখলে, ওদিকের বেঞ্চে দত্তগিন্নি বসে মালা জপছেন ও তাদের দিকে কটমট করে চেয়ে আছেন।

খোকাকে দুধ খাওয়াতে হবে। সরোজিনী উঠে বসল।

—আপনি কতক্ষণ উঠেছেন, মাসীমা?

—আমার ব্রাহ্মমূর্ত্তে ওঠা অভ্যেস, বুঝলে সরষু।

—আমার নাম সরোজিনী।

—আমার কি অত মনে থাকে। বলছিলুম কি, এই যে আজকালকার বৌঝিরা, এদিকে চড়চড়ে রোদ উঠে গেছে, আর দরজা বন্ধ করে ঘুমোচ্ছেন, এ বাপু আমরা কোনদিন পারি নি, পারি না।

—আমারও মাসীমা ভোরে ওঠা অভ্যেস, আর এই যে এলার্ম ক্লক রয়েছে, ঘুমোবার কি জো আছে, গুঁতিয়ে কঁদে জাগিয়ে দেবে।

—এত কর্তব্য সরষু!

—সরোজিনী!

—আমার অত ছাই মনে থাকে না। তা তুমি বড় ভাল মেয়ে দেখছি। আজকালকার ছেলেমেয়েরা ত মায়ের কোলই পায়না, ঝি চাকরের কোলে কোলেই ঘোরে,—মারা সাজছেন গুজছেন, বন্ধুদের সঙ্গে গল্প করছেন, মাঝে মাঝে আবার আদরও উথলে উঠে, তখন ঝি চাকরদের কসে বকুনি।

—আমি ঝি চাকরদের কাছে ছেলেমেয়ে মানুষকরা পছন্দ করি না।

—সেই কথাই ত বলছিলুম। এই আমাদের বড়বৌ—তোমার টানাটানির সংসার, একটা ঝি আছে, বেশ, তার ওপর আবার একটা চাকর, বামুন কেন—যখনই দেখি, চাকরটা ছেলেটাকে কোলে নিয়ে সদর দরজার গোড়ায় বিড়ি ফুঁকছে—ছি ছি!

—আপনার কোন্ ছেলে সঙ্গে যাচ্ছেন?

—ওই ত বড়ছেলে গো। খুব পণ্ডিত, বিদ্বান মানুষ, সব পরীক্ষায় জলপানি পেয়ে এসেছে—কিন্তু হলে কি হয়, টাকার দিকে ঢু—ঢু—তবে আমার মেজছেলে খুব রোজগারে, তার কাছেই ত বোম্বে যাচ্ছি। রোজগার করলে কি হয় মা, ছেলেমেয়ে ত হল না একটা এতদিনে—আর মেজবোয়ের ত নিত্যি অস্ব্থ—এদিকে পটের বিবির মত ফিটফাট সেজে আছে সারাক্ষণ—

—ছেলেমেয়ে হওয়া ভাগ্য মাসীমা, ইচ্ছে করলে কি সবার হয়।

—সেই ত বলি সরযু! তেলিগ্রাম এল, মেজবোমার অস্ব্থ, তেলিগ্রামে ভাড়ার টাকা শুদ্ধ পাঠিয়ে দিয়েছে, তাই হাঁপাতে হাঁপাতে ছুটেছি। এদিকে মেজছেলের কাছে বেশী দিন থাকবার জো নেই, বড়বোমা বলবে, বড়লোক ছেলের বাড়ী বেশী দিন থাকবেই ত মা। তা তোদের বাড়ী আসব কি, ওই ঝি চাকরদের হাতে সংসার তুলে দেওয়া আমার ভাল লাগেনা—আমি নিজের হাতে বেঁধে থাই—

—আপনার মেজছেলের বাড়ী কতগুলি ঝি চাকর মাসীমা?

—ও বাবা, সেখানে আবার বাবুর্চি বেয়ারা গিস্গিস্ করছে—  
কানের কাছে সারাক্ষণ ‘মেম সাহেব’ ‘মেম সাহেব’ করছে—

—শুনতে ভাল লাগে?

—তা বড় কাজ করে, ও সব না করলে নাকি উন্নতি হয় না। আমি বকে দি—সারাক্ষণ মেমসাহেব মেমসাহেব করিস্নি।

দুধ খেয়ে খোকা ঘুমিয়ে পড়ল।

শিবাজী জেগে উঠল। দীপিকার পিঠে এক ঠেলা দিয়ে সে উঠে বসল।

—মা, কোন্ ষ্টেশন?

—ষ্টেশন কোথায় বোকা ছেলে, গাড়ী ত চলছে।

—ও ! চকোলেট দেবে বলেছিলে, সকালে ।

—আমি কখন বল্লুম ?

—রাঙামামা বলেছিল । রাঙামামা কোথায় ?

—যাও, আগে দাঁত মাজো, হাত মুখ ধোওগে ।

শিবাজী লাফিয়ে উঠল । এ্যাটাচিকেশ থেকে দাঁতের বুরুশ, মাজন, তোয়ালে, সাবান বের করে বাথরুমে গেল ।

মালাজপ শেষ করে দত্তগিনি বল্লেন, এ বেশ ভাল শিক্ষা । নিজে নিজের সব করে ।

সরোজিনী আলোভরা মাঠের দিকে চেয়ে বসে, কিন্তু দাদার কাণ্ড দেখলেন !

—তোমার দাদা বেশ ছেলেটি ।

—সারারাত একবার উঁকিও মারলে না ।

—আমি যেন কোন্ স্টেশনে দেখলুম, হন্ হন্ করে চলে গেল ওদিকে ।

—আপনি ত দিব্যি ঘুমোচ্ছিলেন, আপনি দেখলেন কখন ?

—সে কি সরষু !

—আমার নাম সরোজিনী, মাসীমা ।

—আমি না হয় তোমার আর একটা নাম দিলুম । রাগ কোরোনা ।

—রাতে একবার এসে খোঁজ নেওয়া ত উচিত ছিল, দাদার ।

—বোধ হয় ঘুমিয়ে পড়েছে, ক্লান্ত ছিল । তোমার দাদার বিয়ে হয়েছে ?

—ওই দেখুন না আর এক কাণ্ড ! এই সাত বছর পরে বিলেত থেকে এলেন । বিয়ে হবে কখন ?

—সেখানে বিয়ে-থা করেনি ত ?

—লোকে কত কথা বলে, গুজব রটাচ্ছে। দাদা ত বলে, করিনি। স্ততরাং আমরাও বিশ্বাস করি, করেনি।

—আবার বিয়ে করবে কথা দিয়ে না এসে থাকে। সে আর এক মুন্সিল, সরোজিনী !

—দাদা বলেছে, ভাল চাকরী না পেলে বিয়ে করবে না।

—সাত বছর বিলেতে ছিল। তাই ত মা ! শোন, একটা পরামর্শ দি। তোমার মাসীমা দেখছ সেকেন্দ্রে, কিন্তু দত্তবাড়ীতে বসে অনেক কিছু দেখেছি—শোন বলি, চিঠি পতর খুলে দেখছ ?

—চিঠিপতর কি খুলব মাসীমা ?

—নাও, নেকী মেয়ে ! বলি বিলেত থেকে যে সব চিঠিপতর আসে, মেম বন্ধুদের গো—খুলে পড়ছ ?

—সে পড়ব কি করে ? দাদা দেবে কেন পড়তে ?

—শোন, একটা মংলব দি। আমার দেওয়ার শালার ছেলে, সেও ওই রকম আট বছর ছিল বিলেতে। এসে বলে বিয়ে করব না। আমি বল্লুম খোঁজ নাও বাপু, গোলমাল আছে ; চিঠি দেখ, চিঠি। আমার পরামর্শ মতই ত, পিয়নের সঙ্গে সড় করে সব বিলিতা চিঠি নিয়ে নেওয়া হল ; খুলে দেখা গেল কোন্ মেমকে বিয়ে করবে বলে প্রতিজ্ঞা করে এসেছে। হুপ্তায় হুপ্তায় মেমের মোটা মোটা চিঠি আসে—বাছাধন একখানিও পান না—নিজেই লিখে মরেন মোটা মোটা চিঠি, তাও বাড়ীর কাউকে দিলে ডাকে ফেলা হত না। বাছা আমার কিছুদিন গুম হয়ে বসে রইলেন বাড়ীতে, চিঠির জবাব পান না হুপ্তায় হুপ্তায়। ভাবলে, মেম ভেগেছে আর কারুর সঙ্গে, আর কেন, বিয়ে করতে রাজী হয়ে গেল। আমার বোনের মামাশুভ্রের মেয়ের সঙ্গে বিয়ে হয়েছে। এখন তিন ছেলে, চার মেয়ে, দিব্যি স্থখে ঘর সংসার করছে। তাই বলছিলুম,

সরোজিনী—দেখ, এবার তোমার নাম ঠিক বলেছি—বলছিলুম, লুকিয়ে চিঠি দেখ, ওসব কলকৌশল করতে হয়।

—দাদা সে রকম প্রকৃতির নয়, মাসীমা। যদি বিয়ে করতেন নিজেই বলতেন।

—করেন নি ত ভাল। এখন তোমরা দেখে শুনে দিয়ে দাও শীগ্গীর। এ ত কর্তব্য মা।

—এ আপনি গায়া কথা বলেছেন, মাসীমা।

—শোন সরোজিনী, একটি খুব ভাল মেয়ে আছে—দেখ, এবার তোমার নাম ঠিক বলেছি—আমাদের পাড়ায় মল্লিকদের বাড়ী, চারটে পাশ-করা মেয়ে, বরাবর জলপানি পেয়ে গেছে—

—দেখতে কেমন মাসীমা? আমাদের খুব সুন্দরী বৌ হওয়া চাই, আমার ত তাই ইচ্ছা। মা বলেন, তুই সারাক্ষণ সুন্দরী সুন্দরী করিস না, ও নিজের পছন্দ মত যা হয় একটা করুক।

—সেই কথাই ত বলছি মা সরোজিনী। মেয়ে খুব সুন্দরী নয়, কিন্তু ওই মেয়েই তোমার দাদার পছন্দ হবে, বলে দিলুম আমি। আর মানাবে, তোমার দাদাকে ত দেখলুম—নেহাং কচি মেয়ে ত বিয়ে করতে পারবে না—হাঁ, “মালতী” নাম মেয়েটির—রং ফর্সা—আমি কালো মেয়ের কথা বলব না মা—আমার ভাস্করের শালার নাতনী, বাপ নেই কিন্তু বাপু।

—তাহ’লে?

—তা তোমাদের ত টাকা চাই না, বাপ নাই রইলো। মা’টি বড় ভাল মানুষ গো। মেয়ের বিয়ের জন্তে আমার কাছে কত হাঁটাইটি করছে; আমার হাতে কি ছেলে আছে বাপু। আবার মেয়ে বলে বিয়ে করব না, স্বদেশী করে বেড়াব।

—তবে মাসীমা, এই স্বদেশী মেয়ে আমাদের ঘাড়ে চাপাতে চান, ওখানে হবে না মাসীমা, আপনি অথ কোন সম্বন্ধ জানেন ত বলুন।

—ও স্বদেশী, মা, ছ’ দিনের খেয়াল,—এ মেয়ে তোমার দাদার পছন্দ হবে, এ আমি বলে দিলুম।

সরোজিনী আর কোন উত্তর দিলে না। স্ট্রটকেশ খুলে শিবাজীর কাপড় জামা বাহির করে দীপিকাকে ঠেলে জাগাল।

কে যেন ঠেলা দিয়ে রাধাকান্তকে জাগিয়ে দিলে। ঠেলা নয়, গাড়ীর ঝাঁকুনি। তবু রাধাকান্তের মনে হল, যেন তার ছোট মেয়ে মিনু তাকে ঠেলা দিয়ে বলছে, বাবা, ওঠ, দাঁড়াবে চল।

রাধাকান্তের খাটের পাশে ছোট খাটে মিনু শোয়। রাধাকান্তের স্ত্রী শোয় মেজেতে মাদুর পেতে। এমন অকাতরে ঘুমোয় যে, মিনু বার বার ডেকেও কোন সাড়া পায়না। তখন সে বাবার খাটের কাছে এসে ধীরে ডাকে, হাত ধরে টানে, বাবা এসো। অন্ধকারে বারান্দা দিয়ে বাথরুমে যেতে মিনুর ভয় করে। রাধাকান্তকে উঠতে হয়, মিনুর হাত ধরে যেতে হয় বারান্দায়। ঘুমের ঘোরে মিনু কি যা তা বলে ওঠে, রাধাকান্তের বড় মজা লাগে। তার প্রিয় কুকুর “খাজা খাঁ” একবার ডেকে ওঠে, তারপর লেজ নাড়তে নাড়তে পা চাটে। নামটি মিনুর দেওয়া।

রাধাকান্ত চমকে জেগে উঠল। ভাবলে, রাতে মিনু তাকে ডেকে পায়নি। তারপর মনে পড়ে গেল, কারখানায় ধর্মঘট, ব্যান্কেতে টাকা নেই, মোগলসরাই থেকে টেলিগ্রাম করতে হবে।

রাধাকান্ত বাঙ্কেতে সোজা হয়ে বসল। গাড়ী প্রভাতের আলোয় ভরে গেছে। গাড়ীর আলো সে নিভিয়ে দিলে।

দেবপ্রিয় ধীরে বসে, নেমে আসুন, নীচেতে যথেষ্ট জায়গা রয়েছে।

রাধাকান্ত, জিজ্ঞেস করলে, মোগলসরাই আর কত দূর মশাই?

দেবপ্রিয় বসে, বেশীদূর নয়।

হঁ, বলে রাধাকান্ত বসে রইল, বাঙ্ক থেকে নামল না। ভাবতে লাগল, মোগলসরাইতে ভাল করে খেতে হবে, কতকগুলি চিঠি লিখতে হবে, হিসাবও করতে হবে।

কল্যাণ ছাড়া এ গাড়ীর সবাই জেগে উঠে বসেছে।

কনকের পায়ের কাছে বোতলগুলির দিকে চেয়ে গণেশ বসে, বোতলে কিছু আছে মশাই?

অর্দ্ধশত্ৰু এক হুইস্কির বোতল তুলে কনক বসে, এইটায় কিছু আছে দেখছি, তবে সোডার বোতল সব শূন্য।

আমি নির্জলাই থাই, বলে গণেশ কনকের পাশে গিয়ে বসল।

শিপ্রা ক্ষুধার বলে উঠল, এই সকাল থেকেই স্নান হবে নাকি।

বোতলটা ধরে গণেশ বসে, গা-টা কেমন ম্যাজ্‌ম্যাজ্‌ করছে, একটু চাঙ্গা হয়ে নি। কারুর আপত্তি আছে?

বিরিঞ্চি কটমট করে বোতলটার দিকে তাকালে। কেউ কোন কথা বলে না।

গণেশ উঠে আসতে দেবপ্রিয় শিপ্রার পাশে গিয়ে বসল।

বিরিঞ্চি এতক্ষণ শিপ্রাকে দেখছিল। এই কালো রোগা মেয়ে, এই অভিনেত্রী শিপ্রা! মুখে খানিকটা রং লেপেছে, ঠোঁট দুটো করেছে রাঙা, কালো চুলের কুণ্ডলী সাপের ফণার মত উত্তত, তবে শাড়ীটা বেশ বাহারের আর কঙ্কনের প্যাটার্ণ ভাল। ওরি নাচ দেখবার,

গান শোনবার জ্ঞান, চোখ ঘুরানো, চলার বলার ঢং দেখবার জ্ঞান মাসের পর মাস সিনেমাতে লোকের ভিড় ! বিরিকি একদিন গেছল দেখতে, দলে পড়ে। সেই অভিনেত্রী শিপ্রার সঙ্গে এ কালো মেয়ের মিল দেখতে পাচ্ছে না। তবু বিরিকির ইচ্ছে হচ্ছিল, একবার শিপ্রার পাশে বসে, ধীরে হেসে বলে, তোমার ফিল্ম আমি দেখেছি, বেশ করেছে, বেশ গলা তোমার।

দেবপ্রিয় শিপ্রার পাশে বসাতে বিরিকি সেদিক থেকে মুখ ঘুরিয়ে নিলে।

দেবপ্রিয় শিপ্রাকে ধীরে বলল, আমাকে বোধ হয় চিনতে পাচ্ছেন না, ষ্টুডিওতে আপনার সঙ্গে আলাপ হয়েছিল।

এটা নিছক মিথ্যা কথা। শিপ্রা কিন্তু দম্লে না, সে হেসে বলল, হ্যাঁ, খুব মনে আছে—আপনি কবিতা লেখেন, না ?

দেবপ্রিয় চুপ করে আছে দেখে শিপ্রা বলে যেতে লাগল, গল্পও লেখেন, অর্থাৎ আপনি লেখক।

দেবপ্রিয় টাক-ভরা মাথাটা নেড়ে বলল, আপনার ঠিক মনে আছে আমি লিখি, তবে বেশীর ভাগ খবরের কাগজে।

হাত-ব্যাগ থেকে লিপষ্টিক নিয়ে ঠোঁটে রঙ দিতে দিতে শিপ্রা বলল, ঠিক, এই লেখার কথা নিয়েই আলোচনা হয়েছিল। জীবনে যে রং নেই সে রং দিতে হয় লেখায়, আপনি বলেছিলেন। রঙ্গপূর্ণ দৃষ্টিতে শিপ্রা দেবপ্রিয়ের দিকে চাইলে। তার কালো চোখের কাজল চাউনিতে ক্ষণপ্রভার দীপ্তি ক্ষণিকের জ্ঞান বলসে উঠল।

দেবপ্রিয় চমকে গেল। বুঝতে পারলে, জীবন অভিনয় এত সহজে করতে পারে বলেই এ তরুণী বড় অভিনেত্রী হতে পেরেছে। কিন্তু চুপ করে থাকলে চলবে না। শিপ্রা সম্বন্ধে খবরটা মোগলসরাই



থেকেই টেলিগ্রাম করে পাঠাতে হবে। খবরটার জন্ত কিছু পয়সা পাওয়া যাবে।

ধীরে দেবপ্রিয় বলে, আপনি ত বোম্বে যাচ্ছেন ?

হেসে শিপ্রা বলে, খবরটা আপনার জন্তে দরকার, না আপনার খবরের কাগজের জন্তে ?

—আমার কাগজই খবরটা অবশ্য প্রথম ছাপবে, আমারও কিছু লাভ আছে।

—বেশ, তাহলে শুভুন। বোম্বে যাব বলেই মোটর কারে বাহির হয়েছিলুম বারাকপুর থেকে। বর্দ্ধমানে এক গরুর গাড়ী বাঁচাতে গিয়ে গাছের সঙ্গে মোটরকারের লাগলো ধাক্কা। তারপর বর্দ্ধমান ষ্টেশনে চলন্ত ট্রেনে ওঠা। আর এখনও সেই চলন্ত ট্রেনে চলেছি। বোম্বের টিকিটও কেনা রয়েছে সঙ্গে। এই খবর পাঠালেই হবে।

—হাঁ। অনেক ধন্যবাদ।

কাঁকন-পর্য্য হাত তুলিয়ে শিপ্রা গণেশের দিকে দেখিয়ে বলে, ওই ভদ্রলোকের ছেলেটিকে চেনেন না মনে হচ্ছে। গুঁর নামটা এই সঙ্গে যুক্ত করে দিতে পারলে, আরও যাকে বলে সেন্সেস্শানাল্, নিউজ হত—কলকাতার যত চায়ের দোকানে, ছেলেদের আড্ডায় আজ সন্ধ্যায় গল্প জমে উঠত—

বিস্মিতভাবে দেবপ্রিয় বলে, ওকে দেখিছি যেন কোথাও, যদি অনুগ্রহ করে—

শিপ্রা হেসে বলে, গুঁর অনুমতি না পেলে কি করে বলি গুঁর নাম ! উনি ত অজ্ঞাতবাস করছেন।

দেবপ্রিয় একটু করুণভাবে গণেশের দিকে চাইলে।

হুইস্কির বোতল গণেশ প্রায় শেষ করে এনেছে, একটুকু বাকী।

বোতলটা নেড়ে গণেশ বলে, দেখুন যদি আমার হেল্থ ড্রিক করেন তাহলে এই অজানা পথিকের পরিচয় পাবেন।

টাকের ওপর হাত রেখে দেবপ্রিয় বলে, এখন সকাল বেলায় ? আমাকে মাতাল করতে চান ?

শিপ্রা ভ্রুকুটি করে গণেশকে বলে, কি যা তা বলছো, চুপ করো। ইসারায় সে সন্ন্যাসী প্রেমদাসের দিকে দেখালে।

গণেশ হো হো করে হেসে উঠল !

—আমার নাম জানবার জন্তে এত কাণ্ড। শুনুন, আপনার সামনে এই যে মূর্তি দেখছেন, ইনি হালদার বংশের কুলঙ্গার গণেশচন্দ্র—শুনলেন, রাতে কিন্তু খেতে হবে।

—আপনি গণেশ হালদার !

—লোক সমাজে উক্ত নামেই পরিচিত।

—আপনার সঙ্গে আলাপ করবার জন্তে অনেকদিন থেকেই ইচ্ছে।

—কেন বলুন ত ?

—শুনেছি, আপনাদের বাড়ীতে খুব ভাল পুরানো লাইব্রেরী আছে।

—ও, আপনি ওই পুরানো বই-এর সঙ্গে আলাপ করতে চেয়েছিলেন, মাহুষের সঙ্গে নয়। মাহুষটি বুঝলেন—

—না, না, বড় ভাল লাগছে আপনাকে ! আপনার অগাধ টাকা, অনেক কাজ করতে পারেন।

—ভাল ভাল কথা বলতে আরম্ভ করলেন যে। এখন টেলিগ্রামটা লিখে ফেলুন।

রাধাকান্ত বাক থেকে নেমে এল তাড়াতাড়ি। এই গণেশ হালদার !

দু'তিন লাখ টাকা ত সে ইচ্ছা করলে এখনই দিতে পারে। হুইস্কির বাকী অংশের ভাগ চেয়ে আলাপ করবার জগ্গে রাধাকান্ত গণেশের পাশে বসল।

হুইস্কির বোতল নিঃশেষে শেষ করে গণেশ রাধাকান্তের দিকে চাইলে। হেসে বললে, আপনাকেও কি কোথাও দেখেছি?

হ্যাঁ, গতরাত্রে, এই গাড়ীতে, ব'লে রাধাকান্ত চুপ করে বসে রইল।

সকাল ঠিক ছ'টার সময় বিছানা থেকে ওঠা জগদীশের অভ্যাস ও নিয়ম। সেজন্ত মাথার কাছে একটি ছোট এলার্ম ঘড়ি সব সময় থাকে। ঘুম ভেঙ্গে গেলেও জগদীশ চুপ করে শুয়ে থাকে, ঘড়ির এলার্ম বেজে উঠলে তবে ওঠে।

গতরাত্রে ঘড়ি মাথার কাছে রেখেছিল কিন্তু এলার্ম দিতে ভুলে গেছিল। এমন ভুল তার কখনও হয় না।

ঘুম ভাঙতেই জগদীশ ঘড়ি দেখলে। ছ'টা বেজে পাঁচ মিনিট, তাড়াতাড়ি সে বান্ধ থেকে নেমে এল।

বিছানার ওপর অল্পপর্মা এলিয়ে পড়ে ঘুমোচ্ছে, রঙীন গোল বালিশে কালো চুলের বগ্না, সাদা শাড়ীর আঁচল বুক থেকে খসে শুভ্র সমুদ্র-ফেনায় জমাট তরঙ্গের মত ছড়িয়ে পড়েছে, অলঙ্কার-বিস্তৃত নিটোল হস্তের ওপর মাথা রাখা, শাড়ীর কালোপাড়ের নীচে কনক বর্ণের পা দুখানি, ক্লান্তদেহের করুণ মাধুরী-ভরা ঘুমের এ রূপখানি প্রভাতের আলোয় জগদীশের অনির্বচনীয় মনে হল, অল্পমাকে যেন সে নতুন করে দেখলে। স্নিগ্ধ মধুর বাতাস বইছে, শিশিরসিক্ত প্রান্তর ঝিকিমিকি

করছে, নীলাকাশের পেয়ালা হতে শুভ্র নির্মল আলোর ধারা উপ্ছে পড়ছে—এই জাগরণপূর্ণ প্রভাতালোকের মধ্যে রূপের আলোয় ভরা শ্রান্ত নারীর নিদ্রাটুকু বড় সুন্দর। জগদীশের ইচ্ছা হল, অনুপমার মাথার কাছে বসে চেয়ে থাকে তার নিদ্রিত মুখের দিকে, চেয়ে থাকে এই আলোক-ভরা আকাশের দিকে।

কিন্তু ছ'টা বেজে দশ মিনিট হয়েছে। মোগলসরাই পৌছিবার পূর্বেই তাকে প্রাতঃক্রিয়া সারতে হবে—দাড়ি কামাতে হবে, ব্যায়াম করতে হবে, ড্রেস করতে হবে।

অনুপমার মাথার দিকে জানলার খড়খড়ি ফেলে দিয়ে জগদীশ দাড়ি কামাতে গেল।

জগদীশ যখন ড্রেস করে এল অনুপমা জেগে উঠেছে। পিঠে বালিশ দিয়ে বদ্ধ খড়খড়ির কোণে বসেছে, খড়খড়ির ফাঁক দিয়ে আলোর সমান্তরাল রেখাগুলি তার পিঠে বুকে এসে পড়েছে, বিপর্যাস্ত কেশভারে শুভ্র আলোর ডোরা-কাটা। সে আলোর দীপ্তি কৃষ্ণ চক্ষের পল্লবে। রসজ্জ্বলিতা কমলিনীর মত তনুলতা রহস্য-মধুর।

বিশ্বয়মুগ্ধ নয়নে জগদীশ চাইলে, ধীরে একটু এগিয়ে গেল। তারপর থমকে দাঁড়ালে। অনুপমার চারিদিকে অদৃশ্য জালের মত ছুর্ভেগ বেড়া তাকে বাধা দেয়, ধাক্কা মারে, দেহের এ বেড়া পেরিয়ে সে অনুপমার অন্তরলোকে প্রবেশ করতে পারে না কেন?

‘বো’ বাঁধতে বাঁধতে জগদীশ বড় জোরে টান দিলে। চূপ করে বসে-থাকা অনুপমার দিকে চাইলে। অনুপমা বোধ হয় তাকে ভালবাসে না, অথবা অসুখের জ্ঞাত, তাকে দূরে রাখতে চায়। অনুপমার অন্তরের বিমুখতা অদৃশ্য হাতে জগদীশকে ঠেলা দেয়, আলিঙ্গন সম্ভব হয় না।

জগদীশ কিন্তু একথা ভাবল না যে, ভয় রয়েছে তার মনে। তার মগ্ন চৈতন্যলোকে যে গভীর আশঙ্কা রয়েছে, এ অদৃশ্য বাধা তারি ছদ্মরূপ, কেবল মাত্র ব্যাধি-সংক্রমণের আশঙ্কা নয়, অনুপমার কাছে পরিপূর্ণ আত্ম-নিবেদনের আশঙ্কা রয়েছে, আপন সত্তাকে লুপ্ত মুক্ত করার আশঙ্কা। অনুপমাকে সে ঘৃণাও করে।

আদরের স্বরে জগদীশ বলে, ওগো, জেগেছ? ওঠো অনুপমা, খোলগো আঁখি—

অনুপমা চোখ মেলে নির্ণিমেষ নয়নে চাইলে। প্রভাত-সূর্য্য যেরূপ দীপ্ত রশ্মিবাণে কুয়াশার পর্দা খান্-খান্ করে কেটে ফেলে, তেমনি তীব্র আলোক-শলাকা কৃষ্ণ তারকা হতে বিচ্ছুরিত হয়ে জগদীশের ছাই-রঙের কোটে প্যাণ্টে বিদ্ধ হ'ল, জগদীশ সমস্ত দেহে একটা জ্বালা অনুভব করলে।

অনুপমা হেসে উঠল।

—বা, এর মধ্যে যে ড্রেস করা হয়ে গেছে, দেখছি। এমন করে দাঁড়িয়ে থেকোনা, বোসো।

বেঞ্চির অপর কোণে জগদীশ বসে বলে, কেমন ঘুম হল?

—তুমিত বেশ ঘুমিয়েছিলে, একবার উঠে দেখেছিলে, ঘুমোচ্ছি কি না?

—সত্যি, খুব ঘুমিয়েছি। তুমি ভাল ঘুমোওনি? ওষুধটা খেলে না কেন?

—সারারাত যা হৈ-চৈ তা ঘুমোব কি?

—হৈ-চৈ?

—হাঁ, গো। ঝক্-ঝক্—ঘড়্-ঘড়্—ভ্যক্-ভ্যক্—কু—

ওষ্ঠাধর কুঞ্চিত করে অল্পপমা রেল-ইঞ্জিনের শিটি দেওয়ার সুরে লম্বা শীস দিয়ে উঠল।

—তা রেলগাড়ী চলার শব্দ ত হবেই।

—শুধু চলছে! এই থামছে, এই আলো, এই অন্ধকার, যেন ভূতের দাপাদাপি কাণ্ড! ভোরের বেলায় যা হোক একটু ঘুমিয়ে পড়েছিলুম।

—ভাস্ক্যারেরা ঠিকই বলেছিল, সারারাত ট্রেনে যাওয়া ঠিক হবে না, অমন নিস্তর্র বাগানে অতদিন থেকে। তোমার মুখটা বড় রাঙা মনে হচ্ছে।

—ফর্সা মুখের ওই রকমই রঙ হয়।

—ঠাট্টা নয়, কি রকম ফ্লাস্‌ড্। জ্বর হয়নি ত?

—হাঁ, জ্বর ত হয়েছে; সারারাত না ঘুমিয়ে ট্রেনে বাস করে যদি জ্বর না হয় ত লোকে বলবে আমার অসুস্থ ধাপ্লাবাজি।

—সব সময়ে ঠাট্টা কোরোনা অল্প—ওষুধটা তাহলে খাও।

—সত্যি আমার একটু জ্বর হয়েছে।

—থার্মোমিটার দিয়ে দেখেছ?

—ও, দেখতে হয় না। আমি নিজে বুঝতে পারি। শেষ রাতে একবার কাসির বেগ হয়েছিল।

—আমায় ডাকলে না কেন?

—দরকার হয়নি।

—আচ্ছা, টেমপারেচারটা দেখ।

—আমি এখন দেখব না। চুপ করে বস দেখি।

—তাহলে,—মোগলসরাইতে নেমে পড়া যাক্।

—মোগলসরাইতে কি হবে?

—অথবা নৈনী দিয়ে এলাহাবাদ চলো, সেখানে দুদিন বিশ্রাম করে যাওয়া যাবে।

—আচ্ছা, জর কি আমার নতুন হচ্ছে, আমি সটান বোসে যাব। পথে কোথাও নামছি না। এক গেলাস জল দাও দেখি। আর এ খড়খড়ি তুলে দাও।

চোখে মুখে জল দিয়ে একটু জল থেয়ে অনুপমা বলে, দাও একটা রুমাল, মুখটা মুছি, আর অমন ঘুরঘুর কোরো না, আমার পাশে চুপ করে বোসো দেখি।

জগদীশ বসল অনুপমার পাশে। অনুপমা তার হাত টেনে নিলে নিজের হাতে।

—তোমার হাত বড্ড ঠাণ্ড কেন?

—তোমার হাত বড় গরম হয়েছে, তাই অমন মনে হচ্ছে।

—অনেকদিন পরে আবার জর হল, বোসে গেলেই সমুদ্রের হাওয়াতে ছেড়ে যাবে।

—আজ চুপচাপ শুয়ে থাক। কি খাবে?

—কথা না বলে আমি হাঁপিয়ে উঠব, চুপচাপ শুতে পারব না, এতদিন পরে তবু একটু মানুষের মুখ দেখছি! সারাক্ষণ ট্রেনের ঝং ঝং যত বিতিকিছিরি শব্দ—তার মধ্যে চুপ করে থাকা।

—জর আরও বাড়বে।

—বাড়ুক। ওগো মাথায় একটা বালিশ দাও না।

অনাবৃত স্নগোল বাহুলতায় অনুপমা জগদীশের হাত জড়িয়ে ধরলে। এ ভূজবন্ধনে যেন সে তাহার দেহের তাপ অন্তরের চঞ্চলতা জগদীশের শীতল দেহমানে সঞ্চারিত করতে চায়।

অনুপমা মুহূ হেসে উঠল। তার হাসির দিকে চাইলে জগদীশের রক্তে দোলা লাগে। মনে হয়, অদৃশ আড়াল সবে গেছে।

মুহূরু অনুপমা বলে, ওগো শোন, চলো, আমরা ইয়োরোপ খাই।

—ইয়োরোপ!

জগদীশ একটু ঘাড় বেঁকালে, অনুপমার মুক্ত কেশ পড়েছে তার পিঠের ওপর। অনিন্দিত বাহু দিয়ে মোহিনী বুঝি বাঁধছে! শিখিল কোমল তনুর স্পর্শ ঘন অরণ্য-বেষ্টিত সরসীর শ্রামল শম্পতটের মত স্নিগ্ধ, স্বপ্নাবেশ আনে।

—হাঁ, ইয়োরোপ! চমকে ওঠ কেন? স্নাইজারল্যাণ্ডে গিয়ে থাকবো। সেখানে ভাল ভাল স্নানাটোরিয়াম আছে শুনেছি; আমি স্নানাটোরিয়ামে থাকব, তুমি নানা জায়গা ঘুরতে পার।

—এ সব কথা তোমায় কে বলে?

—কে আবার বলবে, আমি নিজেই ভেবে ঠিক করেছি।

—আচ্ছা, আগে বোঝেতে যাই চল। এখন অত ভেবো না, তোমার জ্বর হয়েছে।

—স্নাইজারল্যাণ্ডে কিছুদিন গিয়ে থাকলে আমার অসুখ সেরে যেতে পারে; ওদেশে অনেকের একেবারে সেরে যায় শুনেছি।

—এ সব কথা কে বলে তোমায়? আমাদের বোস ডাক্তার?

—দেখ, তোমার চেয়ে কিন্তু কম বই পড়িনি জেনো। বলেই পারো, যাবো না।

—না, যাব না আমি ত বলছি না। সব খোঁজ নিতে হবে, ডাক্তারদের সঙ্গে পরামর্শ করতে হবে। সত্যি তোমার অসুখ সারবে কি না—আর ছুটি চাইলেই ত আমি ছুটি পাব না—জান ত, তুমি বোঝ না। বোঝে গিয়ে ঠিক করা যাবে—না, এখন ইয়োরোপ যাওয়া



অসম্ভব। জান না, ইয়োরোপে কি গোলমাল চলছে, যে কোন সময় যুদ্ধ বাধতে পারে, এ সব ভেতরের খবর, তোমায় সব বলতে পারি না।

ভূজবন্ধন ধীরে শিথিল হয়ে মুক্ত হয়ে গেল। অনুপমা কোন কথা বললে না, ধীরে চোখ বুজলে। মাথাটা দপ্‌দপ্‌ করছে।

জগদীশ ধীরে দাঁড়িয়ে বললে, তোমার মুখে যে রোদ এসে পড়ছে, খড়খড়ি ফেলে দি।

দাও, বলে অনুপমা একবার চোখ চাইলে। একটু হতাশের সুরে বললে, ভেবোনা ইয়োরোপ যাবার জন্যে তোমায় আমি সাধ্‌ছিলুম, আমার মনে হল, এম্মি বলছিলুম।

অনুপমা আবার চোখ বুজে এলিয়ে শুয়ে পড়ল।

অনুপমা ভাবতে লাগল, সে যা শুনতে চেয়েছিল, সে কথা শুনতে পেলনা। ইয়োরোপে যাবার তার সত্যি এমন কিছু ইচ্ছা নেই। তবু জগদীশ ত বলতে পারত, হাঁ, তোমায় নিয়ে যাব ইয়োরোপে, স্নুইজারল্যান্ডে সবচেয়ে ভাল স্যানাটোরিয়মে তোমায় রেখে দেব। তার একটা ইচ্ছা, একটা খুশি হয়েছে, শুনে বলতে ত পারত, পূর্ণ করব তোমার খুশি। যদি যুদ্ধ বাধে, যদি ডাক্তারেরা অনুমতি না দেয়, যদি ছুটি না পাওয়া যায়, তাহলে ত পরে যাওয়া হত না, কিন্তু এখন ত জগদীশ তার মনের ইচ্ছা পূর্ণ করতে বলতে পারত, হাঁ চলো, আমরা যাব ইয়োরোপে, তুমি সেরে যাবে, তারপর নানা দেশ ঘুরব, ছুটি আমি যে করে পারি যোগাড় করব; ইণ্ডিয়া আফিস গিয়ে দেখা করলে, তোমার ব্যাধির কথা বললে, নিশ্চয় দেবে। এ সব কথা ত জগদীশ বললে না, কেন বললে না? বললে ত কোন ক্ষতি হত না, কিন্তু কতবড় লাভ হত, অনুপমা বুঝত যে, জগদীশ সত্যি তাকে ভালবাসে। না, জগদীশকে পরীক্ষা করতে সে বলেনি। মনের খুশিতে

সে বলেছিল, একথা। শুধু শুনতে সাধ ছিল, জগদীশ বলেছে, তোমার ইচ্ছা হচ্ছে, নিশ্চয় যাবো আমরা। সে সাধ পূর্ণ হল না।

রঙীন কুশানে অন্তপমা মুখ গুঁজলে। ট্রেন বড় ছুঁলছে। স্থির লৌহবন্ধে অবিশ্রান্ত ঘূর্ণ্যমান লৌহচক্রের ঘর্ষণধ্বনি কঠিন ককশ।

অন্য কোণে জগদীশ চুপ করে বসে টাইম-টেবলের পাতা ওলটাতে ওলটাতে ভাবতে লাগল, নিশ্চয় ওই কল্যাণ ছোকরাটা এ সব মংলব দিয়েছে।

মোগলসরাই স্টেশনে ট্রেন থামতেই দেবপ্রিয় স্টেশনের টেলিগ্রাফ-আফিসে টেলিগ্রাফ করতে ছুটল। শিপ্রা-সংবাদ কলিকাতায় সন্ধ্যার কাগজেই প্রকাশিত হয়ে যাওয়া চাই।

টেলিগ্রাফ-অফিসে ভয়ানক ভিড়। সাহেবী পোষাকপরা এক কৃষ্ণবর্ণ বাঙ্গালীকে সাহায্য করবার জন্য আফিসের কেরাণীটি ভয়ানক ব্যস্ত। অনেকক্ষণ অপেক্ষা করার পর, দেবপ্রিয় টেলিগ্রাম লেখবার ফর্ম পেলে। ছোট করে গুছিয়ে লিখতেই অনেকক্ষণ কাটল। লিখতে লিখতে মাঝে মাঝে সে মাথা তুলে দেখলে, সেই কৃষ্ণবর্ণ বাঙ্গালীটি তার দিকে কটমট করে চাইছে।

লেখা তখনও শেষ হয়নি, ছাই রঙের স্ট্রট-পরা লোকটি এগিয়ে এল। যেন একটু তিক্তস্বরে বললে, আপনি কি দেবপ্রিয়—?

দেবপ্রিয় স্থির দৃষ্টিতে চাইলে। জগদীশের মতন মুখ মনে হচ্ছে! কলেজে জগদীশ এই রকম রঙের স্ট্রট পরে আসত, তার ভাঁজগুলি এমনি নিখুঁত থাকত। হাঁ, জগদীশই হবে। ওই রকম কালো খাবড়া মুখ, মোটা নাকের পাশে ছোট চোখ, বিরল। ওই কদাকার-দর্শন সহপাঠীর সঙ্গে কলেজে দেবপ্রিয়ের বিশেষ ভাব ছিল। কলেজে দেবপ্রিয় ছিল খ্যাতিনামা ছাত্র, বিশ্ববিদ্যালয়ের স্বর্ণপদক-মার্ক। জগদীশ কোন পরীক্ষায় তার সমকক্ষ হতে পারে নি। সেজন্য জগদীশের ঈর্ষা ও ক্ষোভ বড় কম ছিল না। সেই জগদীশ আজ মোটা মাহিনার গভর্নমেন্ট অফিসার। বিলেতে যাবার টাকা ছিল বলেই আজ জগদীশ এমন চাকরি পেয়েছে। কেশ্বিজ্ঞে গিয়ে পড়বার

মত পিতৃসঙ্কিত অর্থ যদি দেবপ্রিয়ের থাকত, আজ সে আই, সি, এস না হলেও একটা বড় অধ্যাপকও ত হতে পারত।

চশমার কালো কাচ দিয়ে জগদীশের দিকে চেয়ে, দেবপ্রিয় ভাবলে, সে বলে, না সাহেব, আপনি ভুল করছেন, আমি আপনার জানা সে দেবপ্রিয় নই। এ জগদীশকে না চিনলেও ক্ষতি নেই। তবু দেবপ্রিয় জগদীশের দিকে চেয়ে রইল, জানতে ইচ্ছে করল, সহপাঠী জগদীশের কতখানি পরিবর্তন হয়েছে। মৃদু হেসে সে বললে, হাঁ জগদীশ সাহেব, চিনতে ভুল করনি।

জগদীশের স্মৃতিপরা ও সাহেবীয়ানার জগ্ন সকলে তাকে পরিহাস করে, জগদীশ-সাহেব বলে ডাকত।

—তাইত বলি, দেবুর মতন মনে হচ্ছে, তবে অত বড় টাক দেখে একটু দ্বিধা হচ্ছিল।

দেবপ্রিয়ের হাত ধরে জগদীশ জোরে ঝাঁকুনি দিলে।

—অত জোরে টিপোনা। জোরে হাওসেক করার অভ্যাস যায়নি দেখছি।

—কতদিন পর দেখা বলত, দেখে বড় আনন্দ হচ্ছে তোমাকে, এই টেনেই যাচ্ছ? এত কি টেলিগ্রাম লিখছ?

লেখা কাগজগুলি দেবপ্রিয় সাটের পকেটে পুরে ফেললে। সে বললে, একটা খবর পাঠাব ভাবছিলুম, পরে অগ্ন কোন স্টেশন থেকে পাঠাব, এখানে যা ভিড় দেখছি।

—দরকারী হয় এখান থেকেই পাঠাও, আমি বলে দিচ্ছি ক্লার্ককে।

—না, না, দরকার নেই : তোমার টেলিগ্রাম করা হয়ে গেছে?

জগদীশ সন্দিগ্ধভাবে দেবপ্রিয়ের দিকে চাইলে। তার সম্বন্ধে কোন খবর পাঠাচ্ছিল নাকি?

—কাকে খবর পাঠাচ্ছিলে ?

দেবপ্রিয় ব্যঙ্গের সুরে বলে, আমার খবরের কাগজের আফিসে পাঠাচ্ছিলুম, তোমার সম্বন্ধে নয়, ভয় নেই, একটি অভিনেত্রীর উদ্দেশে লিখছিলুম।

এ ব্যঙ্গময় কণ্ঠস্বর জগদীশের চেনা। সে একটু চমকে উঠল, তারপর শো হো করে হেসে বলে, আজকাল অভিনেত্রীতে ইন্টারেস্টেড নাকি ? সে ভাগ্যবতী কে ? টেলিগ্রাম যদি না করো ত চলো, একটু চা খাওয়া যাক রেস্টোরাঁ-কারে।

ট্রেনের দিকে দু'জনে এগিয়ে চলল।

দেবপ্রিয়ের পিঠ মুছ আঘাতে চাপড়ে জগদীশ বলে, তুমি ত আজকাল খ্যাতনামা লেখক। ক'খানা বই হ'ল ?

—এসব খবরও তোমায় রাখতে হয় নাকি ?

—আমার স্ত্রীর হাতে তোমার কি একখানা বই দেখছিলুম একদিন, 'সমীরণ' বলে—

—'সমীরণ' ও নামে কোন বই লিখেছি বলে ত মনে হচ্ছে না, 'সমীক্ষণ' নয় নিশ্চয় !

—তা হতে পারে। আমার স্ত্রী তোমার লেখা খুব পছন্দ করেন। সেদিন আমায় পড়ে শোনাচ্ছিলেন। চলো তোমার সঙ্গে আলাপ করিয়ে দি।

—এই যে বলে, রেস্টোরাঁ-কারে যাবে চা খেতে।

—ও ইয়েস, চলো, আগে চা খেয়ে নেওয়া যাক।

রেস্টোরাঁ-গাড়ীর সম্মুখে এসে দেবপ্রিয় বলে, আমি ত এখন যেতে পারব না, তুমি চা খাও গে।

—সে কি ! আবার টেলিগ্রাম করতে হবে নাকি ?

—না। মাকে নিয়ে বোম্বে যাচ্ছি, তাঁকে একবার দেখে আসা দরকার।

—আর অভিনেত্রীটিও কি সঙ্গে যাচ্ছেন?

—সঙ্গে না হলেও এক ট্রেনে।

—শোন, আমি প্রথমশ্রেণীর কুপেতে আছি, ছিওকিতে নিশ্চয় এসে। আমার স্ত্রী তোনার সঙ্গে আলাপ করে বিশেষ খুসি হবেন।

মায়ের গাড়ীর দিকে যেতে যেতে দেবপ্রিয় পথে থমকে দাঁড়াল। প্রথমশ্রেণীর এক গাড়ীর সম্মুখে পাগড়িওয়ালা পাহারা। গাড়ীর মধ্যে এক সুন্দরী যুবতী ও চঞ্চলা তরুণী; সামনে টেবিলে চায়ের সরঞ্জাম,— পেয়ালার টুং টাং শব্দ, তরুণীর উচ্ছ্বসিত হাস্যের মধ্যে সুন্দরীর স্থিরমূর্ত্তি, স্বর্ণালঙ্কার-শোভিত হস্তের কম্পিত ভঙ্গী, শুভ্র আননে ক্ষণিকের রক্তিমাবড় সুন্দর।

মায়ের সঙ্গে দেখা করে দেবপ্রিয় আবার প্রথমশ্রেণীর কুপের সম্মুখে এসে দাঁড়াল। জগদীশ শুধু ভাল চাকরি নয়, পরমাসুন্দরী স্ত্রী লাভ করেছে। আর কলেজে প্রফেসারগণ বলতেন, দেবপ্রিয়ের ভবিষ্যৎ সমুজ্জ্বল। তখন কে জানত, কোন অফিসে কেরাণীগিরি করে জীবন কাটাতে হবে।

পকেট থেকে টেলিগ্রামের লেখা কাগজগুলি বাহির করে সে ছিঁড়ে ফেল্লে। সামান্য অর্থলাভের জন্ত, এত ঘট করে টেলিগ্রাম করতে তার ঘৃণা বোধ হল। বস্তুতঃ, জগদীশকে দেখে তার অন্তর ক্ষোভিত হয়ে উঠেছে, ব্যর্থ হল তার জীবন। ভাগ্য তাকে বার

বার বিদ্রূপ করেছে। প্রভাতের আলো যেন কালিমাভিরা। কালো পদ্মার ওপর সোনালী তারার মত জ্বলছে, ওই অপক্লপা নারী।

—দেবপ্রিয় বাবু! অ—দেব—প্রিয়—বা—বু!

সৌন্দর্য্যস্বপ্ন হতে চমকে দেবপ্রিয় চাইলে। কুপের পাশের প্রথম শ্রেণীর গাড়ী হতে শিপ্রা তাকে চেষ্টা করে ডাকছে। সে কম্পার্টমেন্টের দিকে দেবপ্রিয় এগিয়ে গেল।

শিপ্রা বলে, বাবা, এত চেষ্টাচ্ছি আপনি শুনতেই পান না। কি হাঁ করে দেখছিলেন?

—যা গোলমাল ঘটেনে।

—টেলিগ্রাম করলেন?

—টেলিগ্রাম করিনি।

—করেন নি? কেন? আমাদের ওপর চটে গেলেন নাকি? এই দেখ, গণেশবাবু, তুমি কি সব বলেছিলে গুঁকে—দেখছ পণ্ডিত মানুষ উনি।

—না, না, সে জ্ঞান নয়। আমি সত্যি চটিনি। কেমন ইচ্ছে করল না করতে।

—তা বেশ করেছেন। বোধহয় সারপ্রাইজ ভাল করে হবে। আশুন আমাদের গাড়ীতে। আপনাকে আমাদের ভাল লেগেছে। বেশ লোক আপনি।

দেবপ্রিয় অজানিতভাবে টাকের উপর হাত বুলিয়ে নিলে। এটাও কি অদৃষ্টের আর একটা পরিহাস। হোক পরিহাস, এ রক্কে সে যোগ দিতে চায়।

দরজা খুলে গণেশ বলে, উঠে আশুন দেবপ্রিয় বাবু, কি ওই সন্ন্যাসীদের দলে পড়ে থাকবেন? চা খেয়েছেন?

দরজার ফাঁক দিয়ে দেখা গেল, বেকির উপর চায়ের ট্রে পাশে চারটি বোতল সাজান।

—আপনার মুখ দেখে বুঝতে পাচ্ছি, চা আপনি খান নি।

—আচ্ছা, একটু চা খেতে পারি, কিন্তু এখুনি গাড়ী ছেড়ে দেবে।

—তাতে কি!

—এটা যে ফার্স্ট ক্লাশ।

—মশাই, চারখানি টিকিট কিনে কম্পার্টমেন্ট রিজার্ভ করা হয়েছে, কি ভয় পাচ্ছেন আপনি!

—কম্পার্টমেন্ট রিজার্ভ করবার দরকার কি ছিল?

—কেন করব না? পয়সা কিসের জন্তে মশাই? কমফোর্ট চাই, বুঝলেন। উঠে আসুন, বেশ গল্প করতে করতে যাওয়া যাবে—আর এসব একা খাওয়া যায় না, বুঝতে পারেন ত।

দেবপ্রিয়ের টাকের উপর গণেশ হাত বুলিয়ে দিলে।

শিপ্রা হেসে বললে, তুমি আবার গুঁকে ভয় দেখাচ্ছ কেন? না, না, দেবপ্রিয় বাবু, ওসব আপনার খেতে হবে না। আপনি ফ্রেশ জানেন?

—ফ্রেশ? কিছু জানি, কেন?

—আমি দেখেই বুঝেছিলুম, আপনি জানেন। উঠে আসুন, এবার ট্রেন ছেড়ে দেবে। ফ্রেশ-জানা একজন পণ্ডিত অভিনেতা আমাদের দরকার!

দেবপ্রিয় ভাবলে, সে বলে, নিরিবিবি থাকবার জন্তে আপনারা কম্পার্টমেন্ট রিজার্ভ করেছেন,—

নটী শিপ্রার দিকে চেয়ে সে কোন কথা বলতে পারলে না। চঞ্চলপদে গাড়ীতে উঠে সে শিপ্রার পাশে বসল। গণেশের দিকে চেয়ে বললে, এখনও একটা বোতলও খোলেন নি?



শিপ্রা কটাক্ষপাত করে বলে, তবে যে ও গাড়ীতে বড় ভালমানুষ  
সাজছিলেন !

গণেশ হেসে বলে, আহা, যেখানে যে-রকম সাজতে হয়, বোঝনা—  
কত জায়গায় কত রকম রূপ ধরতে হয়,—কবি বলেছেন না—  
the world is a stage—কি বলেন—আমি দেখেই বুঝেছি  
আমাদের দেবপ্রিয়বাবু লোক ভাল—কি বলেন—তাহলে একটা  
বোতল—

শিপ্রা বাধা দিয়ে বলে, তুমি আগে চা খাও দেখি—বোতল ত  
পালাচ্ছে না ।

—শিপ্রাদেবী যখন বলছ, তাই হোক । কি বলেন ! দেবপ্রিয়বাবু,  
আমি চুপচাপ লোক ভালবাসি না, মশাই । পাঁচ মিনিট কথা না কইতে  
পারলে আমি হাঁপিয়ে উঠি ।

—তুমি বুঝতে পার না, দেবপ্রিয়বাবু একটা পণ্ডিত লোক, দার্শনিক  
মানুষ, কত বিষয় ভাবেন ।

দেবপ্রিয়ের হাতে চায়ের পেয়ালা দিয়ে শিপ্রা হেসে উঠল । ইঞ্জিনের  
টানে দোলার জগ্ন অথবা দেবপ্রিয়ের হস্তকম্পনের জগ্ন খানিকটা চা  
উছলে গড়িয়ে পড়ল ।

যোগলসরাই ষ্টেশন ছাড়িয়ে ট্রেন ছুটে চলল ।

সোনালী চায়ের দিকে চেয়ে দেবপ্রিয় ভাবল, নর্তকী শিপ্রার হাতের  
তৈরী চা সে কোনদিন খাবে, কে ভেবেছিল !

মালতী বলে, অল্পমাদি, আর এক কাপ চা ?

অল্পপমা হেসে বলে, তোর যে প্রথম কাপ এখনও শেষ হল না, অত ভেবে কি হবে। থার্মোমিটারটা আমার দে'ত।

—তোমার কি জর এল নাকি ?

—জর এসেছিল, এখন বোধ হয় ছেড়ে গেছে, সে-টা দেখছি।

—এদিকে গাড়ী যে ছেড়ে দিল।

—কি অমূল্য জিনিষ রয়েছে তোমার গাড়ীতে! শোন, পরের ষ্টেশনে তোর জিনিষগুলো এ গাড়ীতে আনিয়ে নিচ্ছি, তুই আমাদের সঙ্গে চল।

—বা, তোমাদের গাড়ীতে যাব কি করে, তোমরা আলাদা যাবে বলে কুপে রিজার্ভ করেছ।

—আচ্ছা দিনের বেলা চল ত। আমি টিকিট বদলে দিচ্ছি।

—না, সে হয় না।

—আমি জানি, তুই কি ভাবছিস্। তুই ভাবছিস্, তুই যদি ও গাড়ীতে থাকিস্ ত সমরও ও গাড়ীতে লুকিয়ে থাকতে পারে। আচ্ছা আমরা যদি ওকে এগাড়ীতে লুকিয়ে রাখি।

—সে অসম্ভব। সমরও রাজী হবে না। তাছাড়া ও কোথায় গেল কিছু বুঝতে পারছি না। মোগলসরাইতে বোধ হয় অগ্ন ট্রেনে চলে গেল।

—সে ভয় করিস্ না। ও ঠিক এ ট্রেনেই যাচ্ছে। আচ্ছা, তোদের কদিনের ভাব ?

—তুমি কিছু বুঝছ না। আমাদের মধ্যে বিশেষ কিছুই আলাপ ছিল না !

—কিন্তু ট্রেনে এক রাতেই—লুকোলে কি হবে, তোর মুখ দেখে বুঝতে পারছি না ?

—আমি মানছি, সমরের জন্ত বিশেষ চিন্তিত, উদ্বিগ্ন বলতে পার, অমন ছেলে, সত্যি যদি ধরা পড়ে—তাছাড়া ওর সঙ্গে পরামর্শ করছিলুম, যদি একসঙ্গে ইয়োরোপ যাওয়া যায়—অতদূর একা যেতে সাহস হচ্ছে না।

—বেশ, বুঝেচি।

—সমরের মাকে একথানা চিঠি লিখতে হবে।

—আচ্ছা সমর যদি ওপথ ছেড়ে দেয়, আমি ওঁকে বলতে পারি, উনি কোন ভাল চাকরি করে দিতে পারেন।

—সমর মোটেই তা রাজী হবে না, তুমি এসব ছেলেদের জান না। কি তুমি যা তা বলছ।

—আচ্ছা, মালতি, সমরকে একবার জিজ্ঞেস কর, গভর্নমেন্ট তাকে ভাল চাকরি দিতে রাজী আছে।

—ও সব কথা আমি বলতে পারব না।

—তাহলে আমাকেই বলতে হবে।

—কেন?

—তাছাড়া ওকে বাঁচাবার কোন উপায় নেই। সত্যি বলছি, সমরকে আমার বড় ভাল লেগেছে। ওর জীবনটা অমন করে নষ্ট হতে দেব না।

—নষ্ট কাকে বল? হাজার হোক, গভর্নমেন্ট অফিসারের স্ত্রী ত, তুমি আর অন্য রকম কি করে ভাববে? ❀

অনুপমার কালো চোখের তারা জলে উঠল। ক্লরুণ সুরে সে বললে, দেখ্ মালতি, আমি কি ভাবি, না ভাবি, তা বোঝবার বয়স তোর এখনও হয়নি, ভগবান করুন, যেন আমার মত দুঃখ না পাস্।

মালতী অনুপমার তপ্তহস্ত জড়িয়ে বললে, ক্ষমা করো, অনুপমা দি।

আমি কিছু ভেবে বলিনি। মনটা স্থির নেই, তুমি জান। কিন্তু সমর সম্বন্ধে ওরকম কথা তুমি কি করে ভাবতে পার ?

—আচ্ছা, আমার অনুরোধ, তুই একবার সমরকে জিজ্ঞেস কর। তার উত্তরটা শুনতে চাই।

—এখন তার দেখা পেলে ত।

রৌদ্রালোকিত প্রান্তরের দিকে ছ'জনে স্তব্ধ হয়ে চেয়ে রইল।

আকাশ কি স্নিগ্ধনীল ! আলোক কি অপূর্ণ উজ্জ্বল ! কল্যাণের হৃদয় কোন্ আনন্দ-রসে কানায় কানায় ভরা। প্রভাতালোকপূর্ণ সবুজ পৃথিবীর দিকে চেয়ে সে বসেছিল।

ঘুম তার অনেকক্ষণ ভেঙে গেছে। তবু যেন সে ঘুমঘোর কাটাতে চাইছে না, কোন্ ক্ষণিকের স্মৃতিস্বপ্নকে দীর্ঘ করে তুলতে চায়। সঙ্গীত খেমে গেলে স্বরের রেশগুলি যেমন নীরবে কানে বাজে, তেমনি দেহমনের তন্ত্রীতে কোন স্পর্শের ঝঙ্কার সে থামতে দিতে চায় না, তারি স্বর রজতবর্ণ আলোকধারায় আকাশের নীলপেয়ালা হতে উপছে পড়ে, ধরণীর শ্যামলিমায় উচ্ছ্বসিত।

অনুপমা তাকে ভালবাসে কিনা, সে কি অনুপমাকে ভালবাসে, এ সব কথা সে ভাবতে চায় না। আকাশ-পৃথিবী-জোড়া আলোকের আনন্দ-সঙ্গীতের মধ্যে কোথাও যেন তালভঙ্গ না হয়।

রাত্রিশেষের স্নিগ্ধ আলো-অন্ধকারে দ্রুতগামী গাড়ীর মধ্যে ব্যথিতা পীড়িতা অনুপমা তার পিঠে ঠেসান দিয়ে যখন ঘুমিয়ে পড়েছিল, তখন কল্যাণ যে গভীর শান্তি, যে নিবিড় আনন্দ অনুভব করেছিল,

এরূপ অপূর্ব উপলব্ধি তার কখনও হয়নি। সে শান্তির স্বরকে সে ছিন্ন করতে চায় না। এ ভালবাসা নয়, অতৃপ্ত তৃষ্ণার ক্ষণিক নিবৃত্তি নয়, এ অনুভূতি বাক্যাতীত।

মির্জাপুর স্টেশনে ট্রেন থামতে কল্যাণ গাড়ী থেকে নেমে পড়ল। অনুপমার স্নিগ্ধ স্তন্যদর মুখ সে দেখতে চায়, জগদীশের সঙ্গে আলাপ করতে চায়। জগদীশকে হয়ত বলতে চায়, অনুপমা যে অস্থায়ী একথা কি সে জানে, অনুভব করে।

কুপের সামনে এসে কল্যাণ স্থির হয়ে দাঁড়াল। জোরে আসতে সে হাঁপাচ্ছে। জগদীশ নেই, মালতী মল্লিক অনুপমার পাশে বসে। অনুপমার মুখ দেখা যাচ্ছে না, কালো চুলের কুণ্ডলী রেশমের জালে বাঁধা; রূপালি রঙের ব্লাউজ-ঘেরা পিঠ নিস্তরঙ্গ হৃদের মত।

অনুপমা তখন মালতীকে বলছে, তোর জন্তু একটা প্ল্যান করেছিলুম।

—কি অনুপমাদি?

—কল্যাণের সঙ্গে তোর আলাপ করিয়ে দিতে চাই। কল্যাণকে তোর ভাল লাগবে। ইয়োরোপে বেশীদিন থেকে বোধ হয় একটু যাকে বলে বস্তুতাত্ত্বিক হয়েছে, সে আইডিয়ালিজম্ আর নেই। কিন্তু সময়ের দিকে যা টান দেখছি।

—বার বার এক কথা বোলো না। একটু চুপ কর দেখি, ওই দেখ, বোধ হয় তোমার কল্যাণ—

—হাঁ, ওই ত কল্যাণ! হীরা সিং সাহেবকো সেলাম দেও।

যন্ত্রচালিতের মত কল্যাণ কুপের চেয়ারে এসে বসল। তার বুক ধক্ ধক্ করছে। অনুপমার দিকে সে স্থিরনয়নে তাকাল। গত রাত্রে চঞ্চলা মোহিনী অনুপমা, শান্ত নিদ্রাতুর অনুপমার সঙ্গে এ

জাগরণফুল অন্তপনার যেন কোথাও মিল নেই ; সে স্বপ্নের অন্তপনা প্রভাতের শুকতারার মত মিলিয়ে গেছে । কল্যাণ বিস্মিত বাখিত হল । তার বৃকে কে যেন ঘা দিলে । এ রহস্যময়ীর ক্রয়নয়নে কোন্ চন্দ্রের দৃষ্টি ।

রহস্যময় হেসে অন্তপনা বলে, তোনারি নাম হচ্ছিল কল্যাণ !

—শুনে বিশেষ গর্ভ অন্তভব করছি ।

কল্যাণ মালতীর দিকে চাইলে ।

সহসা রক্তোচ্ছ্বাসে সে মুখ রক্তিম ।

—মালতীকে বলছিলুম, বেশীদিন ইয়োৰোপে থাকলে লোকে বস্তুতান্ত্রিক হয়ে যায় ।

—অর্থাৎ Materialist আর ভারতবর্ষে সব আধ্যাত্মিক । এটা তোমার মস্ত ভুল ধারণা । কোন বড় সভ্যতা বস্তুতান্ত্রিক হয়ে বাঁচতে পারে:না ।

—বৈচে আছে, কে বলে, তার মৃত্যুর দিন ঘনিয়ে আসছে ।

—তার প্রাণ আছে, এ কথা অস্বীকার করতে পার না । অনেকগুলি বড় আইডিয়ার ওপর, সত্যের ওপর সে সভ্যতা প্রতিষ্ঠিত । সে আইডিয়ার জন্ত সে দেশের নরনারী প্রাণ দিতে পারে । তবে যে স্বপ্নবিলাসকে তোমরা আইডিয়ালিজম্ বল, তা সে দেশে নেই ।

মালতী এবার কথা কইলে, স্বপ্ন আপনি কাকে বলেন ?

—যা নিছক মনগড়া কল্পনা, বাস্তবের কোন ভিত্তি নেই, তাই স্বপ্ন ।

প্রভাতালোকের শান্তির সুরভরা সঙ্গীত শেষ হয়ে গেছে । কল্যাণ যেন সবাইকে আঘাত করবার জন্ত উদ্ভত ।

মালতী ক্ষুব্ধস্বরে বলে, 'মন দিয়েই কি আমরা পৃথিবী গড়ছি না, তার রস তার সৌন্দর্য্য সবই ত অন্তরের অন্তর্ভূতি।

অনুপমা হেসে বলে, দার্শনিক তত্ত্বালোচনা থামা দেখি, দেখ ত, কেটলিতে চা আছে কি না ?

মালতী বলে, কিছু আছে, তবে ঠাণ্ডা।

কল্যাণ মূঢ় হেসে বলে, ঠাণ্ডাই দিন, হৃদয়ের তাপে গরম করে নেওয়া যাবে।

মালতী চুপ করে কাপে চা ঢালতে লাগল।

মির্জাপুর স্টেশন পার হয়ে ট্রেন ছুটে চলল।

সন্ন্যাসী প্রেমদাসের নিকট বিরিক্ষি এগিয়ে এল। অগ্র যাত্রীর অগ্র সব গাড়ীতে চলে গেছে, শুধু রাধাকান্ত চা খেয়ে নোটবুক খুলে হিসাব করছে। প্রেমদাসের সঙ্গে নিভৃতে কথা কইবার এমন সুযোগ আর পাওয়া যাবে না।

বিরিক্ষি ধীরে বলে, ঠাকুর একটা নিবেদন আছে।

নির্ণিমেষ নয়নে প্রেমদাস বিরিক্ষির দিকে চাইলেন। সে দৃষ্টিতে স্নিগ্ধতা নেই, কারুণ্য নেই, তীক্ষ্ণ মর্মভেদী জ্বালাভরা সে দৃষ্টি।

বিরিক্ষির কেমন ভয় হল। সে আর কোন কথা বলতে পারলে না। তার অস্থির কথা বলে ঔষধ প্রার্থনা করতে পারলে না।

প্রেমদাস উঠে দাঁড়িয়ে তাকে বুকে জড়িয়ে ধরলেন, যেমন তিনি বিরিক্ষিকে ট্রেনে প্রথম দেখে জড়িয়ে ধরেছিলেন।

কোন অজানা ভয়ে বিরিক্ষির বুক কেঁপে উঠল।

দীর্ঘ সে বললে, ঠাকুর আমার অস্থির কথা আপনায় একবার বলেছিলুম, বার বার বলতে লজ্জা করে—

—কোন ভয় নেই, তোমার অস্থির শীগ্গীর সেরে যাবে।

—ঠাকুরের আশীর্ব্বাদে—তবে অনেকদিন পর কাল রাতে হঠাৎ ব্যথা বোধ হয়েছিল।

—কোন বেদনা থাকবে না, বিরিঞ্চি। নিভয়ে এগিয়ে চল। যাত্রী তুমি।

—ঠাকুর আপনার সহযাত্রী হতে চাই।

—কাহারো পথ দীর্ঘ, কাহারো বক্র সঙ্কীর্ণ, সহযাত্রী হতে চাইলে যে সঙ্গীর পথের ছুংখের ভাগ নিতে হবে—একটি যেতে হবে, বিরিঞ্চি। কোন ভয় তোমার নেই। দেখি, রাধাকান্ত বাবু আমাকে কি যেন বলতে চান।

রাধাকান্ত হিসাবের বই হতে মুখ তুলে চমকে চাইল।

—আমার নাম রাধাকান্ত কি করে জানলেন?

—ঠাকুর ইচ্ছা করলে সবই জানতে পারেন।

—জানতে পারেন? হ্যাঁ?

—আপনি কলিকাতার এক প্রসিদ্ধ ধনী ব্যবসাদার, আপনার নাম জানা কি আশ্চর্য্য।

—ধনী? হুঁ! ইন্সলভেন্সি নিতে হবে!

—ঠাকুরের রূপা হলে—

—রূপা! দিন না জোগাড় করে কিছু টাকা—বেশী নয়, তিন লাখ—আমি ঠাকুরের শিষ্য হতে রাজী আছি, দেখি সন্ন্যাসীর শক্তি।

—সন্ন্যাসীর কাজ কি টাকা জোগাড় করে দেওয়া—আপনি বিচক্ষণ ব্যবসায়ী হয়ে এ কথা বললেন?



—তবে অলৌকিক শক্তি কি ?

—আচ্ছা টাকা আমি দিতে পারি, আপনি নিয়ে কি করবেন ?

বিরিঞ্চি প্রেমদাসের দিকে সন্দ্বিগ্ননয়নে চাইলে। সন্ন্যাসী হয়ত কোথাও গুপ্তধনের সন্ধান পেয়েছেন, অথবা কোন ধনী শিগের বিষয়-লাভ করেছেন। তারও যে টাকার বড় দরকার।

রাধাকান্ত দাঁড়িয়ে উঠে বললে, আমি নিজের জগ্গে চাইছি না, আমি চাইছি আমার কলকারণথানার জগ্গে, আমার মিল বাঁচাতে হবে। তার ওপর লাগিয়েছে ধর্মঘট, যত বদমাইস শা—

ক্রোধে সে কাঁপতে লাগল।

—রাধাকান্ত বাবু শান্ত হোন। যদি আপনি আজ তিন লাখ টাকা পান, আমায় কি দেবেন ?

—দেবেন, আমায় দেবেন—আপনি সন্ন্যাসী, আপনার টাকা কি হবে, আমার যে টাকার বড় প্রয়োজন।

আবেগের সঙ্গে রাধাকান্ত আবার উঠে দাঁড়াল, তারপর সন্ন্যাসী প্রেমদাসের পা জড়িয়ে ধরল।

—জীবনে কখনও এমন করে কারো কাছে ভিক্ষে চাইনি, আমার আলিপুরের বাড়ী মটগেজ দিতে রাজী আছি।

রাধাকান্তকে ধরে তুলে প্রেমদাস বুকে জড়িয়ে ধরল।

—রাধাকান্ত বাবু, আপনার নিষ্ঠা দেখে বড় আনন্দ হল। আপনি যা চান তা সমস্ত প্রাণ দিয়ে চান, আপনি সত্যপরায়ণ লোক—পাবেন, আপনি টাকা পাবেন।

—কে, কে দেবে ? আপনি ? কখন ? এখুনি টেলিগ্রাম করতে হবে যে—

—আমি সন্ন্যাসী, আমি কোথা থেকে দেব—তবে আপনি আজকের মধ্যে টাকা পাবেন।

—সব হৈয়ালি, ভণ্ডামি!

প্রেমদাসকে ঠেলা দিয়ে ছেড়ে রাখাকান্ত নিজের বেঞ্চের এক কোণে গুম্ হয়ে বসল। এ আবেগ, এ ভিক্ষা চাওয়ার জন্ম সে লজ্জিত, স্তব্ধ।

—দেখ বিরিকি, রাখাকান্ত বাবুর একপ্রাণতা আছে, কিন্তু বিশ্বাস নেই।

—বিশ্বাস না থাকলে মুক্তি কি করে হবে ঠাকুর? ভক্তির মূলে যে বিশ্বাস।

—সুন্দর কথা বলেছ। কিন্তু রাখাকান্ত বাবু ত মুক্তি চান না।

বিরিকি ভাবল সে বলে, আমি মুক্তি চাই। শুধু ছোট মেয়েটির বিবাহ হয়ে গেলে ও ছেলেটার একটা চাকরি হলেই—ঠাকুরের ত অনেক দনী শিষ্য আছে—

কিন্তু প্রেমদাসের স্তব্ধ, গম্ভীর মূর্তি দেখে সে কোন কথা বলতে পারলে না।

দীপ্ত আলোকপূর্ণ আকাশের দিকে চেয়ে প্রেমদাস স্তব্ধ হয়ে বসলেন।

ছিঙ্কী স্টেশন ছাড়িয়ে বোম্বে মেল ছুটে চলেছে, মধ্য-ভারতের গিরি নদী তরঙ্গায়িত প্রান্তর পার হয়ে ।

প্রথম বোতল শেষ করে গণেশ বলে, কি দেবপ্রিয় বাবু, অন্ধৈক গেলাস এখনও রয়েছে যে ।

শিপ্রা হেসে বলে, দেবপ্রিয় বাবুর ভয়, পাছে তিনি মাতাল হয়ে যান । তোমার অনুরোধে খেয়েছেন ত অনেকটা ।

গেলাসটা নাড়তে নাড়তে দেবপ্রিয় বলে, দেখুন, আমেজ একটু লেগেছে, এর বেশী মাত্রা বাড়াতে গেলে মত্তাবস্থার সৃষ্টি হতে পারে, নিজের কথাবার্তা ব্যবহারের উপর নিজের কণ্ঠ হারিয়ে ফেলতে পারি, মানুষের এর চেয়ে দুর্বলতা কি হতে পারে !

গণেশ উচ্চহাস্তে দাঁড়িয়ে উঠল । শিপ্রা কিন্তু একটু বিষণ্ণভাবে দেবপ্রিয়ের দিকে চাইলে ।

দেবপ্রিয় বলে, দেখুন, মানুষের সঙ্গে পশুর তফাৎ হচ্ছে, মানুষের বুদ্ধি আছে, সেই বুদ্ধি লোপ করতে আমি রাজী নই । কথা কইব, হাসব, হয়ত বিজ্ঞের মত কথাও বলব, অথচ আমি কি করছি, কি বলছি, নিজেও জানব না, বুঝব না,—

শিপ্রা বাধা দিয়ে বলে, আপনি বোধ হয় এর আগে কখনও খান নি ?

দেবপ্রিয় বলে, না ।

দ্বিতীয় বোতল খুলতে খুলতে গণেশ বলে, নেশা একটু লাগতেই ভাল ভাল কথা বলতে আরম্ভ করেছেন, দেখছি ! কিন্তু পণ্ডিতের মত

ত কথা হচ্ছে না। আমরা কি সত্যিই বুদ্ধি দ্বারা চালিত হই? আমরা যে কাজ করি, তা কি কোন রহস্যময় অজানা শক্তি দ্বারা চালিত হয়ে করি না? এই যে আমি অভিনেত্রী শিপ্রাদেবীকে ফাষ্ট ক্লাস রিজার্ভ করে নিয়ে চলেছি, এই যে আপনি তার পাশে বসে চা খেলেন, হুইস্টি খাচ্ছেন, এসব কি আমরা বুদ্ধি দ্বারা পরিচালিত হয়ে করছি—কি যে আমরা চাই, কেন যে আমরা চাই, তা আমরা নিজেরাই জানি না। ছুটে চলেছি জীবনের ভোগের নেশায়, তার আশা, আনন্দ, অতৃপ্তি, বাসনা, আর বাসনার ব্যর্থতা—সেই নেশার বেগ, নেশার জ্বালা কমানোর জন্যে এই নেশা করি, বুঝলেন দেবপ্রিয় বাবু, যাকে বলে বিষে বিষে বিষক্ষয়—

‘পপ্’ করে বোতলের ছিপি খোলার শব্দ হতেই গণেশ চুপ করল। দেবপ্রিয় বিস্মিত হয়ে গণেশের দিকে চেয়ে ভাবলে, এই লক্ষপতি যুবক একটা বুদ্ধিহীন কামুক নয়। জীবনকে এ নূতন রূপে গভীরভাবে ভোগ করতে চায়, জানতে চায়। লক্ষপতি পূর্বপুরুষদিগের ভোগ-বাসনার অতৃপ্তি অনলের মত জ্বলছে, নিজের জীবনকে উড়িয়ে দিয়ে সে কামনাকে পরিহাস করতে চায়।

দেবপ্রিয় ভাবতে লাগল, গণেশ ঠিক কথাই বলেছে। আমরা বুদ্ধিবৃত্তি দ্বারা পরিচালিত নই। ট্রেনে সিনেমা-অভিনেত্রীর পাশে বসে যে হুইস্টি খাচ্ছে, এ কথা সে কোনদিন কল্পনাও করতে পারে নি। অথচ য ইচ্ছায় মানন্দে বসেই ত সে খাচ্ছে।

শিপ্রার গাড়ীতে উঠে সে যে গল্প করতে করতে চলেছে, এ শুধু সাংবাদিকের সংবাদ-সংগ্রহের প্রচেষ্টা বলে ভুল বলা হবে। এর মধ্যে কি মোহ নেই? কোন গুপ্তকামনা পরিতৃপ্তির প্রয়াস নেই? শিপ্রা তাকে মুগ্ধ করেছে। সে মুগ্ধতায় হৃদয় মত্ত আবেগে আন্দোলিত। ওই

কালো মেয়ের স্ফটিক রূপ যেন কালো পাথরে খোদাই-করা ফিডিয়সের হাতে-গড়া তরুণী, অথবা কালিদাসের উজ্জয়িনী হতে বহুযুগ পার হয়ে কোন নটী চঞ্চলপদে এসে অবাক হয়ে বসেছে। এ মোহন মুগ্ধতাকে ত সে বুদ্ধির বাণ দিয়ে ছিন্ন করতে চায় না।

বস্তুতঃ জগদীশের সঙ্গে দেখা হবার পর হতে দেবপ্রিয়ের অন্তর অশান্ত হয়ে উঠেছে। যেন কোন বৃত্তক্ষু বিদ্রোহী সংস্কারের শেকল ভেঙে বুদ্ধির কারাগার হতে ছুটে পালিয়ে চলেছে। সে বঞ্চিতের দলে থাকবে না, ধনবানদের মত সে-ও জীবন উপভোগ করতে চায়।

ভাবতে ভাবতে দেবপ্রিয় গেলাসের বাকী হুইস্কিটুকু খেয়ে ফেলে। গলা জলে ওঠাতে সে চমকে উঠল। সূর্যালোকিত পৃথিবী, চঞ্চল বনপ্রান্তর বড় সুন্দর লাগল।

বিস্মিত হয়ে শিপ্রা দেবপ্রিয়ের দিকে চাইলে। মদ খেয়ে দেবপ্রিয় যেন গভীর চিন্তায় মগ্ন। মূর্খ মাতাল শিপ্রা অনেক দেখেছে, একবার পণ্ডিত মাতাল দেখতে ইচ্ছে করছে, অথচ দেবপ্রিয়কে মাতাল করে তুলতে তার ভাল লাগছে না। গণেশ যে দেবপ্রিয়কে মাতাল করে মজা দেখতে চায়, এ কথা বুঝে সে দেবপ্রিয়ের শূণ্য গেলাসটা উল্টে রেখে দিলে। দেবপ্রিয় স্তব্ধ হয়ে বসে রইল।

শিপ্রা বললে, অত কি ভাবছেন, দেবপ্রিয় বাবু!

কালো চশমা খুলে দেবপ্রিয় চাইলে। শিপ্রার দীর্ঘ নয়নের ঘনকৃষ্ণ তারকা কি স্নিগ্ধ, কি গভীর!

দেবপ্রিয়ের দৃষ্টিতে শিপ্রা ভীত হয়ে উঠল। অনেক প্রেমমুগ্ধ যুবকের উন্মত্ত দৃষ্টি সে দেখেছে, কিন্তু এমন জ্বালাময় উদাস দৃষ্টি সে দেখেনি।

শিপ্রা বললে, আপনি সব সময় অত কি ভাবেন, কেন এত ভাবেন? কথা বলুন, দেবপ্রিয় বাবু!

—কেন ভাবি ? কে ভাবে ? আমি কি ভাবি ? এই যে ভাবছি, এ চিন্তা-ক্রিয়া আমার ইচ্ছার অধীন নয়। উর্ধ্বনাভ যেমন আপনার চারিদিকে জাল তৈরী করে, তেমনি আমার মাথায় বসে কে যেন অবিশ্রাম চিন্তার জাল রচনা করে চলেছে, ঘড়ির কাঁটা যেমন অহনিশি ঘুরে চলে, তেমনি আমার মস্তিষ্কে চিন্তার পর চিন্তা দল বেধে ঘুরে চলেছে, যেমন ওই স্থলীল দিগন্তে মেঘের সারি উড়ে চলেছে—তারা কি জানে, কেন, কোথায় তারা চলেছে—

শিপ্রা এবার ভয় পেয়ে একটু সরে বসল। ভাবলে, পণ্ডিত মাতাল হলে বোধ এট রকম ভাবে কথা বলে।

শিপ্রার সরে বসার ভঙ্গী দেবপ্রিয় দেখলে। কালো চশমা পরে সে বললে, ভাববেন না আমি মাতাল হয়েছি।

কক্ষণে বলয়ে ঝঙ্কার দিয়ে শিপ্রা বললে, আমি কি তাই বলছি !

কিন্তু তার কথার স্বরে বোঝা গেল, মনে মনে সে কি ভাবছে। দেবপ্রিয় ক্ষুব্ধ হয়ে উঠল। ট্রেনটা বড় বেশী জ্বলছে, মনে হল। বাকী ইষ্টপ্লেটকু না খেলেই হত। হয়ত সে মাতাল হয়ে যাবে।

উত্তেজিতভাবে দেবপ্রিয় বললে, না, না, আমি মাতাল হই নি। এই ত আমি বেশ চিন্তা করছি। দেখুন আমি ফরাসী কবি মুসের কবিতা আবৃত্তি করছি :

Poète, prends ton luth ; le vin de la jeunesse

Fermente cette nuit dans les veines de Dieu !

শিপ্রা বললে, কিন্তু আমরা যে ফরাসীভাষা জানি না, আপনি কবিতা ঠিক বলছেন কি না কি করে বলব !

দেবপ্রিয় দাঁড়িয়ে উঠে বললে, ও, ফরাসী ভাষা জান না ! আচ্ছা আমি মহাভারত হতে শ্লোক বলছি।

শিপ্রা বলে, আপনি ভুলে যাচ্ছেন, আমরা আপনার মত পণ্ডিত নই, আমরা মৃণ্মু মেয়ে মানুষ। যা বলতে চান বাংলায় বলুন। ও ফরাসী কবিতার মানে কি ?

দেবপ্রিয় শিপ্রার পাশে বসল। সে চঞ্চল হয়ে উঠেছে। আবেগের সঙ্গে বলে, মানে হচ্ছে, হে কবি, তব বীণা লহ তুলি, আজি রজনীতে যৌবনমদিরাধারা বিশ্ববিধাতার ধমনীতে উচ্ছলিত—

গণেশ বলে উঠল, বা, চমৎকার কবিতা—আমায় একটু লিখে দিন— আমাদের প্যারিস-ফেরতের পার্টে এই কবিতাটি দিতে হবে—দেখুন—বিধাতা মাতাল হয়ে উঠেছেন !

দেবপ্রিয় বিস্মিত হয়ে বলে, প্যারিস-ফেরৎ কে ?

শিপ্রা বুঝিয়ে বলে, আমরা যে ফিল্ম করতে যাচ্ছি, তাতে একজন প্যারিস-ফেরতের পাট আছে, আপনায় তাই জিজ্ঞেস করেছিলুম, আপনি ফ্রেঞ্চ জানেন কি না—আপনিই করুন না সে পাটটা—আপনি বেশ পারবেন।

দেবপ্রিয় হেসে উঠল। বলে, আমি করব ফিল্মে অভিনয় ! তা মন্দ কি ! টাকাও ত পাওয়া যাবে। আর সারাক্ষণ অভিনয়ই ত করছি। বাড়ীতে অভিনয়, আফিসে অভিনয়—যা সত্যিকার ভাবি তা গোপন করা, কথা বানিয়ে ভাব রচনা করে প্রকাশ করা—এই ত অভিনয়—

গণেশ হেসে বলে, তবে অভিনয়ের আগে এক গেলাস ক্যামেল, আর দেখতে হবে না, ফরাসী কবিতা সেন-নদীর মত ছুটে চলবে।

দেবপ্রিয় ক্ষুব্ধ হয়ে বলে, দেখুন, আমি সত্যি মাতাল হইনি, বুদ্ধির কি পরীক্ষা করতে চান, করুন।

শিপ্রা হাণ্ডবাগ হতে লিপ্‌ষ্টিক বাহির করে বলে, চটছেন কেন, তার চেয়ে আসুন একটু তাস খেলা যাক।

—তাস ! তাসখেলা আমি ভাল জানি না।

—জানেন না ! আপনি কি সারাজীবন খালি বই পড়েছেন ?

—তাসখেলার খিওরী জানি, বেশী খেলিনি।

গণেশ হেসে বলে, সেইজন্মেই আপনার এই অবস্থা।

দেবপ্রিয় বিস্মিত হয়ে বলে, কেন ?

গণেশ বলে, আপনি জীবনের খেলারও সব বড় বড় খিওরী বইয়েতে পড়ে মুগ্ধ করেছেন, কখনও সাহস করে খেলেন নি, তাই হাতে যখন রঙের বিবি আসে, রাখতে পারেন না, অন্য লোকে নিয়ে চলে যায়।

—আপনি আমার জীবনের কি জানেন ?

—দেখছি এই যে, আপনার সাধ আছে কিন্তু সাহস নেই।

শিপ্রা বিরক্তির সঙ্গে বলে, কি যা তা বলছ, গণেশ বাবু ! দেবপ্রিয় বাবু, আপনি ওসব শুনবেন না। তাসখেলা শিপতে চান ত বলুন, শেখাতে পারি।

দেবপ্রিয় তার নোট বুক বাহির করে বলে, আমাকে দেবার মত সময় যদি আপনার হাতে থাকে, তাহলে তার সদ্ব্যবহার করতে চাই।

শিপ্রা ব্যাগ থেকে তাসের প্যাকেট বাহির করে বলে, কি, ইন্টারভিউ দিতে হবে ?

অনুন্য়ের সঙ্গে দেবপ্রিয় বলে, দেখুন আমি আপনার একটা জীবনী লিখতে চাই।

শ্লেষের সুরে শিপ্রা বলে, জীবনী ! আমার জীবন লিখবেন ! কেন ? খুব বিক্রি হবে, নয় ?

গণেশ বলে উঠল, পঙ্কের উপর পদ্ম ফুটেছে, তার শোভা দেখে মোহিত হয়েছেন, সেজ্ঞ পঙ্কের ইতিহাসের দরকার কি ! পণ্ডিত হলে অনেক মুস্কিল দেখছি।



দেবপ্রিয় একটু লজ্জিতভাবে বলে, আপনারা ভুল বুঝছেন, আমি সে জীবনীর কথা বলছি না। ভুল বুঝবেন না।

শিপ্রা গম্ভীরভাবে বলে, দেখুন দেবপ্রিয় বাবু, আমার জীবনের কথা লোকসমাজে প্রচার করবার মত নয়—তাতে গর্বের কি আছে—বরঞ্চ লজ্জা পাবারই—আপনার মত পণ্ডিত লোক ভাল ভাল বই লিখবেন—

বলতে বলতে শিপ্রা থেমে গেল। দেবপ্রিয় তার দিকে বিমুগ্ধভাবে চেয়ে আছে। ওই মুগ্ধ মুখ, খুলি ছোড়া টাক দেখে শিপ্রার হাসি পেল। এ মুগ্ধতা ছইস্কির ক্ষণিক মাদকতা নয়, সে বুঝতে পারলে। হাসি চেপে সে চূপ করে বসল। এ নেশার ভঙ্গী সে দেখতে চায়।

দেবপ্রিয় বলে, ইসাডোরা ডাঙ্কানের আত্মজীবনী পড়েছেন ত, আমি সেই রকম বই লিখতে চাই, আপনি বলে যাবেন, আমি লিখে যাব,—বাহিরের জীবনের কথা আমি বলছি না, আমি চাই আপনার অন্তরের, আপনার অন্তর্ভূতির ক্রমবিকাশের ইতিহাস।

শিপ্রা আর হাসি চাপতে পারলে না। উচ্চহাস্তে বলে, ইসাডোরা ডানকান না বাঁকান, কে, নাম ত শুনি।

বিস্মিত হয়ে দেবপ্রিয় বলে, শোনেন নি ?

গণেশ এবার টিপ্পনী দিলে, সত্যি কথা বলতে কি, বিচ্ছেদ ত খারডো কেলোশ—

শিপ্রা কটাক্ষ করে বলে, তা গণেশবাবু ঠিকই বলেছ, উনি পণ্ডিত মানুষ, সবাইকেই পণ্ডিত ভাবেন।

দেবপ্রিয় দীপ্তকণ্ঠে বলে, ভুল বুঝছেন। আপনি কবে কোথায় জন্মেছেন, কোন্ স্কুলে পড়েছেন, এ সব আমি জানতে চাই না। এ সব লিখতে চাই না। আপনি শুধু প্রতিভাসম্পন্ন অভিনেত্রী নন, আপনি

অপূর্ব নৃত্যকুশলা, অপরূপ আপনার নৃত্য। এ নৃত্যের ছন্দ রয়েছে আপনার আত্মায়, আপনার মনের বেদনা কামনা আশা স্বপ্ন নৃত্যে রূপিত হয়। এ রূপ দেবার শক্তি ধীরে ধীরে কি করে প্রথম লাগল, তারপর বিকশিত হয়ে উঠল, ফলের মত, কোন্‌ নিবিড় আনন্দের ছন্দে দেহমন ঢুলে উঠল—আমি চাই সেই ইতিহাস। ষ্টেজে যখন নৃত্য করেন, শত শত বিমুগ্ধ দর্শকের মুগ্ধ দৃষ্টির দীপ্তি ষ্টেজের আলোর সঙ্গে ঝলমল করে—তখন মনে কি ভাবের সঞ্চার হয়, আমি চাই সেই অন্তর্ভূতির ইতিহাস।

শিপ্রা এবার গম্ভীরভাবে বসলে। এমন মশ্রদ্ধভাবে কেউ তার সঙ্গে কখনও কথা করিনি। জীবন, যেখানে সে সত্য, যেখানে সে সার্থক, দেবপ্রিয় সেই শিপ্রাকে জানতে চায়।

দেবপ্রিয় বলতে লাগল : মনে পড়ে কি, ছেলোবেলায় কোনদিন প্রথম আপনার নৃত্য করবার ইচ্ছে হল। হয়ত, কোন বসন্তের প্রভাতে কোন পুষ্পিত উপবনে,—দেখলেন বাতাসে গাছের ডাল ভূয়ে ভূয়ে পড়ছে, ফলগুলি ছলছে, পাতাগুলি আলোয় ঝিল্মিল্ করছে, সবুজ রঙের কোন পাখী উড়ে বেড়াচ্ছে,—কোন্‌ অজানা স্বরে পা দু'টি চঞ্চল হয়ে কেঁপে উঠল, হৃদয়ে লাগল শিহরণ—উতলা বাতাসে অঞ্চল দিলেন উড়িয়ে—‘বসন্তের আবির্ভাব’ নৃত্যে আপনার সে রূপ দেখেছি—ও ভাবময়ী মূর্তির স্রোত—

শিপ্রা বললে, শুনতে বেশ লাগছে, কিন্তু অত কিছু ভেবে নাচি, বলে ত মনে হয় না।

দেবপ্রিয় বলে যেতে লাগল, আপনার মনে নিশ্চয় অনেক ভাবের উদয় হয়, তারি প্রেরণায় নৃত্যরূপের ব্যঞ্জনা, আপনি বুঝতে পারেন না ! অথবা, মনে পড়ে কি বালিকাবয়সে দীর্ঘ দর্পণের সম্মুখে একা ঘরে নৃত্য-কলার নানা ভঙ্গী অভ্যাস করছেন, হঠাৎ এক ঝলক সূর্যালোক বুকের

ওপর এসে পড়ল, আরশী আল্‌মলিয়ে উঠল, অল্পভব করলেন, কি সুন্দর আপনার দেহ, কি অজানা বেদনা আপনার বক্ষে—অল্পভব করলেন আপনি নারী—আলো-ভরা স্নব্ধ আয়নার দিকে বিস্মিত মুগ্ধনয়নে রইলেন চেয়ে—আলোকের সঙ্গে এল আগুন, অজানা আনন্দ, অজানা আকাজক্ষা—‘যৌবনের জাগরণ’ নৃত্যে আপনার রূপভঙ্গী দেখেছি—  
কিশোরী বয়সের কোন মধুর গোপন অল্পভূতিই নিশ্চয়ই—

গণেশ বলে উঠল, বা চমৎকার! আর এক গেলাস হোক তাহলে।

শিপ্রা মুহূর্তে বলে, কিন্তু আমার ত এ রকম কিছু মনে পড়ছে না। আচ্ছা, দেবপ্রিয়বাবু, আপনার স্ত্রী আছেন?

দেবপ্রিয় একটু চুপ করে বলে, স্ত্রী! হ্যাঁ, আছেন বৈ কি।

চশমাটা খুলে সে কাচগুলি রুমাল দিয়ে মুছতে লাগল।

শিপ্রা হেসে বলে, তাঁর সঙ্গে কি আপনি এই রকম ভাবে বড় বড় কথা বলেন?

দেবপ্রিয়ের গণ্ডের রক্তিম আভা মলিন হয়ে এল। এক অভিনেত্রীর সঙ্গে সে এমনভাবে কথা কইছে, এই দৃশ্যটি যদি তার স্ত্রী নলিনীর নয়নগোচর হত, তাহলে তার মুখের অবস্থা কিরূপ হত, সে কল্পনা করতে চেষ্টা করলে।

শিপ্রা বলে, কৈ কথার উত্তর দিচ্ছেন না যে। মুখা মেয়ে মানুষ পেয়ে খুব বড় বড় বক্তৃতা দিচ্ছিলেন।

গণেশ হেসে বলে, দেখ ত, স্ত্রীর নাম করে সকালের নেশাটা একেবারে ছুটিয়ে দিলে।

শিপ্রা বলে, কি সিনিক্‌ তুমি। তা ছাড়া দেবপ্রিয় বাবুর কোন নেশা হয় নি। শুভ্রন, তার চেয়ে আপনার সংসারের গল্প করুন।

দেবপ্রিয় অনুভব করলে, যে মানসিক উত্তেজনা সে এতক্ষণ কথা কইছিল, সে আবেগ আর নেই। বোধ হয় একটু নেশা হয়েছিল, কেটে গেছে। ধীরে সে বলে, আমার সংসারের কথা কি শুনবেন— এক্ষেপে সাধারণ জীবন, অর্থাভাব, রোগ, খুঁটিনাটি নিয়ে বাগড়া—তারই নামে একটা শান্তির ভাব—

শিপ্রা বলে, কি জানি, পরের সংসারের কথা শুনতে আমার বেশ ভাল লাগে, বোধ হয় নিজের সংসার নেই বলে।

দেবপ্রিয় বলে, আপনার জীবনের খুব বড় কাজ রয়েছে, আপনি সাধারণ সংসার করবার জন্তে নন।

গণেশ হেসে হাততালি দিয়ে উঠল, হাঁ, একথা ঠিক বলেছেন। বোঝান ত। শুনলে ত, অত বড় পণ্ডিতের মত।

শিপ্রা ধীরে বলে, শুভ্র দেবপ্রিয় বাবু, আমার জীবনী লিপিতে চান, আপনায় আমি সাহায্য করব; অথবা আপনার লেখা কোন বই আমি ফিল্ম কোম্পানীকে বলে করিয়ে দেব, কিন্তু আমাকে একটা বিষয় সাহায্য করতে হবে।

দেবপ্রিয় বলে, কি সাহায্য করতে হবে বলুন, আমি রাজী।

কটাক্ষে শিপ্রা গণেশের দিকে চাইলে। মুহূর্ত্তে বলে, এখন বলতে পারছি না, পরে বোলবো। আসুন, আপনায় তাসখেলা শেখাই। তাসের ম্যাজিক জানেন?

মৃধু নয়নে দেবপ্রিয় শিপ্রার দিকে চাইলে, এ যেন কোন যাদুময়ী। তার ব্যবহারে কতখানি সত্য, কতখানি অভিনয় সে জানতে চায় না, মোহঘোরের আনন্দ সে অনুভব করতে চায়।

চিন্তাপূর্ণ দৃষ্টিতে কল্যাণ মালতীর মুখের দিকে চাইলে, যেমন ভাবে সে চেয়ে থাকে খাতার সাদা পাতায় কালো কালীতে লেখা অঙ্ক শাস্ত্রের কোন নতুন ফরমুলার দিকে। নিশিঙ্গাগরণমলিন শুভ্র বিবর্ণ মুখশ্রী, লম্বা দীর্ঘ চোয়ালে চিত্তের দৃঢ়তা পরিস্ফুট, আবার পেলবগণ্ডে অসম চিবুকে হৃদয়ের কমনীয়তা প্রকাশিত। অন্তপমার পাশে মালতী, যেন পূর্ণ প্রস্ফুটিত রৌদ্রতাপম্নান রক্তগোলাপের পাশে শিশিরসিক্ত বিকচোন্মুখ রজনীগন্ধা।

কল্যাণের তীক্ষ্ণ দৃষ্টি মালতীর আয়ত নয়নের রূক্ষ তারকায় আঘাত খেয়ে যেন ঠিকরে গেল। মালতীর পাণ্ডুর গণ্ডে রক্তের ছোপ লাগল।

চা খাওয়া শেষ হতে অন্তপমা বলে, তোমার গল্প করো, আমার কথা কইতে ক্লান্তি লাগছে, আমি বরঞ্চ চুপ করে শুনি।

অন্তপমা এক কোণে চোখ বুজে বসেছে। মালতীও চুপ করে বসে, বলবার কথা খুঁজে পাচ্ছে না। কল্যাণ তার হৃদয়কে চঞ্চল কিংবা বাণীকে মুক করেছে।

মাঝে মাঝে কল্যাণ মালতীর সঙ্গে কথা কইছে। সেটা প্রশ্নোত্তরের মত দাঁড়াচ্ছে। মালতীর পাশে চেয়ারে বসে সে মালতীর মুখের দিকে চাইছে। তাজা কচি ফলের মত এ মুখ, স্বপ্নে তারুণ্যে ভাবের বাজনায ভরা। তরুণী অন্তপমার কথা মনে পড়ে। যখন সে কলেজের ক্লাশ পালিয়ে হঠাৎ চলে আসত অন্তপমার সঙ্গে গল্প করতে। এ ব্যাবিক্রিষ্টা অপরূপা সুন্দরী নারী একদিন ছিল চঞ্চলা তরুণী।

অন্তপমা বলে, তোমরা যে বড় চুপচাপ।

কল্যাণ হেসে বলে, অনেক সময় কথা বলার চেয়ে চুপ করে বসে থাকা ভাল লাগে।

অনুপমা কটাক্ষ করে বলে, শুনে স্তম্ভী হলাম।

মালতী ধীরে বলে, বোধ হয় কেউ কথা কইবার মুড়ে নেই।  
তাছাড়া এ সময়টা ঠিক গল্প জমে না।

কল্যাণ বলে, সামাজিক আইনের দিক থেকে অবশ্য চুপ করে বসে থাকাটা অপরাধ; কিন্তু অনেক সময় কথা না কয়ে আপনাকে গভীরভাবে ব্যক্ত করা যায়; অনেক সময় দুইবন্ধু পাশাপাশি চুপ করে বসে পরস্পরকে যে শান্তি আনন্দ দিতে পারে, তা কথা কয়ে পারে না।

অনুপমা হেসে বলে, সে-টা স্বামী-স্ত্রীর মধ্যেই বেশী দেখা যায়, কথা-না-কওয়ার শান্তি, আনন্দ!

মালতী বলে, অনুপমাদি, কি মিনিক্‌ তুমি!

কল্যাণ বলে, কবি টেনিসনের গল্প জ্ঞানেন না। একবার টেনিসন গেছিলেন কার্লাইলের সঙ্গে দেখা করতে বহুদিন পরে। লাইব্রেরীতে ফায়ার প্লেসের সামনে দুজনে বসলেন মুখোমুখি চেয়ারে। দু'এক কথার পর টেনিসন ফায়ার প্লেসের আগুনের দিকে চেয়ে চুপ করে বসে রইলেন, কার্লাইলও চুপ করে বসে ভাবতে লাগলেন। দুজনে স্বপ্ন, চিন্তামগ্ন, তিনঘণ্টা কেটে গেল। তারপর হঠাৎ টেনিসন উঠে পড়লেন, কার্লাইলের সঙ্গে হাওসেক করে বলেন, তোমার পাশে এই চুপ করে বসে যে গভীর আনন্দ পেয়েছি তার তুলনা নেই; কারণ আমার চিন্তার সঙ্গে তোমার নীরব চিন্তাধারা মিশে গেছে, আমি একটা কাবের খসড়া করে ফেলেছি। তোমাকে তার জগে ধন্যবাদ।

মালতী বলে, কার্লাইল তখন হয়ত ভাবছিলেন, ফরাসী বিপ্লবের প্যারিসের কোন পথদৃশ্য, আর টেনিসন হয়ত ভাবছিলেন কিং আর্থারের ক্যামেলোটের সভা কি করে ভেঙে পড়ল—

কল্যাণ বলে, আমাদের প্রত্যেকের জীবনে কি এমনি বিপ্লব, ভাঙন নেই? হৃদয়ের সে সব গভীরতম বেদনা, স্বপ্ন-বাসনার কথা, একা বসে বসে ভাবার চেয়ে কোন বন্ধুর পাশে বসে ভাবলে কি নতুন শক্তি নতুন আশা জীবনের নতুন রহস্যময় আনন্দপথ খুঁজে পাওয়া যায় না!

অনুপমা মালতীর দিকে কটাক্ষ করে বলে, তোমার কথা শুনে আশা হচ্ছে, কল্যাণ! কি বল মালতী।

মালতী কোন উত্তর দিলে না। তার মুখ রক্তিম।

মাণিকপুর স্টেশনে কল্যাণ কুপে থেকে নেমে গেল।

মালতীও নামবার চেষ্টা করাতে অনুপমা বাধা দিলে। বলে, খড়খড়ি ফেলে দিয়ে বস দেখি, একা আমি হাঁপিয়ে উঠব।

মালতী বলে, কেন জগদীশ বাবু ত আসছেন।

অনুপমা হেসে বলে, সাহেব এখন আসছেন না। কোন বড় মিলিটারী অফিসার যাচ্ছেন এ টেনে, তাঁর সেলুনে বসে ভারতে ব্রিটিশ সাম্রাজ্যরক্ষণের পরামর্শ হচ্ছে, যুদ্ধ নাকি শীঘ্র বাধবে।

মালতী বিস্মিত হয়ে বলে, যুদ্ধ শীঘ্র হবে নাকি? তাহলে আমার ইয়োরোপ যাওয়া ত হবে না।

অনুপমা বলে, দরকার কি, ঘরে বসেই যুদ্ধ চালা না; কল্যাণ বেশ ভাল Fighter.

মালতী একটু রেগে বলে, কি তুমি সারাক্ষণ যা তা বল!

অনুপমা মালতীর গালে আঙুল টিপে বলে, তা অত রাঙা হতে উঠছি কেন?

ষ্টেশন হতে গাড়ী ছাড়-ছাড় হয়েছে। একটা কুলী অনুপমাকে সেলাম করে বলে, গাড়ী সাফ করতে হবে, মেমসাব !

কণ্ঠস্বরে অনুপমা চমকে উঠল। কুলীর মুখের দিকে নিষিমেয় নয়নে চাইলে। তারপর গম্ভীর স্বরে বলে, হাঁ, বাথরুম সাফা করতে হবে, শীগ্গীর ! শীগ্গীর !

হাতে ছোট এক ঝাঁটা ও ময়লা ঝাড়ন নিয়ে কুলীটি তাড়াতাড়ি দ্রুপতে উঠে পায়খানা-ঘরে ঢুকে দরজা বন্ধ করে দিলে। সাফ করবার কোন শব্দ হল না। ট্রেন ষ্টেশন ছাড়িয়ে চলল।

মালতী একটু ভীতভাবে বলে, কুলীটা যে বাহির হল না, অনুপমাদি।

অনুপমা হেসে বলে, বোধ হয় চলে গেছে, দেখনা দরজা খুলে।

মালতী দাঁড়িয়ে উঠে বলে, আমার কেমন ভয় করছে।

অনুপমা বলে, ভয় কিরে ? তুই না ইয়োরোপ যাচ্ছিলি একা। জানলার আর দরজার খড়খড়িগুলো ফেলে বন্ধ করে দে দেখি, বড় তাত আসছে।

মালতী বিস্মিতভাবে অনুপমার দিকে চাইলে।

খড়খড়িগুলো ফেলে বসতেই ধীরে ট্রেনের গতি মন্দ হয়ে এল।

অনুপমা ভীতভাবে উঠে দাঁড়ালে। উদ্ভিগ্ধকণ্ঠে মালতীকে বলে, মুঞ্চিল হল মালতী। এবার তোরা সাহসের পরীক্ষা হবে।

মালতীর মুখ পাংশুবর্ণ। কম্পিতকণ্ঠে সে বলে, কি হয়েছে, আমি কিছু বুঝতে পারছি না, অনুপমা দি !

অনুপমা গম্ভীরস্বরে বলে, ও কুলী কে চিনলি নি, তোরা পাশ দিয়ে গেল মুচ্কে হেসে, ও যে সময় !

—সময় !



—হাঁ, সময় আছে ওই বাথরুমে। ট্রেন যে থেমে এল। বোধ হয় তাকে খোঁজবার জন্তেই ট্রেন থামান হচ্ছে।

—কিন্তু ষ্টেশনেই ত তাকে খুঁজতে পারত।

—ষ্টেশনের প্লার্টফর্মে ট্রেনের সব গাড়ীতে খোঁজা অস্ববিধের। এখন গাড়ী থামিয়ে খোঁজা সুবিধের।

—ট্রেন যে সতিাই থেমে এল।

—এখন ভয় পেলে চলবে না। সময় অণু কোথাও লুকাবার জায়গা না পেয়েই এ গাড়ীতে আশ্রয় নিয়েছে। তাকে বাঁচাতে হবে।

—এখানে কি সার্চ করতে আসবে না?

—আসবে একবার নিশ্চয়, তবে সাহেবকে নিয়ে আসবে। না, অমন মুখ শুকিয়ে ভয় পেলে চলবে না। তুই বাথরুমে ঢুকে দরজা বন্ধ করে দে!

—আমি! সে আমি পারব না!

—যা শীগ্গীর। পুলিশ খুঁজতে এলে, আমি বলব, আমার বোন বাথরুমে আছে; তুই ভেতর থেকে সাড়া দিবি। তাহলে কেউ খুলতে সাহস করবে না।

—আমার কেমন সাহস হচ্ছে না। যদি তা শুনেও না চলে যায়—

—কি বোকা মেয়ে, ট্রেন থেমে এল বলে, আর দেরী করিস্ না।

—অনুপমা দি!

—আচ্ছা, আমিই যাচ্ছি বাথরুমে। আমি সময়কে বলেছিলুম যে, আমি থাকতে তার কোন ভয় নেই। সেই ভরসায় সে এ গাড়ীতে এসেছে। তুই শুধু স্থির হয়ে থাকবি, কোন রকম ভয়ের ভাব দেখাস্ নি। আমার স্বামী এলে শুধু বলবি, অনুপমাদি আছেন ওখানে। বেশী কথা বলবি না—দে, আমার ওই জামা, আর ব্যাগটা দে।

ট্রেনের গতি আরও মন্দ হয়ে এল। এক ধাক্কায় দরজা খুলে অনুপমা বাথরুমে প্রবেশ করলে। সশব্দে দ্বার বন্ধ হয়ে গেল। মালতী সে দিকে চাইতে পারলে না। চেয়ারের হাত ধরে দাঁড়িয়ে সে কাঁপতে লাগল।

ট্রেন অতি মৃদু গতিতে চলেছে।

মালতীর দম আটকে আসছে বন্ধ কুপেতে। জানলার খড়খড়ি ফেলে সে বাহিরে চাইলে। ট্রেন থামলে যেন সে বাঁচে।

ট্রেন কিন্তু থামছে না, ধীরে, অতি ধীরে চলেছে। তীব্র রৌদ্রালোকিত তরঙ্গায়িত প্রান্তর হিংস্র জন্তুর ক্ষুদিত চক্ষুর মত চক্‌মক্‌ করছে।

ট্রেন ত থামছে না। তার গতি বাড়ছে না কমছে, মালতী কিছু বুঝতে পারছে না। চেয়ারে বসে সে ঠাপাতে লাগল।

কতক্ষণ কাটল তার বোধ নেই। সময়ের গতি যেন থেমে গেছে। এক নিমেষ যেন অনন্তক্ষণ।

ট্রেন আবার তুলছে। অথবা ট্রেন হয়ত থেমে গেছে, সে ভুল করে ভাবছে, ট্রেন নড়ছে, ট্রেন তুলছে।

অনুপমার কণ্ঠস্বরে মালতী চমকে উঠল। বাথরুমের দরজা খুলে অনুপমা বলছে, মালতী, জানলা খুলেছিষ্ কেন, বন্ধ করে দে। মালতী কোন উত্তর দিতে পারলে না। জানলার দিকে চাইলে। পাহাড় বন প্রান্তর, সমস্ত পৃথিবী যেন উর্দ্ধশ্বাসে ছুটে পালাচ্ছে।

অনুপমা মালতীর সামনে এসে দাঁড়াল।

—আমাদের ভয় বোধ হয় অমূলক, ট্রেন ত থামল না।

—তাই ত মনে হচ্ছে, ট্রেন ত চলেইছে, থামতে চায় না।

—কি ফ্যাকাসে মুখ হয়েছে তোরা, যা চোখে মুখে জল দিয়ে আয়। কিছু খা, সমরকেও কিছু খেতে দে।

—আমি কেমন উঠতে পারছি না।

—আর ভয় নেই, ওঠ। আমরা মিছে ভয় করেছিলুম।

—সত্যি আর ভয় নেই, অনুপমা দি—টেন তাহলে থামবে না—  
পুলিস আসবে না—কি ভয় পেয়েছিলুম!

মালতী আবেগের সহিত অনুপমার কণ্ঠ জড়িয়ে ধরলে। আয়ত  
শ্লিষ্ট নয়নদ্বয় হতে অশ্রুবিन्दু শীতল পাণ্ডুর অধর দিয়ে টস্টস্ করে  
গড়িয়ে পড়ল।

অনুপমা মালতীকে বক্ষে চেপে ধরলে। সমর বক্রহেসে বলে,  
কমরেড্ মালতী, হাতের ঝাড়নটা বড়ই ময়লা, একটা রুমাল দিয়েও  
সাহায্য করতে পারলুম না।

অনুপমা একটু পরিহাসের স্বরে বলে, সমর ত রাজী হয়েছে, তোরা  
হার হল মালতি!

অদমনীয় ভাবোচ্ছ্বাসের প্রকাশে মালতী লজ্জিত হয়ে স্তব্ধ বসেছিল।  
একটু বিরক্তির সঙ্গে সে বলে, কি রাজী হয়েছে?

অনুপমা বিজয়িনীর মত হেসে বলে, ভাল কোন কাজ পেলে ও  
বিপ্লবের পথ ছেড়ে দেবে। ও করতে চায় দেশের সেবা।

মালতী ক্ষুব্ধস্বরে বলে, অসম্ভব? তার তু'চোখ জালা করতে লাগল।

স্মাণ্ডউইচ খেতে খেতে সমর হেসে উঠল। অকুণ্ঠিত করে বলে,  
অসম্ভব কেন? কমরেড্ মালতি!

অগ্নিগর্ভ নয়নে মালতী একবার সমরের দিকে দৃষ্টিপাত করলে।  
তার বাঁকা হাসিভরা মুখের দিকে চাইতে ঘৃণা হল। শুষ্কস্বরে সে বলে,  
তুমি গভর্ণমেণ্টের চাকরি করবে?

সমর উচ্চহাস্যে বলে উঠল, কেন করব না? যদি মোটা মাহিনা  
পাই।

মালতী ব্যঙ্গস্বরে বলে, তাহলে এত চং করা কেন—কাল রাত থেকে এতরকম চং না করলেই পারতে—

সমর ধীরে বলে, আহা চট কেন কমরেড্—ধরো, যদি কোন তরুণ আই-সি-এস তোমাকে শুভপরিণয়ের প্রস্তাব করে, তুমি কি প্রত্যাখ্যান করবে !

মালতী ক্রুদ্ধ হয়ে বলে, কমরেড্ বলবার তোমার কোন অধিকার নেই, অন্তগ্রহ করে চুপ করো ।

মুখ গুঁজে মালতী গুম্ হয়ে বসল । তার বুক কাঁপছে । আবার বুঝি সে কান্নায় ভেঙে পড়ে । দাঁতে দাঁত চেপে সে চোখের জল নিরোধ করলে ।

ব্যাপারটা এরকম দাঁড়াবে, অন্তপমা ভাবে নি । মালতীর আবেগ-অরুণ মুখের দিকে চেয়ে অন্তপমা ভাবলে, মালতী সমরকে ভালবেসেছে ।

সমরের কিন্তু কোন ভাব-চাঞ্চল্য দেখা গেল না । স্নাণ্ডউইচ শেষ করে সে কেক খাচ্ছে । মালতীর মনে যেন আরও আঘাত দেবার জ্ঞান সে বলে, দিদি, মাহিনেটা মোটা হয় যেন, বোজ এরকম স্নাণ্ডউইচ-কেক খেতে হবে ।

মালতী নিজেকে সামলে নিলে । এত সহজে সে হার মানবে না । সমরের মুখে স্থিরনয়নে চেয়ে সে বলে, কেন অন্তপমাদিদিকে কতগুলো মিথ্যে কথা বলছ । জগদীশবাবুকে বলে উনি পরে মুশ্বিলে পড়বেন । তুমি ত সত্যি গভর্ণমেন্টের চাকরি নেবে না ।

সমর বলে, কেন নেব না ! গভর্ণমেন্ট যদি আমাদের চাকরি দিতে আরম্ভ করে, ধীরে ধীরে আমরাই গভর্ণমেন্ট হয়ে উঠব ।

অন্তপমা উৎসাহের সঙ্গে বলে, বেশ বলেছ ভাই ! কোন্ ডিপার্টমেন্ট তোমার পছন্দ ?

সমর বলে, আবকারী বিভাগ ছাড়া যে কোন ডিপার্টমেন্টে দাও।

তর্জনী তুলে মালতী বলে, তোমাকে গোয়েন্দা-বিভাগে দেবে !

• সমর যে পরিহাস করছে, এ কথা সে কেন এতক্ষণ বুঝতে পারেনি। কিন্তু সত্যি কি সে পরিহাস করছে ?

মালতী ভাবতে লাগল, সমর যদি গভর্ণমেন্ট অফিসার হয়, তাতে তার রাগ করবার, আপত্তি করবার কি আছে। এ বিপ্লবের পথ, দুঃখ নির্যাতনময় জীবন, কত রোগভোগ, বেদনা, ব্যর্থতা। ভালই ত, সমর এ বিপ্লবের পথ ছেড়ে দেবে। তবু অদমনীয় ক্ষোভে মালতীর মন অশান্ত। এ যেন ঠিক হচ্ছে না।

সমর হেসে বলে, আচ্ছা, মালতী দেবী, এই যে আমি দাগী চোরের মত লুকিয়ে লুকিয়ে ট্রেনে পালিয়ে চলেছি, সে-টা ভাল, না, এই যে জগদীশবাবু ফাষ্ট ক্লাশে সুন্দরী স্ত্রীকে নিয়ে চলেছেন, সে-টা ভাল, অথবা মিষ্টার কল্যাণ কুমার পাইপ টানতে টানতে একবার এ গাড়ী একবার ও-গাড়ীতে বসে গল্প করতে করতে চলেছেন, সে-টা ভাল ?

মালতী আবার রেগে উঠল, তিক্তস্বরে বলে, দেখুন, আমি আপনার অভিভাবক নই, আপনি যা খুসি করতে পারেন। তবে, আমাদের গাড়ীতে উঠে, এত ঢং এত গ্যাকামি করার দরকার ছিল না। তাই দেখেই আমার হাড় জলে গেছে !

অনুপমা কটাক্ষে হেসে ভাবলে, অভিভাবক নও, সেইটাই হচ্ছে ক্ষোভের কারণ।

সমর কি বলতে যাচ্ছিল, মালতীর মনের অজ্ঞারে খোঁচা দিয়ে সে শুলিঙ্গলীলা দেখতে চায়, কিন্তু অনুপমা ঠোঁটের উপর তর্জনী রেখে ইসারা করাতে, সমর চুপ করে বসে রইল।

জ্বত-চলন্ত ট্রেনে তিনজনে শুক্ক বসে রইল। বাহিরে প্রথর রৌদ্র-ভরা শূণ্যপ্রান্তর অগ্নিপ্রভ অঞ্চলের মত কাপছে।

পরের স্টেশনে মালতী কুপে থেকে নেমে নিজের গাড়ীতে গেল। বলে গেল, মা'কে চিঠি লিখতে হবে।

অনুপমা বলে, রাগ করিস্ না, জব্বলপুরে চা খেতে আসিস্। ওঁর সঙ্গে ত আলাপ হল না।

জগদীশ খবর পাঠালে, এ স্টেশনেও সে আসতে পারলে না, বড় জরুরী কাজ পড়ে গেছে।

ট্রেন ছুটে চল। সূর্য্য মধ্য-গগনে। বিজন গিরিপ্রান্তর মধ্যদিনের প্রথর আলোকে উদাসতায় ভরা।

খড়খড়ি সব নামিয়ে দিয়ে অনুপমা রঙীন কুশান ঠেসান দিয়ে বসল। সমরকে ডাকল, বস, আমার পাশে। মনটা খারাপ হয়ে গেল। মালতী বড় বেদনা পেয়ে গেল।

সমর বলে, তোমাকে বড় ক্লান্ত দেখাচ্ছে, দিদি। তুমি একটু ঘুমোও, আমি ততক্ষণ line of marchটা ভাবি।

অনুপমা একটু উদাস স্বরে বলে না, না, বস আমার কাছে, গল্প বল—চুপচাপ থাকতে ভাল লাগছে না—মাথাটা কেমন দপ্‌দপ্‌ করছে—এ সব emotion আমার নয় না।

তরুণ স্ত্রীস্বামী সমরের দিকে অনুপমা চাইলে। নয়নের কৃষ্ণতারকা অন্ধকারে রেডিয়মের মত জল্জল্ করতে লাগল। কোন নারীর চোখে এরূপ অপরূপ জ্যোতি সমর কখনও দেখেনি। মন্ত্রমুগ্ধের মত সে বসল। বিলিমিলি-ঝরা আলো অনুপমার মুক্তকেশে রঙীন সিকং-শাড়ীতে এসে পড়েছে, কোন মায়ালোকের মত।

সমরের দেহের রক্ত বিলম্বিত করে উঠল। অনুপমা যে কি সুন্দরী,

এতক্ষণ চোখ মেলে সে দেখেনি। ওই এলায়িত তরুর ক্লাস্তিমণ্ডিত স্বৰ্ণমা অপূৰ্ণ জ্যোতিষ্কলোকের মত তার চোখে উদ্ভাসিত হয়ে উঠল।

—তুমি কি সুন্দর, দিদি! এতক্ষণ চোখ চেয়ে দেখিনি।

—যা, বেশী জ্যাঠামি করতে হবে না, বোস্।

—তোমার অস্থখ সেরে গেছে?

—সম্পূর্ণ সারে নি, সাবধানে থাকতে হয়।

—আচ্ছা, ইয়োবোপে চলে যাও না কেন, সুইজারল্যান্ডের কোন স্থানাটোরিয়মে গিয়ে কিছুদিন থাকলে—

—কে নিয়ে যাচ্ছে বল!

—কেন, জগদীশবাবু তোমায় বুঝি তেমন যত্ন করেন না। লোকটাকে দেখেই বুঝেছি, পাকা egoist.

—আমার অস্থখের কথা থাক, তোর প্র্যান কি বল।

—আমি নিয়ে যাব, যাবে আমার সঙ্গে?

—পাগলা ছেলে!

—তুমি কি ভেবেছ সত্যি আমি গভর্ণমেন্টের কাজ নেব!

—কাজ নিতে বলি না, কিন্তু এ পথ ছাড়। কি সুন্দর স্বাস্থ্য, শক্তি, সমস্ত জীবন তোর সম্মুখে, ব্যর্থ করিস্ না এমন করে।

—জীবনে কে ব্যর্থ কে সার্থক হল, কে তার হিসাব করবে, কে তার বিচার করবে, দিদি!

—তা জানি! তবু ভয় হয়, বড় ব্যথা লাগে।

—কারাগারে যে মরল, সে মৃত্যু কি ব্যর্থ, নিরর্থক বলতে চাও?

—জানি, ফুলিঙ্গ হতেই দাবানল জ্বলে ওঠে। কিন্তু তুমি আমায় কথা দিয়েছ। আমি ওঁকে বলব। কাজ নিতে হয় নিও।

—বোলো। কি জানি, তোমার কথাতে ‘না’ বলবার শক্তি খুঁজে পাচ্ছি না। তুমি বোধ হয় আমায় যাদু করেছ।

—আমি! না মালতী?

—মালতীর সে শক্তি নেই দিদি, আমার প্রলয়-পথের সহযাত্রিণী হবার মত।

অল্পপমা মুহূ দীর্ঘনিশ্বাস ফেলে। বুকে একটা বেদনা যেন ঠেলে উঠতে চায়। আবার কাশির বেগ না আসে!

ধীরে সে বলে, আচ্ছা চুপ করে বন্। ওই শিশি হতে আমায় একটি পিল্ দে দেখি, আর এক গেলাস জল।

জল খেয়ে অল্পপমা চোখ বুজে শুয়ে রইল। গাড়ীটা বড় ঢুলছে, বিরাট দানবের মত আর্ন্তনাদ করতে করতে চলেছে, সে পলনি বড় কক্কশ, বেদনাদায়ক।

রৌদ্ৰতাপক্লিষ্ট কমলের মত এ স্তন্দরী নারীর দিকে সমর মুগ্ধ চোখে চেয়ে রইল। সত্যোজাত শিশুর কান্নার মত এ অল্পভূতি অপূর্ণ নবীন!

মধ্যমশ্রেণীর মহিলা-গাড়ীর কক্ষে মালতী ফিরে এল।

মধ্যদিনের তপনতপ্ত নির্মেষ আকাশের মত তার ছুঁচোখ জ্বলছে।

গাড়ীর এক কোণের সব খড়খড়ি ফেলে দিয়ে সে গুম্ হয়ে বসল। মাথাটা হান্কা, শূন্য বোধ হল। যেন সে ভাববার শক্তিও হারিয়েছে।

না, হার মানলে চলবে না। বন্ধ জানলাগুলির দিকে চেয়ে মালতী ভাববার চেষ্টা করতে লাগল। হার সে মানবে না।



সমরকে বাঁচাতে হবে। হঠাৎ সমর এমন বদলে গেল কেমন করে? অথবা সমর সত্যিই সোসিয়লিজমে বিশ্বাস করে না।

অনুপমা মায়াবিনী। অনুপমার রূপে সমর মুগ্ধ, মত্ত হয়েছে। অনুপমার নিদ্দেশে সে চলেছে।

কুপেতে ঝাড়ুদারের সাজে সমরের আবির্ভাবের পর হতে দ্রুত ঘটনার স্রোত অতিচঞ্চল সিনেমা-ফিল্মের আলোছায়ায় নৃত্যের মত মালতীর চোখের সামনে প্রবাহিত হয়ে গেল। মালতী চোখ বুজলে। কালো পর্দার ওপর আলোর আবছায়া কাঁপতে তুলতে লাগল।

যদি সে সাহস করে বাথরুমে প্রবেশ করত, দেখাতে পারত, সমরের জন্ত সে ত্যাগ করতে প্রস্তুত, তাহলে সমর অনুপমার মায়াজালে পড়ত না। কিন্তু তার কেমন ভয় হল। জীবনে এমন ভয় কখনও সে পায়নি।

সমরকে বাঁচাতে হবে। সমর কি বুঝছে না, অনুপমার হাতে সে ক্ষণিকের ক্রৌড়নক। উচ্চপদস্থ গভর্নমেন্ট-অফিসারের স্ত্রী অনুপমার এ শুধু নিঃসঙ্গ রেলপথযাত্রার খেয়াল।

মালতী ভাবতে লাগল, কিন্তু সমরের ওপর তারই-বা কি অধিকার! তবু, সে হার মানবে না। সমরের এ মুগ্ধতা দূর করতে হবে। অনুপমার প্রতি সমরের মোহাচ্ছন্ন দৃষ্টি সে দেখেছে, ভাবের রঙীন বাষ্পের আবরণে সে দৃষ্টি কুছাটিকায় পথ-হারা পথিকের মত। সমর যদি এখন তার বাড়ীতে আসে, সে বুঝিয়ে দিতে পারে, সে কি ভুল করছে। সত্যিই কি সমর গভর্নমেন্টের কাজ নেবে, নিজেকে বাঁচাবার জন্ত!

মালতীর দুই চোখ ফেটে জল এল। শুভ্রমলিন গাও দিয়ে দীর্ঘ চোয়াল বেয়ে অশ্রুবিन्दু ঝরে পড়ল গ্রীষ্মের বিশুদ্ধ অপরাহ্নে বৃষ্টির বড় বড় ফোঁটার মত।

মালতী আর ভাবতে পারলে না, ফুঁপিয়ে ফুঁপিয়ে কাদতে লাগল।

—বহিন !

মালতী চমকে চাইলে।

গাড়ীর অপর প্রান্তে জানলার ধারে একটি হিন্দুস্থানী মেয়ে বসে, তার চোখে পড়েনি। ঘেন একগাদা রঙীন ঘাঘরা ও গুড়না কুণ্ডলী পাকিয়ে পড়ে আছে।

ঘোমটার লম্বা ঢাকা মুখের ওপর থেকে সরিয়ে মেয়েটি এতক্ষণ জানলা দিয়ে রৌদ্রদীপ্ত বনপ্রান্তরের দিকে চেয়েছিল, আলো-ভরা বিশ্বপ্রকৃতির এ মুক্তরূপ সে বোধ হয় তার প্রাচীর-ঘেরা বাড়ীর ছোট জানলাগুলি দিয়ে দেখতে পায় না। দুই চোখ ভরে সে চলন্ত পথদৃশ্য দেখছিল।

কান্নার শব্দ শুনে সে ফিরে তাকাল। মালতীর কান্না দেখে তার মনে পড়ল, বাড়ীতে তার ছোটবোন বোধ হয় তার জগ্নে এম্মি কাদছে। আবেগের সঙ্গে সে মুতুষ্পরে ডাকলে, বহিন !

বিস্মিত হয়ে মালতী হিন্দুস্থানী মেয়েটির দিকে চাইলে। কি সরল স্নিগ্ধ কালো চোখ ! একটু ভীত সলজ্জভাবে সে চেয়ে আছে। হাত-ভরা চাঁদির গহনা, কানেতে রূপার ফুল। থগেরি রঙের মোটা কাপড়ের ঘোমটার ফাঁক দিয়ে সিঁথির সিঁদুর জল্জল্ করছে।

চোখ মুছে মালতী মুগ্ধ হয়ে তার দিকে চাইলে। এই ত সত্যিকার ভারতের মেয়ের রূপ। এ ত ফরাসী সিন্ধের ব্লাউজ-পরা ইবসেন-তুর্গেনিভ-পড়া মেয়ে নয়। এদের দেখতে, এদের স্বথঃখের কথা

জানতেই ত মালতীর এই নিরুদ্দেশ যাত্রা। সমর এসে একবার এই মেয়েদের দেখুক।

মালতী উঠে দাঁড়ালে, একটু এগিয়ে এল। উৎসাহের সঙ্গে সে বলে উঠল, বহিন! তারপর সে হেসে উঠল। হিন্দি সে একেবারে জানে না। কি ভাষায় সে কথা বলবে? তার ভুল ভাঙা হিন্দি শুনলে মেয়েটি নিশ্চয় পরিহাস করবে।

মালতী তার বেঞ্চেতে বসে মূঢ় হাসতে লাগল। এ মূক হাশ্বে মেয়েটি ভয় পেল। মুখের উপর সে ঘোমটা টেনে দিলে, তারপর নুগ ঘুরিয়ে চেয়ে রইল বাহিরের প্রান্তরের দিকে।

মালতী চূপ করে বসে ভাবতে লাগল, পশ্চিমভারতের এ মেয়েটি হতে সে কত পৃথক, কত দূরে!

জব্বলপুর স্টেশনে ট্রেন এসে থেমেছে।

সমর বলে, আমি এখন যাই, দিদি।

অনুপমা বাধা দিয়ে বলে, না, না, বোস, উনি এ স্টেশনে আসবেন, পরিচয় করিয়ে দিই। চা খাবার সময় হল।

সমর হেসে বলে, বেশটা ঠিক গভর্ণমেন্টের চাকরির দরখাস্ত পেশ করবার মত নয়।

দরজার খড়খড়ি ফেলে অনুপমা প্ল্যাটফর্মের দিকে চেয়ে বলে, ওই উনি আসছেন! কিন্তু গাড়ীর ভেতর মুখ ফিরিয়ে সে দেখলে, সমর নেই। পলকের মধ্যে সে অন্তর্হিত। একটা ব্যঙ্গহাস্যের শব্দ জানলা দিয়ে ভেসে এল।

কুপেতে প্রবেশ করে জগদীশ অনুপমার ললাটে হাত দিয়ে দেখলে  
জর এসেছে কি না, তারপর শ্রান্ত হয়ে অনুপমার পাশে বসে পড়ল।  
তার গম্ভীর মূর্তি অনুপমার ভাল লাগল না।

বিরক্তির সঙ্গে অনুপমা বলে, তোমাদের পরামর্শ শেষ হল ?

স্থির দৃষ্টিতে অনুপমার দিকে চেয়ে জগদীশ বলে, হোল আর কৈ ?  
সি খাবার ছুটি নিয়ে এসেছি।

—আবার যেতে হবে সেলুনে ?

—হ্যাঁ, শোন, তুমি আর কিছুক্ষণ একা থাকতে পারবে ?

—মোটাই নয়। এক মুহূর্তের জগুও নয়। তোমার সাহেবের অত  
শ্রম করবার থাকে, এগাড়ীতে এসে করতে পারেন।

—দেখ, অব্বা হোয়ো না। Situationটা তুমি বুঝছ না।

—সিচুয়েসন্ আমি জানতে চাই না, আমি শুধু জানি তুমি এখন  
কুটিতে আছ।

—আচ্ছা, আগে চা খেয়ে নেওয়া যাক্। কি খাবে আর !

—শুধু এক কাপ চা, আর কিছু খাব না।

—রাগ কর কেন। তোমার জগু চিকেন-প্যাটি আনতে বলেছি।  
আচ্ছা, মালতী ত ছিল এগাড়ীতে, আর মিষ্টার ঘোষ, সব গেলেন  
কোথায় ?

—তারা কি তোমার স্ত্রীকে আগলাবার জগু ট্রেনে চলেছে।

—মালতীকে ডেকে দি তোমার গাড়ীতে। চা খেয়ে গেলে  
ট্রেনের আগে ছুটি পেতে পারি।

—তা না হলে সাহেবের সঙ্গেই রাত কাটাতে হবে না কি !

—বোঝ না, duty first.

—করোগে তোমার duty. আমি একাই থাকতে পারব মালতীকে ডেকোনা। ডাকলেও সে আসবে না।

বিস্মিত ভাবে জগদীশ অন্ত্রপমার দিকে চাইলে। জগদীশের দিবে কটাক্ষপাত করে অন্ত্রপমা হাসলে।

এ রহস্যময় হাস্যোদ্ভাসিত অপরূপ মুখের দিকে চাইলে জগদীশের রক্ত ঝিল্মিল্ করে ওঠে।

বয় টোষ্ট, চা, প্যাটি, কেক সব দিয়ে গেল। পেয়ালায় চা ঢালতে ঢালতে অন্ত্রপমা বলে, শোন, তোমার সঙ্গে বিশেষ কথা আছে।

চিকেন-প্যাটি দাঁত দিয়ে চিবোতে চিবোতে জগদীশ বলে, finish করেছে, একটা খাও তুমি আগে!

জগদীশের কালো কদাকার মুখের উপর জল্জলে চোখে চেয়ে অন্ত্রপমা ধীরে বলে, শোন, আমার এক ভাই এই ট্রেনে যাচ্ছে।

জগদীশ হেসে বলে, তোমার ভাই! আমার সম্বন্ধী বল—তোমার ভাই আছে বলে ত জানতুম না। জগদীশ আর একটা প্যাটি মুখেতে পুরলে।

জগদীশের হাসির ভঙ্গীতে অন্ত্রপমার ভয় হল। উদ্বিগ্নকণ্ঠে সে বলে সে আমার ভাই, আমাকে দিদি বলেছে; আমি বলেছি, আমি থাকতে তার কোন ভয় নেই। তার কোন বিপদ হবে না।

এক চুমুক চা খেয়ে জগদীশ বলে, বিপদ হবার আশঙ্কা আছে নাকি?

অন্ত্রপমা ক্ষুব্ধরে বলে, দেখ, আমায় ভয় দেখিও না; তুমি নিশ্চয় জানো, রিপোর্ট পেয়েছ।

জগদীশ হেসে বলে, তুমিও যে রিপোর্টারদের দলে রয়েছ, ত জানতুম না।

অনুপমা বলে, তাকে আমি অভয় দিয়েছি। তোমাকে বাপু অত সাধতে পারি না—তাকে একটা কাজ দিতে হবে।

জগদীশ বলে, বরাভয়দায়িনি, যদি অভয় দিলে, তবে আমার ভয়ে সে এ কুপে ছেড়ে চলে গেল কেন?

অনুপমা উত্তেজিত হয়ে বলে, তোমার ভয়ে যায় নি। ভয় তারা জানে না।

জগদীশ এবার উচ্চস্বরে হাস্য করে উঠল।

—ভয় যদি জানে না, তাহলে দুই মহিলার কাছে আশ্রয় ভিক্ষা করতে আসে কেন?

—সে আসেনি, আমি বলেছিলুম আসতে।

—বেশ, তুমি তাকে রক্ষা করার দায়িত্ব ত নিয়েছ।

—তুমি বাঁচাবে না, তুমি কাজ দেবে না! আমি যে তাকে বলেছি—

অনুপমার হাত কেঁপে থানিকটা চা কাপ হতে ছল্কে পড়ে গেল শাড়ীতে।

—আমি কি বলেছি কাজ দেবো না, অস্থির হোচ্ছ কেন?

—বেশ, দরকার নেই তোমার কাজে, শুধু বোদে পর্য্যন্ত তাকে নিরাপদে যেতে দাও।

জগদীশ হেসে বলে, এতখানি পথ যখন নিরাপদে আসতে পেরেছে, তখন বাকীটুকুও যেতে পারবে; কোন ভয় নেই। তবে তার আর একটা বড় বিপদ ঘনিয়ে আসছে—একটা প্যাটি খাও।

—সে বিপদ কি?

—সোসিয়লিজম ও স্তম্ভরী নারীর মধ্যে কোনটা বেশী ভয়ঙ্কর দেখা যাক!

—দেখ সব বিষয়ে পরিহাস করোনা।

অনুপমা স্তব্ধ হয়ে বসে রইল। এ গম্ভীর স্তব্ধতা অকস্মাৎ আঘাতের মত জগদীশকে দূরে ঠেলে দেয়। রহস্যময় সৌন্দর্য-আবরণের সৃষ্টি করে।

পরম বিশ্বয়ে জগদীশ অনুপমার দিকে চাইলে।

যে অপরূপ নারীসৌন্দর্যে সে মন্ত্রমুগ্ধ, সে মায়াজালে এ সোসিয়লিষ্ট যুবকও ধরা পড়েছে। অলৌকিক এর শক্তি।

জগদীশ বলে, ওগো, তোমার ভাইকে আমি ভাল কাজ দেব। সত্যিই সে সোসিয়লিজম্ ছেড়ে দেবে ?

অনুপমা কোন উত্তর দিলে না। চা-ভেজা শাড়ীটা ছাড়তে সে উঠল। তার মন ভারী হয়ে উঠেছে। সমর যে পথে চলেছে, সেই পথেই হয়ত তার জীবনের সার্থকতা। স্বপ্ন-ভরা ছুরন্ত প্রাণ-ভরা তরুণের জীবন নিয়ন্ত্রিত করবার অধিকার বা শক্তি তার আছে কি ?

মিস্ মল্লিক, কাকে খুঁজছেন !

মালতী চমকে চাইলে। তার সামনে কল্যাণকুমার, ঠোঁটের কোঠিখানভাবে লাগান পাইপ হতে ঈষৎ ধূম উদ্গীর্ণ হচ্ছে।

জব্বলপুর স্টেশনে ট্রেন থামতে মালতী প্ল্যাটফর্মে নেমে পড়েছে মনে ক্ষীণ আশা আছে, সমরের দেখা পেতে পারে। সমর হয়ত আচ্ছন্নবেশে থাকবে না। অনুপমার কুপের দিকে যেতে তার ইচ্ছা হচ্ছিল না। সমরকে সে একা চায়। সমরের সঙ্গে একটা বোঝাপড়া করতে চায়।

মুখ হতে পাইপ নামিয়ে কল্যাণ বলে, আপনি কাউকে খুঁজছেন মনে হচ্ছে।

মালতীর মুখ রাঙা হয়ে উঠল। অপরাহ্নের আলো সে রক্তিম মুখে এসে পড়ল। যেন কোন বিকাশোন্মুখ পুষ্পের পাপড়িতে রঙ লাগল।

ম্লান হেসে মালতী বলে, বিশেষ কাউকে খুঁজছি না।

ওলের মত বড় ভারী মাথাটা নেড়ে কল্যাণ বলে, সেই-ত আরও মুস্থিল, লক্ষ্য যেখানে স্থির, সন্ধান করতে সেখানে দেবী হয় না, আমরাও সাহায্য করতে পারি; কিন্তু এই যে নিবিশেষ থেকে বিশেষকে নিকাচন করা, নিরুদ্দেশ বাহির হয়ে উদ্দেশ্য খোজা, এ অবস্থাটা বেদনাময়।

আয়তনয়নে মালতী কল্যাণের দাঁপ্ত চোপের দিকে চাইলে; পাইপের ধূমজালে গোরবণ মুখকান্তি আচ্ছন্ন। কল্যাণ কি পরিহাস করছে!

মালতী হাস্তের সুরে বলে, আপনার কি সেই অবস্থা নাকি?

পাইপটা পরিষ্কার করতে করতে কল্যাণ বলে, অবস্থাটা কি ঠিক বুঝতে পারছি না, মিস্ মল্লিক। চেষ্টাও করি না। তবে এটা বুঝছি, চা খাবার সময় হয়েছে, চায়ের তৃষ্ণাও জেগেছে, কিন্তু একা খেতে যেতে ইচ্ছা করছে না, একা বসে আমি চা খেতে পারি না, বিশেষতঃ বিকেল বেলা।

মালতী গম্ভীর ভাবে বলে, একা খেতে হবে কেন, যিনি নিমন্ত্রণ করেছেন তিনি সঙ্গে থাকেন।

বিশ্বয়ের সুরে কল্যাণ বলে, নিমন্ত্রণ? কৈ আমি ত জানি না। এই দেখুন, আমার নিমন্ত্রণ, আমি নিজে জানি না, এগ্নি করে জীবনের বড় স্বযোগ সুবিধেগুলো হারাই—কে নিমন্ত্রণ করেছে?



—কেন, অনুপমা দিদি !

—অনুপমা ! কৈ মনে ত পড়ছে না। আপনাকেও বোধ হয় করেছে।

—আমাকে বলেছিল, কিন্তু আমি যাব না।

—আর আমাকে হয়ত বলেছিল, আমি ভুলে গেছি। এ ভালই হয়েছে। চলুন, তার চেয়ে রেস্টোরাঁ-কারে গিয়ে চা খাওয়া যাক—আপনি রাজী মিস্ মল্লিক !

—চা খেতে আমার বিশেষ ইচ্ছে নেই।

—আবার বিশেষ ইচ্ছার কথা তুলেই মুস্থিল হয়। ইচ্ছাটা এখন অবিশেষই থাক, যখন বিশেষ রূপ ধরে উঠবে, জানাবেন। চলুন, মিস্ মল্লিক, এখন গাড়ীতে একা বসে চা খেতে হলে মন বড় খারাপ হয়ে যাবে, ভাবব, পৃথিবী জুড়ে, টেন ভরে এত নরনারী, অথচ চা খাবার একজন সঙ্গীও আমার নেই।

—সেটা-ত সহজেই করতে পারেন—সব সকাল-বিকেলের চা-খাবার সঙ্গী—আপনায় চা তৈরী করে খাওয়াবে।

পাইপে অগ্নিসংযোগ করে কল্যাণ বুলে, আপনি কি বলতে চান, বুঝতে পারছি। দেখুন, অত বড় লোভ আমি করি না, সেজ্ঞে ঠকিছিও বারবার—আজ বিকেলে যে আপনার সঙ্গে চা খেতে পাচ্ছি, এই আনন্দ কণাটুকুই চাই, চিরদিনের অসীম আনন্দের দাবী করতে সাহস হয় না !

মালতী বলতে চাইলে, আপনি আমার কথা কিছুই বুঝেন না, এ সব কি বলছেন—কথার রঙীন জাল রচনা করছেন। কিন্তু সে কোন কথা বলতে পারলে না। পাণ্ডুর আনন রক্তোচ্ছ্বাসে অরুণ। নীরবে সে কল্যাণের সঙ্গে রেস্টোরাঁ-কারের দিকে চলল। কল্যাণ যেন তাকে

টেনে নিয়ে চলেছে। ষ্টেশনের কুলী-বেশী সমর তার পাশ দিয়ে চলে গেল, সে চিনতেও পারল না।

রেস্তোরাঁ-কারে টেবিলে দু'জনে মুখোমুখি বসল।

গণেশ ঘুনিয়ে পড়েছে।

শিপ্রা ও দেবপ্রিয় তাস খেলে চলেছে। ষ্টেশনের পর ষ্টেশন চলে যাচ্ছে, তাদের খেয়াল নেই।

হঠাৎ তাসগুলো ছড়িয়ে ফেলে শিপ্রা বলে, শুভুন দেবপ্রিয় বাবু, আপনি আমায় সাহায্য করবেন, কথা দিয়েছেন।

বিস্মিত হয়ে দেবপ্রিয় বলে, কথা দিয়েছি বটে, কিন্তু কি করতে হবে জানাননি ত।

গম্ভীরভাবে শিপ্রা বলে, ব্যাপারটা সহজ নয়।

শিপ্রার স্বর্ণ-কঙ্কনের দিকে চেয়ে দেবপ্রিয় বলে, আপনার উপযোগী কোন সিনেমা-গল্প লিখে দিতে হবে, যাতে আপনার অভিনয়-নৈপুণ্য প্রকাশিত হয়,—আমি কখনও গল্প লিখিনি—তবে চেষ্টা করতে পারি।

—সিনেমা-গল্প নয়, জীবনের গল্পরচনায় যোগ দিতে হবে।

—কার জীবনের?

—আমার।

—আপনার! আমি ত আপনার জীবন লিখতে ব্যগ্র।

—পুরাতন জীবন নয়, নতুন জীবন গড়তে হবে। আচ্ছা, দেবপ্রিয় বাবু, আমাকে দেখে আপনার কি মনে হয়?

—বেশ ভালই মনে হয়।

—হতে পারি আমি একট্রেস, তা বলে আমি খারাপ মেয়ে ত নই।

—কে বলে আপনি খারাপ!

আবেগের সঙ্গে দেবপ্রিয় দাঁড়িয়ে উঠল। শিশ্রার নিন্দুককে সে বুঝি মুষ্টিযুদ্ধে আহ্বান করবে!

—বস্তুন, স্থির হয়ে। শুভ্রন আমার কথা, আপনি পণ্ডিত মানুষ, বুঝতে পারবেন।

—আমি বুঝতে পারছি, এই একট্রেসের লাইফ আপনার ভাল লাগছে না, আপনি চান সহজ সরল জীবন, শান্ত গৃহকোণ—

—ঠিক বলেছেন, আপনি পণ্ডিত লোক সহজেই বুঝতে পারলেন, আর এই কথা অল্প লোকদের বলে, হাসে। তবে একটিং করতে ভাল লাগে না, বলতে পারি না। দেখুন না থিয়েটারে একটিং করতে, এখন ফিল্মে একটিং করতে চলেছি—বেশ একটা উত্তেজনা, আনন্দ আছে বৈকি—কিন্তু এতে ত সমস্ত মন ভরে না।

—বলুন, হৃদয় ভরে না। আপনি চান ভালবাসা—হৃদয় পেতে চান।

—ভালবাসা! জানি না সত্যি ভালবাসা কি—ষ্টেজে কত ভালবাসার অভিনয় করেছি, কিন্তু আমাদের জীবনটা কি দেখুন।

—জীবনে ভালবাসা পেতে চান। আপনি ষ্টেজে যে প্রেমের অভিনয় করেন, জীবনে তা সত্যরূপে পেতে চান, আর আমরা জীবনে যে প্রেমের বেদনা পাঠ, তা ভুলতে মিথ্যার অভিনয় দেখতে যাই।

—দেখুন, আপনার হেঁয়ালি বুঝলুম না।

—জীবনটা যে একটা হেঁয়ালি।

—হেঁয়ালির সমাধান করবার এখন সময় নেই, আমার কথাটা শুনে নিন—গণেশবাবু এখনি জেগে উঠতে পারে।

—এর মধ্যে গোপনীয় কি আছে ?

—আপনি কিছুই বুঝতে পারছেন না। আপনার সঙ্গে যা পরামর্শ করতে চাই, সে-ত গণেশবাবুর সম্বন্ধেই।

—গণেশবাবুর সঙ্গে আপনার কি সম্বন্ধ আমি ত জানি না।

—কি সম্বন্ধ মনে হয়।

—দেখুন যা জানি না, সে বিষয়ে অনুমান করতে পারি, কিন্তু তা বলা উচিত নয়।

—আপনি বলুন। আমি তার জন্তে দুঃখিত বা লজ্জিত হব না।

—আপনারা দু'জনে বন্ধু !

—বন্ধু ! বা বেশ বলেছেন, গণেশ বাবুকে জাগিয়ে শোনাতে ইচ্ছে করছে।

—গভীরভাবে ভেবে দেখুন, আপনার মধ্যে শুধু কামনার যোগ নয়, শুধু লালসার নয়, তার চেয়ে গভীর যোগ রয়েছে—এ যোগে দু'জনের আত্মা আনন্দ পাচ্ছে।

—আত্মা ! লোকে যে বলে, একট্রেসের আবার আত্মা !

—তাহলে, কাল রাতে কে কাঁদছিল আপনার হৃদয়ে ঘসে ? সে কি আপনার অশান্ত অতৃপ্ত আত্মা নয় !

—আপনি আমাকে কাঁদতে দেখেছিলেন !

—সেই সময়ে হঠাৎ ঘুম ভেঙে গেছিল। মনে হল, কে যেন কাঁদছে, সে কান্না যেন পৃথিবীর বুক থেকে আসছে।

—মাঝে মাঝে আমার কেমন মন খারাপ হয়ে যায়, কিছু ভাল লাগে না—আমি অমন কাঁদি—ওটা বোধ হয় আমার একটা অসুখ। তারপর লজ্জা হয় সে কথা ভাবলে।

—আমারও ত কিছু ভাল লাগে না, কিন্তু আমি ত অমন কাঁদতে পারি না।

—কি পাগলের মত বকছেন, আপনি যে পুরুষ মানুষ, কাঁদবেন কি ! তবে গণেশবাবু মাঝে মাঝে খুব মাতাল হয়ে গেলে, হঠাৎ কাঁদতে বসে।

—না, কাঁদবার জন্তে মাতাল হতে রাজী নই।

—দেবপ্রিয় বাবু, আপনি স্থখী নন, বুঝতে পারছি।

—স্থখ জীবনের কাম্য নয়, বেদনাকে ভয় করি না। কিন্তু এই যে মহারহস্য, এর কোন সন্ধান পাওয়া যায় না, জীবনের সব জটিল প্রশ্নের কোন উত্তর মেলে না—থিওরীর পর থিওরী গড়ি—কেন দুঃখ, কেন অবিচার অত্যাচার, কেন ব্যাধি—সমস্যার সমাধান নেই—বলতে পার—এ অশাস্তি—

—দেবপ্রিয় বাবু, ভুলে যান কেন আমি এসব বিষয়ে অজ্ঞ। শুনুন, আসল কথাটা বলা হচ্ছে না।

চশমার কাচ মুছে দেবপ্রিয় কালো চশমাটা পরলে। বহির্জগতের ওপর কালো রং ঢেলে দূরে সরিয়ে সে যেন অন্তর্জগতে বাস করতে চায়।

দেবপ্রিয় দেখলে, ঘুমন্ত গণেশের দিকে শিপ্রা স্থিরনয়নে চেয়ে আছে। কি ব্যাকুল মমতা সে দৃষ্টিতে ! দেবপ্রিয় চমকে উঠল !

তত্ত্বজিজ্ঞাসুর মত দেবপ্রিয় বললে, আপনি গণেশবাবুকে বিবাহ করতে চান ?

সোনার ঢুল ঢুলিয়ে শিপ্রা হেসে উঠল, কোন উত্তর দিলে না।

দেবপ্রিয় বললে, আর গণেশ বাবু রাজী নন, সেজন্য আপনি আমার সাহায্য চাইছেন, তাঁকে রাজী করাতে।

বিস্মিতভাবে শিপ্রা দেবপ্রিয়ের মুখে চাইলে, কে বললে এসব কথা ?

—এই কথাগুলি বলবার জন্তে আপনি এতক্ষণ চেষ্টা করছিলেন ?

—আপনি সাংঘাতিক লোক !

—এ বিষয়ে ভেবে আপনায় বলব ।

—কি ভাববেন ? এত ভাবেন কেন ?

—সাহায্য করা উচিত হবে কি না—অর্থাৎ আপনার বিবাহ করা—

বাধা দিয়ে শিপ্রা ক্ষুব্ধ হয়ে বলে, উচিত কি না ! চাই না আপনার সাহায্য । আবেগের সঙ্গে শিপ্রা দাঁড়িয়ে উঠল, ক্রোধে তার দুই চোখ জলে ভরভর ।

দেবপ্রিয় হতাশভাবে বসে রইল । অনেক বইয়েতে পড়েছে, অভিনেত্রীদের মনের অবস্থা ক্ষণে ক্ষণে পরিবর্তনশীল । দৃষ্টান্ত তার সম্মুখে ।

রেন্সটারী-গাড়ীতে চা খাওয়া শেষ হয়ে গেছে ।

একটা ছোট স্টেশনে গাড়ী থামতে মালতী টেবিল ছেড়ে ঠঠবার চেষ্টা করলে ।

কল্যাণ তাকে বাধা দিয়ে বলে, আর একটু গল্প করা যাক, বন্ধন । তাড়া কিসের ?

বয়সে আর এক পট্ চা আনতে বলে কল্যাণ বলে, চতুর্থ কাপ হোক !

মালতী হেসে বলে, মোটেই না । আপনি কি চা খেতেই পারেন !

—সত্যেন দত্তের সেই চীনে কবিতার অনুবাদ মনে পড়ে, ‘প্রথম পেয়লা কণ্ঠ ভেজায়’—আমি বোধ হয় গতজন্মে চীনে ছিলাম ।

—এবার মগজে মুকুতা মাণিক জুলবে ?

—দেখুন মিস্ মল্লিক, আজ বড় ফুর্টি করে চা খাচ্ছি—ভাববেন না ফ্রাটারি, বড় ভাল লাগছে আপনাকে।

—কথাগুলো ইংরাজীর অনুবাদ বলে মনে হচ্ছে।

—এতদিন ইংলণ্ড থেকে বোধ হয় ইংরাজী ভাষায় ভাবি।

—অথবা, ইংরাজ মেয়েদের ওই সব কথা বলে বলে এমন অভ্যাস হয়ে গেছে, যে দেশের মেয়েদেরও ভুলে বলে ফেলেন।

—আপনার কি সত্যিই একথা মনে হচ্ছে ?

মালতী কোন উত্তর দিতে পারলে না। চা-খাওয়া খালি পেয়ালার মধ্যে অকারণে একটা চামচ নাড়তে লাগল।

—দেখুন মিস্ মল্লিক, আপনার সাহসিকতায় আমি মুগ্ধ। এই যে একা বেরিয়ে পড়েছেন—দেশের তারুণ্যের জয়যাত্রা দেখছি আপনার মধ্যে।

—অত বড় বড় কথা বলবেন না, লজ্জা করে। আপনি ত কত দেশ ঘুরেছেন।

—বলেন ত আর একবার ঘুরতে পারি আপনার সঙ্গে, আমাকে গাইড করলে ঠকবেন না।

অপরাহ্নের আলো-ভরা শুক্ল বনানীর দিকে চেয়ে মালতী দীর্ঘনিশ্বাস ফেলে। মনে পড়ল সময়ের সঙ্গে তার আর ইয়োরোপ যাওয়া হবে না, বোধ হয় বোধে হতেই বাড়ী ফিরতে হবে।

আনন্দের মালতীর দিকে কল্যাণ মুগ্ধবাকুল চোখে চেয়ে রইল। বড় জানতে ইচ্ছে করল, কি ভাবছে সে। হয়ত, এই সন্ধ্যার পৃথিবী তার চোখে সুন্দর লাগছে, মধ্য-ভারতের এ ঘন অরণ্যের রহস্যরূপে সে চকিত।

মালতীর আয়ত নয়নের করুণবাকুল দৃষ্টি কল্যাণের তীক্ষ্ণচক্ষুর দীপ্ত-

কালো তারকায গিয়ে কখন পড়ল মালতী তা জানতে পারল না। এ সম্মোহনের মত।

—আপনি কি আবার ইয়োরোপে যাবেন? এট ত এলেন কত বছর পরে।

—দরকার হলে আবার যেতে পারি।

—এখন কি দরকার?

—প্রকৃত আপনি আমাকে প্রদর্শকরূপে নিযুক্ত করলেন।

—কি যে বলেন! ইচ্ছা হয় ইয়োরোপে যেতে। একটি ছেলের সঙ্গে প্ল্যান করছিলুম—সে প্ল্যান ভেঙে গেল।

—একজনের সঙ্গে প্ল্যান হল না বলে আর একজনের সঙ্গে হবে না? আপনি সাহসিকা, life নিয়ে experiment করতে ভয় পাবেন কেন?

—না, ভয় করব না। Life is an experiment, ইংরাজীতে বলে বেশ শোনায, কিন্তু তার বাংলা করে ‘পরীক্ষা’ বলেই ভয় করে।

তাহলে ফোর্থকাপ্ হোক, বলে সমর মালতীর শূন্য পেয়ালা চা ঢেলে ভরে দিলে।

প্রায়াক্ককার সাক্ষ্য পার্শ্বত্যাগীর দিকে মালতী দীপ্ত নয়নে চেয়ে রইল। তার বুক দুর্ভুর্ করছে। চূপ করে সে বসে রইল। কল্যাণের মুখের দিকে চাইতে পাল্লে না।

পাইপে তামাক ভরতে ভরতে কল্যাণ বলে, আপনি বিশ্বাস করছেন না আমার কথা? কথাগুলো সহজস্বরে বলি, সেজ্ঞা আমাকে কোন মেয়ে সিরিয়স্ ভাবে না—

রঙীন দিগন্তের দিকে চেয়ে মালতী বলে, আমি আপনাকে খুব সিরিয়স্ ভাবছি। কিন্তু ভেবে দেখুন, আপনার সঙ্গে আমার পথের ক্ষণিক আলাপ, আপনি আমাকে কিছুই জানেন না।



পাইপটা টেবিলে রেখে কল্যাণ বল্লে, জানার ত এক জায়গায় স্তর হবে মিস্ মল্লিক, সে পথেই হোক আর বিপথেই হোক। আর এ জানার যে শেষ নেই—এ অশেষের পরিচয়—

—বুঝতে পারছি কেন লোকে আপনাকে সিরিয়স ভাবে না। কথার কৃত্রিম জালে আপনি মনের আসল কথা ঢেকে রাখেন।

—আশ্চর্য্য! এই কথাগুলি আমাকে এক ফরাসী মেয়ে বলেছিল, প্যারিসের কোন কাকোফোনে। বুঝতে পারেন না কি, মনের অধিক অংশটা অবাক্ত, আমার কাছে ত অজ্ঞাতই মনে হয়, কথার ঘোমটা পরে সে বসে থাকে।

—আমি খুব স্পষ্টভাবে ভাবতে চাই, আর খুব সহজ স্পষ্ট করে তা বলতে ভালবাসি।

—কিন্তু তা কি সম্ভব? ওই যে শুকতার! শুভ্র পুষ্পের মত অন্ধকার দিগন্তে ফুটে উঠল, দিনের আলোয় কে ভাবতে পেরেছিল, ওই তারা ছিল ওখানে? মনের আকাশে তেমনি ইঠাং কোন স্থল, কোন কথা জেগে উঠে আপনার চমক লাগিয়ে দেয় না কি? অথচ সে স্থল সে ব্যথাকে ভাষায় ব্যক্ত করবার চেষ্টা করলে ওই শুকতারার মত কোন্ অসীম অতল অন্ধকারে মিলিয়ে যায়।

পাইপটা মুখে তুলে কল্যাণ চুপ করলে।

স্তব্ধ বনপ্রান্তে শুকতারার দিকে মালতী চেয়ে রইল।

অনুভব করলে কোন্ গভীর আনন্দ, শান্তি, ব্যাকুলতায় হৃদয় ভরে আসছে, এ অনুভূতির ভাষা বুঝি নেই। শুধু চুপ করে ছ'জনে কাছাকাছি বসে থাকা।

পশ্চিম দিগন্তের অন্ধকারে শুকতারা মিলিয়ে গেছে, হঠাৎ-নিভে-  
যাওয়া প্রদীপের মত। এখনও চাঁদ ওঠেনি। চারিদিকে মায়াময়  
অন্ধকার।

খোলা জানলার ওপর রঙীন কুশন রেখে অন্তপমা এলিয়ে শুয়ে  
পড়ছে। অন্ধকার কুপেতে সে একা। বাহিরে আকাশের অন্ধকার  
গাড়ীর ভেতরের অন্ধকারের মত এত গাঢ় নয়। মাঝে মাঝে তারা  
ফুটে উঠছে। নিম্নভূমিতে মধ্যভারতের ঘন বনানীর তিমির-শ্রোত।

দিনের নানা ঘটনায় মানসিক উত্তেজনায় সে শ্রান্ত। কিন্তু এ  
দৈনিক ক্লান্তিতে অন্তর আরও উদ্দীপিত হয়ে উঠেছে। বল্গা-ছেড়া  
উন্মত্ত অশ্বের মত উদাম চিন্তার শ্রোত ছুটে চলেছে, মাথা টনটন  
করছে। এ চিন্তার গতিরোধ করবার শক্তি তার নেই।

প্রবল বায়ুশ্রোতের দিকে মুখ করে চোখ বুজে অন্তপমা ভাবছিল।  
কিছু ভাবতে সে চায় না, কে যেন তার মাথার ভেতর বসে ভেবে  
চলেছে।

অন্তপমা ভাবছিল, যদি তার অসুখ না হত। আবার কখনও  
ভাবছিল, তার কোন অসুখ হয়নি; মালতীর মত সে তরুণী, প্রাণে-ভরা।

আবার ভাবছিল, জগদীশের সহিত যদি তার বিবাহ না হত,  
তাহলে এখন সে কি ভাবে থাকত, কি কাজ করত? হয়ত সে গান্ধী-  
শিষ্যা হয়ে জেলে যেত, অথবা কোন বিদ্রোহী দলে মিশত, সময়ের মত  
সোসিয়লিষ্ট হয়ে বক্তৃতা দিত, অথবা জীবিকার্জনের জন্য কোন স্থলে  
শিক্ষয়িত্রীর কাজ নিত।

জীবনটাকে ভেঙেচুরে নতুন করে গড়তে ইচ্ছে করে।

যদি তার বাবা হঠাৎ মারা না যেতেন; যদি তিনি এখন বেঁচে থাকতেন। হয়ত, কল্যাণের সঙ্গে তার বিবাহ হত, অথবা সে কাউকেই বিবাহ করত না। মালতীর মত ভ্রমণে বাহির হত।

ভাল লাগে না ভাবতে, তবু সে ভেবে চলেছে।

সম্মুখে স্নিগ্ধ ঘন অন্ধকার; সৃষ্টির পূর্বের আদিন অন্ধকারের মত গম্ভীর রহস্যময়, প্রলয়ের অন্ধকারের মত ভীষণ, পবনবহুল। এমনি কোন রাত্রির অন্ধকারে সন্ধ্যার শুকতারার মত সে মিলিয়ে যাবে। তারপর কোন নবলোকে নবপ্রভাতে নবজন্ম হবে কি?

কেন বাঁচতে সাধ যায়? পৃথিবী কি এমনি সুন্দরী যে বারবার দেখতে ইচ্ছে করে, জীবন কি সত্যিই স্বপ্নময়, মধুময় যে এত ব্যথতা এত বেদনা ভোগ করেও তাগ করতে ইচ্ছা হয় না?

হয়ত সে কোন অজানা ক্রোড়কের হস্তের পুত্তলিকা; বেঁচে থাকবার কামনা ক্রীড়াকারীর ইচ্ছায় চিরজাগ্রত, আর সকল দুঃখজালা ভোগ, হৃদয়ের সকল বেদনা তার প্রাপ্য।

সে হবে বিদ্রোহিনী। কিন্তু কার বিরুদ্ধে সে বিদ্রোহ করবে? রাষ্ট্র, সমাজের বিরুদ্ধে বিদ্রোহ করা যায়, আইন অমান্য করে বিপ্লবের বাণী প্রচার করে যুদ্ধ করে বিদ্রোহ করা যায়। কিন্তু এ অজানা শক্তির বিরুদ্ধে কি করে সে বিদ্রোহ করবে? আব্রুহত্যা করে যেখানে বিদ্রোহ করতে হয় সে বিদ্রোহে লাভ কি? এ জীবন ত্যাগ করার জ্ঞান নয়, এ মানব-জীবন আরও পূর্ণরূপে উপভোগ করবার জ্ঞান সে হবে বিদ্রোহিনী।

অনুপমা চোখ মেলে উঠে বসল।

সম্মুখে দিগ্বলয়ে অন্ধকার কেটে গেছে। স্বপ্নতরীর মত শুভ্র চন্দ্রমা অন্ধকারসমুদ্রে পাড়ি দেবার জ্ঞান যাত্রা শুরু করেছে।

অনুপমা হেসে উঠল, তারপর দীর্ঘনিশ্বাস ফেলে। হাসতে গিয়ে বুকে একটা বাথা খচ্‌খচ্‌ করে উঠেছে। কাশির বেগ আসে বুঝি। চাঁদের আলোয় চাইতে আর ইচ্ছা হল না। আবার সে চোখ বুজে শুয়ে পড়ল। সে অনুভব করতে চাইল, অসীম অন্ধকারে সে ছুটে চলেছে, অনন্তবোমে কক্ষচ্যুত কোন তারকার মত, সংঘাতে বিপ্লব, নবসৃষ্টি হবে।

একটি ছোট ষ্টেশনে ট্রেন থেমেছে ক্ষণকালের জন্য। নিঃশব্দে কে একজন কুপের দরজা খুলে প্রবেশ করলে। তার দীর্ঘ দেহের ছায়া জানলার ফ্রেমে-বাঁধান আকাশটুকু ভরে দিলে। প্রবেশ করেই আগন্তুক কুপের আলো জেলে বাহিরের অন্ধকার দূর করে দিলে। সবিস্ময়ে চকিতভাবে অনুপমা চেয়ে দেখলে, এ সময় নয়, কল্যাণও নয়, এক অজানা সন্ধ্যামী।

অনুপমা ভয় পেলো না। হাঙ্গেরীয় ব্লাউজের উপর কট্‌কী শাড়ীর রঙীন চওড়া আঁচলা টেনে মুড়ু হাসলে। অজানা ক্রীড়কের কোন নতুন খেলা বুঝি শুরু হবে।

লজ্জিতভাবে প্রেমদাস বল্লেন, আমি যে গাড়ী ভুল করে ফেল্লুম, দেখছি, মা! এ যে বড় অত্যায হল।

অনুপমা হেসে বল্লেন, এ অত্যায আপনার স্বেচ্ছাকৃত নয়, আপনি বস্তুন। গাড়ী চলতে আরম্ভ করেছে, এখন নামবার চেষ্টা করবেন না।

—এ যে বড় ভুল করলুম।

—ভুল আপনি করে থাকতে পারেন, কিন্তু এ ম্যারিয়নেটের অভিনয়ে দড়ি যিনি টানছেন, তিনি ভুল করেন নি। আপনি বস্তুন।

—বড় সুন্দর কথা বলেছ মা, ভুল তিনি করেন না।

—দেখুন, আমার বড় একা লাগছিল, মনে হচ্ছিল ওই আকাশ-

জোড়া অঙ্ককার আমার বুকে চাপ দিচ্ছে, আমি হাঁপিয়ে উঠছিলুম, ঠিক সেই সময় আপনি গাড়ীতে ঢুকে আলো জেলে দিলেন। আমি বোপ হয় আপনাকেই খুঁজছিলুম।

—আমাকে ? আমাকে কি তুমি চেন ?

—এই ত চেনার শুরু হল। তবে আপনার নাম শুনেছি।

—কার কাছ থেকে শুনলে ?

—দু'জনের কাছ থেকে। একজন আমার পুরাতন বন্ধু, আর একজনের সঙ্গে এই ট্রেনেই আলাপ।

—আমাকে ত নয়, তাকেই ত তুমি চাইছিলে। তোমার নতুন আলাপীটিকে।

—হ্যাঁ, তার কথা আমি ভাবছিলুম, তার জন্তে আমি চিন্তিত। আপনি ঠিক বলেছেন। আপনি কি মনের কথা বুঝতে পারেন ?

—তোমার মন বড় চঞ্চল, বড় বাখা-ভরা, এ বুঝতে পারছি।

—আপনাদের ত অলৌকিক শক্তি আছে, আমার মনকে শাস্ত করে দিন্ দেখি !

প্রেমদাস মুহূ হাসলে।

জল্জলে চোখে চেয়ে অনুপমা বলে, কি, চূপ করে রইলেন যে !  
আচ্ছা আপনি অস্থখ সারিয়ে দিতে পারেন ?

—আমি ত ডাক্তার নই।

—আপনাদের ত অলৌকিক শক্তি আছে।

আমি ত ঐন্দ্রজালিক নই। আমি সন্ন্যাসী। তবু লোকে ভাবে আমি ষাডুবিজ্ঞা জানি। এই দেখ আমার গাড়ীতে একজন ব্যবসাদার চলেছে, তার অর্থের প্রয়োজন, আমাকে বলে, আপনি টাকা জোগাড় করে দিন, আপনার শিষ্য হব, আপনি টাকা দিন। আচ্ছা, আমি কি

তেজারতির কারবার করি? কিন্তু লোকটির নিষ্ঠা প্রবল। সেজন্য তাকে সাহায্য করতে গাড়ী থেকে নেমেছিলুম। এই ট্রেনে একটি পনী যুবক যাচ্ছে, তার সঙ্গে একটি অভিনেত্রী আছে, শুনলুম, কাষ্টক্লাস গাড়ীতে সে যাচ্ছে, তারি খোঁজে এসেছিলুম, ভুলে তোমার গাড়ীতে উঠে পড়েছি।

—আপনি যাদের খুঁজছেন, তাঁরা বোধ হয় পাশের গাড়ীতে আছেন। মাঝগান থেকে আমার লাভ হয়ে গেল। জানেন সন্ন্যাসীদের আমার বেশ লাগে, আমার বাবার কাছে অনেক সন্ন্যাসী আসতেন, তাঁরা বড় মজার মজার কথা বলতেন। একজন ছিলেন অদ্বৈতবাদী। জগৎ যে মিথ্যা, এ প্রমাণ করতে প্রাণান্ত পরিশ্রম করতেন। তিনি কিন্তু সবচেয়ে বেশী খেতে পারতেন। তাঁর গলাবাজি শুদ্ধিদেরা যে মিথ্যে নয়, তা সবাই বুঝতে পারত।

—তুমি কি অন্তপমা?

—হ্যাঁ, আমার নাম অন্তপমা।

—আমিই সে-ই সন্ন্যাসী।

রাধাকান্ত আবার নোটবুক নিয়ে হিসাব করতে বসছে। গাড়ীর ঝাঁকুনিতে সংখ্যাগুলি ঠিকমত লিখতে পারছে না, বার বার লিখছে আর কাটছে; দেনার টাকা পাওনার চেয়ে বেশী হয়ে যাচ্ছে। সেজন্য সে চিন্তিত নয়। এখন কিছু টাকা ধার পেলে হয়, ছ'লাখের কমে চলবে না, চার লাখ পেলে বেশ ভাল হয়। কলটা সারতে দেবী হবে। অবশেষে কি বোম্বে মার্কেটে গিয়ে ধার করতে হবে? কলের সেয়ার-

গুলির ওপর বাটলিওয়ালার লোভ ভয়ানক, সে জানে ; শেয়ার গচ্ছিত রেখে টাকা চাইলেই সে পাবে। কিন্তু খাল কেটে কুমীর ঢোকাতে সে চায় না।

টাকা তার চাই। হার সে মানবে না। বোম্বে পৌছেই ব্যবস্থা করতে হবে। হাত পাততে হবে পাশী-ধনীর কাছে। অথচ ওই গণেশ ইচ্ছা করলেই দু'লাখ টাকা দিতে পারে। সন্ন্যাসীরও অনেক ধনী শিষ্য আছে নিশ্চয়। সন্ন্যাসী যে তখন বলে, আপনি টাকা পাবেন, তার মানে কি ?

রাধাকান্ত দাঁড়িয়ে উঠল। আর একটা আলো জ্বলে দিলে।

সামনের বেকিতে সন্ন্যাসী নেই। এ গাড়ী ছেড়ে সবাই গেছে কেন ? শুধু সেই বৃদ্ধ লোকটি বসে আছে ; সাদাচুল-ভরা মাথা দেখলে মনে হয় যেন পরচুল পরে যাত্রার অভিনয় করতে নেমেছে।

আর একটি অজানা লোক সামনে বসে তার দিকে সন্ধিগ্ননয়নে চাইছে। বন তার সঙ্গে কথা কইতে চায়, কিন্তু তার সাহস হচ্ছে না কথা কইতে। লোকটি পরিচিত, সেয়ার মার্কেটে দেখেছে, অথবা কোন ইংরাজ দালালের আফিসে।

লোকটি দাঁড়িয়ে উঠল। টেরা চোখ কাঁপিয়ে বলে, তাজ্জব ব্যাপার ! মিতর সাহাব ! কোথা চলেছেন ? ফতেসিংকে চিনতে পারছেন না হুজুর !

ফতেসিং ! রাধাকান্তর বিশ্বাস হল না তার সামনে ফতেসিং দাঁড়িয়ে। কোটিপতি ফতেসিং !

আবেগের সঙ্গে রাধাকান্ত ফতেসিংএর দুহাত জড়িয়ে ধরলে, আশায় আনন্দে সে কাঁপছে।

রাধাকান্তকে জোরে ধরে ফতেসিং বলে, আপনার কি অসুখ হোল,

মিতর সাহাব ! আরে বসুন, বসুন—টেনে এতো হিসাব করলে ত মাথা গরম হবে—এতো হিসাব কেনো—কোন্ কোম্পানীকে লাটে তোলাচ্ছেন !

রাধাকান্ত দীপ্তকণ্ঠে বলে, আপনার দেখা পেয়েছি, আর আমার ভয় নেই, বসুন।

মাথায় মাড়োয়ারীর পাগড়ি, কানে হীরার ফুল, গলায় সোনার হার, পশ্চিমী কতুয়ার উপর চীনে-সিল্কের লম্বা পাশী কোট, পরনে জরি-পাড় ধুতি, পায়ে লগুনে-কেনা জুতো। ফতেসিংকে মাড়োয়ারী বলে ভুল করা হবে। বস্তুতঃ তার কোন দেশ নেই, কোন জাতি নেই। সে বলে, সে জহুরী, হীরক-ব্যবসায়ী। আসলে সে কুসীদজীবী। সে রাজামহারাজদের টাকা ধার দেয়, পৃথিবী জুড়ে তার টাকা খাটছে। পৃথিবীর যে সব অর্থপতিরাজ্যশক্তিকে অর্থ দেয় প্রজাশক্তিকে দমন করবার জন্ত, আবার প্রজাদের ক্ষমতালোভের প্রচেষ্টায় অর্থ সাহায্য করে রাজ্যশক্তিকে থরু করবার জন্ত, এক জাতিকে ঋণ দেয় অপর জাতির নিকট হতে রণ-সম্ভার ক্রয় করবার জন্ত, আবার বিক্রেতা-জাতিকে টাকা ধার দেয় যুদ্ধোপকরণ প্রস্তুত করবার জন্ত, দেশে দেশে কলকারখানার চাকা ঘোরার সঙ্গে যাদের টাকা খাটে, খনিতে তেল কয়লা ওঠার সঙ্গে যাদের টাকা ওঠে, কামানের ধূমে বোমার আগুনে যাদের টাকা পুড়ে খাটি সোনা হয়, ফতেসিং সেই সব ধনপতিদের দলের।

ফতেসিং হেসে বলে উঠল, মিতর সাহাব, তাজ্জব ব্যাপার, বোম্বে যাচ্ছেন, না বিলেত ? আপনার মিলে ষ্টারাইক গুনলুম।

রাধাকান্ত বলে, ষ্ট্রাইক বিশেষ কিছু নয়, প্রায় মিটে গেছে, ক'টা ছোকরা এসে বড় গোলমাল করছিল। কিছু টাকা দিতেই সরে পড়েছে।

ফতেসিংকে সে মিলের সত্যিকার অবস্থা জানাতে চায় না।



ফতেসিং হেসে বলে, এ আপনি ভুল করলেন, আবার টাকা নিতে আসবে—ষ্টারাইক বাধাবে—তার চেয়ে একটা সর্দারি কাজ দিয়ে দিতেন ওদের সর্দারকে। এগ্নি করে বড় বড় গভরনমেন্টও চোল্ছে।

রাধাকান্ত আগ্রহের সঙ্গে বলে, এ ঠিক বলেছেন, তা আপনিও বোম্বে চলেছেন—what a great pleasure—আপনাকে দেখে বড় আনন্দ হচ্ছে। একটা কাজের কথাও আছে।

সকল লম্বা গৌঁকে একবার আঙুল বুদিয়ে ফতেসিং বলে, সে জানি, আপনার সব সময়ই কাজ, আর কিছু চিন্তা করেন না—খালি ব্যবসা, টাকা—টাকা! এসব সঙ্গে যাবে না, মিত্তির সাহাব।

রাধাকান্ত একটু বিরক্তির সঙ্গে বলে উঠল, এ যে ভূতের মুখে রাম নাম! টাকার জন্তে আপনি যে সমস্ত পৃথিবী ঘুরে বেড়াচ্ছেন—কোটিপতি হয়েও ত আপনার তৃষ্ণা মিটিছে না।

ফতেসিং টেরা চোখের তারা ঘুরিয়ে বলে, আরে কি বলেন, টাকা কি আমার? দেনে-ওয়ালা দিচ্ছেন, খেলাচ্ছেন, আমরা ত ভগবানের খাতাঞ্চী মাত্র।

রাধাকান্ত হেসে বলে উঠল, ভগবানও কি তেজারতির ব্যবসা খুলে বসেছেন নাকি?

ফতেসিং গম্ভীর হয়ে গেল। দীর্ঘে বলে, ভগবানকে নিয়ে joke করবেন না। তাঁর রূপা না হলে কিছই নেনে না।

রাধাকান্ত চুপ করে বসল। অবাক হয়ে ভাবলে, হয়ত ভগবানের রূপায় সে ফতেসিংএর দেখা পেয়েছে, কিন্তু যতক্ষণ না সে তিন লাখ টাকা ধার পাচ্ছে, ততক্ষণ সে নিশ্চিত হতে পাচ্ছে না। বোধ হয় ফতেসিং বুঝতে পেরেছে, সে টাকা ধার চাইবে, সেজন্তে কথাবার্তায় এমন ধর্মের স্বর লাগিয়েছে।

রাধাকান্ত আর বৈধা ধারণ করতে পারল না। আবেগের সঙ্গে বলে, দেখুন ফতেসিং, আমায় কিছু টাকা ধার দিতে হবে।

ফতেসিং কোনরূপ বিশ্বাস প্রকাশ করলে না। বিনীতভাবে বলে, এত আশার সৌভাগ্য, আনন্দের কথা। তবে আমার কি সামর্থ্য!

রাধাকান্ত বুঝলে, ফতেসিং ধার দিতে বিশেষ রাজী নয়, কিন্তু কত টাকা দরকার জানবার জন্ত বাগ্র।

রাধাকান্ত বলে, বেশী নয়, চার লাখ টাকা হলেই এখন হবে, এত আপনার কাছে সামান্য টাকা, বলেন ত মিলের কিছু সেয়ার আপনার কাছে রেখে দেব।

টেরা চোখে চেয়ে ফতেসিং বলে, মিলের ষ্টরাইক ত থেমে গেছে বলছেন। তাহলে অত টাকার কি দরকার হচ্ছে?

রাধাকান্ত বুঝলে, ফতেসিং টাকা দিতে রাজী, মিলের সেয়ারের ওপর সকলেরই লোভ। দীর্ঘে বলে, আপনাকে সত্যিকথা বলছি, একটা কল একটু ভেঙ্গে গেছে, চালাতে সাহস হচ্ছে না, ইংলণ্ড থেকে ইঞ্জিনিয়ার আনতে হবে।

গোঁফের ওপর আঙুল বুলিয়ে ফতেসিং বলে, আচ্ছা, সে কথা হবে কাল সকালে। বোধহয় তে তা হচ্ছেন।

রাধাকান্ত বুঝলে, ফতেসিং কাল সকালে কাগজে সব খবর জানতে চায়, কলের সেয়ারের দর কত দেখতে চায়। রাতের মধ্যে কথাটা পাকাপাকি করে নিলে সুবিধে হয়।

ফতেসিং বলে, দেখুন মিতার সাহাব, যে কাজের জন্তে আপনার গাড়ীতে এলুম, আগে সে কার্যসিদ্ধি হোক। টাকার কথা পরে হবে।

সবিস্ময়ে রাধাকান্ত বলে, সে কাজ কি?

ফতেসিং অনামিকায় বৃহৎ পোখরাজের আংটির দিকে চেয়ে বলে,

এসেছিলুম সাধু-দর্শনে। শুনলাম এ গাড়ীতে প্রেমদাস বাবাজী যাচ্ছেন—তিনি কোন্ গাড়ীতে জানেন ?

টেরা চোখে ফতেসিং কোন্ দিকে চাইছে, বিরিক্ষি বুঝতে পারলে না, ভাবলে তার দিকে চেয়ে প্রশ্ন করছে। কথা কইতে সে-ও উৎসুক হয়েছিল। সে বলে উঠল, ঠাকুর ত এই গাড়ীতে ছিলেন, কাছের কোন গাড়ীতে গেছেন, পরের ষ্টেশনে এ গাড়ীতে আসতে পারেন। আপনি তাঁকে চেনেন ?

ফতেসিং হেসে বলে, কিছু চিনি বৈকি ! বড় জোর সাধু। তাঁর আশীষ চাই। যে বছর তাঁর কথায় হাঁসপাতালে ছ'টা বেড দিলুম, নিউইয়র্ক মার্কেটে বড় লাভ করেছিলুম। মিতার সাহাব, এত বড় সাধু আপনার সঙ্গে গাড়ীতে, আর আপনি তাঁর পদসেবা না করে টাকার হিসাব করছিলেন !

বিরিক্ষি ধীরে বলে, তিনি বোধ হয় গুঁর অগ্রে টাকার জোগাড় করতে গেছেন।

ফতেসিং অবাক হয়ে বলে, টাকার জোগাড় ! আরে বাবা, তিনি ধূলি ছুঁয়ে দিলে সোনা হয়ে যায় !

বিরিক্ষি আগ্রহের সঙ্গে বলে, আপনি দেখেছেন ? সত্যি ?

মনে মনে সে ঠিক করলে, কিছুদিন প্রেমদাস ঠাকুরের পদসেবা করবে, সঙ্গ কিছুতেই ছাড়বে না। অন্ততঃ ছোট মেয়ের বিবাহের খরচটা জোগাড় করে নেবে।

ফতেসিং হেসে উঠল। বলে, দেখিনি ! বাবাজী বলেন, এই বিধবার মেয়ের বিবাহের খরচ দিতে হবে। যেদিন চেক লিখে দিলুম, তার পর দিনই “হিমালয়ান মিল” কিনলুম অর্ধেক দামে। বিনালাভে টাকা দিই না, বুঝলেন।

ঠাকুরের কথায় ওই লোকটি একজনের মেয়ের বিবাহের খরচ দিয়েছে !

বিরিঞ্চি আকুলনয়নে ফতেসিংএর দিকে তাকালে । কিন্তু ফতেসিং কোন্ দিকে চেয়ে আছে, সে বুঝতে পারলে না ।

ফতেসিং বলে, আচ্ছা, যুদ্ধ লাগবে শুনছি না কি ?

কেউ উত্তর করলে না ।

রাধাকান্ত খোলা জানলা দিয়ে অন্ধকার বনভূমির দিকে চেয়ে রইলো ।

মধ্যম শ্রেণীর মেয়ে-গাড়ীতে মালতী ফিরে এসেছে । গাড়ীতে সে একা । হিন্দুস্থানী মেয়েটি পথে কোথাও নেমে গেছে ।

এক কোণে চুপ করে সে বসে রইল । গনটা কেমন ভারী হয়ে উঠেছে । অকারণে কল্যাণ তাকে কেন এমন করে ডেকে চা খাওয়ালে ।

সত্যিই কি অকারণে ?

গাড়ীতে পৌছে দিয়ে কল্যাণ বলেছিল, সাহস হয় না বলতে, ডিনারের সময় যদি আসেন ত ডেকে নিয়ে যাব ।

মালতী উত্তর দিয়েছিল, রাতে আর খেতে পারব বলে মনে হয় না । আর কেমন ক্লান্তি লাগছে ।

কল্যাণ হেসে চলে গেল পাইপের ধূম উদগারিত করে । কিন্তু তার মুখে হাসি এল না ।

ট্রেনের ঝঝঝ ঝনির মধ্যে কল্যাণের-বলা টুকরো টুকরো কথা

তার কানে বাজতে লাগল। কতকগুলি কথা হেঁয়ালির মত তখন মনে হয়েছিল, এখন যেন সে অর্থ বুঝতে পারছে। ইমপ্রেসনিষ্ট চিত্রশিল্পীর ছবি যেমন খুব নিকট থেকে দেখলে, কতকগুলি অসংলগ্ন পুরু রঙের মোটা ছোপ বলে মনে হয়, কিন্তু দূরে গিয়ে দেখলে সমস্ত ছবিটি আলোর দীপ্তিভরা বর্ণের সুষমামণ্ডিত একে উদ্ভাসিত হয়ে ওঠে, তেমনি, গাড়ীতে একা বসে ভাবতে ভাবতে কল্যাণের চা-খাওয়ান ভাববাঙ্কক চিত্রের মত ফুটে উঠল। জল্জলে রঙে রেখাগুলি হারিয়ে গেছে।

ভাল লাগছে দেখতে, কিন্তু অর্থ স্পষ্ট নয়। নয়নে রঙের নেশা লাগে কিন্তু হৃদয় ভারাক্রান্ত হয়। এ সুখ নয়, এ হৃদয়জালা।

মালতীর কঁাদতে ইচ্ছে করল।

চারিদিকে চেয়ে দেখলে, গাড়ীতে কেউ নেই। বাহিরে চেয়ে দেখলে, স্তব্ধ বনানী অন্ধকারঘন।

ফুঁপিয়ে ফুঁপিয়ে সে কঁাদতে লাগল। অনেকক্ষণ ধরে সে কঁাদলে। কেন্দে তার মন হান্ধা হল। মনে হল, বানিয়ে কথা বলতে কল্যাণ ওস্তাদ। এতক্ষণ সে তার সঙ্গে ফ্লাটিং করেছে মাত্র। কিন্তু সমরও কি তাকে ভালবাসে না?

সে কেন ভালবাসা পাবার জন্ম তৃপ্তি? সে জীবনের লক্ষ্যভ্রষ্ট হচ্ছে কেন?

মায়ের কথা মনে পড়ল, মালতীর। মাকে চিঠি লেখা হয়ে ওঠেনি। ইতরসি-স্টেশন থেকে একটা টেলিগ্রাম করতে হবে। মা এখন রাঁধতে বসেছেন। আর মনু কি করেছে? তার পরীক্ষার ফল কি হল, কে জানে!

মালতীর আবার কান্না পেল। কিন্তু এবার সে কঁাদল না। আপন মনে হেসে উঠল, হাসি-কান্নায়-ভরা এ জীবন বড় মজার। গুণ্ গুণ্.

করে সে গেয়ে উঠল, কান্না-হাসির দোল দোলান মাথ-ফাগুনের  
পালা—

ছুলাইন গান গেয়ে সে থামল। মনে হল, কে যেন হেসে উঠছে  
তার গানের সুরে, হাততালি দিচ্ছে, আর তার মনটা কাঁদছে।

বোধ হয় সমর আবার তার গাড়াতে প্রবেশ করেছে।

গাড়ীর প্রতি কোণে সে সমরকে খুঁজলে, জানলা দিয়ে মুখ বাড়িয়ে  
দেখলে। কোথাও কেউ নেই। হির হয়ে সে গাড়ীর মাঝের বেঞ্চিতে  
বসলে। তার কেমন ভয় করছে। সমস্ত রাত হয়ত একা থাকতে  
হবে। হয়ত অনুপমাদিদির কুপেতে আশ্রয় নিতে হবে। একা সে  
থাকতে পারবে না। সমর কি আসবে না। সমর!

অজ্ঞাতভাবে সে চোঁচিয়ে উঠল—সমর!

পেছন থেকে আবার কে হেসে উঠল।

পরম বিশ্বাসে মালতী দেখলে, সমর তার পেছনে দাড়িয়ে।

কমরেড্! স্মরণ করতেই সাড়া দিয়েছি, বলে সমর তার সামনে  
বেঞ্চিতে বসল।

মালতী হতবাক্ বসে রইল।

সমর বলে, দেখ মালতীদেবী, চোখের জল বুজ্জোয়া নারীদের নয়নের  
শোভাবর্ধন করে, আঁখির কোণে অক্ষর রেখাকে বুজ্জোয়া কবি আঘাট-  
আকাশের নবমেঘ-সঞ্চারের সঙ্গে তুলনা করতে পারে, কিন্তু কম্যুনিষ্টের  
পক্ষে ক্রন্দন শুধু লজ্জাকর নয়, গর্হিত কস্ম। সে কেঁদে ভিক্ষা করে  
নেয় না, জোর করে কেড়ে নেয়। আপন অধিকারে নেয়।

মালতী লজ্জিতভাবে বলে, কৈ, আমি কাঁদছি না ত। আমায়  
কাঁদতে দেখছ নাকি?

—দেখিনি, তবে অনুমান করছি।

—মোটাই কাঁদছি না।

—মোটকথা বুজ্জিয়া মনোবৃত্তি তুমি ত্যাগ করতে পারনি।  
পারবেও না।

—কেন? আমি সোসিয়লিজ্‌মে বিশ্বাস করি।

—তারচেয়ে বেশী বিশ্বাস করো যে, পুরুষ হচ্ছে মেয়েদের সম্পত্তি,  
বিশ্বাস করো যে মেয়েরা প্রেমের লীলা খেলে রূপের মায়াজাল ছড়িয়ে,  
ভাবের কুজ্জাটিকা সৃষ্টি করে, পুরুষদের মত্ত, অন্ধ, বিপথগামী কোরে এ  
সম্পত্তি লাভ করবার অধিকারিণী।

—কেন! আমি কি করেছি? ওসব রূপের লীলা, ভালবাসার চং  
যার মধ্যে দেখছ, তাকে বলগে। আমাকে বলতে এসেছ কেন?

—এই দেখ আমার কথা প্রমাণ হয়ে গেল। তুমি আমাকে তোমার  
সম্পত্তি বলে ভাবছ—তাই জেলাস্‌ হয়ে উঠছ।

—জেলাস্‌! নিজের সম্বন্ধে তোমার বড় বেশী উঁচু ধারণা  
দেখছি।

—তাহলে ও গাড়ীতে থেকে অমন করে চলে এলে কেন?

—ভাল লাগল না বলে। ফাঁদ পাতা আমার ব্যবসা নয়।

—অথবা ফাঁদ-পাতার প্রতিযোগিতায় পেরে উঠলে না।

—দেখ, তোমার সঙ্গে আমি ঝগড়া করতে চাই না। কিন্তু  
তুমি যে এত দুর্বল তা ভাবিনি।

—নারীর রূপে কে না ভোলে বল!

—ভাল্‌গার হোয়ো না। অন্ত্রপমাদিদির এ হচ্ছে ক্ষণিকের খেয়াল,  
তা বুঝতে পারছ?

—এই খেয়ালের খেলায় আমি যদি কিছু আনন্দলাভ করে নিতে  
পারি, মন্দ কি!

—সমর, ঠাট্টা নয়, তোমার সত্যিকার প্ল্যান কি বলো। সত্যি ইয়োরোপ যাবে? আমিও যাব তোমার সঙ্গে, বলো।

—কেন তোমার পথপ্রদর্শক পদলাভের জন্ত যিনি এত করে দরখাস্ত পেশ করলেন,—তার মত সঙ্গী থাকতে—

—এবার কে জেলাস?

—ফুঃ!

—রদ্দ নয়, একটা ঠিক করো। চাকরী নিতে তোমায় কিছুতেই দেব না।

—তুমি কি আমার গাড়িয়েন হলে?

—দরকার হলে হতে হবে।

—দেখ, Sex আর Property, এই দুই সমস্যার সমাধানের জন্ত মানুষের সকল বেদনা, বাসনা, সংঘাত, সংগ্রাম—আর যেখানে এই দুই শক্তিদ্বারার যুক্ত আবর্ত, সে কি ভীষণ অবস্থা ভাবো।

—তোমার হেঁয়ালি আমি বুঝতে চাই না। তুমি ইয়োরোপ যাবে কি না বলো।

—বোম্বে গিয়ে তোমায় জানাব। ইতিমধ্যে অণু পথসঙ্গীটিকে হাতছাড়া করো না।

—তোমার উপদেশের জন্ত ধন্যবাদ।

—ডিনারের সময় হয়ে এল। রাতে ক্ষিদে পেলো, পথে কোথাও খাবার পাবে না, ক্ষিদে জ্বলছে ঘুমও হবে না। সে জন্ত এখন নিমন্ত্রণ রক্ষা না করাটা বুদ্ধিহীনের কাজ হবে।

রেগে মালতী বলে উঠল, খুব হয়েছে, চুপ করো।

মুচকি হেসে সমর এক দরজা খুলে অদৃশ্য হয়ে গেল।

মালতীর দুই চোখ জ্বলতে লাগল। গুম্ হয়ে সে এক কোণে বসলো।



মনে মনে সে বল্লে, আমার মনে এমন করে ব্যথা দিয়ে তুমি কি আনন্দ পাও।

টেনের ছোট একটা কম্পার্টমেন্ট খালি দেখে দেবপ্রিয় সেখানে আশ্রয় নিয়েছে। কালো চশমা পরে সে এক কোণে বসে। সে একা থাকতে চায়। চিন্তা করা শুধু তার স্বভাব নয়, তার ব্যাধিস্বরূপ।

সে ভাবছিল, গণেশ শিপ্‌রার গাড়ীতে সারাদিন সে কাটালে কি করে! এখন তাদের সঙ্গ শুধু লজ্জাজনক নয়, ঘৃণাকর। বোপ হয়, নব অনুভূতির সন্ধানে সে গেছিল। বাহিরের খটনা, নব নব চরিত্রের সংস্পর্শে তার মনে আঘাত করে, চিন্তার ঢেউ জাগিয়ে তোলে; তখন সে লোকসমাজ হতে মনন-লোকে চলে যেতে চায়।

দেবপ্রিয় ভাবছিল, বৌদ্ধযুগের বিহারের মত, ইয়োরোপের মধ্য-যুগের মন্থারীর মত কোন নির্জন উদ্বেগহীন আশ্রয়-স্থান বর্তমান যুগে নেই, চিন্তকরা যেখানে স্থিরচিত্তে চিন্তা করতে পারে। বর্তমান যুগের মানুষের গভীরভাবে নির্লিপ্তভাবে চিন্তা করবার স্থান বা অবকাশ নেই, সেজন্ত কোন সমস্যার সমাধান হচ্ছে না; লালসাপীড়িত আবেগচঞ্চল চিত্ত হানাহানি কাড়াকাড়ির মধ্যে সত্য-দর্শন কি করে লাভ করবে? তার যদি টাকা থাকতো, সে এরকম একটি আশ্রম প্রতিষ্ঠান করবার চেষ্টা করত।

দেবপ্রিয় আবার হেসে ভাবলে, সত্যিই যদি তার টাকা থাকত, হয়ত সে রাধাকান্তর মত কলকারখানা তৈরি করত, অথবা গণেশের মত নর্তকীর নূপুর-নিকণে টাকা দিত ছড়িয়ে, মদিরাধারায় টাকা

দিত গলিয়ে। স্মৃতির প্রাণ হচ্ছে, মানুষের চরিত্র ও ব্যবহার, তার ইচ্ছা, জীবনের আদর্শ, তার ধর্ম ও নীতি, তার আদিক অবস্থার ওপর কতদূর নির্ভর করে, তার ধনসঞ্চয় দ্বারা কতদূর নিয়ন্ত্রিত? এই বুজোয়া মরালিটি কি বুজোয়া অর্থসংগ্রহের অহমিশি প্রচেষ্টার সঙ্গে যুক্ত নয়, সম্পত্তি-রক্ষণের উপায়রূপে স্থাপিত হয় নি? আজ ধনতান্ত্রিক সভ্যতার ভাঙনের সঙ্গে সঙ্গে তার উচ্চ স্তম্ভগুলি কি ধসে পড়ছে না? মানব আত্মার চিরন্তন প্রকাশ, শাস্ত্রত সত্যভূমি কোথায়?

এ সমস্যা ভাবতে হবে।

কালো চশমাটা মুছে প'রে দেবপ্রিয় ভাবতে বসল।

স্থিরচিত্তে দেবপ্রিয় ভাবতে পারছে না। দেহ ক্লান্ত, মন অবসাদে ভারাক্রান্ত। গাড়ীর শক্ত কাঠে মাথা রেখে সে অর্ধশয়ানভাবে বসল।

দিশাহারা দৈত্যের মত ট্রেন ছুটে চলেছে অন্ধকার বনপথ দিয়ে।

দেবপ্রিয়ের চিন্তার সূত্র বারবার ছিন্ন হয়ে যাচ্ছে। কোন্ নটীর নৃত্যদোহুল পদপল্লবে সে ছিন্নসূত্র বারবার জড়িয়ে যাচ্ছে।

নটীর পূর্ণরূপ সে দেখতে পাচ্ছে না, শুধু চঞ্চল পদের অশান্ত ভঙ্গিমা। ঝঙ্কাঙ্কর সমুদ্র-তরঙ্গ যেমন শূণ্য বিজন বালুকাময় তীরে বার বার আছাড় খেয়ে পড়ে তেমনি বেদনাবিহ্বল-ছন্দে নৃত্যপরা পদমৃগাল ছুঁচ্ছে।

এ কার পা বার বার তার চোখের সামনে ভেসে উঠছে, কাঁপছে, ছুঁচ্ছে, অজানা পথে আহ্বান করছে।

কোন ফরাসী গল্পে পড়েছিল, লেখকের ঘরে বহুযুগের পার হতে কোন সুন্দরী নারী এসেছিল তার ভাড়া পা খুঁজতে। কিন্তু এ পা অতীতকালের কোন নর্তকীর নয়, কালিদাসের উজ্জয়িনীর বা হারুণ-অল-রসিদের বোগদাদের কোন লীলাচঞ্চলা সুন্দরীর নয়।

দেবপ্রিয় চমকে উঠে বসল, এ শিপ্রার পদভঙ্গিমা ! পদ্মের ডাঁটার মত দীর্ঘ সুন্দর। দুপুরে গাড়ীতে সে নর্তকী শিপ্রার অনেকগুলি ছবি দেখেছিল, তাছাড়া কোন চিত্রশিল্পী শিপ্রার নৃত্যভঙ্গীর কতকগুলি রঙীন রেখাচিত্র এঁকেছিল, সেগুলি শিপ্রা দেবপ্রিয়কে দিয়েছিল দেখতে। বর্তমান ধনতান্ত্রিক সভ্যতার ভবিষ্যৎ সম্বন্ধে যখন সে ভাবতে বসেছে, এক নাচওয়ালীর নৃত্তিত চরণ তার চোখের সামনে এল বিঘ ঘটাতে !

দেবপ্রিয় বুকে একটা অজানা বেদনা অনুভব করল।

বার্থ সে ! শৃগু এ জীবন !

মানবসভ্যতার ভবিষ্যৎ যাই হোক, তার নিজের জীবনের ভবিষ্যৎ সম্বন্ধে কোন্ আশা আছে ? তার বর্তমান জীবন বাসনাবিহীন, হতাশাসময়, নিরর্থক মনে হয়।

গরীব সাব-এডিটরের একঘেয়ে জীবনের দিনের পর দিনের সঙ্কীর্ণ গ্লানি, ক্ষোভ, হতাশার ভার আর সে বহন করতে রাজী নয়। সে বিদ্রোহ করবে।

কিন্তু কার বিরুদ্ধে সে বিদ্রোহ করবে ?

সে আর ভাবতে চায় না। আর চিন্তন, সমীক্ষণ নয়। সে জীবনকে উপভোগ করতে চায়। দেহের প্রতি স্নায়ু দিয়ে শিরায় শিরায় রক্তশ্রোতের উল্লাসে, তত্ত্বস্পর্শের উন্মাদনায় সে অনুভব করতে চায় বেঁচে থাকার আনন্দ। ওই গণেশ হালদারের মত।

মনের বিদ্রোহী ভাবে আরও উদ্দীপিত করবার জন্ত দেবপ্রিয় নিজ জীবনের একটি দিনের কথা ভাবতে লাগলো।

সকালে যখন ঘুম থেকে ওঠে, দেহের অবসাদ দূর হয় না, কারণ রাত্রে স্থনিদ্রা সম্ভবপর নয়। স্ত্রীর বুকের ব্যথা প্রায়ই বাড়ে, অথবা

কোন ছেলেমেয়ের অস্থির জ্ঞান মাঝরাতে জেগে বসে থাকতে হয়। ছেলেমেয়েরা পালা করে অস্থির করে চলে। আর রাত্রে একবার ঘুম ভাঙলে সহজে তার ঘুম আসে না, নানা চিন্তা মাথায় ঘোরে, কখনও বা সে কোন প্রাচীন দার্শনিক বা আধুনিক ঐতিহাসিকের গ্রন্থ পড়তে আরম্ভ করে। সকালে দেবী করে ওঠার উপায় নেই; কারণ ঘর রান্নাঘরের ঘোঁয়ায় ভরে যায়, তখন গলির মোড়ে চায়ের দোকানে শীঘ্র আশ্রয় নিতে হয়।

কোন রকমে ভাত খাওয়া সেরে ছুটতে হয় আফিসে, রোজ এক রকমের রান্না, স্বাদহীন, বিশ্বাস লাগে না! টামে লোকের ভিড়, ঘেসাঘেসি বসতে হয়, কোনদিন বসবারও জায়গা পাওয়া যায় না; গোলমালে, গরমে, জনতার তপ্ত নিশ্বাসে চারিদিক বিরক্তিকর বোধ হয়।

আফিসের পুরাণো কালের চেয়ার ও দাগকাটা বড় পুরাণো কাগজ-ভরা টেবিল দেখলে মনে ঘণার ভাব জাগে। মানবসমাজের প্রতি, দেশের প্রতি, কাগজের কর্তৃপক্ষদের প্রতি ঘণা! সে ভাব দমন করে প্রফ দেখতে হয়, রয়টারের ইংরাজির বাংলা তর্জমা করতে হয়, অবসর-সময়ে পরনিন্দা, খোসামোদ ও ইয়োরোপ সম্বন্ধে ভবিষ্যদ্বাণী। সন্ধ্যায় ধুকতে ধুকতে বাড়ী ফিরে শুনতে হয় সংসারের অনটনের কথা; মায়ের মৃখে শুনতে হয় তাঁর বোম্বের ছেলের সচ্ছলতার সঙ্গে তুলনামূলক সমালোচনা; ছোট মেয়ে এসে বলে, বাবা একটু পড়া বলে দাও। চুপ করে শুনে সে চলে যায় পাড়ার আড্ডায়। ইচ্ছা করে রাতে বই পড়ে বা লেখে, টনবীর বর্তমান ইউরোপ সম্বন্ধে বইগুলিতে ধূলা জমে, বাড়ীতে নিরিবিলা পড়বারও একটু জায়গা নেই, পাড়ার ক্লাবেই আশ্রয় নিতে হয়। ময়লা সতরঞ্চির ওপর বসে দাবাখেলায় মেতে সব ভুলে

বাঁদ্রা ! সেখানেও বেশীক্ষণ খেলার জো নেই। বার বার বাঁড়ীর চাকর আসে তাগাদা দিতে ; চাকরটা কিছু বলে না, শুধু দরজার কাছে এসে চূপ করে দাঁড়িয়ে থাকে। ক্লাবের লোকেরা মুচকে হেসে বলে, দূত বড় শীগ্গীর এল দেবপ্রিয় বাবু, উঠে পড়ুন। রোডটো সেট এক রসিকতা ! কোন কোন দিন সে বিরক্তি দমন করতে পারে না, গজ ছুঁড়ে ফেলে দিয়ে উঠে পড়ে। ছোট ভাড়াটে বাঁড়ীতে ঢুকতে যেন দম আটকে যায়। তবু হাসিমুখে নলিনীর সঙ্গে কথা কইতে হয়। নলিনী হয়ত কোনদিন শ্রান্ত হয়ে ঘুমিয়ে পড়ে, ঘুমঘোরে বলে, 'আমি কিছু খাব না, তুমি খেয়ে নাও। নলিনীকে জাগাতে হয়, বলতে হয়, 'উঠ নলিনী, খোল গো আঁখি'। আধ ঘুমভরা নলিনীকে বড় রহস্যময় সুন্দর দেখায়। সে সৌন্দর্য্য ক্ষণিক ! একটু পরেই কথা কাটাকাটি আরম্ভ হয়, নলিনীর মুখ রুম্ম, কণ্ঠস্বর কৰ্কশ হয়ে ওঠে। রাতের খাবারেরও কোন স্বাদ থাকে না।

এমনি দিনের পর দিন কাটে, ক্লান্তিকর, প্রানিময়, ব্যর্থতা-ভরা।

আবেগের সঙ্গে দেবপ্রিয় দাঁড়িয়ে উঠল।

ছোট কম্পার্টমেন্ট, বেকিগুলি শূন্য, ধূলিময়।

ক্রতগামী ট্রেনের দোলায় দেবপ্রিয় চঞ্চল হয়ে ঘুরে বেড়াতে লাগল। তারপর মাঝের বেকির উপরের অংশ হাত দিয়ে জোর করে ধরে সে অভিনয়ের ভঙ্গীতে দাঁড়াল।

আপন মনে সে বেদনার আবেগে উচ্চৈঃস্বরে বলে উঠল, বিদ্রোহ ! এ সমাজ, এ রাষ্ট্র ভেঙে নতুন করে গড়তে হবে। দেখ জগদীশকে, বি-এ পরীক্ষায় আমি হয়েছিলুম ফাষ্ট, আর জগদীশ ফাষ্ট ক্লাশও পেলেন না ; পিতৃসম্বিত অর্থে জগদীশ বিলেত যেতে পেরেছিল বলে আজ তার এতবড় চাকুরী, এমন সুন্দরী স্ত্রী। এই ধনতান্ত্রিক সভ্যতা—হঁ !

দেবপ্রিয় বেষ্টিতে বসল। সববে সে ভাবতে লাগল, সে যে আপন মনে কথা কইছে, সে জ্ঞান তার নেই।

শূন্য বেষ্টির দিকে চেয়ে দেবপ্রিয় বলে, দেখ, আমি কিন্তু কন্মানিভম্ বিশ্বাস করি না—রাশিয়ার অবস্থা দেখ—স্বাধীন চিন্তাপারা লুপ্ত—হঁ! কিন্তু বিপ্লব চাই, আমি মানবসভ্যতার ইতিহাসের ছাত্র—অত্যদিক তাপের পর ‘পিঙ্গল, বিচ্ছল, ব্যথিত নভতলে’ যেমন ঝড়ের মেঘ গুঠে, তেমনি আসে যুদ্ধ, বিপ্লব—আমার মত কত ব্যথিতজনের হৃদয়ের তাপ সঞ্চিত হচ্ছে—হঁ! বুঝতে পারছি, গণেশবাবুর জীবনে কোন গভীর বেদনার ক্ষত আছে, জালা আছে; গণেশবাবু বলেছিল, ‘বাসনার বার্ণতা’, ঠিক বোঝাতে পারেনি, অর্থাৎ বাসনা রয়েছে, দেহের, মনের, তা পূর্ণ হচ্ছে না, কেন হচ্ছে না—তা পূর্ণ করা যায় না, সম্ভবপর নয়, পূর্ণ হলে সৃষ্টিদারা শেষ হয়ে যায়। বাসনার অন্ধগুহা হতে এই রূপের নির্বাণিণী অবিরাম বারে পড়ছে, সে গুহা দ্বার বন্ধ করে দাও, শুকিয়ে যাবে এই বস্তুর বালুচরে অনন্ত প্রাণরসের তরঙ্গিণী, অসীম শূন্য অন্ধকারে মিলিয়ে যাবে এই বিচিত্র জগৎ-চিত্রের চঞ্চল দারা! হঁ!

দেবপ্রিয় আবার দাঁড়িয়ে উঠল। বেষ্টিতে হাত দিয়ে বলে যেতে লাগল, দেখ গণেশবাবু, তুমিও বিদ্রোহী, তোমার দলেই যোগ দেব ভাবছি, রূপের বার্ণাতলায় বসে পান করব স্তম্ভ, ওই বিদ্রোহী মানবের তৈরী-করা জালাময় স্তম্ভ। কিন্তু তোমার বিদ্রোহ বড় নতুন ধরনের। ঐতিহাসিক সমাজের সম্মুখে তুমি টাকা দিচ্ছ উড়িয়ে, বলছ, দেখ অর্থ কত তুচ্ছ জিনিষ, কত সহজে খরচ করা যায়, অর্থের মোহশক্তি হতে আমি মুক্ত। এই বুদ্ধোন্মত্ত সমাজনীতিকে ব্যঙ্গ করে তুমি বলছ, দেখ, নারী হচ্ছে পণ্যদ্রব্য ভোগের বস্তু; যে নারীকে তোমরা সম্ভ্রমের

জননী, গৃহের মঙ্গলদীপ বলো, সে নারী দাবান্নি, সে নারী আলেয়া  
—বা—চোখের সামনে আবার ঢুলছে পদমুগাল।

দেবপ্রিয় বেকিতে স্থির হয়ে বসতে চেষ্টা করলে।

ভূগর্ভের কোণ গভীর উচ্চ শ্রোত ভূপৃষ্ঠ ভেদ করে করে মূক্তধারার  
মত উচ্ছ্বসিত হয়ে উঠলে, যেমন ভূকম্পন হয় তেমনি কি বিচিত্র  
আলোড়ন তার দেহে মনে। এ অজানা শক্তি, রহস্য!

দেবপ্রিয় আবার ভাবতে বসল।

নারীর এ মোহিনী শক্তিকে, দেহলালসার পরিতৃপ্তিকে, সে শুধু  
অবহেলা নয়, অবজ্ঞা করেছে। এ তাহারি প্রতিশোধ! জ্ঞানের  
সত্যকে জানা তার চিন্তার সাধনা, আত্মার গভীর শান্তিকে উপলব্ধি  
করবার পথ সে জীবনে খুঁজেছে—stillness of the spirit—  
শান্তি ত সে পেল না, মননের পথে নানা মতবাদ, তর্কের ধূলি, নব নব  
সন্ধানের উৎস্রব বেদনা। এবার সে যাবে রূপান্তরভূতির পথে, দেহের  
পেয়ালা দিয়ে রূপের স্রাব পান করে মোহমুক্ত আনন্দে চিন্তনের ব্যর্থ  
বেদনা ভুলে থাকা।

আবেগের সঙ্গে দেবপ্রিয় আবার উঠে দাঁড়াল, বলে উঠল—কি  
সুন্দর তোমার তনু, নারী! পরিপূর্ণা সুন্দরী নারীকে দেখতে ইচ্ছে  
করে—জানতে ইচ্ছে করে তার রূপের রহস্য, জানতে ইচ্ছে করে সে রূপ  
যখন যুবতী-তনুতে প্রস্ফুটিত পদ্মের মত বিকশিত হয় তখন তার মনে  
কি অন্তর্ভূতি কি বেদনা কি আনন্দ জাগে—হ্লাদিনী শক্তি নারীদেহে  
কি অপরূপ মূর্তিতে প্রকাশিত হয়,—কেশের বর্ণে, ত্বকের লাবণ্যে, নয়নের  
তারকার জ্যোতিতে, গ্রীবার রেখায়, বক্ষের স্রবমায়, কটির ভঙ্গীতে,  
চরণ-মুণালের নৃত্যপরা ছন্দে!

—বা চমৎকার!

দেবপ্রিয় বিস্মিতভাবে চারিদিকে চাইলে।

সমর আবার বলে উঠল, বা! চমৎকার! আপনাকে আমি সি-আই-ডি অফিসার ভেবেছিলুম, এখন দেখছি আপনি সিনেমার এ্যাক্টর!

দেবপ্রিয়ের কানে কোন কথা গেল না, সে শুধু দেখলে তার সামনের বেঞ্চে একটি তরুণ যুবক বসে! একটু এগিয়ে সে চাইলে, চশমাটা খুলে ভাল করে চাইলে। সত্যিই একটি যুবক বসে।

চশমাটা ঝুন্ডালে মুছতে মুছতে দেবপ্রিয় বললে, কে তুমি? নাচওয়ালীর পায়ের মত তুমি ত অলীক ছায়া নও?

সমর হেসে দাড়িয়ে উঠে বলে, না, দেখতে পাচ্ছেন, আমি অলীক নই; এবং নাচওয়ালীর পা তার কাছে অলীক নয়, বিশেষতঃ সেট পায়ের নেচে এখন তাকে জীবিকার্জন করতে হয়।

দেবপ্রিয় হির হয়ে বোঁকিতে বসে বলে, হুঁ! আপনি কখন এলেন, কোন্‌ স্টেশনে গাড়ী থেমেছিল?

—গাড়ী কোন স্টেশনে থামেনি। আমি চলন্ত ট্রেনের দরজা খুলেই এসেছি। আপনাকে গোড়ায় আমি সি-আই-ডির লোক ভেবেছিলুম, এখন দেখছি আপনি পাকা সিনেমা এ্যাক্টর।

—আমি সি-আই-ডি! আমি সিনেমা এ্যাক্টর! বাঃ!

—আপনি সিনেমার অভিনেতা নন? সারাদিন ত ছিলেন একট্রেনের গাড়ীতে, সুন্দর বক্তৃতাও দিচ্ছিলেন।

—বক্তৃতা! আমি বক্তৃতা দিচ্ছিলুম!

—যদি ভুল বুঝে থাকি ক্ষমা করবেন, আমার মনে হচ্ছিল, আপনি খালি গাড়ী পেয়ে পাট রিহাসেল করছিলেন।

করণভাবে দেবপ্রিয় হাসলে। ধীরে ধীরে বলে, ঠিক বলেছ তুমি, আমি রিহাসেল দিচ্ছিলুম বটে।



দেবপ্রিয় চুপ করে বসল।

সমর প্রশ্ন করলে, আপনি কি শিপ্রার গাড়ীতে ছিলেন না ?

—ছিলুম, তাতে কি প্রমাণ হয় ?

—প্রমাণ কিছুই হয়ত করা যায় না। শিপ্রার নাচ আমার ভাল লাগে। তার প্রমাণও যদি চান, আমি দিতে পারব না !

—না, প্রমাণ আর চাই না।

দেবপ্রিয় স্থিরদৃষ্টিতে সমরের দিকে চাইলে। ভাবলে, যদি এই যুবকের মত তার তাকুণ্য, শ্রী, উদ্বেলতা থাকত, হয়ত বা শিপ্রার মন জয় করতে পারত।

দেবপ্রিয় বলে, দেখুন, আমি অভিনেতা নই, রিহাসেস্‌লও দিচ্ছিলুম না, I was thinking aloud.

সমর গভীরভাবে বলে, আপনি তাহলে নিশ্চয়ই কবি।

দেবপ্রিয় হেসে বলে, হুল হল, আমি সাব-এডিটরী করি ; সাব-এডিটার কবি শুনেছেন ?

সমর বলে, এ বিষয়ে আমার কোন অভিজ্ঞতা নেই। আচ্ছা শিপ্রা দেবীর সঙ্গে আপনার খুব আলাপ নিশ্চয়।

—কেন বলুন ত ?

—তার সুপারিসে যদি কোন সিনেমা-কোম্পানীতে কাজ পাওয়া যায়—

—কি পাস ?

—এম্-এ পাস করেছি ; এখন বাংলার বহুশত বেকার যুবকের একজন—সেজগু চাকরীর বাচ-বিচার করি না।

—কি পাট তুমি করতে পার ?

—ধরুন কম্যুনিষ্ট, কলকারখানায় গিয়ে ষ্ট্রাইক করাচ্ছে, গ্রামে গিয়ে চাষাদের ক্ষেপাচ্ছে, এ পাট মন্দ পারব না।

—তা ত পারবে, তোমরাই বিপ্লবের অগ্রদূত।

—কোন বিপ্লবের ?

—দেখছ না ভাঙন ধরেছে, উনবিংশ শতাব্দীর গড়া জীর্ণ প্রাসাদ আর থাকছে না। কিন্তু আমি কম্যুনিজমে বিশ্বাস করি না।

—কিন্তু বিপ্লবে বিশ্বাস করেন ?

—এখানে বিশ্বাস অবিশ্বাসের প্রশ্ন ওঠে না, এটা প্রাকৃতিক ঘটনার মত, ঝড়ের মত, বজ্রার মত, শীতের পর বসন্তের জাগরণের মত ঘটবে। বিপ্লব নানা রূপে আসবে—যুদ্ধ, যুদ্ধ—নব সৃষ্টি ! রুশিয়ার কম্যুনিজম্ কি গতযুদ্ধের ফল নয় ?

সমর হেসে বলে, তার চেয়ে ফ্লাদিনী শক্তির রূপ বর্ণনা করুন, শুনি।

দেবপ্রিয় সময়ের দিকে তীক্ষ্ণ দৃষ্টিতে চেয়ে স্তব্ধ হয়ে বসল।

প্রেমদাস বলেন, কি আশ্চর্য্য, দেখ অনুপমা, তোমার কণ্ঠস্বরে তোমাকে চিনলুম ; তোমায় যখন দেখেছিলুম, তুমি চঞ্চলা কিশোরী, গিরিঝর্ণা আজ ছু'কূল-ভরা নদী হয়েছে, কিন্তু সে কলধ্বনি একই সুরে বাজছে।

দীপ্তনয়নে অনুপমা সন্মাসীর দিকে চাইলে। মালার রুদ্রাক্ষগুলি তাকে মুগ্ধ করল। ওই গেরুয়া-বসন-পরা লোকটির মধ্যে কি রহস্যময় শক্তি রয়েছে, সে শক্তির পরিচয় সে পেতে চায়।

প্রেমদাস বলেন, গাড়ীতে আর একটি মেয়ের সঙ্গে দেখা হল, তাকেও বহুদিন আগে ছেলেবেলায় দেখেছিলুম।

পিঠের কুসানে ঠেস দিয়ে এলিয়ে বসে অনুপমা বলে, কে ?

—পাশের গাড়ীতে যে অভিনেত্রীটি যাচ্ছে, শিপ্রা !

—শিপ্রা ? আপনার শিষ্যা নাকি ?

—না, আমার শিষ্যা নয়, তার বাবা-মাকে আমি জানতুম।

—শিপ্রার অভিনয় আমি দেখেছি, তার নাচ আমার ভাল লাগে, কিন্তু অভিনয় মনকে স্পর্শ করে না, মনে হয় বড় বানিয়ে করছে, জীবনে সত্যিকার দুঃখ সে জানে নি।

—অভিনয়টা কি বানানো জিনিষ নয় ?

—দেখুন, জীবনে আমরা বানিয়ে চলবার চেষ্টা সারাক্ষণ করছি, অলীক স্বপ্ন ভেবে, মিথ্যার রং দিয়ে। জীবনের গভীর সত্যের, ব্যথার অনুভূতি ষ্টেজের অভিনয়েতেই ঠিক করে প্রকাশ করা যায়। সে জগৎ জীবনে মিথ্যার এ্যাক্টিং করা বড় সহজ কিন্তু ষ্টেজে সত্যের এ্যাক্টিং করা বড় শক্ত।

—আমি ছোটবেলায় যাত্রা দেখেছি, থিয়েটার কখনও দেখিনি।

—আপনি কি শিপ্রাকে ছোটবেলায় জানতেন, তখন সে কেমন ছিল ?

—ছোটবেলায় তাকে ভাল করে দেখিনি, তখন আমি ছিলাম তাত্ত্বিক।

—তাত্ত্বিক !

অনুপমা নোজা হয়ে বসল, প্রশ্ন করলে, এখনও কি আপনি তাত্ত্বিক ?

কৃষ্ণ জ্বলতামণ্ডিত আয়ত নয়নের কৃষ্ণতারকা জ্যোতির্ময় হয়ে উঠেছে, অপরের সূচিকণ শুভ্রচর্মে অকণাভা, হাঙ্গেরীয় ব্লাউজের নীচে বক্ষপঙ্কর স্পন্দিত।

বিমুগ্ধ নেত্রে প্রেমদাস অন্ত্রপমার দিকে চাইলেন, তুষারশুভ্র উত্তুঙ্গ হিমাচলশিখরে উষাকর্ণের ছাতির মত রক্তিম।

অন্তরের আবেগ দমন করে প্রেমদাস ধীরে বল্লেন, ভয় নেই, আমি এখন তান্ত্রিক নই।

অন্ত্রপমা হেসে উঠল। যে হাসিতে জগদীশ মগ্নমুগ্ধ হয়েছে, সমরের তরুণচিত্ত পূজার প্রদীপের মত জ্বলে উঠেছে, সে হাসির অপরূপতায়, নয়নতারকার অলৌকিক দীপ্তিতে প্রেমদাসও বিচলিত হলেন।

হাসির স্তরে অন্ত্রপমা বল্লেন, তান্ত্রিককে ভয় করি কে আপনাকে বল্লেন? আমি তান্ত্রিক সন্ন্যাসীকে সত্যিকার জানতে চাই। কপালকুণ্ডলার কাপালিককে দেখবার জগ্গে ছেলেবেলায় মাঠে, নদীর ধারে একা ঘুরেছি। তন্ত্রশাস্ত্র সম্বন্ধে বাবার কত বই ছিল দেখেছেন ত, সেগুলো লুকিয়ে পড়তুম, বিশেষ কিছুই বুঝতে পারতুম না—তবু পড়তুম—মনে হত সে এক অপূর্ণ শক্তির জগৎ—দেখতে ইচ্ছে হত অমাবস্তার অন্ধকারে শ্মশানে তান্ত্রিক কি ভাবে সাধনা করে—

অন্ত্রপমা হঠাৎ চুপ করলে, যেন আর সে কথা কইতে পারছে না, স্থির হয়ে সে বসল—গভীর স্থির দৃষ্টিতে প্রেমদাস তার দিকে চেয়ে আছেন, সে দৃষ্টিতে কি দীপ্তি, কি জ্বালা! কাঁচা পাকা দাড়ি আগুনের শিখার মত, তাঁর শরীর হতে শুধু তেজ নয় একটা তাপ বিকীর্ণ হচ্ছে, ভয় করে, আবার এগিয়ে যেতেও ইচ্ছে করে—মধ্য রাতের শুষ্ক অন্ধকারে হঠাৎ কোথাও আগুন লাগলে যেমন ভয় করে আবার দাবান্নের মূর্তি দেখতে ছুটে যেতে ইচ্ছে করে।

ভয় দূর করবার জগ্গে অন্ত্রপমা হেসে উঠল।

আপনাকে সংযত করে প্রেমদাস স্তব্ধ হয়ে বসলেন, তাঁর মুখ রুদ্ধ, চক্ষুতারকা অগ্নিগোলকের মত। অন্ত্রপমার মুখ হতে দৃষ্টি সরিয়ে

তিনি খোলা জানলা দিয়ে বাহিরের দিকে চাইলেন, উর্দ্ধে আকাশের দিকে নয়, নিম্নে অরণ্যের সঘন অন্ধকারের দিকে।

এবার অনুপমার ভয় হল। একটু সরে এককোণে সে বসলে। এলার্ম চেন কোথা থেকে টানা যায়, কম্পিত দৃষ্টিতে খুঁজতে লাগল। গাড়ী বড় ছুঁলছে, আবার বুঝি তার কাশির বেগ আসে! কখন পরের স্টেশনে এসে থামবে? অজানিত ভাবে সে টাইমটেবল হাতে টেনে নিলে কিন্তু খুলে না, চূপ করে বসে রইল। সন্ন্যাসীর দীর্ঘ বিপুল পৃষ্ঠ দেখাচ্ছে যেন হলুদবর্ণের কোন অজানা জন্তু গুঁড়ি মেয়ে বসে।

করুণ কণ্ঠে অনুপমা বলে, আপনি কথা বলুন।

লৌহচক্রের বিরামহীন কর্কশধ্বনি আর সে শুনতে পারছে না, তার কান বুঝি ফেটে যাবে, সহচর মানুষের স্নিগ্ধস্বর সে শুনতে চায়, তা না হলে ভয় দূর হচ্ছে না।

অনুপমার দিকে না চেয়ে সন্ন্যাসী বলেন, ভয় নেই, কোন ভয় নেই, স্থির হও, শান্ত হও।

কি স্নিগ্ধ স্বর সন্ন্যাসীর! তাঁকে সে ভয় করছিল! গ্রীষ্মের গুমোট রাতে হঠাৎ-জাগা বাতাসের মত এ কর্ণস্বর চারিদিকের তাপ দূর করে দিল।

ব্যথিত কণ্ঠে অনুপমা বলে, আপনি এদিকে তাকান, আমার দিকে চেয়ে দেখুন একবার, আকাশের দিকে অমন চেয়ে আছেন কেন? আপনার মুখ দেখি, তা না হলে আমার ভয় দূর হবে না।

প্রেমদাস ধীরে মুখ ফেরালেন। দুই নয়নে অবিরল ধারায় অশ্রু বরছে। কি ব্যথিত শীর্ণ মুখ! অশ্রুপূর্ণ নয়ন কুজাটিকাচ্ছন্ন প্রভাতের মত।

অনুপমার ইচ্ছা হল সন্ন্যাসীর হাত জড়িয়ে ধরে।

অস্ট্রিয়ারে সে বলে, আপনি কঁাদছেন ?

হেসে প্রেমদাস বলেন, কঁাদা সন্ন্যাসীর পক্ষে কি লজ্জার কথা !  
সন্ন্যাসীও মানুষ, একথা ভুলে যাও কেন ? শান্ত হও তুমি ।

অনুপমা ধীরে বলে, আমি আপনার শিগা হব ।

প্রেমদাস প্রশ্ন করলে, কেন ?

অনুপমা সন্ন্যাসীর মুখে চোখ রেখে বলে, আমি শান্তি চাই,  
আমার যা রোগ, বেশীদিন বাঁচবার কথা নয়—আচ্ছা, কঁাদলে মন  
অনেক হাল্কা হয়, আমি কিন্তু কঁাদতে পারি না—কান্না পায় না ।

সন্ন্যাসী স্নিগ্ধস্বরে বলেন, রাগ হয় ? ক্ষোভ ?

অনুপমা বিস্মিত হয়ে বলে, ঠিক বলেছেন । ভয়ঙ্কর রাগ হয়  
সবার ওপর—আর নিজেকে ভোলাতে নানারকম কল্পনার জাল বুনি—  
উপন্যাস, কবিতা পড়ি—সাহিত্যের জগৎ বড় সুন্দর জানেন, বেশ  
ভুলে থাকা যায় ।

প্রেমদাস মুহূ হেসে বলেন, এখন সাহিত্যের জগতে গিয়েও শান্তি  
আনন্দ পাচ্ছ না, তাই ধর্মের জগতে শান্তির সন্ধান করতে চাও ।

অনুপমা চিন্তিতভাবে বলে, হয়ত আপনি ঠিক বলছেন, অত  
আত্মবিশ্লেষণ করিনি, ধর্মজগৎ একটা কল্পলোক মনে হয়—এও ত  
মানুষের কল্পনার খেলা ।

প্রেমদাস বলেন, তুমি সংসার সমাজ থেকে পালিয়ে ধর্মের সন্ধান  
করতে চাচ্ছ, জীবনের ঘাত-প্রতিঘাত স্তম্ভ-ভুংগের ন্যায় থেকেই ধর্মের  
সাধনা করতে হবে—একটা স্টেশন বোদ হয় কাছে এল, আমি  
এখানেই নামব ।

অনুপমা উৎসুকভাবে বলে, আপনি ত বোধে যাচ্ছেন, কাল  
দেখা হবে ?

সন্ন্যাসী একটু বিস্মিতভাবে বল্লেন, বোপ হয় মাকের কোন ষ্টেশনেই নেমে যাব।

অন্তনয়ের কণ্ঠে অন্তপমা বল্লে, না, না, চলুন বোধেষ্টে। আর দেখা পাব না? আর একবার আসবেন—মাকের কোন ষ্টেশনে আসবেন!

সন্ন্যাসী বিচলিত হয়ে অন্তপমার দিক হতে মুখ ঘুরিয়ে নিলেন, অন্তপমার চোখ আবার জলজল করে উঠেছে।

আবেগ দমন করে প্রেমদাস তারা-ভরা রাত্রির দিকে চাইলেন। আপন মনে জপ করতে লাগলেন, শাস্ত হও, তুমি শাস্ত হও।

ছোট এক ষ্টেশনে হঠাৎ ট্রেন থামল।

প্রেমদাস চমকে উঠে দাঁড়ালেন। অন্তপমার দিকে একবার ফিরে চাইলেন।

কি কাতর দৃষ্টিতে অন্তপমা চেয়ে আছে তাঁর দিকে। ওই প্রদীপ নয়নে এ কাতরতা দেখলে বিস্মিত হতে হয়।

প্রেমদাস ধীরে বল্লেন, আগি এখন যাই।

কাতরকণ্ঠে অন্তপমা বল্লে, না, না, যাবেন না, বসুন। একা থাকতে বড় ভয় করবে আমার। বাহিরে অন্ধকার বড় গভীর মনে হচ্ছে।

প্রেমদাস বল্লেন, এখন আমায় যেতে হবে অন্তপমা। কোন ভয় নেই তোমার, শাস্ত হও তুমি, শাস্ত হও।

অন্তপমা সোজা হয়ে উঠে বসে বল্লে, সে শাস্তির পথ আমায় বলে দিন আপনি। আপনি পালাচ্ছেন কেন অমন করে?

চমকিত হয়ে প্রেমদাস অশ্রুটস্বরে বলেন, পালাচ্ছি ! বোধ হয় পালাচ্ছি, কি জানি তুমি আমায় বড় বিচলিত করে তুলেছ, আমার মনের শান্তিভঙ্গ করেছে।

একটু রুদ্ধস্বরে অন্তপমা বলে উঠল, যত দোষ আমাদের, নয় ? আচ্ছা যান আপনি, আপনাকে পরে রাখতে চাই না।

প্রেমদাস বলেন, এখন দাউ, পারি যদি আর একবার আসব। ভুলে তোমার গাড়ীতে উঠে পড়েছিলুম, এ ক্ষণিকের আসা ভুলে যেও।

অন্তপমা একটু ব্যঙ্গের স্বরে বলে, আমি সন্ন্যাসী নই, অত সহজে ভুলি না। ভেতরে আপনি এখনও এত দুর্বল কেন ? যান আপনি, তপোভঙ্গ করতে চাই না। কোন্ সাহসে পাশের গাড়ীতে বাচ্ছিলেন !

অন্তপমা হেসে উঠল।

প্রেমদাস বৃকে একটা ব্যথা অনুভব করলেন। কুপের দরজা খুলে ষ্টেশনের প্ল্যাটফর্মে লাফিয়ে পড়ে যেন টলতে লাগলেন।

জানলা দিয়ে মুখ বাড়িয়ে অন্তপমা বলে, আপনার গাড়ী পেছন দিকে, গাড়ী কিন্তু বেশীক্ষণ দাঁড়াবে না, বরঞ্চ পাশের গাড়ীতে উঠে পড়ুন।

অন্তপমার কোন কথা বোঝ হয় প্রেমদাসের কানে গেল না। তিনি সামনে এগিয়ে চলেন। রাবাকাস্তের টাকার জন্ত যে গণেশের সঙ্গে দেখা করতে নিজের গাড়ী থেকে নেমেছিলেন, সে কথা সম্পূর্ণ ভুলে গেলেন। এগিয়ে চলেন ইঞ্জিনের দিকে। মনে হল ট্রেনটা ভুলে উঠছে। চলন্ত ট্রেনে প্রেমদাস লাফিয়ে উঠলেন। তাঁর গাড়ীতে কেউ নেই দেখে নিশ্চিত হলেন। তিনি এখন একা থাকতে চান। থামে বসতে চান।



প্রেমদাস স্থির হয়ে বসতে পারলেন না। খোলা দরজার কাছে দাঁড়িয়ে রইলেন একটা বেঞ্চি ধরে। নিম্নে বনানীর কৃষ্ণধারা বয়ে চলেছে রহস্যময় কালশ্রোতের মত। ট্রেন ছুটে চলেছে।

অনুপমার ব্যঙ্গভরা কথা কানে বেজে উঠল, পালাচ্ছেন কেন এমন করে ?

প্রেমদাস ভাবতে লাগলেন, সত্যিই ত পালিয়ে এলুম। সেই যুবক তান্ত্রিক এ প্রোঢ় বৈষ্ণবের মধ্যে মাঝে মাঝে জেগে ওঠে ; বলে, এ প্রেমের ধর্ম, সেবার ধর্ম আর নয়, শক্তির ধর্মকে জাগাও, জাগ্রত কর উদ্দীপ্ত কর হ্লাদিদ্বী শক্তিকে !

শ্রাবণের অন্ধকার রাতে সর্পিণ বিদ্যাম্মালার চকিত দীপ্তিতে উচ্চল কালিন্দী তীরে কম্পিত অন্তরে রাপিকার অভিসার নয় ; অমাবস্যার তামসী রাত্রে ভৈরবোচক্রে ভৈরবীকে আহ্বান কর, পরমাসুন্দরী নারীর অপরূপ লাবণ্য এ অন্ধকারে লুপ্ত হয়ে যাক, মহাশক্তির উদ্বোধন কর, নমুণ্ডমালিনী কালিকার নৃত্য শুরু হোক।

প্রেমদাস বেঞ্চির এক কোণে বসে পড়লেন। স্থির হয়ে বসতে পারলেন না, ছলতে লাগলেন, উচ্চৈঃস্বরে বলে উঠলেন, যা দেবী সর্ব-ভূতেশ্বরূপবতীরূপেন সংস্থিতা—অনুপমারূপেন—মোহিনীশক্তিরূপেন—অপরূপ সৌন্দর্য্যরূপেন—

প্রেমদাস দাঁড়িয়ে উঠলেন। মুষ্টিবদ্ধ বাম হস্ত কম্পিত। কম্পিতকণ্ঠে বলে উঠলেন, জয় করতে হবে, এ নোহ জয় করতে হয় ; নারীর সৌন্দর্য্য কেন আমাকে এমন বিচলিত করে !

ক্লান্ত অবসন্নতায় প্রেমদাস আবার বসে পড়লেন। প্রথম যৌবনের প্রেমস্বপ্নভরা নারীসৌন্দর্য্যমণ্ডিত বেদনা-উদাস দিনগুলি মনে পড়ল। তখন তিনি যেমন সৌখীন তেমনি স্বরসিক খেলালী ছিলেন। কখনও

বসতেন ছবি আঁকতে, কখনও আরম্ভ করতেন বেহালা বাজাতে। ভাবতেন, চণ্ডীদাসের মত প্রেমের কবিতা লিখব, রেনোয়ার মত নারীসৌন্দর্য আঁকব, নীচুসের মত নব-মানবের কথা বলব। বন্ধু শিল্পীর ষ্টুডিওতে রাতের পর রাত মদের পেয়ালার সামনে আঁট, নারী, সভ্যতা, সমাজ, কত কথাই না আলোচনা হয়েছে।

সেই চির তরুণ শিল্পী বৃহস্ক হয়ে জেগে ওঠে, জীবন-রসের শূণ্যপাত্র কল্পিত হস্তে ধরে দাঁড়ায়।

আজ সন্ধ্যায় অনুপমাকে দেখে মনে পড়ল, ষ্টুডিওর কত সুন্দরী মডেলের মূর্তিসৌন্দর্য, কত যুবতী বাইজীর কণ্ঠসঙ্গীতমাধুরী, কত তরুণী প্রেমিকার চকিত ব্যাকুল চাউনি।

তারপর, ভৈরবীচক্রে কত যোগিনী!

কিন্তু তত্ত্ব সাপনায় তিনি কোন সুন্দরী নারীর সহায়তা পাননি। সেজন্তু বার বার তাঁর মন বিক্ষিপ্ত বিরুদ্ধ-ভাবাপন্ন হয়েছে। অনুপমার মত কোন অপকৃপা সুন্দরী নারীর সাহচর্য পেলে হয়ত তিনি তত্ত্বসাপনায় সফলকাম হতেন।

প্রেমদাস চমকে দাঁড়িয়ে উঠলেন।

অনুপমার নয়নে কোন্ নবলোকের অপূর্ণ আলোক উদ্ভাসিত হয়ে উঠেছিল। সে-ত নীপবনে মিলনোৎকর্ষিতা রাবিকার আশা-সঙ্কুল দৃষ্টি নয়; সে যে কালীর উগ্ধত খড়্গের বাল্মলানি, কুলকুণ্ডলিনীর দিব্যদ্যুতি।

অনুপমা তাঁর শিখা হতে চায়, ভাবছে ধর্মের পথে সে শান্তি পাবে। শান্তি কোথায়? লোকে দেখে বাহিরের শান্তি, অন্তরে অহর্নিশি নব নব কামনার সংঘাত চলেছে, ক্রুদ্ধ সর্পের মত বাসনা উগ্ধত হয়ে ওঠে।

যুক্তকরে প্রেমদাস দাঁড়িয়ে উঠলেন, হে কৃষ্ণ ! যেমন তুমি বিষধর কালিয় দমন করেছিলে তেমনি দমন কর এ ক্ষুরকামনাকে তোমার কঠোর পদাঘাতে ।

সমর বলে, সন্ন্যাসীটা এসেছিল বুঝি !

অন্তপনা ম্লান হেসে বলে, হাঁ এসেছিলেন ।

—দেখলুম গাড়ী গাড়ী ঘুরে বেড়াচ্ছে, কি নব্ব ঝোড়ে গেল, তোমার বড় অস্থস্থ দেখাচ্ছে, দিদি ।

—উনি সাধারণ সন্ন্যাসী নন, শক্তিমান পুরুষ ।

—হাঁ, জানি, মেয়ে শিগা জোগাড় করতে ওস্তাদ ।

—ওঁর কথা থাক । তুমি এসে আমার বাঁচালে ভাই ।

—তুমিও যে সন্ন্যাসি-ভক্তাদের দলে ভিড়বে, ভাবিনি ।

—আমার কেমন বড় ভয় করছিল ; শুধু ভয়ই নেই, মনের মধ্যে যেন কোন জোর নেই—মনে হচ্ছিল, যদি একটা কলিসন্ হয়, আমি মরে যাই, বেশ হয় ।

—তুমি স্থখী নও, তোমার বিবাহিত জীবন সত্যের উপর প্রতিষ্ঠিত নয়, এ বুদ্ধোন্মাদ সমাজ ভেঙে কম্যুনিষ্ট-ষ্টেট না হলে নান্নুষের সত্যিকার স্থখ হবে না ।

—সেটা কবে হবে ভাই ? মরার আগে দেখে যেতে পারব ?

—ইয়োরোপে আর একটা যুদ্ধ বাধলেই হবে, গত মহাযুদ্ধে দেখলে না, কত রাজ্য লুপ্ত হল, কত রাজ্যর মুকুট ধূলায় লুটিয়ে পড়ল । আগামী যুদ্ধে পৃথিবী-জোড়া ধনতান্ত্রিক সভ্যতা ভেঙে

চরমায় হয়ে সেই ধ্বংসস্তুপের ওপর নতুন সমাজ গড়ে উঠবে—  
কন্মানিচ্ছ্।

সমরের তরুণ দীপ্ত মুখের দিকে অনুপমা ক্লান্ত করুণ চোখে চাইলে।  
কি অপূর্ণ স্থপ! কি সহজ বিশ্বাস!

অনুপমা দীর্ঘে বলে, দেখ সমর, তোমার মত ভাবতে চাই, কিন্তু  
পানি না। তরুণ তুমি, তাই ভবিষ্যতের স্বপ্নে মগ্ন হয়ে এগিয়ে চলতে  
পার, কিন্তু আমরা বর্তমান জীবনটাকেই উপভোগ করতে চাই।

সমর আবেগের সঙ্গে বলে উঠল, ভুল! ভুল দিদি। এখন  
সবাইকে ভাঙনের কাজে লাগতে হবে।

অনুপমা হেসে বলে, আমি নিজেই যে ভাঙা। ফ্যানটা এদিকে  
একটু ঘুরিয়ে দাও ত ভাই, কেমন গরম লাগছে।

সমর সিলিং-ফ্যানটা অনুপমার দিকে ঘুরিয়ে দিয়ে বলে, তুমি শুয়ে  
পড়, সেই ট্যাবলয়েডটা কি আবার খাবে?

এলিয়ে শুয়ে অনুপমা বলে, মানব সভ্যতার কথা থাক, মালতীর  
খবর বল, সারাদিন তার আর দেখা পাওয়া গেল না, বিকেলে চা খেতে  
আসতে বলেছিলুম, এল না ত।

সমর একটু চঞ্চল হয়ে বলে, আমি ত তার খবর রাখবার ভার  
নিইনি, তবে দেখলুম কল্যাণকুমারের সঙ্গে চা খাচ্ছিলেন—

অনুপমা হেসে উঠল, বলে, কাজটা তুমি পছন্দ করনি মনে  
হচ্ছে।

সমর তাচ্ছিল্যের স্বরে বলে, কাজটার মধ্যে এমন কিছু অপছন্দের  
নেই, মামুলী ব্যাপার, তবে ওসব ঢং গ্রাকামি আমার ভাল লাগে না।  
কমরেড হবার সাধ কেন?

অনুপমা কটাক্ষ করে বলে, তুমি চাও ফ্রিলাভ!

সমর গম্ভীরভাবে বল্লে, ঠাট্টা কোরোনা দিদি, শেকলপরা প্রেম হয় না।

অনুপমা বুঝলে ব্যথায় সমরের মন টনটন করছে। স্নিগ্ধস্বরে সে বল্লে, দেখ সমর, মালতী তোমায় ভালবেসেছে। তার মুখ দেখে আমি তা বুঝেছি। কিন্তু তুমি ত সে ভালবাসা চাও না, স্নিগ্ধ গৃহকোণে মাটির প্রদীপের শিখার মত সে ভালবাসা—তুমি চাও প্রলয়ের আগুন।

—ভালবাসায় আমি বিশ্বাস করি না। এ ভালবাসা বুর্জোয়া সভ্যতার সৃষ্টি। ধনসঞ্চয়, সম্পত্তিকে ভালবাসার এ আর এক রূপ।

—এ তুমি কেতাবের বুলি বলছ। সত্যি ভালবাসা কি তুমি এখনও জান নি।

—তুমি কি জেনেছ?

—আমার কথা থাক্। গল্পটা শুনি, কল্যাণের সঙ্গে মালতী কোথায় চা খাচ্ছিল?

—রেন্টার'-গাড়ীতে।

—আর তাই দেখে তোর 'জেলসি' হচ্ছিল!

—ফুঃ!

—কল্যাণের সঙ্গে মালতীর বিবাহ হলে মন্দ হয় না।

—যদিও, তোমার মতে, সে আমাকে ভালবাসে।

—কিন্তু তুই ত বিয়ে করবি না, তোর প্রলয়-পথের সঙ্গিনী কে হবে!

—তবে অত পোজ্ কেন?

—যে মালতী তোকে ভালবাসে সে ত ঘর ছেড়ে বাহির হয়েছে দুর্গম অভিসারে, কিন্তু সাহসে তার কুলাচ্ছে না, যদি কেউ ডাকে

ঘর বাঁপতে, সে আর এগুতে পারবে না—ঘর বাঁধা আমাদের রক্তে—

—তুমিও বুঝি সেজ্ঞা বিয়ে করেছ দিদি !

—হয়ত তা সত্যি ! কিন্তু ঘর গড়তে পারলুম কৈ ? দম আটকে আসে তব শেকল খুলতে ইচ্ছে করে না। তোর সঙ্গে কথা কয়ে মন অনেকটা হাল্কা হল। একা গাড়ীতে কত অদ্ভুত কথা ভাবছিলুম। ওই অন্ধকার বনগুলির দিকে চেয়ে মনে হচ্ছিল, চলে যাই ওদের মতো, ওই গিরিবনে কি রহস্য লুকান আছে ! ওরা যেন আনায় ডাকছে। মনে হচ্ছিল, সন্ন্যাসী যদি বলেন, এস আমার সঙ্গে, আমার অলৌকিক শক্তিতে তোমার ব্যাধি সারিয়ে দেব, তারপর ভারতের রহস্যময় অরণ্য-পর্বতে পরিভ্রমণ করব—আমি চলে যেতে পারি সন্ন্যাসীর সঙ্গে—

—ওই সন্ন্যাসীর সঙ্গে।

—সে কি কোন সন্ন্যাসীর সঙ্গে ? সে যে নবজীবনের অন্তর্ভূতির সন্ধানে—পুরানো জীবন ভেঙে গড়তে।

—কিন্তু এ ধনতান্ত্রিক সভ্যতা, এ সমাজ ব্যবস্থা, এ রাষ্ট্রমূর্তি না ভাঙলে নতুন জীবন গড়বে কি করে ? তুমি হতে পারবে দিদি—

—কি হতে পারব ?

—চলো তুমি ইয়োরোপে, যাবে আমার সঙ্গে ? তোমায় সারিয়ে তুলব—তারপর—

মুহু দীর্ঘনিশ্বাস ফেলে অল্পপমা বললে, চুপ করো সমর, চুপ করো, আমার মধ্যে যে আগুন আছে তার জালা তোমায় দিতে চাই না।

ক্লান্তনয়নে অল্পপমা চাইলে।

মন্ত্রমুগ্ধের মত সমর তার দিকে চেয়ে।

অনুপমা অনুভব করলে সমর তার অসামান্য রূপে বিমোহিত, অন্ধকার নিশীথের চঞ্চল বাতাসে নশালের আগুনের শিখার মত তার তরুণ প্রাণ কাঁপছে।

ডু'জনে শুরু হয়ে বসে রইল।

ওপরের বাক্সের এক কোণে বিরিকি ঘুমিয়ে পড়েছিল। এমন কোণ ঘোঁষে সে ছিল যে প্রেমদাসের চোখে পড়েনি।

সন্ধ্যা হতে বিরিকির শরীর ভাল নেই। পেটের ব্যথা অসহ্য হয়ে ওঠেনি, তবে শরীর বড় ক্লান্ত। বোধহয় এত দীর্ঘকাল রেলগাড়ীর ঝাঁকুনীতে দেহ অবসন্ন হয়ে পড়েছে।

ফতেসিংএর কথা শুনে সে বিশেষ উত্তেজিত হয়ে উঠেছিল। ঠাকুর প্রেমদাসের পা জড়িয়ে ধরে ছোট মেয়ের বিবাহের টাকা কোন রকমে জোগাড় করতে হবেই।

মাঝে ষ্টেশনে গাড়ী থামতে রাধাকান্ত চলে গেল ফতেসিংএর সঙ্গে, বোধ হয় সন্ন্যাসীর সন্ধানে। বিরিকি আর বসে থাকতে পারল না। নিজের বাক্সে উঠে শুয়ে পড়ল। অবসাদে সে ঘুমিয়ে পড়ল। প্রেমদাস যখন গাড়ীতে উঠলেন, সে জানতে পারল না।

গাড়ীর এক ঝাঁকুনীতে বিরিকির ঘুম ভেঙে গেল। সে স্বপ্ন দেখছিল, তার ছোট মেয়ে বিমলা লাল বেনারসী পরে বিবাহের বধূবেশে তার সামনে দাঁড়িয়ে, গলায় মুক্তার হার, হাতে সোনার কঙ্কণ, কানে হীরের ঢুল ঝলমল করছে। বিমলা কেঁদে বলছে, বাবা আমি বিয়ে করব না, বাবা আমি স্বপ্নের বাড়ী যাব না। আর বিরিকি

হেসে বলছে, দূর বোকা মেয়ে, বিয়ে করবিনি কি ! দেখবি বরকে কত ভাল লাগবে, তখন আর আসতে চাইবিনি ।

ঘুম ভেঙে গেল কিন্তু সালঙ্কতা বিমলার ছবি তার চোখে যেন ভাসছে ; বিরিকির চোখ ছল্ছল্ করে উঠল ।

উঠে বসে বিরিকি দেখলে, প্রেমদাস মুদিতনয়নে স্থির হয়ে ধ্যানের আননে গাড়ীর মেজেতে বসে ।

ঠাকুর গাড়ীর ধূলায় কেন ? বেঞ্চিতে ত বসলে পারেন ।

বিরিকি তাড়াতাড়ি বান্ধ হতে নামলে । প্রেমদাস নীচে বসে স্তবরাং বেঞ্চির গদিতে বসা চলবে না । প্রেমদাসের সামনে সে গাড়ীর মেজেতে বসে দুই হাত জোড় করে প্রার্থনার স্বরে বলে, ঠাকুর একটি নিবেদন আছে, বিরিকিকে তরিয়ে দিন প্রভু ।

প্রেমদাস কিন্তু চোখ মেলে চাইলেন না, কোন কথাও কইলেন না ।

বিরিকি ভাবলে, ঠাকুর গভীর ধ্যানমগ্ন । ঠিক এই সময় কেন ধ্যানে বসলেন ? এখন কেউ নেই, একেবারে পা জড়িয়ে কৈদে মেয়ের বিবাহের ব্যবস্থা করে নেওয়া যেত । হঠাৎ গাড়ী থেমে যেতে পারে, তারপর ফতেসিং, রাধাকান্ত সব এসে হাজির হলে মুশ্কিল ।

বিরিকি যুক্তকরে জোর গলায় বলে, ঠাকুর বিরিকিকে এবার রুপা করুন ।

প্রেমদাস বিচলিত ভাবে চোখ মেলে চাইলেন । সম্মুখে নতজান্ন বিরিকিকে দেখে বিবস্তির স্বরে বলে উঠলেন, এ কি ! এখানে এমন করে বসে কেন ? তুমি কোথায় ছিলে ?

দীনভাবে বিরিকি বলে, আমি বান্ধে ঘুমিয়ে পড়েছিলুম, জেগে দেখি, ঠাকুর এই গাড়ীর ধূলায় ধ্যানস্থ বসে । আমি কি আর ওপরে থাকতে পারি ?



প্রেমদাস সন্দিগ্ধস্বরে বলে উঠলেন, এতক্ষণ ঠিক ঘুমোচ্ছিলে ?

—হাঁ ঠাকুর, স্বপ্ন দেখছিলুম আমার ছোট মেয়ের বিয়ে হচ্ছে !

—বেশ ! ওঠ । অমন হাতঘোড় করে আছ কেন ?

—আপনার রূপাভিক্ষা, ঠাকুর, আপনার আশীর্বাদ ।

—উঠে বস, পা ধোরো না—কি হল তোমার ?

—আপনিও উঠে বসুন ।

প্রেমদাস বুঝলেন, আর স্থিরচিত্তে চিন্তা করা চলবে না । তিনি উঠে গাড়ীর গদীতে বসলেন । বিরিকি তখনও করঘোড়ে তাঁর সামনে দাঁড়িয়ে ।

একটু বিরক্তির স্বরে প্রেমদাস বল্লেন, কি চাই তোমার ? রাধাকান্ত বাবুর মত টাকা ধার চাই ?

—আপনি রূপা করলে সব হবে । টাকা ধার করে আমি শুদবো কি করে ?

—ও, ধার নয়, দান ।

—শুধু রূপা করুন ।

—শোন বিরিকি, আমি অতি তুচ্ছ, নগণ্য মাতৃষ, রূপা করবার আমি কে ? যদি দুঃখ হতে ভ্রাণ পেতে চাও রূপাময় ভগবানকে ডাক, আমি এতক্ষণ তাঁকেই ডাকছিলুম ।

—আমাদের কাছে আপনিই ভগবান, আপনিই রূপাময়ের অংশ ।

প্রেমদাস রাগ করতে পারলেন না, হেসে উঠলেন । লোকটা কি নাছোড়বন্দা । বোধ হয় মেয়ের বিয়ের জন্ত টাকার দরকার, তাই প্রথমেই স্বপ্নের কথাটা বল্লেন ।

—কি, মেয়ের বিয়ের জন্ত টাকা দরকার ?

—ঠাকুর ত অতৃষ্ণামী, মনের কথা জানতে পারেন। ঠাকুর যে কত বড়, কত উদার, বুঝতে পারিনি ; কতেসিংএর কাছে শুনলুম।

—কতেসিং !

—হ্যাঁ, তিনি এসেছিলেন ঠাকুরের দর্শন পেতে ; রাধাকান্ত বাবু ত তাঁর সঙ্গে আপনার খোঁজ করতে গেলেন।

প্রেমদাস বিচলিত হয়ে উঠলেন, পরের ষ্টেশনে গাড়ী থামলেই রাধাকান্ত ও কতেসিং একসঙ্গে হাজির হবে, তারপরে ঋণের জন্তু দু'জনের মধ্যে দর কষাকষি চলবে। তার আগে বিরিকির টাকার ব্যবস্থা করে দেওয়া যাক।

মুহূ হেসে প্রেমদাস বলেন, কতেসিং কি বলে, দিতে চায় টাকা ? কতাদায়গ্রন্থদের অর্থদান করে ও বিশেষ আনন্দ পায়—কি বলে ?

বিরিকি বুঝলে এমন সুরোণ আর আসবে না। সে আবেগের সঙ্গে প্রেমদাসের পা জড়িয়ে ধরে বলে, ঠাকুর শুধু আপনার একটি কথা—আপনি খুঁসি হবেন, এইটুকু তাকে জানাতে পারলেই হল।

প্রেমদাস বিরিকিকে বুকে জড়িয়ে ধরলেন। ঝোড়ো বাতাসে ভাঙা ডালে শুকনো পাতার মত সে কাঁপছে। তার সাদা চুলগুলি তীব্র আলোয় সাদা থড়ির তালের মত দেখাচ্ছে।

বিরিকিকে পাশে বসিয়ে প্রেমদাস বলেন, বিরিকি তুমি স্থির হও, শান্ত হও, তোমার মেয়ের বিবাহের ব্যবস্থা আমি করে দেব, নিশ্চিন্ত থাকো।

—ঠাকুরের অসীম কৃপা।

—তুমি স্থির হয়ে শুয়ে থাক, তোমার শরীর ত ভাল নেই, বিরিকি।

—হ্যাঁ, সন্ধ্যা থেকে শরীর কেমন ঝিমিয়ে পড়ছে। আর শরীরে জোর

নেই। মেয়ের বিয়েটা হয়ে গেলেই আমার সংসারের সব কর্তব্য হয়ে গেল, তারপর আপনার সঙ্গ আর ছাড়ছি না—আপনার তল্লী বয়ে বাকী জীবন কাটিয়ে দেব।

—বড় দীর্ঘ তোমার যাত্রা, বিরিকি—তুমি স্থির হয়ে শুয়ে পড়। আমাকে একটু স্থির হয়ে বসতে দাও, ভগবানের কৃপা এখন আমার যে বড়ই দরকার!

বিরিকির বুক কোন্ অজানা ভয়ে ছলে উঠল। প্রেমদাসের পদধূলি নিয়ে সে বিনীতকণ্ঠে বলে, ঠাকুর ক্ষমা করবেন, ভগবানকে ডাকার মাঝে আপনায় এমন করে বিরক্ত করলুম। আমরা সংসারের জীব, বড়ই স্বার্থপর।

ইতরুসি ষ্টেশনে গাড়ী থামতে মালতী উৎসুকভাবে প্ল্যাটফর্মে নেমে দাঁড়াল। পুরানো শাড়ী ছেড়ে সে ঘননীল রঙের শাড়ী পরেছে, মহিস্তাপি জর্জেটে স্ফাটী পাড় বসান, বেণীর উচ্চত কুণ্ডলীর সঙ্গে শাড়ীর রং মিশে গেছে, শুভ্র মুখশ্রীর বিবর্ণতা আরও অধিক হয়ে উঠেছে, চক্ষুর কৃষ্ণ রহস্য সঘন। ষ্টেশনপ্ল্যাটফর্মের চেয়ে আশাটের প্রথম মেঘের ছায়ায় কদম্ববৃক্ষতলে দাঁড়ালে তাকে বেশী ভাল মানাত।

চঞ্চলচিত্তে মালতী দাঁড়াল।

কল্যাণের ডিনারের নিমন্ত্রণগ্রহণ করা সম্বন্ধে সে কোন সিদ্ধান্ত করতে পারছে না। কখনও ভাবে, বলবে, তার গিঁদে নেই, থাকে না। কখনও ভাবে, থাকে কিন্তু তার নিজের খাবার বিলের টাকা নিজে দেবে, কল্যাণকে দিতে দেবে না। কখনও ভাবে, যদি সময়ের সঙ্গে দেখা হয়, তাকে টেনে নিয়ে রেস্তোরাঁ-গাড়ীতে থেতে যাবে, সময় সারাদিন নিশ্চয় ভাল করে খায়নি। কিন্তু সময়ের দেখা পাওয়া মুশ্কিল। সে যখন রেস্তোরাঁ-গাড়ীতে যাবে তখন হয়ত সময় তার গাড়ীতে এসে হাজির হবে। কল্যাণ আচ্ছা মুশ্কিলে ফেল্লো।

মালতী স্থির দাঁড়িয়ে থাকতে পারলে না, টেলিগ্রাফ আফিসের দিকে এগিয়ে গেল, কল্যাণ তাকে না দেখতে পেয়ে চলেও যেতে পারে।

—মিস্ মল্লিক, একটু দাঁড়ান।

চমকে ফিরে মালতী দেখলে কল্যাণ তার দিকে দ্রুতপদবিক্ষেপে আসছে; মুখে পাইপ নেই; চৌচৌর কোণে বাঁকা হাসির রেখা, যেন সে বলছে ডিনার খাবার জগু সাজ ত করা হয়েছে দেখছি।

দ্বিধাজড়িত স্বরে মালতী বলে, দেখুন আমি বোধ হয় আপনার সঙ্গে ডিনার খেতে যেতে পারছি না।

মালতীর রক্তিমগণ্ডে চোখ রেখে কল্যাণ বলে, কেন? আর কোন নিমন্ত্ৰণ আছে?

হাতের চামড়ার সাদা ব্যাগ ছলিয়ে মালতী বলে, না, তা নয়—কেমন ক্ষিদে নেই।

কল্যাণ দৃঢ়স্বরে বলে উঠল, অর্থাৎ কারণ কিন্তু খুঁজে পাচ্ছেন না—এ আপনার কাছ থেকে আশা করিনি, মিস্ মল্লিক—আপনি বা বলবেন স্পষ্ট করে বলবেন, কোথাও দ্বিধা করবেন না—সাধারণ বাঙ্গালী মেয়ের মত—

মালতী বাধা দিয়ে বলে, আমি অসাধারণ কিসে!

মালতীর গভীর কালো চোখে চোখ রেখে কল্যাণ বলে, অনামাছা আপনি, এই যে ষ্টেশনে ভিডের মাঝে নীল শাড়ী পরে দাঁড়িয়েছেন—

মালতী বাধা দিয়ে বলে, আচ্ছা, বক্তৃতা দিতে হবে না, চলুন। কল্যাণ অসঙ্গত কিছু বুঝি বলে, ভেবে, তার দৃক কাঁপছে। ধীরে সে বলে, কিন্তু আমায় যে একটা টেলিগ্রাম করতে হবে।

কল্যাণ বলে, কোথায় বলুন, করে দিচ্ছি।

মালতী মুখ রাঙা করে বলে, বাড়ীতে, মায়ের কাছে।

কল্যাণ হাসির স্বরে বলে, বিশেষ প্রাইভেট না হয় ত বলুন, কি জানতে হবে, আমি টেলিগ্রাম করে আসছি, আপনি ভিড়ে যাবেন কেন? পথে এমন কিছু কি ঘটল যে এখনি মাকে টেলিগ্রাম করতে হবে?

মালতী রাগের স্বরে বলে, আপনি বড় বাজে কথা বলেন, চুপ করুন দেখি একটু!

নীলবে ছ'জনে রেস্তোরাঁ-গাড়ীর দিকে এগিয়ে চলল।

টেলিগ্রাম করে মালতী ও কল্যাণ রেস্তোরাঁ-গাড়ীতে এসে বসতে ট্রেন স্টেশন ছাড়িয়ে চলল।

কল্যাণ দেখলে, অদূরে কনক ও গ্রেগরি 'আপেরিতিভ' পান করছে। কল্যাণের ইচ্ছা ছিল তাদের টেবিলে গিয়ে বসে কিন্তু মালতী ওদিকে যেতে রাজী হল না। জ্ঞানলার দ্বারে এক কোণের চেয়ারে মুখ রাঙা করে সে বসে পড়ল। কল্যাণ প্রথমে পাশের চেয়ারে বসবে ভেবেছিল, কিন্তু মালতীর সামনের চেয়ারে মুখোমুখি বসল। মালতীর পেলব শুভ্র অধরে রক্তের ছোপ তার বড় ভাল লাগল। কিন্তু এ মুগ্ধতায় তার কথা বলবার সহজ স্রোত মৃদু হয়ে এল। রূপালি পাড়-বসান নীল শাড়ীর পটভূমিকায় এই তরুণীর আবেগকম্পিত আনন রহস্যময় সুন্দর, এমন স্নিগ্ধতা এমন অনির্কচনীয়তা সে কখনও কোন ইংরাজ মেয়ের মুখে দেখেনি।

মালতীর মধ্যে কি বিশেষ আকর্ষণ?

কল্যাণ ভাবলে, মালতী রেলপথে আকস্মিক আলাপে আধ-জানা বলে এমন রহস্যময়ী হয়ে উঠেছে, তার চারিদিকে কত ইসারা কত ইঙ্গিত! এ রহস্যময় মাধুৰ্য্যটুকু সে উপভোগ করতে চায়।

ভোজ্য-তালিকার কার্ড নিয়ে বয় এসে সামনে দাঁড়াতে মালতী বলে উঠল, আমি কিন্তু বেশী খেতে পারব না, বলে দিচ্ছি।

কল্যাণ হেসে বলে, বেশী খাবার জন্তে জোর করা আমার স্বভাব নয়, আমার কাজও নয়, কিন্তু কিছু ত খাবেন, কি খাবেন বলে দিন।

মালতী মুদুকণ্ঠে বলে, আমি অত ভাবতে পারছি না, আপনি যা হয় বলে দিন।

কল্যাণ বয়কে দুটো ডিনারের অর্ডার দিয়ে মালতীর মুখের দিকে

চেয়ে বলে, দেখুন মিস্ মল্লিক, আপনাকে জোর করে থাওয়াব বলে ত আপনাকে নিমন্ত্রণ করিনি, ট্রেনের ঝাঁকুনীতে ডিনারটা একা খেতে হবে না, দু'জনে এক সঙ্গে খাব, এই আনন্দলাভ করবার জগ্গেই আপনাকে ডেকেছি, এর মধ্যে আমার স্বার্থপরতা যথেষ্ট। খাওয়াটা এখানে গৌণ, আপনার সঙ্গে গল্প করাটাই মুখ্য।

মালতী হাসির স্তরে বলে, আবার আপনি বানিয়ে বানিয়ে কথা বলতে আরম্ভ করেছেন। আমার কিন্তু বেশী কথা বলার মত শক্তি নেই -

কল্যাণ বাধা দিয়ে বলে, অথবা মুড নেই। অথবা যা অনুভব করছেন তা ভাবাতীত।

—দেখুন সব সময় ঠাট্টা করবেন না।

—এই মুষ্কিল, মিস্ মল্লিক, আমার এমনি দুর্ভাগ্য, মনের গভীর অনুভূতির কথা বলতে গেলেই, মেয়েরা ভাবে পরিহাস করছি।

মালতী ভীতবিস্মিত চোখে চাইলে।

কল্যাণ বলে যেতে লাগল, দেখুন, এই যে রাতের অন্ধকারে মধ্যভারতের গিরিবনপ্রান্তর পার হয়ে উর্দ্ধশ্বাসে ট্রেন ছুটে চলেছে, তার রেস্টোরাঁ-কারে আমরা দু'জনে বসে ডিনার খাবার প্রতীক্ষায়—মাঝে মাঝে মনে হচ্ছে আপনাকে আমি খুবই জানি, আবার কখনও মনে হচ্ছে আপনি অজানা রহস্যময়ী, একটুকু চিনেছি মাত্র—অথচ ওই যে পাহাড়ের মাথায় তারাগুলি ঝলমল করছে, বনপ্রান্তে উঠেছে চাঁদ, তাদের দিকে না চেয়ে, চেয়ে আছি এই টেবিলের দিকে—এই যে পরম বিস্ময়, রহস্য—অন্তরের এ ভাব কি কোন কথায় প্রকাশ করতে পারা যায়—আমি চেষ্টা করে কি পারছি প্রকাশ করতে—এই যে ঠিক আজকে রাতে ট্রেনে বসে—

মালতী এতক্ষণ মুখে কনাল চেপে ছিল, মনে মনে ক্রুদ্ধ হচ্ছিল, কিন্তু হঠাৎ সে উচ্চৈঃস্বরে হেসে ফেললে, কল্যাণের কথার ছন্দে বলার ভঙ্গীতে আর সে হাসি চেপে রাখতে পারলে না। সে যেন খুব খুসি হয়ে উঠল, মনের অস্বাচ্ছন্দ্যের ভাব দূর হয়ে গেল। কল্যাণ যেন তার মনের খুব নিকটে এসেছে।

মালতী হাসির স্তরে বলে, খুব হয়েছে, এবার চুপ করুন। বেশী কথা না বলে এবার থেতে আরম্ভ করুন।

কটাক্ষে মালতীর দিকে চেয়ে কল্যাণ ডিনারের প্রথম কোর্সে মনোযোগ দিলে।

গ্রেগরি বলে, দেখছেন কনক রায় মহাশয়, সারাদিন ঘোষের কেন দেখা পাওয়া যায় নাই, তাহার কারণ এখন বোঝা যাচ্ছে।

কনক হেসে বলে, ব্যাপারটা আমি ঠিক বুঝে উঠতে পারছি না, এই মেয়েটি ত সন্ধ্যাতে চা খেয়ে গেল।

গ্রেগরি হেসে বলে, যার সঙ্গে চা খাওয়া যায় তাহার সহিত কি ডিনার খাওয়া যায় না।

কনক বলে, তা নয়। অকারণে মেয়েদের নিমন্ত্রণ করে খাওয়ান কল্যাণের একটা খেয়াল বলেই হয়! ও বলে, ও একা রেস্টোরাঁতে থেতে পারে না, কোন নিমন্ত্রিতার সঙ্গে খেলে খাওয়াটা আনন্দকর হয়। কিন্তু, কল্যাণ কখনও একই মেয়েকে একই দিনে দু'বার খাওয়ায় না। বিলেতে কখনও দেখিনি, একদিনে একই মেয়েকে চা থেতে নিমন্ত্রণ করেছে, আবার ডিনার থেতেও অনুরোধ করেছে।



গ্রেগরি বলে, তা এ রেলপথে পরিচিত কত জন পাইবে ?

কনক কটাক্ষ করে বলে, ইনিও ত অপরিচিতা ।

গ্রেগরি উৎসাহের সঙ্গে বলে, গার্লটির কিম্ব striking face. ওঁর একটা পোরট্রেট আঁক কনক রায় মহাশয় । আর বাঙ্গালী মেয়েদের মুখে এমন—কি বলিব—softness—আমাদের দেশের মেয়েদের মুখে দেখি না—বোধ হয় পদ্মপ্রথার ফল ।

কনক মাংসের কাটলেট কাটতে কাটতে বলে, ওটা ভুল বলেন, বাঙ্গালী মেয়েদের মুখের বঙে যে অপরূপ স্নিগ্ধতা আছে, আমাদের মাটির ঘরের মাটির প্রদীপের আলোর মত, তোমাদের স্ট্রলফ্রেমের প্রাসাদের ইলেক্টিকের তীব্র আলো নয়—এ স্নিগ্ধতা তাদের অন্তরের প্রকৃতির ও দেশের প্রকৃতির পরিবেষ্টনীর ফল, পদ্মপ্রথার জন্ম হয়নি । ঘনসবুজ আমগাছের পাতায় তালতমালের আন্তরণে আষাঢ়ের মেঘের স্নিগ্ধ-ছায়াপাত দেখছ, চৈত্রের নিম্নল রাতে দীর্ঘ নারিকেল পাতাগুলিতে চাঁদের আলোর ঝিকিমিকি দেখছ, ভাদ্রের বাংলায় ভরা নদীর রূপ দেখছ—তা যদি না দেখে থাক ত বাঙ্গালী মেয়ের স্নিগ্ধ-রূপ-মাদুরী বুঝবে না, গ্রেগরি সাহেব ।

গ্রেগরি হেসে উঠল । বয়সে ডেকে মদ্য তালিকা আনতে বলে । গ্রেগরি বলে, কল্যাণের মুখ দেখিয়া তোমার কি মনে হইতেছে সে আশ্রয় পল্লবে বর্ষার মেঘের ছায়া দেখিতেছে !

কনক একটু গম্ভীর, বলে, কল্যাণ সম্বন্ধে আমি চিন্তিত হয়ে উঠেছি । আমার মনে হচ্ছে, ওই মেয়েটিকে কল্যাণ ভালবেসেছে !

গ্রেগরি বিস্ময়ের স্বরে বলে, কল্যাণ ভালবেসেছে ?

কনক বলে, কেন, সে কি খুব আশ্চর্য্য ?

গ্রেগরি বলে, আচ্ছা আজ্ঞে এক bet রাখা যাক ?

কনক বলে, bet ! কি ?

গ্রেগরি হেসে বলে, আমি বলছি, কল্যাণ ও মেয়েটিকে ভালবাসে নাই কিন্তু ওই সুন্দরী তরুণীকে বিবাহ করিবে—আপনার মত কি ?

কনক বলে, আমি বলছি, কল্যাণ ওকে ভালবেসেছে কিন্তু বিয়ে করবে না।

গ্রেগরি বলে, তা হলে কি বাজী বলুন ?

কনক একটু চিন্তিতভাবে বলে, কিন্তু আর এক সম্ভাবনা রয়েছে, কনক ওকে ভালবেসেছে এবং বিবাহ করবে।

গ্রেগরি বলে, তাহা হইলে ভালবাসিয়াছে কি ভালবাসে নাই এই প্রশ্ন বা সমস্যা। বিবাহ করিতে পারে, নাও করিতে পারে। বেশ, তবে এই এক বোতল স্প্রাম্পেন অর্ডার দেওয়া যাক। ডিনারের পর আমি কল্যাণকে ডাকিয়া জিজ্ঞাসা করিব—যদি কল্যাণ ওই গার্লকে ভালবাসিয়া থাকে তবে আমি এই স্প্রাম্পেনের দাম দিব, আর যদি ভাল না বাসিয়া থাকে তাহা হইলে আপনি দেবেন—এই বাজীতে রাজী ?

কনক বলে, স্প্রাম্পেন আশু—কিন্তু সত্যিকার ভালবাসা কি মিষ্টার গ্রেগরি ? তার রূপ আর অল্‌ভুতি কে বলতে পারে ?

কাটলেটের বাকী অংশটুকু কনক মুখে পুরিয়া চিবাইতে লাগিল।

ডিনার খেতে গণেশ রেস্টোরাঁ-গাড়ীতে যায়নি। রেস্টোরাঁ-গাড়ী হতে আহাৰ্য্য ও পানীয় আনিয়াছে গাড়ীতে। আহাৰ্য্যের চেয়ে পানীয়ই অধিক।

দেবপ্রিয় ও তাদের গাড়ীতে এসেছে। দেবপ্রিয় নিজেই এসেছে, যেন এ গাড়ীতে তার নৈশ-ভোজের নিমন্ত্রণ ছিল।

দেবপ্রিয় না আসলে গণেশ তাকে খুঁজে নিয়ে আসত, অথবা আর কোন সহভোজীকে। কারণ, রাত্রে সে একা মদ খেতে পারে না।

মদ্যপান সম্বন্ধে গণেশ যেমন অভিজ্ঞ তেমনি স্থানিকীচক। আজ সে দেবপ্রিয়ের জন্ত বিশেষ করে ককটেল তৈরি করেছে। সাত আট রকম মদের ছোট বড় বোতল সামনে সাজান।

অবাক হয়ে শিপ্রা দেখছিল, গণেশের সঙ্গে পালা দিয়ে দেবপ্রিয় মদ খেয়ে চলেছে, কিন্তু নাতাল হয়ে উঠছে না, শুধু চশমার কালো কাচ দিয়ে অত্যাঙ্গুল চক্ষের দীপ্তি বৈশাখের থর-রৌদ্রের মত জ্বালাময়।

মদের গেলাস শূন্য করে একটা চেরী চিবিয়ে দেবপ্রিয় চেষ্টা করে বলে উঠল, হাঃ হাঃ, বাজী মাং।

শিপ্রা ভীতভাবে তার দিকে চাইলে। গণেশকে সে ইঙ্গিত করলে, শূন্য গেলাসে আর মদ না ঢালতে। দেবপ্রিয়ের ওপর তার কেমন করুণা হল। এবার কিছু খাবার থাওয়াতে পারলে নেশাটা নাও লাগতে পারে।

অনুমনয়ের স্বরে শিপ্রা বলে, দেবপ্রিয়বাবু, এবার কিছু solid হোক।

দেবপ্রিয় যেন চমকে উঠল, তারপর উচ্চৈঃস্বরে হাসলে, Solid, হুঁ ! solid, liquid, gas—জগৎ, এ বিশ্বব্রহ্মাণ্ড আগে ছিল গ্যাস, সে গ্যাসে অহর্নিশি আগুন জ্বলছে—সে গ্যাস হতে হল লিকুইড্ জল, মহার্গবে নারায়ণ ভাসছেন—তারপর এল সলিড্, মাটি, মাংস—হাঃ হাঃ, আমরা—

গণেশ বলে উঠল, বা কি চমৎকার সৃষ্টিতত্ত্ব, কিন্তু মধ্যাবস্থায় থাকলেই ত বেশ হত—ভাবুন ককটেলের মহার্গব—

শিপ্রা চঞ্চলভাবে বলে, চুপ করো, গণেশবাবু। দেবপ্রিয়বাবু, আপনি একটা মার্চিন্ কাটলেট খান—বড় সুন্দর করেছে।

দেবপ্রিয় একটু রেগে বলে উঠল, দেখ, ঠিকিয়ে আমায় খাওয়াতে পারবে না !

শিপ্রা বিস্ময়ের স্বরে বলে, আপনায় কে ঠকাচ্ছে ?

গণেশ কটাক্ষ করে বলে, ঠকাচ্ছ বৈকি। আমি সত্যি কথা বলছি, ওটা মার্চিন্ নয়, পর্ক।

দেবপ্রিয় একগানি কাটলেট তুলে বলে, বহুবরাহ, বহুবরাহ, কোন দোষ নেই। কিন্তু আমি ঠকছি না—তোমার অন্তরোধে খাচ্ছি—ভুলিয়ে খাওয়াতে পারবে না।

একটু ভীত স্তব্ধভাবে শিপ্রা দেবপ্রিয়ের দিকে চাইলে।

দেবপ্রিয় নীরবে কাটলেট খাওয়া শেষ করলে তারপর দাঁড়িয়ে উঠে বলে, বাজীমাং, এবার কি পাট করতে হবে ?

শিপ্রা হেসে বলে, এবার একটা বক্তৃতা করুন।

দেবপ্রিয় একটু ক্রুদ্ধস্বরে বলে, দেখ, পরিহাস কোরোনা, তুমি বড় এ্যাক্ট্রেস্ জানি, আমিও এ্যাক্টিং করতে পারি—কি পাট করতে হবে বলো ?

কক্‌টেলের গেলাস নামিয়ে গণেশ বলে, পাট ত আপনার জন্তে তৈরী রয়েছে, প্যারিস-ফেরতের পাট—

দেবপ্রিয় বেঞ্চির গদিতে বসে তার শূন্য গেলাস গণেশের দিকে এগিয়ে বলে, ঠিক বলেছ। আমি ঠিক করলুম তোমাদের দলেই যোগ দেব।

শূন্য গেলাস ভরে দিয়ে গণেশ বলে, বাজীমাং, কিন্তু বৌদিদি যদি আপত্তি করেন ?

দেবপ্রিয় গম্ভীর হয়ে বসে রইল, পূর্ণ গেলাস স্পর্শ করলে না। যেন তার নেশা কেটে গেছে।

শিপ্রা ধীরস্থরে বলে, দেবপ্রিয়বাবু আপনি পণ্ডিত মানুষ, আপনি কেন সিনেমাতে অভিনয় করতে যাবেন ?

দেবপ্রিয় আবার আবেগের সহিত দাঁড়িয়ে উঠে বলে, আমি পণ্ডিত ? বেশ ! কি জানি আমরা ?

দেবপ্রিয়ের চাউনিতে শিপ্রা ভয় পেল।

—আপনি স্থির হয়ে বসুন।

—আমি মাতাল হয়েছি ?

—না, না, মাতাল হবেন কেন ?

—হইনি ! আলবাৎ মাতাল হয়েছি, তোমরা আমায় মাতাল করেছ, পরিহাস কোরোনা—অস্বীকার কোরোনা। বেশ, আমি মাতাল হব। জীবন উপভোগ করতে চাই—গণেশ আমি তোমার দলের—

গণেশ ব্যঙ্গের স্বরে বলে, কিন্তু আমি ত মাতাল হতে পারি না, হতে চাই, কিন্তু নেশা লাগে না।

গ্রেগরিদের টেবিলে স্ন্যাম্পেনের বোতলটি কল্যাণের চোখ এড়ায়নি। অথচ মালতী থাকাতে তাদের টেবিলে সে যোগ দিতে পাচ্ছে না। ডিনার খাওয়া শেষ হতেই সে চঞ্চল হয়ে উঠল। এক ছোট স্টেশনে ট্রেন থামতে সে তাড়াতাড়ি মালতীকে তার গাড়ীতে পৌছে দিয়ে আবার রেস্টোরাঁ-গাড়ীতে ফিরে এল।

কনক হেসে বলে, জানতুম তুমি আসবে।

গ্রেগরি বলে, তোমার জন্তে আমরা অপেক্ষা করিতেছিলাম।  
কল্যাণ কোন উত্তর দিলে না। বয়সকে ভেদে আর একটি মদের বোতল  
আনতে লুকুম করলে।

গ্রেগরি বলে, এ বোতলের দাম দেওয়া হয়নি।

নিজের গেলাস ভরে কল্যাণ বলে, কেন? আমি তা বলে দিচ্ছিলাম।

গ্রেগরি বলে, শোন ঘোষ-মহাশয়? তুমি ওই তরুণীকে ভালবাস  
কি না, এ প্রশ্নের উত্তরের উপর নির্ভর করিতেছে কে দাম দিবে—  
আমাদের দুইজনের মধ্যে বাজী হইয়াছে—

কল্যাণ হেসে বলে, ও প্রশ্নের উত্তর দেওয়ার চেয়ে আমি বরঞ্চ দাম  
দিচ্ছি।

গ্রেগরি প্রতিবাদ করে বলে, না তাহা হইবে না, আমরা অড়ার  
দিয়াছি, আমরা দাম দিব, প্রশ্নের উত্তর দিতে আপত্তি কি?

কল্যাণ গুলের মত মাথা নেড়ে বলে, গার্লটিকে তোমার পছন্দ  
নাকি?

—থুব striking face.

—দেখ আর্থার, তোমরা এমন bet করেছ শুনে আশ্চর্য্য হলাম—  
এরকম প্রশ্নের কি কোন উত্তর হয়? আর ভালবাসা সম্বন্ধে আমার  
মত তুমি জান।

—সে জন্তেই ত আমি কনক রায় মহাশয়কে বলছিলুম, কল্যাণ ও  
মেয়েকে ভালবাসেনি।

—হতে পারে ত পথের ভালবাসা পথ-শেষে শেষ হয়ে যাবে।

—সে কি ভালবাসা?

—যাকে একবার ভালবেসেছি তাকে সারাজীবন ভালবাসতে না  
পারলে—

—সারাজীবনের কথা হচ্ছে না।

—তাহলে দু'দিন আর দু'বছরের মধ্যে তফাৎ করতে চাও। দেখ, এ ভয় নয়, ভক্তি নয়, এ ভালবাসা—আগুনের মত জ্বলে ওঠে আবার নিভেও যেতে পারে ত।

—দেখ, পরমেশ্বরের মত প্রেমকে কেউ কোনদিন define করতে পারেনি। ভালবাসা বলতে তুমি বা-ই বোঝ না কেন, আমরা এই প্রশ্নের উত্তর চাই, তুমি ওই তরুণীকে ভালবেসেছ কি ?

গেলাসের স্ন্যাম্পেনের শেষ বিন্দু পান করে কল্যাণ ধীরে বলে, আমার মনে হয়, আমি ওকে ভালবেসেছি, ওর মধ্যে দেখলুম সৌন্দর্যের নবরূপ, অনির্কচনীয় : ওর মধ্যে দেখলুম আত্মার নব রহস্য, গভীর সুন্দর ; শুনলুম কোন্ নবজীবনের আহ্বান।

কনক বলে উঠল, ব্রাভো, এইটুকু স্ন্যাম্পেনে এত কথার ফেনা আছে, জানতুম না। গ্রেগরি তুমিই জিতলে, নেশাটা বোধ হয় কেটে গেল।

কল্যাণ একটু লজ্জিতভাবে বলে, না, না, নেশা নয় কনক। আমি ত প্রথমে বল্লুম, কথা দিয়ে এ প্রশ্নের উত্তর দেওয়া যায় না।

কনক ব্যঙ্গের স্বরে বলে, অর্থাৎ হ্যা-ও বটে না-ও বটে।

গ্রেগরি খুসি হয়ে বলে উঠল, এ তুমি ঠিক বলেছ কনক রায় মহাশয়। কল্যাণ ভালবেসেছে বটে, ভালবাসেনিও বটে! ফল এই, অর্দেক দাম আমি দেব, অর্দেক তুমি। বোতলটা তুমি-ই শেষ কর কল্যাণ।

কল্যাণ ধীরে বলে, প্রশ্নটা করে তোমরা বড় ভাবিয়ে তুলে আমাকে।

কুপের বৈদ্যাতিক ছুটি পাখা বিরামহীন ঘুরে চলেছে, যেন ছুটি বৃহৎ কালো পোকা একটানা আর্তনাদ করে ঘুরছে।

অনুপমার পাশে জগদীশ নিস্তব্ধভাবে বসে। মাঝে মাঝে অনুপমার দিকে শঙ্কিতভাবে চাইছে। বিপর্যাস্ত বেশ, পাণ্ডুর আনন, রক্তিম অধর, উদ্ভ্রান্ত নয়ন, অনুপমার এমন করুণ বিহ্বল মূর্তি সে কখনও দেখেনি।

জগদীশ ভাবলে, নিশ্চয় অনুপমার খুব অস্থির করেছে, এই দীর্ঘ ট্রেন-যাত্রার ঝাঁকুনি তার সহ্য হচ্ছে না, এ রাত কাটিয়ে বোধে পর্যাস্ত পৌছাতে পারলে হয়। হঠাৎ আবার রক্তশ্রাব না হয়।

অনুপমার মনের ওপর যে ঝড় বয়ে গেছে, জগদীশ তা বুঝতে পারলে না; সে বেদনা বোঝবার মত প্রেমানুভূতি তার নেই। পাল-ছেঁড়া হাল-ভাঙা ঝড়ের ঝাপটা-খাওয়া নৌকার মত তার মূর্তি। জগদীশের ভয় হল।

বিমূঢ়ের মত জগদীশ দাঁড়িয়ে উঠল।

অনুপমা তার হাত চেপে ধরে আছে।

—তুমি যে উঠলে, আবার যেতে হবে নাকি ?

—না, ঠিক যেতে হবে না।

—ঠিক যেতে হবে না, মানে ? তুমি আর যেতে পারবে না।

—তোমার কি ভয় করছে ?

জলজলে চোখে অনুপমা হেসে উঠল।

মন্ত্রমুগ্ধের মত জগদীশ অনুপমার পাশে বসলে। অনুপমার মুণাল বাহু তাকে জড়িয়ে! অস্থিরের পর অনুপমার এত কাছে সে কখনও বসেনি। জগদীশের কাঁধে মাথা রেখে অনুপমা এলিয়ে বসল; তার দীর্ঘ কেশভার জগদীশের বক্ষে ছড়িয়ে পড়েছে।



জগদীশ অনুভব করলে, বজ্রের রক্তধারা রুদ্ধতালে নৃত্য করছে।  
স্তব্ধ হয়ে সে বসে রইল। মনে হল, অনুপমার দেহের তাপ অত্যধিক,  
নিশ্চয় তার জ্বর হয়েছে।

জগদীশের মনে পড়ল বিবাহের পর অনুপমা জগদীশকে এম্মিভাবে  
আঁকড়ে ধরত।

—অমন চুপ করে থেকো না, কথা কও, বড় কর্কশ ট্রেনের শব্দ।

অনুপমার কাতরকণ্ঠে জগদীশ চমকে উঠল। ধীরে সে বলল,  
তোমাকে ট্রেনে চড়ান ভুল হয়েছে দেখছি। এ রাতটা কষ্ট করে  
কাটাও।

—ভুল!

অনুপমা হেসে উঠল।

—না, না, মোটেই ভুল হয়নি। এ ট্রেন-যাত্রায় কত কাণ্ডই না  
দেখলুম!

—শোন, তোমার কপাল বড় গরম হয়েছে, ঔষুধটা খেয়ে নাও,  
তা না হলে রাতে ঘুম হবে না।

—আমি আজ রাতে ঘুমোতে চাই না। ট্রেনে জেগে কাটাব।

—আমাকেও কি জাগতে হবে?

—নিশ্চয়ই। কতদিন রাত জাগিনি বল ত।

—ট্রেনের ঝাঁকুনি খেতে খেতে রাত জাগায় আনন্দ কি?

—আনন্দ আছে, আজ তোমায় ঘুমোতে দেব না। তাস খেলবে!  
পাশের গাড়ীতে ওরা কেমন তাস খেলছে।

—শোন, তোমাকে খুব গোপনীয় একটা সংবাদ বলি, বলা উচিত  
নয়, কিন্তু না বলে উপায় নেই দেখছি। ইয়োরোপে যুদ্ধ লাগছে।

—সে ত বছদিন থেকে শুনছি।

—এবার সত্যি লেগেছে। আজ রাতেই জার্মানী পোলাও আক্রমণ করবে, তাহলে কাল ইংলণ্ড যুদ্ধ ঘোষণা করবে নিশ্চয়।

—সে ত খুব মজার।

—মজা? মজা কি? যুদ্ধ কি তামাসার ব্যাপার।

—হাঁ তাইত।

—দেখ, তুমি এবার স্থির হয়ে শোও, টেমপারেচারটা দেখি, নিশ্চয়ই তোমার জ্বর হয়েছে, বুক বেশ গরম।

—অথবা, তোমার হাত বড় ঠাণ্ডা। আমার মোটেই জ্বর হয় নি। যুদ্ধ করা মজার ব্যাপার বলে, তার জ্বর হয়েছে, সিদ্ধান্ত করতে হয় না। ইয়োরোপের লোকেরা কেন যুদ্ধ করে বুঝতে পারছি।

—কি বুঝতে পারছ?

—তারা তোমাদের মত ঘ্যানঘেনে প্যানপেনে জীবন চায় না।

—তা কি চায়?

—তারা বাঁচতে চায়। জীবন যখন একঘেয়ে লাগে তারা যুদ্ধ লাগিয়ে দেয়, ম্যালেরিয়ায় পিলে ফেটে মরার চেয়ে শত্রুকে মেরে, নগর গ্রাম পুড়িয়ে, জাহাজ ডুবিয়ে, এরোপ্লেনে উদ্ধার মত মহাশূণ্ডে ছুটে মরা ভাল।

—থারুমোমেটার দেবার আর দরকার নেই।

—বেশ চুপ করে বস দেখি। ভাবো আমাদের দেশে যুদ্ধ বেধেছে, তুমি চলে যেতে বন্দুক ঘাড়ে অথবা এরোপ্লেনে বোমার বস্তা নিয়ে, আমি হতুম নার্স অথবা বারুদের কারখানায়—

—ওগো, এবার চুপ করো। পিকক্স ব্রোমাইডটা কোথায়?

—ওই ব্রোমাইড, আফিম, ধর্মের বুলি, রসের পদাবলী, এ সব দিয়ে তোমরা ভুলিয়ে রাখতে চাও, কিমিয়ে রাখতে চাও—আমি

ওষুধ খাচ্ছি না। যুদ্ধ লাগছে শুনে আনন্দ হচ্ছে—পুরাতনকে না ভাঙলে নতুনের সৃষ্টি হবে কি করে !

—তোমার কম্যুনিষ্ট ভ্রাতার সঙ্গে বুঝি এইসব কথা হচ্ছিল—ওরা সব ক্রিমিছাল।

—ভাবো, আজ ইয়োরোপে আমাদের মত কত দম্পতি সম্মুখে মুক্তির পথ খুঁজে পেল।

—মুক্তির পথ ?

—ক্ষমা করো, তোমাকে আমি বোঝাতে পারব না—এমন ভাবে বলা আমার ঠিক হয়নি।

—শান্ত হও, অল্প, শান্ত হও।

—সবাই বলে শান্ত হও, সে শান্তির পথ কোথায় ? শান্তিই কি কাম্য অথবা সংগ্রাম ? সংগ্রাম করে শান্তি লাভ করতে হয় কেন ?

—তোমার মন বড় উত্তেজিত হয়ে উঠেছে। যুদ্ধের খবরটা না বললেই হত, কিন্তু না বলেও উপায় নেই যে।

—না বলে উপায় নেই ? ও, বুঝেছি। তোমাকে আবার সেলুনে যেতে হবে বুঝি—যুদ্ধ বাধছে তাই এত পরামর্শ।

জগদীশ ধীরে বলে, এবার বেশীক্ষণ থাকব না, পরের স্টেশনেই চলে আসব। কয়েকটা ফাইল নিয়ে আসতে হবে। তোমার অস্থখ বেড়েছে বলে সাহেব আর থাকতে অন্তরোধ করবে না। তবে আমার ছুটি cancelled হয়ে গেল, জেনো।

অল্পপমা সোজা হয়ে উঠে বসে বলে, বেশ যাও ; আমার অস্থখ মোটেই বাড়েনি—সাহেবকে সে কথা বলতে হবে না। কোটির ল্যাভেগারটা একটু খুঁজে দাও দেখি।

অতুজ্জল রেস্টোরাঁ-গাড়ী হতে মূহু আলোকিত ছোট ইন্টারমিডিয়েট কম্পার্টমেন্টে ফিরে এসে মালতী স্থির হয়ে বসতে পারলে না। বুক তার ঢুলছে, কাঁপছে, যেন সে দীর্ঘপথ জোরে ছুটে এসেছে।

গাড়ীর সব জানলা সে খুলে দিলে, তারপর বুক হাত দিয়ে বসল, যেন হাঁপাচ্ছে।

কল্যাণ তাকে ভালবেসেছে কি না, এ প্রশ্নের উত্তর সে কি করে জানবে ?

অথচ এ প্রশ্নের উত্তর না জানলে রাতে তার ঘুম হবে না, চিন্তের চঞ্চলতা দূর হবে না।

এ সঙ্গে আর একটা প্রশ্ন যে ওঠে, কল্যাণকে কি সে ভালবেসেছে ?

কখনও মনে হয় কল্যাণ তার অতি আপনার, হৃদয়ের অতি নিকটে এসেছে, আবার কখনও মনে হয়, কল্যাণ দূরে, বহুদূরে—এ তার স্বাভাবিক সৌজন্য, অথবা হয়ত একটু ফ্লাটিং।

কিন্তু কল্যাণের সামনে বসলে তার বুক এমন ছুর্ ছুর্ করে কেন ! সময়ের সঙ্গে সে কেমন সহজভাবে ব্যবহার করতে পারে, যা তা কথা বলতে পারে, বকুনী দিতে পারে।

সমর তাকে ভালবাসে কি না, এ কথা ত সে কখনও ভাবেনি, অথচ কল্যাণ সম্বন্ধে মনে এ প্রশ্ন কেন জাগল ?

—অতি চিন্তাকুলা হেরি মালতীদেবীকে ডিনারের পরে !

চমকে চেয়ে মালতী দেখলে সামনে সমর দাঁড়িয়ে।

—সমর, কোথায় ছিলে তুমি ?

—এই ট্রেনেই ছিলুম।

—প্ল্যাটফর্মে তোমায় কত খুঁজলুম, পেলুম না—কিছু খেয়েছ ?

—গেছলুম অল্পপমা দিদির কুপেতে স্নাণ্ডউইচের সন্ধানে, দেখলুম গাড়ীতে কেউ নেই, খাবারও নেই।

—অল্পপমাদি গাড়ীতে নেই ? বোধ হয় সেলুনে নিমন্ত্রণ হয়েছে।

—সেলুনেও নেই। বোধ হয় সন্ন্যাসীর সঙ্গে চলে গেলেন।

—সন্ন্যাসীর সঙ্গে ? কি ঠাট্টা করছ ? সত্যি বলো।

—অল্পপমাদি এ ট্রেনেই আছেন ও বেশ ভাল গাড়ীতে আছেন, পরের ষ্টেশনে সে গাড়ীতে যাওয়া যাবে। তার আগে তোমার সঙ্গে একটা কথা ঠিক করে নিতে চাই।

মালতীর সামনে মুখোমুখি বসে সমর বসে, শোন কমরেড্, তুমি কি সত্যিই ইয়োরোপে যেতে চাও, এখন কাজ করবার অনেক লোক দরকার।

অনিমেঘ নয়নে মালতী সমরের দিকে চাইলে। সমরের ঐ তরুণ দীপ্ত মুখে যেন কি অনির্বচনীয় রহস্য রয়েছে, চলে যেতে ইচ্ছে করে তার সঙ্গে। কিন্তু ভয়ও করে, অন্ধকার রাতে মশাল জালিয়ে যেতে যেমন শঙ্কা হয়।

সমর উদ্বেগের সহিত বলে, চিন্তা করবার বেশী সময় নেই কমরেড্।

মালতী চিন্তিতভাবে বলে, কেন ? বোম্বে গিয়ে সব ঠিক করা যাবে।

—হয়তো আমি বোম্বেতে যাব না, পথে কোথাও সরে পড়তে হবে।

—কেন ?

—আমার খবর হচ্ছে আজ রাতেই জার্মানী পোলাও আক্রমণ করছে।

—আবার যুদ্ধ ! এ খবর কোথায় পেলো ?

—সেলুন থেকে। ইয়োরোপে দু'চার দিনের মধ্যেই যুদ্ধ বাধবে।

—তাহলে আর কি করে যাওয়া হয় ?

—এখনই ত যাবার সময়। বড় বড় রাজ্য ভেঙে পড়বে, তাদের ধ্বংসস্থলের ওপর নতুন মানব-সমাজ গড়ে তুলতে হবে।

—রাসিয়া কি করবে ?

—রাসিয়া এখন থাকবে চুপ করে বসে।

—যুদ্ধের মধ্যে এখন আমরা গিয়ে কি করব ?

—লক্ষ লক্ষ মানুষের রক্তে-ভেজা রণাঙ্গনে নতুন বীজ বুনতে হবে, নতুন ফসল তুলতে হবে, তারি উদ্যোগ এখন থেকে করতে হবে।

মুখে ক্রমাল চেপে মালতী একটা হাই তুলে।

—কি জানি, বড় ঘুম পাচ্ছে।

—তাহলে ঘুমোও মালতী দেবী, আমি চল্লুম।

—না, না, বোস, মুশ্কিল এই, আমার হাতে টাকা কিছু নেই।

—এবং কল্যাণকুমার প্রচুর অর্থবান, পিতৃসঞ্চিত সম্পত্তির দাম কত লাখ কিছু খোঁজ পেয়েছ কি ?

—চুপ করো। আচ্ছা একটা প্রশ্নের সত্যি উত্তর দেবে ?

বিমুগ্ধভাবে মালতী সমরের দিকে চাইল। দীর্ঘ অক্ষিপশ্মের ছায়ায় নয়নতারকা জলে ছুঁলে উঠল।

—কি প্রশ্ন ?

ক্ষণিকের জগ্ন মালতী সমরের তরুণস্বপ্নভরা নয়নে চেয়ে রইল। কোন প্রশ্ন করতে পারলে না। গণ্ড রাঙা হয়ে উঠেছে, অধর কাঁপছে। যে প্রশ্ন সে করতে চাইছিল, সে প্রশ্ন করতে পারলে না। নীরবে মুখ ঘুরিয়ে নিলে।

সমর বিম্বিতমুগ্ধভাবে মালতীর দিকে চাইলে। মালতীর এ রূপ মনোমোহিনী।

অন্তরের আবেগ দমন করার জন্তে সমর উচ্চৈঃস্বরে হেসে উঠল।  
তারপর দু'জনে স্তব্ধ বসে।

একটু ব্যঙ্গের স্বরে সমর বললে, তুমি জানো, বুজ্জোয়া ভালবাসায়  
আমি বিশ্বাস করি না।

—আমি ভালবাসায় বিশ্বাস করি, প্রেম বুজ্জোয়াও নয় প্রলি-  
টেরিয়েটও নয়, মানব হৃদয়ের পরম সত্য।

—এ মধ্যরাতে তোমার সঙ্গে প্রেম সম্বন্ধে আলোচনা করতে চাই  
না। তুমি কি স্থির করলে? ভাববার জন্তে পাঁচ মিনিট সময় দিতে  
পারি।

—আমি যাবো, আমি যাবো। কিন্তু এমন ক্লান্তি লাগছে, বড়  
ঘুম পাচ্ছে আমার।

—আধ-স্বপনে-আধ-জাগরণে এই রকম অবস্থা।

—না, না, আমায় ভুল বুঝো না, শোন আমি যাব, আমি যদি  
ঘুমিয়ে পড়ি আমায় জাগিয়ে ডেকে নিও, কমরেড্ !

সমর কোন কথা কইলে না। নীরবে উঠে গিয়ে মালতীর পাশে  
বসে তার নরম ঠাণ্ডা হাত আপন প্রশস্ত করতলে দৃঢ়মুষ্টিতে ধরে বসে  
রইল।

মধ্যভারতের পাহাড় বন পার হয়ে রাতের অন্ধকারে ট্রেন ছুটে  
চলেছে।

গভীর রাত্রি। ট্রেন ছুটে চলেছে। কখনও বনানীর সঘন  
অন্ধকার, কখনও গভীর পর্বতশ্রেণীর রুদ্রমূর্তি, কখনও উন্মুক্ত প্রান্তরে  
আলোছায়ায় রহস্যলোক।

অনুপমা গাড়ীতে একা। গাড়ীর আলো নিভিয়ে সে চুপ করে  
বসেছে রহস্যময়ী নিশীথিনীর মত। ভাবতে সে কিছু চায় না।  
সে চায় শান্তি, সে চায় স্থপ্তি, ব্যাধিক্লিষ্ট দেহমনের সকল শ্রান্তির  
অপসারণ। কোন মন্তব্যে সে যদি নবজীবন লাভ করতে পারত !

কিন্তু তার মাথার ভেতরে বসে কে ভেবে চলেছে ; এ চিন্তাশ্রোত,  
সে ইচ্ছা করলেও থামাতে পারছে না। জানলা দিয়ে চোখ মেলে  
চাইলেই সে দেখতে পাচ্ছে, বহির্জগৎ কোন্ অলক্ষ্যে উর্দ্ধশ্বাসে ছুটে  
চলেছে, অনন্তগগনে গ্রহ তারকা হতে পৃথিবীর পর্বত বন প্রান্তর  
ছুটে চলেছে। অনুপমা ইচ্ছা করলে এ ধাবমান বিশ্বের গতি থামাতে  
পারে না। তেমনি সে, তার অন্তর্জগতের উত্তাল চিন্তা-তরঙ্গিনীর  
অবিরাম ধারা থামাতে পারে না। চিন্তার বিরামহীন শ্রোত নব নব  
পথে প্রবাহিত হয়ে চলে, কিন্তু জীবন ত এগিয়ে চলে না, নব আশা নব  
বাসনা জাগে, শুধু বেদনার তরঙ্গ স্থির জীবনের তটে বার বার আঘাত  
করে, অশ্রুর ফেনপুঞ্জ ছড়িয়ে পড়ে।

অনুপমা আর স্বপ্নজাল বুঁদছিল না। সে ভাবছিল, তার অস্থখ  
আর সারবে না, এমনি ব্যাধিক্ষিপ্ত দেহ নিয়ে কাটাতে হবে দিনের পর  
দিন। ইয়োরোপ যাওয়া ত হবেই না, এ ছুটিতেও কোথাও বেড়ান  
হবে না। বোম্বে গিয়ে আবার ফিরতে হবে কল্কাতায়। সময়



নিশ্চয় ইউরোপে চলে যাবে, যুদ্ধ বাধলেও যাবে। মালতী কি কল্যাণকে বিবাহ করে নতুন জীবন গড়ে তুলবে? সন্ন্যাসী চলে যাবেন মধ্যভারতের বনমধ্যে কোন নির্জন মন্দিরে অথবা হিমালয় পর্বতমালার কোন গভীর কন্দরে অলকনন্দার উৎসতীরে। আর অনুপমাকে ফিরে যেতে হবে কলিকাতার উপকণ্ঠে সেই চিরপুরাতন বাগান-বাড়ীতে—সেই ঈষ্ট ইণ্ডিয়া কোম্পানীর আমলে তৈরী বৃহৎ থাম-ওয়ালা পুরানো বাড়ী, কুরি-নামা গাছের ছায়া-ভরা বৃহৎ বাগান। সেই উদাস স্তব্ধতা, শূন্য বিজনতা। তার জীর্ণ গতিহীন জীবনের উপযুক্ত বাসস্থান। জগদীশ বলেছিল বোম্বের কাছে কোন সমুদ্রতীরে ভাল স্ট্রানাটোরিয়ম আছে, সেখানে সে যেতে চায় না। চিরচঞ্চল সমুদ্রের রূপ দেখলে সে আরও অশান্ত হবে। সেই পুরানো বাগানে ভাঙা বাড়ীই তার ভাল। জগদীশকে মাঝে মাঝে দিল্লী যেতে হবে। সে থাকবে এক। জীবনের পথে সে যখন সত্যিই নিঃসঙ্গিনী তখন একাকিনী থাকাতে তার ছুঁখ নেই। বার বার সে জগদীশের কাছে আসতে চেষ্টা করে, হৃদয়ের স্পর্শ দিয়ে প্রেমের স্পন্দন জাগাতে চায়। জগদীশ ত তাকে প্রথমে ভালবেসেছিল, অথবা সে শুধু যৌবনের মোহ। সে ভালবাসা আবার জাগাতে ইচ্ছে করে।

ছোট এক ষ্টেশনে ট্রেন হঠাৎ থামল। অন্ধকার জনহীন প্র্যাটফর্মে কয়েকটি ক্ষীণ আলোকের প্রভাহীন বিন্দু। চারিদিকে স্তব্ধতা বড় গভীর।

ট্রেন আর নড়ছে না। যেন অন্ধকারে পথ হারিয়ে থমকে দাঁড়িয়ে আছে। জানলা দিয়ে মুখ বাড়িয়ে অনুপমা অবীরা হয়ে উঠল। তারাভরা আকাশ বিম্বিম্বিত করছে, অন্ধকার ষ্টেশনে প্রাণের কোন সাড়া নেই।

কুপের দরজা খুলে অনুপমা অন্ধকার প্র্যাটফর্মে নেমে পড়ল। যেন

সে কোন অদৃশশক্তির চালনায় নেমে পড়ল। ওই রহস্যময় তিমিরাবৃত বনে তার চলে যেতে ইচ্ছা করছে। এখন যদি টেন চলে যায়, এই অজানা টেনের প্রাটফর্মে রাত্রির অন্ধকারে একাধিনী সে দাঁড়িয়ে থাকে, তারপর—

তারপর কি হবে সে ভাবতে চায় না। ওই অনন্ত গগনে নক্ষত্রদলের নর্তনের ছন্দে চিরধাবমান বিশ্বের প্রাণস্রোতের সঙ্গে সে এগিয়ে যেতে চায়। তার বুক দুল্ছে।

অনুপমা একটু এগিয়ে গেল। পাশের প্রথম শ্রেণীর কম্পার্টমেন্টের অত্যাঙ্গুল আলোক তার চোখে এসে পড়ল। গানের সুর, কলধ্বনি, উচ্চহাস, কাচের বন্বনানি, যেন একটি হব্বা চলছে।

মনে হল, গাড়ীটা যেন নড়ে উঠল। সত্যিই বুঝি অজানা প্রাটফর্মে একা থাকতে হবে।

অনুপমা ট্রেনের দিকে ছুটে গেল, নিজের কুপের দিকে নয়, সম্মুখের আলো-ভরা প্রথমশ্রেণীর গাড়ীতে উঠে পড়ল।

গণেশদের গাড়ীতে রঙ্গ তখন বেশ জমে উঠেছে। গণেশেরও নেশা লেগেছে। দেবপ্রিয় স্থির হয়ে বসে থাকতে পারছে না, মাঝে মাঝে দাঁড়িয়ে উঠে অভিনয়ের ভঙ্গীতে বক্তৃতা দিচ্ছে। তার ইচ্ছা শিপ্রা এবার নৃত্য করে। শিপ্রার নৃত্যের সঙ্গে সে একটু মুক অভিনয় করতে চায়। শিপ্রা কিন্তু নৃত্য করতে রাজী হচ্ছে না। ছ' তিনবার অনুরোধ করে দেবপ্রিয় ক্রুদ্ধ হয়ে উঠেছে। আবার শিপ্রার কলহাস্তময় মধুর ভঙ্গীতে সে মুগ্ধ হয়ে যাচ্ছে। এ পণ্ডিত মাতালের মন্তব্য শিপ্রা পুলকিত।

কিন্তু যত নেশা ধরেছে গণেশ তত গুন্ হয়ে যাচ্ছে। তার এ স্তব্ধতায় শিপ্রা একটু ভীতা হয়ে উঠল। হঠাৎ ঈর্ষান্বিত হয়ে গণেশ

একটা কাণ্ড বাধাতে পারে, দেবপ্রিয়কে ঠেলা দিয়ে বলতে পারে, বেরোও বেরোও আমার গাড়ী থেকে। হয়ত চলন্ত ট্রেনের দরজা খুলে তাকে ঠেলে ফেলে দিতে পারে। গণেশ ঘুমিয়ে পড়লে, সে বাঁচে।

হঠাৎ ট্রেন থামতে গণেশ উৎসাহের সঙ্গে উঠে দাঁড়াল। তার সামনে সব বোতল খালি। গাড়ীর দরজা খুলে সে মুখ বাড়ালে, রেস্টোরাঁ-গাড়ীর কোন বয়ের দেখা পাওয়া যায় কি না।

শিপ্রা ধীরে বললে, গণেশবাবু, অন্ধকারে যেওনা। এবার ধীরে শুয়ে পড়। রাত কত হবে দেবপ্রিয় বাবু?

দেবপ্রিয় হেসে বললে, ইয়ং ইজ্ দি নাইট্ শিপ্রা দেবী, আপনার মতনই তরুণী।

খুব হয়েছে, বলে শিপ্রা গণেশের অলক্ষ্যে একটা ভরা বোতল গাড়ীর এক কোণে লুকিয়ে রাখলে।

না, অন্ধকারটা বড় বিচ্ছিরি—কোন বাবুর দেখা নেই, বলে গাড়ীর দরজা ভেজিয়ে গণেশ স্থির হয়ে বসল। দেবপ্রিয়ের দিকে সে কটমট করে তাকালে। শিপ্রা সে চাউনির অর্থ বুঝলে, গণেশ বলতে চায়, যাওনা, আর এ গাড়ীতে কেন; ট্রেন থেমেছে, এবার নিজের গাড়ীতে শুতে যাও। দেবপ্রিয় কিন্তু কোন ভ্রক্ষেপ করলে না।

গণেশ বলে উঠল, কি স্টেশন?

দেবপ্রিয় বাহিরের অন্ধকারের দিকে চেয়ে বললে, খাণ্ডোয়া হবে—ভূঁসোয়াল?

শিপ্রা উদ্বিগ্নভাবে বললে, না, না, এ কোন ছোট স্টেশন, হঠাৎ গাড়ী থেমেছে, এখুনি ছেড়ে দেবে।

গণেশ রুক্ষস্বরে বলে উঠল, কে বলে এখুনি গাড়ী ছাড়বে? ওহে শুনছ দেবপ্রিয় বাবু, একবার রেস্টোরাঁয় যেতে পারবে—

শিপ্রা একটু ভীতভাবে বলে উঠল, এ অন্ধকারে কি করে যাবেন—  
এখনি গাড়ী ছেড়ে দেবে।

গণেশ ক্রুদ্ধস্বরে বলে উঠল, বড় যে—বড় যে, আচ্ছা—ওহে শুনতে  
পাচ্ছ ?

মুক্ত জানলার কাছে মুখ রেখে রাত্রির অন্ধকারের দিকে চেয়ে  
দেবপ্রিয় ধ্যানীর মত স্থির বসে।

গণেশ তার দিকে এগিয়ে গেল। শিপ্রা ভয়ে কঁপে উঠল।

একটু এগিয়ে গণেশ অবাক হয়ে চাইলে। দুই কানের কাছে দুই  
হাত রেখে অন্ধকারের দিকে মুখ বাড়িয়ে দেবপ্রিয় জানলা দিয়ে বাহিরে  
ঝুঁকে যেন গাঁ গাঁ করছে।

শিপ্রার দিকে চেয়ে গণেশ বলে, মূর্ছার ব্যারাম আছে নাকি ?

শিপ্রা বিরক্তির সঙ্গে বলে, চুপ করো, কি বলছেন শোন।

দেবপ্রিয় তখন কানের ওপর হাত রেখে আবেগের সঙ্গে বলছে,  
শুনতে দাও, এ সুস্থিত গম্ভীর নিশীথের তমিস্রায় আর্ঘ্যাবর্ত দাফিণাতোর  
মধ্যে গিরিবনপথে অতীতের যবনিকা ছিন্ন করে শুনতে দাও, ভারতের  
এ প্রাচীন পুণ্যপথে শতাব্দীর পর শতাব্দীর নব নব যাত্রীর পদধ্বনি  
জয়গান শুনতে দাও—

গণেশ দেবপ্রিয়ের পাশে বিস্মিত মুগ্ধ হয়ে বসে বলে, বা, চমৎকার,  
দেবপ্রিয় বাবু, ভাল এ্যাক্টিং হলে আমি সব সময় appreciate করতে  
পারি, কিন্তু আমাদের দিকে মুখ ফিরিয়ে একটু বলুন।

দীর্ঘনিশ্বাস ফেলে দেবপ্রিয় মুখ ফেরাল। ঠিক সেই সময় প্ল্যাটফর্মের  
দিকের ভেজান দরজা খুলে অল্পপমা এ গাড়ীতে প্রবেশ করলে। ট্রেন  
হুলে উঠল।

—আপনি !

—অবাক হচ্ছেন নিশ্চয়। আমি ছিলুম পাশের কুপেতে, বড় এক বোধ হচ্ছিল, নেমে পড়েছিলুম প্ল্যাটফর্মে—

—বেশ করেছেন—Welcome—বসুন—বোতলগুলো দেখে ভয় পাবেন না।

—কিছু দেখেই আমি ভয় পাই না।

—বা। এই আমাদের দেবপ্রিয় বাবু, বড় পণ্ডিত—আর ইনি শিপ্রা দেবী—

—জানি।

—জানেন?

—দেবপ্রিয় বাবুর আমি একজন ভক্ত পাঠিকা।

—শুনছেন, ভক্ত পাঠিকা! হুঃ!

—আমার বই পড়েছেন?

—নেশাটা বুঝি কেটে গেল।

—চুপ!

—হাঁ, আপনার “সমীক্ষণ” কয়েকবার পড়েছি, সব জায়গা বুঝতে পারি না, তবে ভাল লাগে, মনে আঘাত করে।

—ও বিষয় আপনার সঙ্গে আমিও এক মত, দেবপ্রিয় বাবুর সব কথা বুঝতে পারি না, তবে ভাল লাগে—লোকটাকে ভাল লাগে।

—চুপ করো গণেশবাবু।

—ও, বুঝেচি, আপনি জগদীশের স্ত্রী?

—ঠিক বলেছেন।

—কিন্তু জগদীশবাবুকে আমি ত appreciate করতে পারছি না, এ মাঝ রাতে তাঁর এমন সুন্দরী স্ত্রীকে—

—চুপ করো গণেশবাবু।

—বিশেষ কাজে তাঁকে সেলুনে যেতে হয়েছে।

—বাঃ বেশ করেছেন। মানে আপনি আমাদের গাড়ীতে এসে থুব ভাল করেছেন। দেবপ্রিয়বাবুর লেখা পড়েছেন, এ্যাক্টিং দেখেননি ত—চমৎকার এ্যক্টর—আমাদের সিনেমা-কোম্পানীতে যোগ দিচ্ছেন।

—আপনি? সিনেমাতে অভিনয় করবেন?

—না, না—একটু রঙ্গ করছিলুম।

—বুঝেচি।

—মোট্টেই বোঝেন নি। প্যারিস-ফেরতের পাট, বুঝলেন কিনা—

—চূপ করো গণেশবাবু।

—বা, লোকটার প্রশংসা করব না—চমৎকার বলতে পারেন, এই অঙ্ককারে জানলায় ঝুঁকে পড়ে কি গৌঁ গৌঁ করছিলেন—

—উনি পণ্ডিত লোক, কি সব শুনতে পাচ্ছিলেন!

—রাতের অঙ্ককারে আপনি কি শুনতে পাচ্ছিলেন, আমাদের শোনাবেন না একটু?

—শুনবে, শুনবে তোমরা, স্থির হয় বোসো, শোন, সরিয়ে দাও পর্দার পর পর্দা, শতাব্দীর পর শতাব্দী—

—বলুন, দেবপ্রিয়বাবু, আমরা স্থির হয়ে শুনবো।

—শোন, শুনতে দাও, শুনতে দাও।

দেবপ্রিয় এক শূণ্য পেয়ালা হাতে করে দাঁড়িয়ে উঠল। বাহিরের রাত্রির আলোছায়াময় রহস্তরূপের দিকে চেয়ে প্রসারিত হস্তে দেবপ্রিয় বলে যেতে লাগল :

ভারতের এ পুণ্যপথে শুনতে পাচ্ছি সৈনিকদলের অশঙ্করক্ষণি, অসির ঝঞ্ঝনা, কামানের গর্জ্জন। নব নব জাতিতে জাতিতে সংঘাত, সংগ্রাম, সন্ধি, সমন্বয়, শান্তি, আবার নতুন জাতির নতুন দলের আগমন,

নতুন করে সংগ্রাম সমস্তার আরম্ভ। শোন ধনুকের টঙ্কার, বানরসৈন্যের হুকার, রাফস-সঙ্কুল বনপথে হরধনুভঙ্গকারী রামচন্দ্র চলেছেন পদ্মাক্ষী বন্দিনী সীতার উদ্ধারে, আর্ঘ্য অনাথ্যের লড়াই লেগেছে। তারপর শোন রথের ঘর্ঘরে, হস্তিদলের বৃংহিতে, বান খড়্গা মুঘল নানা প্রহরণের শব্দে বিক্ষাগিরি মুখরিত, দক্ষিণাপথ হতে সৈন্যদল চলেছে কুরুক্ষেত্রের রণে। তারপর শোন, মধ্যএশিয়ার প্রান্তরপালিত অতি ক্ষিপ্ত অশ্বপৃষ্ঠে বিদ্বাদ্বেগে কাহারো ছুটে এল, রক্তাক্ত মুক্ত অসিতে বিদ্বাদ্যাম—চলেছে শকসিদিয়গণ, চলেছে পাঠান, মোগল, আগরজজেবের স্মৃজিত বিপুলবাহিনী দাক্ষিণাত্য বিজয়ে চলেছে, অশ্ব-ঝঞ্ঝনা শুনেতে পাচ্ছ কি ? তারপর শোন কামানের গর্জ্জন, বন্দুকের শব্দ, দক্ষ বাকৃদের গঞ্জে ধূমে যুদ্ধভূমি পূর্ণ; তীর নয়, অসি নয়, এ ইয়োরোপের শ্বেতবর্ণ সৈন্যদলের নতুন রণ-রীতি। সে শক যবন মোগল মারাঠা ফরাসী ফিরিঙ্গি সেনা স্বপ্নের মত মিলিয়ে গেছে, তাদের ক্ষিপ্ত অশ্বদলের মত্ত ক্ষুরধ্বনির প্রতিধ্বনি শুনেতে পাচ্ছ কি ! তারপর শোন, কি ভয়ঙ্কর শব্দ। বধির হয়ে যেতে পারো, বিষাক্ত গ্যাসে দম আটকে যেতে পারে, তবু শুনেতে হবে—আর গজে গজে, ঘোড় সওয়ারে ঘোড় সওয়ারে, তরবারির সঙ্গে তরবারির আঘাতে সঙ্গীনের খোঁচায় যুদ্ধ নয়, মূর্তিমান জ্যান্ত-রাফসদলের মত অগ্নিচক্ষু অনলবর্ষী ট্যাঙ্কে ট্যাঙ্কে সংঘাত, এরোপ্লেনে এরোপ্লেনে যুদ্ধ,—আবার নতুন সভ্যতার জন্ম—যুদ্ধ—লেগেছে যুদ্ধের আগুন—শোন—

শিপ্রা ভীত করুণ সুরে বলে, দেবপ্রিয়বাবু, এবার আপনি একটু স্থির হয়ে বসুন। বড় সুন্দর বলেছেন। এবার বিশ্রাম করুন।

অনুপমা আশ্চর্যের সুরে বলে, আপনি জানলেন কি করে, যুদ্ধে লাগছে ?

শিপ্রা বলে উঠল, বা, উনি যে খবরের কাগজের আফিসে কাজ করেন।

দেবপ্রিয় বেকির এক কোণে বসে হাঁপাতে লাগল। অন্ত্রপমাকে তাঁক লাগিয়ে দেবার জন্ত সে একদমে যে এত কথা বলতে পারবে, তা সে নিজেও ভাবেনি।

গণেশ একটু ব্যঙ্গের স্বরে বলল, আমিও মশাই আপনার চেয়ে কিছু কম খেলুম না; কিন্তু আমি ত আপনার মত এমন বক্তৃতা দিতে, এ্যাক্টিং করতে পারলুম না।

পরের স্টেশনে ট্রেন থামতেই অন্ত্রপমা নিজের কুপেতে চলে গেল। গাড়ীতে আলো জ্বালা দেখে ভাবলে জগদীশ এসেছে। কিন্তু কুপেতে প্রবেশ করে দেখলে, মালতী চেয়ারে মুখ রাঙা করে বসে আছে।

—মালতি! কি খবর?

—খবর ত তোমার, কোথায় গেছলে?

—পাশের গাড়ীতে, বড় মজা হল।

—আমার গাড়ীতে আমি একা।

—ভয় করছিল?

—ভয় ঠিক নয়, ভাল লাগছিল না। তোমার কল্যাণ কুমারটি হৃবিধের লোক নয়।

—কেন, মাঝ রাতে জ্বালাতে গেছল? কন্‌গ্রেচুলেট করতে পারি?

—সব সময় ঠাট্টা করো না।

—প্রপোজালটা ডিনারের আগে হল, না পরে?



—প্রপোজাল আবার কি ?

—নেকী !

—শোন অহুদি, ভয়ঙ্কর ঘুমিয়ে পড়েছিলুম। সময় ছিল গাড়ীতে। হঠাৎ ঘুম ভেঙে গেল। চেয়ে দেখি, গাড়ীতে সময় নেই, কেউ নেই। হঠাৎ চমকে দেখি অদূরে অজানা কে বসে, চোঁচিয়ে উঠেছিলুম আর কি !

—কি সাহসিকা !

—দেখি তোমার কল্যাণকুমার চুপটি মেরে বসে। বলে উঠলেন, ভয় নেই। আমি বল্লম, ভরসাই বা কি ; কিন্তু এ সময় এখানে কেন, গার্ড দেখলে মোটা ফাইন হয়ে যাবে। তিনি বল্লেন, মোটা জরিমানা দিতে রাজী আছি, তোমার ঘুমন্ত রূপটি বড় সুন্দর লাগছিল। আমি বিরক্তির সঙ্গে বল্লম, এখন জাগ্রত রূপ সহ করতে পারবেন না, পরের স্টেশনেই সরে পড়ুন।

—বা, আর্টটা বেশ আয়ত্ত হয়েছে দেখছি, যত বাধা দিবি, ওদের জেদ তত বেড়ে যায়, জানিস্।

—না, অহুদি আমার সত্যিই রাগ হয়েছিল। তারপর বলেন কি, তুমিত কম্যুনিষ্ট গুনলুম, কমরেডশিপ করো। আমি রেগে বল্লম, কম্যুনিষ্টের সঙ্গে আমি কম্যুনিষ্ট হতে পারি, আপনার মত পাকা বুর্জোয়ার সঙ্গে কমরেডের সম্পর্ক নয়। ভদ্রলোক চুপ হতে চায় না, হেসে বলেন, তা জানি, আমিও কমরেডশিপ চাই না, আমি বুঝি প্রেম—। বাধা দিয়ে হেসে উঠলুম আমি। বল্লম, প্রেমের আপনি কিছুই জানেন না, প্রেম পরিহাসের জিনিষ নয়।

—বা, খুব কথা বলতে শিখেছিস্ ত। দরকার পড়লে, কথা আপনিই আসে। তারপর ?

—তখন তোমার কল্যাণকুমার অল্প স্বর ধরলেন, বল্লেন, দেখ,

আমি এসেছিলুম তোমাকে নিমন্ত্রণ করতে ; তোমার ত নিরুদ্দেশ যাত্রা, বোধহেতে কোথায় থাকবে, কিছুই জান না ; আমার বোন আমার সঙ্গে চলেছেন জান, মালাবার হিল্‌সে তাঁর স্বামীর সুন্দর বাংলো, তুমি যদি আমাদের সঙ্গে আমাদের বাড়ীতে এসে থাকো—। আমার কেমন রাগ হল, বলে উঠলুম, দেখুন, আপনার বোনের বাড়ীতে আমি থাকতে যাব কেন, আর সে বাড়ী আপনার নয়, আপনি কি বলে নিমন্ত্রণ করছেন—তবু আপনার নিমন্ত্রণের জন্ত অনেক ধন্যবাদ। ভদ্রলোক দমবার নয়, গম্ভীরভাবে বল্লেন, আচ্ছা, আমার ভগ্নীপতির বাড়ী বলে যদি তোমার আপত্তি হয়, তুমি যদি বল, এসে থাকবে, আমিই না হয় বোধহেতে একখানি বাড়ী করছি। আমি বল্লুম, আপনার অনেক টাকা আছে জানি, কিন্তু আমার জন্তে থামাকা বাড়ী করতে যাবেন কেন, সে টাকা আপনি ভাল কাজে সদ্ব্যয় করুন ; আর এবার চুপ করুন, আপনার সঙ্গে বকে আমার মাথা ধরে গেছে। কল্যাণ মুচকে হেসে বল্লেন, কাচা ঘুমটা ভাঙিয়ে ভাল কাজ করিনি দেখছি, আচ্ছা, গাড়ী থামলে নেমে যাব, চেন্‌টানবার দরকার হবে না, তবে আমার নিবেদনটা কাল সকালে স্থনিদ্রার পর একটু বিবেচনা করবেন। তারপর দু'জনে চুপ করে বসে রইলুম। ট্রেন থামতেই আমি তোমার গাড়ীতে চলে এসেছি।

—ভালই করেছি। মানে, আমার গাড়ীতে এসে ভালই করেছি, কিন্তু কল্যাণকে বেশ কবিত্ব করে প্রপোজালটা করবার সুযোগ না দিয়ে ভাল করিস্‌ নি।

—আমার ভাল লাগে না, এ সব।

—কল্যাণ ভেবেছিল, বোধের সমুদ্রতীরে কোন সন্ধ্যায় উতলা হাওয়ায় যখন তোর অলক উড়বে, তোর কানে কানে চুপে চুপে যে বলবে, আমি তোমায়—

—যথেষ্ট ! চূপ করো অহুদি । এমন করে ঠাট্টা করো না ।

—ঠাট্টা নয় রে ।

—বেশ, শোন, আমি ঠিক করেছি—

—ভুল, তুমি ঠিক করতে পার না, আমরা কোন অদৃশ্য শক্তির হাতের খেলনামাত্র—এ ম্যারিয়নেটের নাট্যালীলায় আমাদের ইচ্ছা কোথায় ? শোন্ মালতি, হঠাৎ কিছু ঠিক করিস্ না, খুব বিবেচনা করে স্থির করতে হবে ।

—আমিও ত সেই কথা বলছি ।

—হায়, কোন্ অপরাধে দীর্ঘ মেয়াদে সংসার গারদে আছি বল ! এ গারদখানা, মুক্তি কোথায় ?

—কি হল তোমার অহুদি ? আমার কথা থাক্ তোমার কথা বল, অমন করে চেও না, অহুদি !

—ভুল, ভুল মালতী, একবার ভুল করলে—

—ভাই অহুদি, কেঁদো না—তোমায় কি ব্যথা দিলুম, ক্ষমা করো, তোমার শরীর ভাল নয়, স্থির হয়ে শোও ।

দিনারের পর গ্রেগরি ও কনক নিজেদের গাড়ীতে ফিরে এল ।

গাড়ী স্তব্ধ, মুহূ আলোকিত । গ্রেগরির রিজার্ভ-করা বার্থে রাধাকান্ত গভীর নিদ্রিত । ওপরের বাক্সে বিরিকি শুয়ে আছে চোখ বুজে, তার চোখে ঘুম আসছে না, অস্থিরভাবে পার্শ্বপরিবর্তন করছে । সন্ন্যাসী প্রেমদাস এক কোণে ধ্যানের আসনে বসে আছেন । কল্যাণ কম্পার্টমেন্টে নেই ।

গ্রেগরি বলে, দেখুন কনক রায় মহাশয়, আমার বার্থে কাল এক অভিনেত্রী শুইয়াছিলেন, আজ এক লক্ষপতি শুইয়া আছেন।

প্রেমদাস ধীরে বলেন, ওকে জাগাবেন না, অনেক রাত পরে আজ একটু ঘুমোচ্ছে, আপনি আমার জায়গায় শুন, আমি ঘুমাব না।

গ্রেগরি বলে, না, না, ওঁকে আমি disturb করিতেছি না, আপনি স্থির থাকুন—আমরা দুইজনে এই বেঞ্চে রাত কাটাইতে পারিব। আমারও ঘুম হইবে না।

দু'জনে পেছনের লম্বা বেঞ্চিতে পাশাপাশি বসল।

কনক হেসে বলে, আপনিও কি নিদ্রা-হারাদের দলে! আমি ত বুঝতে পারি না, লোকেদের ঘুম হয় না কেন? আমি ত রাত জাগতে মোটেই পারি না। কিন্তু আজ আমায় জেগে থাকতে হবে। সেজ্ঞা আজ স্ন্যাম্পেন খেলুম দেখলেন। স্ন্যাম্পেন খেলে আমার ঘুম সহজে আসে না।

গ্রেগরি বলে, রাত্রি জাগিবেন কেন? আপনি বোম্বে যাইবেন না? মাঝে কোন্ স্টেশনে নামিতে হইবে, বলুন, আমি আপনাকে জাগাইয়া দিব।

রহস্যের স্বরে কনক বলে, হাঁ, মনমদ স্টেশনে আমায় নামতে হবে, ব্যাপারটা একটু রহস্যজনক, আপনাকে বলতে পারছি না। আমি জেগে থাকবার চেষ্টা করছি, যদি ঘুমিয়ে পড়ি আপনি অন্তগ্রহ করে জাগিয়ে দেবেন।

তারপর প্রেমদাসের দিকে ফিরে কনক বলে, আপনিও কি জেগে রাত কাটাবেন?

প্রেমদাস ধীরে বলেন, আচ্ছা, 'মনমদে' আপনাকে জাগিয়ে দেব, আপনি নিশ্চিত হয়ে ঘুমান।

কনক হেসে বলে, চিন্তার বালাই আমার নেই। আর যদি নাও জাগি, তাতে খুব বেশী লোকমান হবে না।

প্রেমদাস হেসে বলে, বোধ হয় ভালই হবে। জীবনে কামনার তৃপ্তি নেই, সেই জন্তেই লীলা শেষ হতে চায় না।

বিস্মিতভাবে কনক প্রেমদাসের দিকে চাইলে। লোকটা মনের কথা জানতে পারে নাকি !

বহুদিন পরে শিপ্রার সঙ্গে কনকের দেখা। শিপ্রা ছিল কনকের তরুণ শিল্প-জীবনের “মডেল”। ফটোগ্রাফারের ষ্টুডিও বলে সে যে ষ্টুডিও খুলেছিল, আসলে সেটি ছিল তার আঁকবার এ্যাটেলিয়ে। শিপ্রা সেখানে ফটো তোলাবার জ্ঞান আসত না, তার স্থান তখন রেখাগুলি কনক মুগ্ধনেত্রে দেখত ও রঙে আঁকবার চেষ্টা করত। তখন নর্তকীরূপে শিপ্রার নাম হয়নি। কনকের এ্যাটেলিয়েতে সে নানা নৃত্যের অভ্যাস করত, আর কনক নৃত্যরূপগুলির ক্ষণিক চঞ্চল ভঙ্গিমা কখনও ফটো তুলে কখনও স্কেচ করে ধরে রাখবার চেষ্টা করত। সেই পুরাতন কয়েকটা স্কেচ তার সঙ্গে স্টুটকেশে পড়ে রয়েছে। কাঁচা হাতের আঁকা, চঞ্চল সৌন্দর্যানুভূতির অস্ফুট রূপ। এখন শিপ্রাকে আর একবার পাকা হাতে আঁকতে ইচ্ছে করে। শিপ্রাকে যদি সে দু’তিন দিনের জন্তেও পায়, হয়ত সে একটা মহাচিত্র আঁকতে পারে, বতিচেল্লীর “ভেনাসের জন্ম”র মত।

নিরীক্ষিত সিগারটা জ্বালিয়ে কনক আপন মনে হেসে উঠল। সম্ভ্রাম চা খেতে খেতে সে এক মংলব করেছে। গণেশ তখন রেষ্টোরাঁ-গাড়ীতে ডিনারের অর্ডার দিতে এসেছিল, আসলে, দেখতে এসেছিল পানীয় কত প্রকার আছে। সেই অবসরে কনক শিপ্রাকে একটি ছোট চিঠি লিখে পাঠালে, সঙ্গে পুরানো একটা স্কেচও পাঠিয়েছিল।

শিপ্রা তার প্র্যানে রাজী কিনা স্পষ্ট বলেনি, কিন্তু তার ভঙ্গী, মুখের হাসি দেখে কনক বুঝেছিল, গররাজী সে নয়। মনমদ ষ্টেশনে গণেশ যদি না জেগে থাকে তাহলে কোন অসুবিধা হবে না।

গ্রেগরি কনকের আরও কাছে এসে মুহূর্তে বলে, আপনি কতকগুলি ছবি দেখাবেন বলেছিলেন, কনক রায় মহাশয় !

—এখন ?

—এখন ত বেশ ভাল সময়।

—আলো বড় কম মনে হচ্ছে।

—মনের আলো ত আছে।

স্টকেস্ খুলে কনক একটা পোর্টফোলিও বাহির করলে ; সোণালী রঙের একটা ছবি গ্রেগরির হাতে দিয়ে বলে, দেখুন ত মডার্ন দুর্গা-দেবীর একটি ছবি এঁকেছি। দশপ্রহরণধারিণীর হস্তে আর অসভ্য যুগের অস্ত্র নেই, দেখুন বোমা, বন্দুক, রিভলভার, ট্যাঙ্ক, এরোপ্লেন, হাউইটজার, সাবমেরিন্, টর্পেডো, ক্রুইজার ধারণ করে রণরঙ্গী মূর্তি মন্দ দেখাচ্ছে না, অস্ত্রের কি মূর্তি করব ভেবে পাচ্ছি না।

—খুব ইন্টারেস্টিং ! কিন্তু আপনি যে আপনার early studies-গুলি দেখাবেন বলেন।

—সেই কিশোরী নর্তকীর স্কেচ্গুলি ?

—যদি আপত্তি না থাকে।

—গ্রেগরি, আপনি রসিক লোক দেখছি।

নৃত্যময়ী কিশোরী শিপ্রার কতকগুলি রেখাচিত্র বাহির করে কনক গ্রেগরির হাতে দিলে।

উৎসুকভাবে ছবিগুলি দেখতে দেখতে গ্রেগরি বলে, খুব সুন্দর আপনার অঙ্কন, কয়েকটি রেখার টানে দেহের সৌন্দর্য ফুটিয়া উঠিয়াছে।

—আপনি সমজদার লোক, রেখার ফাঁক কল্লনার রঙে ভরে তুলতে পারেন।

—দেখুন, কনক রায় মহাশয়, এই ছবিগুলি দর্শনে আমার যুদ্ধের কথা মনে পড়িতেছে। গত war-এ একবার আমি no man's land-এ আবদ্ধ হইয়াছিলাম।

—সে কি রকম?

—শেষরাত্রে অর্ডার আসিল, আক্রমণ কর। No man's land-এর ওপর পাগলের মত সকলে ছুটিয়া চলিলাম। এমন সময় অদূরে এক কামানের গোলা আসিয়া পড়িল সম্মুখের এক গর্তে, গোলাটি ফাটিতে গর্ত আরও বড় হইয়া গেল, গর্ত বলা যায় না, একটি শুষ্ক পুষ্করিণীর গর্ত। পদতলের মাটি খসিয়া পড়িল, আমি গড়াইয়া চলিলাম। যখন উঠিয়া বসিলাম, দেখি গর্তের তলদেশে গড়াইয়া আসিয়াছি, আর আমার পার্শ্বে একটি শত্রু-সৈনিক, বোধ হয় সে গর্তের অপরদিক হইতে গড়াইয়া আসিয়াছে। আমার বন্দুক খসিয়া পড়িয়াছে, পকেটে রিভলভার সন্ধান করিলাম। শত্রু-সৈনিকটির হাতেও বন্দুক নাই, সে ভীতভাবে বলিল, যুদ্ধ করিবার এখানে স্থান নাই, আসুন স্থির হইয়া বসিয়া থাকি, উঠিতে চেষ্টা করিবেন না, তা হইলে মৃত্যু স্থনিশ্চিত। উপরে ভয়ানক শব্দ। কান বধির হইয়া যায়। দুইজনে স্থির হইয়া পাশাপাশি বসিয়া রহিলাম। সময়ের জ্ঞান নাই। কতকক্ষণ কাটিয়া গেল। একবার উঠিতে চেষ্টা করিলাম। শত্রু-সৈনিকটি জামা টানিল। বলিল, দেখিতেছেন না, উপরে অগ্নিবর্ষণ হইতেছে; স্থির হইয়া বসুন, আক্রমণ শেষ হইলে, রাত্রে উঠিবার চেষ্টা করা যাইবে। আমি বলিলাম, সমস্তদিন এখানে বসিয়া থাকিব কিরূপে! পাগল হইয়া যাইব। সে বলিল, আসুন, গল্প করা যাক। মনকে অগ্র চিন্তায় নিযুক্ত করুন। তারপর সে কতকগুলি ছবি

পকেট হটতে বাহির করিল, cheap postcards, পৃথিবীর নানা দেশের নানা অভিনেত্রী, নর্তকীর ছবি, আরও নানারূপ ছবি, বুঝিতেছেন। সে বলিল, যখন মন অবসন্ন হয়, আমি ছবি দেখি। আশ্চর্য্য, জানেন রায় মহাশয়, সেই ছবিগুলি দেখিয়া দিন স্থিরভাবে কাটিয়া গেল; তা না হইলে বোধ হয় সে দিন পাগল হইয়া যাইতাম—শুধু শব্দে অগ্নিলীলার দীপ্তিতে নয়, ভয়ে সন্দেহে পাগল হইয়া যাইতাম—আপনার ছবি দেখিয়া সেই ছবিগুলির কথা মনে পড়িল।

বিস্মিত হয়ে কনক গ্রেগরির গল্প শুনিছিল। হাই তুলে সে বলে, যুদ্ধের অনেক রকম গল্প শুনেছি কিন্তু এ রকম গল্প শুনি নি।

গ্রেগরি বলে, আপনার ঘুম আসিতেছে, আমার কেবল যুদ্ধের কথা মনে পড়িতেছে, বিশেষতঃ এই রেলের ধ্বনি শুনিলে মাঝে মাঝে মনে হয় যেন no man's land-এ আছি, চোখে আর ঘুম আসে না। আপনি নিদ্রা যান, মনমতে জাগাইয়া দিব।

কনক বলিল, ছবিগুলি আপনি রাখুন, দেখুন ভাল করে। আমায় কিন্তু জাগাতে ভুলবেন না।

কনক ওপরের বাক্সে উঠে শুয়ে পড়ল।

আড়চোখে বিরিক্ষি ছবিগুলির দিকে চাইছিল। স্বপ্ন আলোকে ছবিগুলি অস্পষ্ট দেখা যাচ্ছে। নারীদেহের নানা ভঙ্গিমা। প্রেমদাসের সামনে ছবিগুলি চেয়ে দেখা যায় না।

চোখ বুজে বিরিক্ষি পাশ ফিরলে। প্রেমদাস বলেছেন, তোমার মেয়ের বিবাহের জন্ত ভাবনা কোরো না, বিরিক্ষি, নিশ্চিন্তমনে ঘুমাও। কিন্তু তার মন হতে চিন্তা যে দূর হচ্ছে না। ঠাকুর যে স্পষ্ট করে বলেন না, যেন একটু রহস্য রাখতে চান। ফতেচাঁদকে ত বলে দিতে পারতেন, বিরিক্ষির মেয়ের বিয়ের খরচটা দিয়ে দিও।



বিরিঞ্চি ভাবতে লাগল, ঠাকুরের কথা ত নিষ্ফল হতে পারে না। হয়ত সে অথ কোন উপায়ে হঠাৎ অনেক টাকা পেয়ে যাবে। এই যে রাধাকান্ত মিত্তিরকে ছুপুরে বল্লেন, তুমি আজ টাকা পেয়ে যাবে, সে ত সত্যিই টাকা ধার পেল। ফতেচাঁদ কি সন্তে টাকা ধার দিচ্ছে, তা জানতে পারে নি। রাধাকান্ত নিশ্চয় টাকা ধার পেয়েছেন, তা না হলে অমন করে ঘুমাতে পারেন !

তার চোখে ঘুম আসছে না। পেটের ব্যথাটা আবার যেন জেগে উঠছে, অসহ্য মনে হচ্ছে।

অশ্রুট আর্দ্রনাদ করে বিরিঞ্চি পার্শ্বপরিবর্তন করলে।

প্রেমদাস বিরিঞ্চির বাকের পাশে এসে দাঁড়ালেন, ধীরে বল্লেন, কি কষ্ট হচ্ছে বিরিঞ্চি ?

—ঠাকুর, পেটে ব্যথা—

—সব ব্যথা সেরে যাবে।

—ঠাকুর !

—শোন, বিরিঞ্চি, তোমার কণ্ঠার বিবাহের ভার আমি নিলুম, তুমি নিশ্চিন্ত মনে ঘুমাও, মন শান্ত কর ! না, না, উঠো না, আমি তোমায় আশীর্বাদ করছি, মন শান্ত কর।

বিরিঞ্চি চমকে উঠল। ঠাকুর তার মনের কথা কেমন করে জানলেন ! তার মুখে কোন কথা এল না। বিস্মিত কৃতজ্ঞতার সঙ্গে সে প্রেমদাসের দিকে চাইলে।

প্রেমদাস নিজের বেঞ্চে গিয়ে আবার ধ্যানের আসনে স্তব্ধ হয়ে বসলেন।

বিরিঞ্চি চোখ বুজলে। মাথা যেন তার ঘুরছে, ট্রেন বড় বেশী ছলছে। মনে মনে সে ভগবানের নাম স্মরণ করতে লাগল।

ছোট এক ষ্টেশনে হঠাৎ ট্রেন থামাতে জগদীশ কুপেতে ফিরে এল, হাতে কাগজ ভরা মোটা পোর্টফোলিও। তার কালো মুগ আরও রুক্ষ, গভীর, হঠাৎ দেখলে ভয় করে। কণ্ঠে বিস্ময়ের স্বর এনে সে বলে, এখনও ঘুমোওনি তোমরা? অনুপমা তার কদাকার মুখের দিকে চাইলে, কোন উত্তর দিলে না।

মালতী দাঁড়িয়ে উঠে বলে, আমি ঘাই অনুপমাদি।

অনুপমা মালতীর হাত ধরে বলে, তোকে ধরে রাখব না, কল্যাণের কথাটা ভাবিস্।

মালতী হেসে বলে, সবার কথাই আমি ভাবব্; কোন পক্ষপাত করব না।

প্ল্যাটফর্মের অন্ধকারে মালতী নেমে গেল। তার মূর্তির পাশে পাশে আর একটি কালো ছায়া চলেছে। মনে হল সে কল্যাণ। অনুপমার ইচ্ছা করল সে-ও নেমে চলে যায় রাত্রির স্নিগ্ধ অন্ধকারের মধ্যে।

ড্রেস স্ট বদলে জগদীশ নীরবে স্লিপিংস্ট পরলে। সে গভীর চিন্তায় মগ্ন।

জগদীশ ধীরে বলে, এবার ঘুমাও, রাত অনেক হল।

—ঘুম ত আমার হাতধরা নয়।

—চেষ্টা কর।

—তোমাকে ত চেষ্টা করতে হবে না, তুমি শুয়ে পড়।

—ওষুধটা খাবে?

—আচ্ছা, কষ্ট যদি না হয় ত দাও, আর রাত জাগতে ইচ্ছে করছে না, দেখি যদি ঘুম হয়।

—অত ভেবো না, বসে বসে অত ভাবলে ঘুম আসবে কি করে ?

—বক্তৃতা না দিয়ে ওষুধটা যদি দিতে চাও ত দাও।

জগদীশ নীরবে অল্পমাকে ওষুধ-ভরা গেলাস দিলে।

ওষুধ খেয়ে অল্পমা বললে, duty হয়ে গেছে, এবার শুয়ে পড়।

জগদীশ ধীরে বললে, শোন, কথাটা শুনে তুমি রাগ করবে, বোধে পৌছে তার পরদিনই আমাদের ফিরতে হবে।

সে আমি জানি, বলে অল্পমা বাহিরের আকাশের দিকে মুখ ফিরিয়ে বসল।

শোন, ইয়োরোপের যুদ্ধ—বলে জগদীশ থেমে গেল।

উচ্চরবে অল্পমা হেসে উঠল। ব্যঙ্গের সহিত বললে, শুয়ে পড়, না হলে কোন official secret বলে ফেলবে।

কথাটা কাউকে বোলো না, বলে জগদীশ ওপরে বাক্কে উঠল।

অন্ধকার রাত আরও গভীর হয়ে এসেছে। ওষুধ খেয়েও অল্পমার চোখে ঘুম আসছে না। গাড়ীর আলো নিভিয়ে সে চোখ বুজে ঘুমোতে চাইলে। মাথা দপ্‌দপ্‌ করছে।

অবিরামগতিতে ঝক্‌ঝক্‌ শব্দে ট্রেন ছুটে চলেছে। দেবপ্রিয়ের বক্তৃতার কথাগুলি অল্পমার মনে পড়ে গেল। ট্রেনের শব্দের মধ্যে সে শুনতে পেলে সৈনিকদলের অস্ত্রের ঝঙ্কনা—চলেছে বন্দুকধারী সৈন্যদল

মোটর-সাইকেলে, চলেছে অগ্নিবর্ষী ট্যাঙ্কের সারি, বোমা-ভরা এরোপ্লেন—  
—রাত্রির অন্ধকারে প্রলয়ান্বিত জ্বলছে।

অনুপমা ভয়ে উঠে বসল। গাড়ীর আলো জ্বলে দিলে। চূপ করে  
চেয়ে রইল কালো আকাশের দিকে।

নয়নে তার অশ্রু নেই, জ্বালাও নেই; অন্তরে যেন কোন কামনা  
নেই, কোন ক্ষোভও নেই, শুধু শান্তি, শুধু সে শান্তি চায়, শান্তিময়  
স্থিতি।

এক বড় অজানা ষ্টেশনে ট্রেন থেমেছে। রাত্রিশেষের অন্ধকার  
রহস্যময়। টিপ্‌টিপ্‌ বৃষ্টি পড়ছে।

জানলা দিয়ে মুখ বাড়িয়ে অনুপমা প্ল্যাটফর্মের দিকে চেয়ে রইল।  
ওপরের বান্ধে জগদীশ স্মৃশ্রু।

পাশের প্রথম শ্রেণীর গাড়ীর সামনে এক যুবক এসে দাঁড়াল, যোধপুরী  
ব্রিচেস্-পরা অদ্ভুত মূর্তি; ওই গাড়ীতে বোধ হয় ঢুকতে চায়।

সবিস্ময়ে অনুপমা দেখলে, গাড়ীর দরজা খুলে এক তরুণী নেমে  
যুবকটির পাশে দাঁড়াল। আর্দ্র বাতাসে তাহাদের মুহূর্তের কথাবার্তা  
ভেসে আসছে।

—ভয় করছে!

—তবে নামলে কেন?

—কি জেলাস্ জান না।

—তুমি কি তার সম্পত্তি?

—সত্যি যাবে?

—তবে কি ঠাট্টা করবার জগ্গে বৃষ্টিতে ভিজতে ভিজতে এলুম।  
রাতে ঘুমাই নি।

—কাল যে আমার স্কটিং।

—ওদের ডিরেক্টর আমার বন্ধু, টেলিগ্রাম করে দেব।

—একদিন?

—সে দেখা যাবে, তবে তিনদিনের বেশী নয়, ইলোরার ডাকবাংলো  
দেখলে আসতে ইচ্ছে করবে না।

—তবে শীগ্গীর চলো, জেগে না ওঠে সবাই।

—সেই লেখক না ফিলজ্জফারটিও কি এগাড়ীতে?

—হাঁ, নিদ্রায় অচেতন। কনক! তুমি আমায় বিপদে ফেলবে।

—অত ভয় ত যাও গাড়ীতে ওঠ গে।

—না, না, খুব exciting লাগছে—তুমি dangerous.

—আর কথা নয়, চলো।

—কোন্ দিকে?

—ওদিকের প্ল্যাটফর্মে ট্রেন দাঁড়িয়ে।

তরুণীর হাত ধরে যুবকটি আর্দ্র অন্ধকারে কোথায় হারিয়ে গেল;  
চারিদিকে ছায়ামূর্ত্তি ঘুরে বেড়াচ্ছে।

জোরে বৃষ্টি এল, ট্রেন ছুলে উঠল। অল্পপমা জানলার কাচ বন্ধ  
করে দিলে। বারিবর্ষণমুখর যামিনীর অন্ধকারে ট্রেন ছুটে চলেছে।  
লৌহচক্রের কর্কশ ঘর্ঘরধ্বনি ছাপিয়ে আকুল বারিধারার সঙ্গীত বাজছে।  
এ গীতধ্বনিতে অল্পপমার চিত্ত ধীরে শান্ত হয়ে আসছে।

যেন ঝড়ের বাতাসে দরজা খুলে গেল। দম্কা বুষ্টির জলের সঙ্গে সমর গাড়ীতে প্রবেশ করলে। স্বপ্নঘোর হতে অন্তর্যমা চমকে চাইল ;

—দিদি!

—সমর! ভয়ঙ্কর ভিজে গেছি। বোস্ আমার পাশে। এমন ভিজে বেড়াচ্ছ কেন?

—আমার বোম্বে যাওয়া হবে না, সে জ্ঞাত তোমার সঙ্গে দেখা করতে এলুম।

—চুপ করে বোস্।

—বসবার সময় নেই দিদি, পরের স্টেশনেই আমায় সরতে হবে।

—চুপে চুপে বল। কোথা যাবি?

—এখন পুলিশের হাত থেকে ত বাঁচি।

—কোন ভয় নেই।

—যুদ্ধ লেগেছে, ইয়োরোপে। তুমিও বাঁচাতে পারবে না।

—সমর!

—দিদি! তোমার ঘুম ভাঙালুম।

—আমি জেগেছিলুম।

—রাতে কি তোমার ঘুম হয় না?

—ট্রেনের এ শব্দে আমি ঘুমোতে পারছি না; আর ওই লেখকটির বক্তৃতা শুনে, আমি খালি শুনিছি যেন সৈন্যদল কামান-গাড়ী টেনে টেনে চলেছে।

—তুমি বড় কল্পনা-প্রবণ।

—ঠিক বলেছি। কিন্তু তোমার কল্পনাশক্তিও বড় কম নয়, তা না হলে এই রাষ্ট্র, মানবসমাজ ভেঙে নতুন সভ্যতা সৃষ্টি করবার স্বপ্ন দেখিস্!

—দিদি, নতুন সভ্যতার কথা যাক্, তোমাকে ইয়োরোপে নিয়ে যেতে পারলুম না, এই দুঃখ ।

—আমার সঙ্গে কল্কাতায় ফিরে চল, আমাদের পুরানো বাগান-বাড়ী ভাল লাগবে ।

—আর লোভ দেখিও না । সময় আমার বেশী নেই, তোমার পাশে একটু চুপ করে বসতে দাও ।

—মাথাটা কাছে নিয়ে আয়, মুছিয়ে দি ।

—দিদি, তোমার বুকে এমন করে মাথা রাখলে ঘুমিয়ে পড়ব, কিন্তু ঘুমোলে আমার চলবে না ।

সমর মাথা তুলে বসল । হু'জনে বসে রইল পাশাপাশি । বর্ষণমুখর তমিস্রায় ট্রেন ছুটে চলেছে ।

—সমর !

—দিদি !

—মাঝে মাঝে খবর দিও । কাউকে আমি ধরে রাখতে চাই না ।

—ধরে রাখাই-ত বন্ধন ।

—আর ভাবতে পারি না । আমি যে কি বন্দিনী, তুই জানিস্ না ।

—আমাদের নতুন সমাজে কেউ বন্দিনী থাকবে না ।

—ভেবে ভেবে আমি শ্রান্ত । শান্তি কোথায় ?

—আইডিয়লের জগৎ সংগ্রামেতেই শান্তি ।

—সংগ্রামে শান্তি ?

—হাঁ দিদি, তা না হলে কেউ কি প্রাণ দিতে পারত ?

—সংগ্রামের শান্তি আমি চাই না, আমি চাই প্রেমের শান্তি ।

—অলৌক স্বপ্ন !

—চূপ ! চূপ করে বোস, কথায় শুধু কথার সৃষ্টি করে ।

সমরের ভিজে কাঁধে মাথা রেখে অনুপমা চোখ বুজে চূপ করে এলিয়ে বসল ।

ট্রেন ছুটে চলেছে দুর্নিবার বেগে ।

নাসিক ষ্টেশনে ট্রেন যখন থামল, বৃষ্টি থেমে গেছে, কৃষ্ণ ছিন্ন মেঘদলে উষার আলোর আভাস ।

সন্ন্যাসী প্রেমদাস আসন হতে উঠলেন । নাসিকে নেমে তিনি পদব্রজে যাবেন, এই সংকল্প তাঁর মনে ।

রাধাকান্ত গভীর নিদ্রিত । ওপরে বাক্কে বিরিকি স্থির, স্তব্ধ । প্রেমদাস বিরিকির সামনে এসে ডাকলেন, বিরিকি ! বিরিকি !

কোন সাড়া নেই । বিরিকির দেহে প্রেমদাস ধীরে হাত দিলেন, শীতল দেহ, বক্ষস্পন্দন অনুভব করা যায় না । প্রেমদাস যুক্তকরে এক মুহূর্ত্ত বিরিকির স্থির শায়িত দেহের সম্মুখে দাঁড়িয়ে রইলেন, মনে মনে মন্ত্র জপ করতে লাগলেন, হে যম, হে অমোঘ শাস্ত্র নিয়ম, তোমাকে প্রণাম ।

ধীরে প্রেমদাস প্ল্যাটফর্মে নামলেন । ফতেসিং-এর গাড়ীর সামনে এসে দাঁড়ালেন । প্রেমদাসকে দেখে ফতেসিং তাড়াতাড়ি নেমে এল ।

—ফতেসিং, আমি এখানে নেমে যাচ্ছি ।

—এ যে বড় ক্ষণিকের দেখা পেলুম ঠাকুর, বোম্বোনে আসতে রূপা করুন ।



—শোন, রাধাকান্ত বাবুর সঙ্গে তোমার বন্দোবস্ত হয়ে গেছে ?

—ঠাকুরের যখন সেই রকম ইচ্ছে, আমি দু'লাখ দেব, রাজী হয়েছি।  
এখন ঠাকুরের আশীর্বাদ।

—আর একটি কাজ, ও গাড়ীতে বিরিকি বলে একটি বুদ্ধ লোক আছে, রাধাকান্তকে বলে তার এক অনুচর কন্ঠার বিবাহের সব ব্যবস্থা করে দিতে; রাধাকান্ত ঘুমোচ্ছে, আমি সেজন্ত তোমায় বলে গেলুম। আর ট্রেন বোম্বোতে পৌঁছালে বিরিকির সব ব্যবস্থা তুমি করো। বোম্বো সহর সে জানত না।

পদধূলি নিয়ে ফতেসিং বলে, এ ত বাবার অন্তগ্রহ, আবার কবে দর্শন পাব !

দ্রুতপদে প্রেমদাস এগিয়ে চলেন। অন্তপমার সঙ্গে একবার দেখা করে যেতে হবে।

কুপের সামনে আসতেই সমর তার পথরোধ করে দাঁড়াল।

—কি চান আপনি ?

—আমি চলে যাচ্ছি, অন্তপমাকে একবার দেখে যেতে চাই।

—ওই দেখুন তিনি শান্ত হয়ে ঘুমচ্ছেন, দূর থেকে দেখে চলে যান।  
জাগাবেন না।

প্রেমদাস দেখলেন রঙীন কুশানের স্তূপে মাথা রেখে অন্তপমা এলিয়ে শুয়ে আছে, ভোরের আলোয় শিশিরভেজা অর্ধক্ষুণ্টা কমলিনীর মত।

—বড় সুন্দর, শান্ত চিত্র। আমি জাগাতে চাই না, একটা কথা তুমি বলতে পারবে ?

—কোন কথা বলতে পারব না, কারণ আমিও এ স্টেশনে চলে যাচ্ছি।

প্রেমদাস যুক্তকরে স্তব্ধ হয়ে অন্তপমার দিকে চেয়ে দাঁড়ালেন, মনে মনে কি প্রার্থনা করলেন।

সমর যুদ্ধের বলে, শুভন, আপনি ত সন্ন্যাসী প্রেমদাস ?

—হাঁ।

—আমি একজন কমুনিষ্ট। আমাকে পালাতে হচ্ছে। আমি আপনার সঙ্গে যাব। দরকার হলে গৈরিক বসনও পরতে পারি। আপনার শিষ্য বলে, আমাকে কিছুদিন রাখতে হবে। লুকিয়ে থাকবার জন্তে সাহায্য করতে হবে।

—তুমি যে ইয়োরোপে যাবে ?

—না, ঠিক করলুম, ভারতবর্ষেই থাকবো। আমার কাজ এই দেশে, একথা আজ রাতে দিদির পাশে বসে অনুভব করেছি।

—বেশ, চলো, দেবী কোরো না।

—কিন্তু বিপদ আছে, পুলিশ আপনাকে ধরতে পারে।

—সন্ন্যাসী কোন বিপদকে ভয় করে না। ভয়কে জয় করা সাধনার প্রথম অঙ্গ। এগিয়ে চলো।

সমরের বিদায়-করণ রাত্রিজাগরণপাণ্ডুর মুখের দিকে প্রেমদাস চাইলেন। আবেগের সঙ্গে তিনি সমরকে আলিঙ্গন করে বলেন, আর দেবী নয়, চলো, কোন ভয় নেই।

সমরের হাত ধরে প্রেমদাস দ্রুত চঞ্চল পদে এগিয়ে চলেন। মেঘাচ্ছন্ন উষার আকাশের দিকে চেয়ে মনে মনে প্রার্থনা করতে লাগলেন, হে আদিত্য, অঙ্ককার পর্জন্তের ঘন আবরণের উপরে তোমার অনিবার্ণ অগ্নির চিরজ্যোতি জীবনের প্রতিফলে দেদীপ্যমান, এ কথা কখনও যেন ভুলে না যাই।

সন্ন্যাসীর সঙ্গে সমর চলে গেল। নিদ্রাতুরা অল্পমা জানতে পারল না, রঙীন কুশানে সে মাথাটা আরও চেপে রাখলে।

বোম্বে ষ্টেশন ।

তেরশ' উনপঞ্চাশ মাইল পাড়ি দিয়ে মেল ট্রেন এসে থেমেছে ।

নানাবেশী নানাভাষী যাত্রীজনতার চঞ্চল বগা প্রভাতের মুহূ আলোক-ভরা প্ল্যাটফর্মে বিচিত্র রহস্যময় মূর্তিশ্রোতের মত । হাঁকাহাঁকি, ঠেলাঠেলি, ছুটোছুটির অন্ত নেই ।

ষ্টেশনের এই জনতার দিকে নিদ্রাপ্রফুল্ল চোখে চেয়ে কল্যাণকুমার ঘোষ পাইপে তামাক ভরলে । ইংলণ্ডে সে যে তামাক খেত সে তামাক অনেক খুঁজে যোগাড় করেছিল ; ট্রেন-পথে সে তামাক নিঃশেষিত হল, আর পাবার সম্ভাবনা নেই, এখন পাইপ ছেড়ে আলবলায় অস্থরী তামাকের ধূমপান করতে হবে, ভায়লেটের-দেওয়া পাইপে ধূলা জমবে ।

আর্থার গ্রেগরি উত্তেজিতভাবে এগিয়ে বসে, ঘোষ, কি ভয়ঙ্কর ! আবার যুদ্ধ !

গ্রেগরির আর ধূতি-পাঞ্জাবী-পরা বাঙ্গালী সাজ নেই, থাকী-রঙের হাপ্-প্যান্ট ও কোট পরা, পায়ে মোটা বৃটজুতা ।

কল্যাণ একটু হেসে বসে, এ সজ্জা যে, যুদ্ধে যাচ্ছ নাকি ?

গ্রেগরি গম্ভীরভাবে বসে, Surely. I am going to enlist.

কল্যাণ বসে, Moral armament চল না ।

গ্রেগরি আবেগের সঙ্গে বসে, না, Hunsর সঙ্গে reason চল না, bombs ! bombs !

বীরপদভরে প্ল্যাটফর্মের কংক্রিট-মেজেতে বৃটজুতা ঠুকে গ্রেগরি এগিয়ে গেল ।

ছোট ঝকঝকে লাইটারের সাহায্যে পাইপে অগ্নিসংযোগ করে কল্যাণ দ্বিতীয় শ্রেণীর মহিলা-গাড়ীর সামনে এসে দাঁড়াল। দীপিকা সাজকরে গাড়ীর দরজায় দাঁড়িয়েছিল, কল্যাণকে দেখে গাড়ী হতে লাফিয়ে প্ল্যাটফর্মে নামলে ; ওই আশ্চর্য্যকর ঝকঝকে দেশলাইয়ের ওপর তার লোভ। কল্যাণের হাত ধরে ব্যাগ হয়ে সে বসে, রাঙামামা, আমাকে দাও একবার, আমি জ্বালাব না, শুধু হাতে ধরে থাকব।

গাড়ীর জানলা হতে মুখ বাড়িয়ে শিবাজী চোঁচিয়ে উঠল, আমি একবার জ্বালাব দিদি !

সরোজিনী ছোট খোকার বিছানা পাট করে বাঁধতে বাঁধতে ধমক দিয়ে উঠল, শিবু আবার জানলায় মুখ বাড়িয়েছ !

দেশলাই পাবার কোন আশা নেই দেখে শিবাজী চোঁচিয়ে উঠল, রাঙামামা ইঞ্জিন দেখাবে বলেছিলে, ইঞ্জিন—

সরোজিনী উদ্বিগ্নভাবে বসে, দাদা, টেলিগ্রাম ঠিক করেছিলে ? উনি ত এখনও এসে পৌঁছালেন না !

ভারী নিরেট ওলের মত মাথাটা নেড়ে কল্যাণ গাড়ীর জানলার দিকে এগিয়ে গেল, মালতী সম্বন্ধে সরোজিনীকে যে কথা বলতে চাইছে, সে কথা সে বলতে পারল না, হেসে শুধু বসে, অত ভাবনা কিসের, এতদূর যখন এসেছি, বাড়ী পর্য্যন্ত পৌঁছে দেব।

সরোজিনী খোকাকে জামা পরাতে পরাতে বসে, আচ্ছা, কুলী দিয়ে জিনিষগুলো নামাও ত, আর—কোথায় যাচ্ছ ! না, দাদা, তুমি এখন কোথাও যেও না।

কল্যাণ কোন উত্তর দিলে না, বোধ হয় সরোজিনীর কোন কথা সে শুনতে পায়নি। সে দেখেছে মধ্যমশ্রেণীর গাড়ীর সামনে একটি ছোট ব্যাগ হাতে করে মালতী দাঁড়িয়ে, প্ল্যাটফর্মের জনতার মধ্যে সে

একাকিনী, দিশাহারা নির্ঝাক দাঁড়িয়ে। পাইপ টানতে টানতে কল্যাণ হুঁহু করে এগিয়ে গেল সেদিকে।

প্রভাতের আলোকে মালতীর শুভ করুণ মুখশ্রী মায়াময় হয়ে উঠেছে, হাল্কা নীলশাড়ীর রূপালী পাড় জল্জল্ করছে।

মালতীর ছোট স্ট্রিকেশটা হাতে ধরে তুলে কল্যাণ বলে, মালতী দেবী, একটু দেরী হয়ে গেল আসতে, ক্ষমা করবেন।

মালতী একটু বিস্মিত বিরক্তভাবে কল্যাণের দিকে চাইলে। এ জনতায় সে যাকে খুঁজছে, সে তরুণ এখানে নেই, সে জানে, তবু নিশ্চল দাঁড়িয়ে দুই চোখ দিয়ে খুঁজছে।

কল্যাণ ধীরে বলে, চলুন মিস্ মল্লিক, আমার বোনের সঙ্গে আপনার আলাপ করিয়ে দি। আমার ভাগ্নিরা আপনায় পেলেন খুসি হবে।

মালতী কোন কথা বলে না। দেহে ক্লান্তি, মনে অবসাদ, নিদ্রাহারা দুই চোখ জল্ছে; কিছু ভাববার, প্রতিবাদ করবার শক্তি যেন তার নেই। স্নান হেসে সে কল্যাণের সঙ্গে এগিয়ে চলল।

একটু এগিয়ে মালতী কল্যাণের মুখের দিকে চাইলে। তার মন অনেক হাল্কা হয়ে এসেছে। ধীরে বলে, অনুপমাদিদির গাড়ী কোন্ দিকে?

মুখ হতে ধূমের কুণ্ডলী বাহির করে কল্যাণ বলে, সে দিকেই ত যাচ্ছি।

মালতী শ্রান্ত কণ্ঠে বলে, তাঁর সঙ্গে একবার দেখা করে যেতে চাই।

নির্জল ছইন্দির গেলাস নিঃশেষে শেষ করে গণেশ দেবপ্রিয়ের দিকে

স্ক্রুদনয়নে চাইলে। বিরক্তির সঙ্গে বললে, ট্রেনটা যেন থেমে গেছে মনে হচ্ছে, বড় আশ্চর্য চলছে !

দেবপ্রিয় ভাবল গণেশের বুঝি সতিয়া নেশা ধরছে, ট্রেন চলছে কি থেমে আছে বুঝতে পারছে না। একটু ভীতভাবে সে বললে, ট্রেন ত থেমে আছে অনেকক্ষণ, আমরা বোসে স্টেশনে পৌঁছেছি।

শূন্য গেলাস মেজেতে ছুঁড়ে ফেলে গণেশ বলে উঠল, আলবাত চলছে ট্রেন, আমার যদি মনে হয় চলছে, ত চলছে—

দেবপ্রিয় কালো চশমা পরে বললে, ঠিক বলেছেন, আমাদের অনুভূতি দিয়ে আমরা জগৎ তৈরি করছি, তার আলাদা সত্তা কোথায়—সবই আপেক্ষিক।

গণেশ দাঁড়িয়ে উঠল। ব্যঙ্গের স্বরে বললে, ওহে পণ্ডিত, তোমার ফিলজফি রাখ, ওতে আমায় ভোলাতে পারবে না। এখন শিপ্রাদেবী যে উধাও হল, তা'র কি করছ ?

দেবপ্রিয় গম্ভীরভাবে বললে, ভাবছি, কলিকাতায় কাগজের আফিসে এ খবরটা টেলিগ্রাম করে পাঠাই।

গণেশ হেসে উঠল। বললে, বেশ বেশ, ছু'পয়সা হবে। আমার নামটাও দেবে নাকি ?

দেবপ্রিয় সঙ্কোচের সঙ্গে বললে, বলেন ত দেব না।

গণেশ দেবপ্রিয়ের পাশে বসে তাকে এক ঝাঁকুনি দিয়ে বললে, না, না, দেবে বৈ কি। আমার মত অনেক fool ত আছে, আমার দুর্দশা দেখে তাদের যদি কিছু শিক্ষা হয় !

দেবপ্রিয় বললে, এমন দুর্দশা আর কি ? সত্যি কি দুঃখ হচ্ছে ? আমারও মনে হয় good riddance—আর, এ বিষয়ে—

বাধা দিয়ে গণেশ বললে, দেখুন দেবপ্রিয় বাবু, আপনি এ বিষয়ে কিছু

জানেন না, বোঝেন না, স্ততরাং আপনার কি মনে হয় তা আমি শুনতে চাই না, কিন্তু মশাই, আমার না হয় একটু মাত্রা বেশী হয়েছিল, আপনি কি একটু watchও করতে পারলেন না—এমন বোকা বানিয়ে চলে গেল—যাক্, যাবে কোথায়, আবার আসতে হবে। আপনি বলছেন বোধহেতে আমরা এসে পৌছেছি। হাঁ, তাইত মনে হচ্ছে, ওই ত ডিরেক্টর আসছেন, দু'হাতে দুই বড় garland—এখন একটি মালা আপনায় পরতে হচ্ছে মশাই।

দেবপ্রিয় লাফিয়ে দাঁড়িয়ে উঠল, বিস্মিতভাবে বলল, আমাকে ? না, না। চলুন নামা যাক। মা নিশ্চয় ব্যস্ত হয়ে উঠেছেন।

গণেশ ব্যঙ্গস্বরে বলে উঠল, বড় যে মায়ের কথা মনে পড়ে গেল দেখছি—না, না, পালালে চলবে না—প্যারিস ফেরতের পাটটা আপনি করবেন, ডিরেক্টরের সঙ্গে বন্দোবস্ত করে দি।

রেন্তোরী-গাড়ীর বয় এসে পথে আহাৰ্য্য ও পানীয় সরবরাহ বাবদ বিল হাতে করে গাড়ীর দরজা খুলে দাঁড়াল। সার্টের পকেট হতে কতকগুলি দশটাকার নোট নিয়ে না গুণে গণেশ বয়ের হাতে দিলে। বিলের মোট অঙ্কটা দেখে দেবপ্রিয় চমকে উঠল, তার তিনমাসের সংসারযাত্রার খরচ এর চেয়ে কম।

ট্রেন থেকে দু'জনে প্ল্যাটফর্মে নামল।

ফোলা-হাতা সার্টের বোতাম একটা ছিঁড়ে গণেশ বলল, আচ্ছা দেবপ্রিয়বাবু আপনি যান—আপনার মূ ব্যস্ত হচ্ছেন, বুঝছি—বিকেলের দিকে একবার তাজমহল হোটেলে খোঁজ করবেন—অসুস্থিতা শিপ্রার না দেখা পেতে পারেন, নৰ্মদা কাবেরী যমুনা অনেকের দেখা পাবেন—চাইকি হিমশীতল মর্শ্বরগহ্বর হতে মমতাজ উঠে আসতে পারে আতপ্ত

বক্ষের উষ্ণ শোণিতশ্রোতের স্পর্শ পাবার জন্যে—এই ধমনীর জ্বালাময় রক্তধারার ছন্দ—হুঁ, বুঝলেন।

দেবপ্রিয় দেখলে দূরে তার মা কুলীর সাহায্যে গুড়ের নাগরি, ডাব-নারিকেলের বস্তা, ট্রাঙ্ক পুঁটলি সব নামাচ্ছেন। মুখের ভাব বিশেষ প্রসন্ন বলে মনে হয় না।

দেবপ্রিয় তাড়াতাড়ি বলে, গণেশবাবু আপনি যে জীবন রসের রসিক, তা সাধারণ লোকে বুঝতে পারে না—কিন্তু এখন একটু সময় নেই, আপনার সঙ্গে নিশ্চয় দেখা করব, আপনার সঙ্গে পরিচয়ে মুগ্ধ হয়েছি—জীবনের একটা নতুন রূপ—পরে কথা হবে—এখন যেতে হবে।

গণেশ বলে, আপনি সমজদার, তাই বুঝলেন। কিন্তু ওদিকে কোথায় যাচ্ছেন? আপনার মায়ের গাড়ী—

বাধা দিয়ে দেবপ্রিয় বলে, ওদিকে যদি যান ত আমার মাকে একটু বলে দেবেন অল্পগ্রহ করে, আমি এখুনি আসছি, বলবেন, একটা জরুরী টেলিগ্রাম করতে গেছি, খবরটা এখুনি কলিকাতায় কাগজের আফিসে না পাঠালে দেবী হয়ে যাবে, আজ বিকেলে ছাপা হবে না—বলবেন, আমি এখুনি আসছি।

দেবপ্রিয় দ্রুতপদে টেলিগ্রাফ আফিসের দিকে এগিয়ে গেল।

সিনেমা-কোম্পানীর ডিরেক্টর সদলবলে আসছে দেখে গণেশ প্রস্তুত হয়ে দাঁড়াল। ভাবতে লাগল, দু’তিন দিনের মধ্যেই শিপ্রা বোম্বেতে এসে তার আশ্রয় ভিক্ষা করবে; তখন স্ফটিং করার দু’তিন দিন দেবীর জন্ম মোটা খেসারতি, তাকেই দিতে হবে, তা ছাড়া আর কে দেবে। পকেটের চেক-বইটা হাত দিয়ে সে চাপড়ালে। এ বিষয়ে ডিরেক্টরের সঙ্গে দর-দস্তুর সে ছুপুরেই করে নেবে। তাহলে সন্ধ্যাটা নর্সনা-কাবেরী-যমুনাদের সঙ্গে নির্ভাবনায় কাটান যেতে পারে।



ময়লা দেশী ধূতির জরিপাড় লুটান কোঁচা শ্রাওল দিয়ে মাড়াতে মাড়াতে গণেশ এগিয়ে চল্ল।

প্রথম শ্রেণীর কুপের সামনে তাজমহল হোটেলের তকমা-পরা লোকেরা জিনিষ নামিয়ে গাদা করেছে; হীরা সিং দাঁড়িয়ে আছে নিশ্চল প্রহরীর মত; জগদীশ জরুরী টেলিফোন ও টেলিগ্রাম করতে গেছে, কুপের চেয়ারে অনুপমা এলিয়ে বসে, সিং-শাড়ীর বিচিত্র বর্ণ কুপের আলোছায়ায় রহস্যময়।

মুগ্ধ হয়ে কল্যাণ দাঁড়াল, এ যেন রেমব্রান্টের-আঁকা ছবি, কৃষ্ণ জলতার তলে আয়ত নয়নের কৃষ্ণতারকার রূপ তেমনি জ্যোতির্ময়, তেমনি মায়াময়, তেমনি রহস্যঘন।

—কল্যাণ নাকি!

—তাইত মনে হচ্ছে।

—বোধহেতে এসে পৌছান গেল।

খোলা দরজার কাছে কল্যাণ এসে দাঁড়াল।

—ভাই, পাইপটা—

—ভেরি সরি, মনে ছিল না।

—মালতী, আয়, অমন দাঁড়িয়ে রইলি কেন!

নিঃশব্দে মালতী কুপেতে উঠে অনুপমার পাশে বসল। শুষ্ক জ্বালাময় নয়ন অশ্রুতে ভরভর। ইচ্ছা করছিল, অনুপমার বুকে মুখ রেখে একটু কাঁদে; কিন্তু অনুপমার সাজসজ্জা, সহাস্যভাব দেখে অশ্রুসম্বরণ করে বসল। বেশীক্ষণ সে স্থির হয়ে বসে থাকতে পারল না।

তার বিপর্যাস্ত শুষ্ক কেশভারে অন্তপমা একটু আদরের সঙ্গে হাত বুলাতেই সে যেন ভেঙে পড়ল !

—ভাই অন্তদি !

—চলে গেল সময় !

—তোমায় কি কিছু বলে গেছে, কোথায় গেল ?

—সে কি নিজে জান, কোথায় যাবে !

—আমি ঘুমিয়ে পড়েছিলুম—

—আমিও ! স্বপ্ন দেখছিলুম গভীর বন, ফুল আর ফলে ভরা, একটি নদী বয়ে চলেছে, তার তীরে আমরা সবাই—

হঠাৎ অন্তপমা চমকে সোজা হয়ে বসল। গাড়ীর জানলা দিয়ে মুখ বাড়িয়ে অর্ন্তনাদের স্থরে বলে উঠল, ওকি ! ওকি ! ও কে ?

অদূরে প্ল্যাটফর্মে এক প্রোটের সাদাশালজড়ান নিষ্পন্দ দেহ ষ্টেচার-বাগীগণ বয়ে নিয়ে চলেছে, শনের মত সাদা চুল প্রভাতের আলোকে চক্চক্ করছে।

অন্তপমার পাংশুবর্ণ মুখের দিকে চেয়ে পাইপটা মুখ থেকে নামিয়ে কল্যাণ বল্লে, ও আমাদের গাড়ীর এক যাত্রী, রাত্রে কখন মরে গেছে কেউ জানে না, বোধে ষ্টেশনে যখন পৌঁছাল, দেখা গেল লোকটি আর উঠছে না। তবে সেই সন্ন্যাসী বোধ হয় জানতেন, কারণ তিনি ওই লোকটিকে বলে গেছিলেন সব ব্যবস্থা করতে—

আবেগের সঙ্গে অন্তপমা বল্লে, কাকে বলে গেছিলেন ?

কল্যাণ বীরে বল্লে, ওই যে পাগ্ ডি-পরা লোকটি যাচ্ছে, কোটিপতি ফতেচাঁদের নাম শুনেছ বোধ হয়—আর তার পাশে পাশে কোটপ্যান্ট পরে যে বাঙ্গালী ভদ্রলোকটি যাচ্ছে, সেও বহু লক্ষপতি—কিন্তু যার

মৃতদেহ তারা সম্মানে নিয়ে যাচ্ছে, সে রেলওয়ে আফিসের সামান্য কেরানী, টিকিট বিক্রী করে সারাজীবন কাটিয়ে দিলে—

বাধা দিয়ে অনুপমা বলে, চুপ করো! ওদের কথা আমি জানতে চাই না।

মুখ ফিরিয়ে অনুপমা অপরদিকের প্ল্যাটফর্মের দিকে চাইলে, শূণ্য প্ল্যাটফর্মের পর অন্ধকার দেওয়াল।

দীপিকা ছুটতে ছুটতে এসে গাড়ীর খোলা দরজার সামনে দাঁড়াল, হাঁপাতে হাঁপাতে বলে, রাঙামামা বাবা এসেছেন, মা আপনাকে ডাকছেন, আর পোকা—

বলতে বলতে সে থেমে গেল, বিশ্বয়মুগ্ধনেত্রে অনুপমার দিকে চেয়ে রইল। কানের হীরার ফুল কি সুন্দর! হাতের চুড়িগুলি কি ঝক্ ঝক্ করছে, নখগুলি লাল রঙ করা কেন!

পাইপটা মুখে তুলে কল্যাণ বলে, তা হলে, adieu, উঠুন, মালতী দেবী!

মালতী ধীরে উঠে বলে, তাহলে, এখন যাই ভাই অনুদি!

অনুপমা হেসে বলে উঠল, বলতে হয়, ‘আসি’। না, অত কাছে আসিস্ না, আমি যে রোগী, ভুলে যাস্ কেন!

কল্যাণ যেন চমকে অনুপমার দিকে চাইলে। গলাকাটা ব্লাউজের রঙীন লেসের ফাঁক দিয়ে যে সূচিকণ শুভ্র চর্মের আভা দেখা যায় তাহারি কোমল আবরণতলে বক্ষপঙ্ক্তরের মধ্যে দক্ষিণ ফুসফুসে জীবন-মৃত্যুর সংগ্রাম চলেছে, হৃদ-যন্ত্রের ধক্ধক্ শব্দে এখনও ধ্বনিত হচ্ছে, জয় জীবনের জয়।

—Au revoir!

পাইপ টানতে টানতে কল্যাণ চলে গেল।

তার পেছনে দীপিকার হাত ধরে মালতী চলে গেল।

ষ্ট্রেচার-বাহকগণ ভিড়ের মধ্যে মিলিয়ে গেছে।

ওই, দেবপ্রিয় বাবু ছুটতে ছুটতে চলে গেলেন।

চেয়ারে এলিয়ে বসে অন্তপমা কুশানে মাথা রেখে চোখ বুজলে।  
জগদীশ এখনও এল না।

চোখ বুজতেই, প্রথমে ঘন অন্ধকার, তারপর একটি আলোর শিখা জ্বলে উঠল। সে আলোক-রেখায় দেখা গেল, দুর্গম পর্বত-পথ, বিপুল অরণ্য ; বিপদ-সঙ্কুল পথে সন্ন্যাসী চলেছেন, তার পাশে সমর—অন্তপমা অন্তভব করতে চাইলে, সে-ও চলেছে তাদের সঙ্গে।

পাশের লাইনে একটা ইঞ্জিনের লাইন পারাপারের শব্দে সে ভয়ে শিউরে উঠে চাইলে। এক বৃহৎ কালো ইঞ্জিন-গাড়ী চলতে চলতে থেমে গেছে, আর যেন এগোতে পারছে না, চাকার একটা বিকট কর্কশধ্বনি হল, যেন চাকা ভেঙে গেল, ইঞ্জিন গতিহীন। বৃহৎ অনড় লৌহচক্রের দিকে অন্তপমা ভয়ে চাইলে, মনে হল সে চাকা যেন তার গলায় চেপে বৃকের ওপর থেমে গেছে, আর নড়ছে না। বৃকে কি ভারী বোঝা!

অন্তপমা মুখ ঢেকে চোখ বুজলে। অন্ধকার পর্দায় রঙীন স্বপ্নছবির স্রোত আর প্রবাহিত হল না।

তার মাথা টন্টন্ করতে লাগল। সে অন্তভব করলে, ট্রেন ছুটে চলেছে, অবিরাম ঘূর্ণ্যমান লৌহচক্রের ঘর্ষণধ্বনি বড় কর্কশ ; ছুটে চলেছে চঞ্চল যাত্রীদল, তাদের পদধ্বনি বড় ব্যথা-ভরা ; ছুটে চলেছে সৈন্যদল কামান-গাড়ী টানতে টানতে, তাদের অস্ত্রঝঙ্কন কি উন্মাদক ; অনন্তগগনে ছুটে চলেছে লক্ষ লক্ষ গ্রহতারকা, কি জ্যোতির্ময় এ

পথ ! এ অবিরাম গতিশ্রোতে স্থির বিন্দুর মত সে বসে । তার মাথা ঘুরছে যে !

ঠিক সেই সময় জগদীশ এসে না ডাকলে অনুপমা মূচ্ছিতা হয়ে পড়ত ।

উৎসাহের সঙ্গে জগদীশ বলে, ওগো ! শুনছ, হোটেলে যাওয়া নয়, সমুদ্রের ধারে এক সুন্দর বাড়ী পেয়েছি ।

অনুপমা ক্লান্ত চোখে চেয়ে বলে, আমার পাশে একটু বোস ।

বিস্ময়ের সঙ্গে জগদীশ বলে, না, না, এখন বসবার সময় নেই, ওঠো ! শরীর তোমার ভাল লাগছে না ?

অনুপমা ধীরে বলে, না, আমি ঠিক আছি । সমুদ্রতীর, সে বেশ সুন্দর হবে, বসে বসে ঢেউ গুনবো । চলো !

!

---











